

# 全 唐 诗

（第七部）

· 全唐诗 ·

## 第二百三十一卷

### 卷 231\_1 【宗武生日】

杜甫

小子何时见，高秋此日生。自从都邑语，已伴老夫名。  
诗是吾家事，人传世上情。熟精文选理，休觅彩衣轻。  
凋瘵筵初秩，欹斜坐不成。流霞分片片，涓滴就徐倾。

### 卷 231\_2 【又示宗武】

杜甫

觅句新知律，摊书解满床。试吟青玉案，莫羨紫罗囊。  
假日从时饮，明年共我长。应须饱经术，已似爱文章。  
十五男儿志，三千弟子行。曾参与游夏，达者得升堂。

### 卷 231\_3 【熟食日示宗文、宗武】

杜甫

· 全唐诗 ·

消渴游江汉，羈栖尚甲兵。几年逢熟食，万里逼清明。  
松柏邛山路，风花白帝城。汝曹催我老，回首泪纵横。

卷 231\_4【又示两儿】

杜甫

令节成吾老，他时见汝心。浮生看物变，为恨与年深。  
长葛书难得，江州涕不禁。团圆思弟妹，行坐白头吟。

卷 231\_5【社日两篇】

杜甫

九农成德业，百祀发光辉。报效神如在，馨香旧不违。  
南翁巴曲醉，北雁塞声微。尚想东方朔，诙谐割肉归。

陈平亦分肉，太史竟论功。今日江南老，他时渭北童。  
欢娱看绝塞，涕泪落秋风。鸳鹭回金阙，谁怜病峡中。

卷 231\_6【九日五首】

杜甫

· 全唐诗 ·

重阳独酌杯中酒，抱病起登江上台。竹叶于人既无分，  
菊花从此不须开。殊方日落玄猿哭，旧国霜前白雁来。  
弟妹萧条各何往，干戈衰谢两相催。

旧日重阳日，传杯不放杯。即今蓬鬓改，但愧菊花开。  
北阙心长恋，西江首独回。茱萸赐朝士，难得一枝来。

旧与苏司业，兼随郑广文。采花香泛泛，坐客醉纷纷。  
野树歌还倚，秋砧醒却闻。欢娱两冥漠，西北有孤云。  
故里樊川菊，登高素浣源。他时一笑后，今日几人存。  
巫峡蟠江路，终南对国门。系舟身万里，伏枕泪双痕。  
为客裁乌帽，从儿具绿尊。佳辰对群盗，愁绝更谁论。

卷 231\_7【九日诸人集于林】

杜甫

九日明朝是，相要旧俗非。老翁难早出，贤客幸知归。  
旧采黄花剩，新梳白发微。漫看年少乐，忍泪已沾衣。

卷 231\_8【大历二年九月三十日】

杜甫

为客无时了，悲秋向夕终。瘴馀夔子国，霜薄楚王宫。

· 全唐诗 ·

草敌虚岚翠，花禁冷叶红。年年小摇落，不与故园同。

卷 231\_9【十月一日】

杜甫

有瘴非全歇，为冬亦不难。夜郎溪日暖，白帝峡风寒。  
蒸裹如千室，焦糟幸一样。兹辰南国重，旧俗自相欢。

卷 231\_10【孟冬】

杜甫

殊俗还多事，方冬变所为。破甘霜落爪，尝稻雪翻匙。  
巫峡寒都薄，乌蛮瘴远随。终然减滩濑，暂喜息蛟螭。

卷 231\_11【冬至】

杜甫

年年至日长为客，忽忽穷愁泥杀人。江上形容吾独老，  
天边风俗自相亲。杖藜雪后临丹壑，鸣玉朝来散紫宸。  
心折此时无一寸，路迷何处见三秦。

· 全唐诗 ·

卷 231\_12 【小至】

杜甫

天时人事日相催，冬至阳生春又来。刺绣五纹添弱线，  
吹葭六琯动浮灰。岸容待腊将舒柳，山意冲寒欲放梅。  
云物不殊乡国异，教儿且覆掌中杯。

卷 231\_13 【览物（一作峡中览物）】

杜甫

曾为掾吏趋三辅，忆在潼关诗兴多。巫峡忽如瞻华岳，  
蜀江犹似见黄河。舟中得病移衾枕，洞口经春长薜萝。  
形胜有馀风土恶，几时回首一高歌。

卷 231\_14 【忆郑南玘】

杜甫

郑南伏毒寺，潇洒到江心。石影衔珠阁，泉声带玉琴。  
风杉曾曙倚，云峤忆春临。万里沧浪外，龙蛇只自深。

· 全唐诗 ·

卷 231\_15 【怀灞上游】

杜甫

怅望东陵道，平生灞上游。春浓停野骑，夜宿敞云楼。  
离别人谁在，经过老自休。眼前今古意，江汉一归舟。

卷 231\_16 【愁（强戏为吴体）】

杜甫

江草日日唤愁生，巫峡泠泠非世情。盘涡鹭浴底心性，  
独树花发自分明。十年戎马暗万国，异域宾客老孤城。  
渭水秦山得见否，人经罢病虎纵横。

卷 231\_17 【昼梦】

杜甫

二月饶睡昏昏然，不独夜短昼分眠。桃花气暖眼自醉，  
春渚日落梦相牵。故乡门巷荆棘底，中原君臣豺虎边。  
安得务农息战斗，普天无吏横索钱。

· 全唐诗 ·

卷 231\_18 【览镜呈柏中丞】

杜甫

渭水流关内，终南在日边。胆销豺虎窟，泪入犬羊天。  
起晚堪从事，行迟更学仙。镜中衰谢色，万一故人怜。

卷 231\_19 【即事】

杜甫

暮春三月巫峡长，晶晶行云浮日光。雷声忽送千峰雨，  
花气浑如百和香。黄莺过水翻回去，燕子衔泥湿不妨。  
飞阁卷帘图画里，虚无只少对潇湘。

卷 231\_20 【即事（一作天畔）】

杜甫

天畔群山孤草亭，江中风浪雨冥冥。一双白鱼不受钓，  
三寸黄甘犹自青。多病马卿无日起，穷途阮籍几时醒。  
未闻细柳散金甲，肠断秦川流浊泾。



· 全唐诗 ·

卷 231\_21 【闷】

杜甫

瘴疠浮三蜀，风云暗百蛮。卷帘唯白水，隐几亦青山。  
猿捷长难见，鸥轻故不还。无钱从滞客，有镜巧催颜。

卷 231\_22 【戏作俳谐体遣闷二首】

杜甫

异俗吁可怪，斯人难并居。家家养乌鬼，顿顿食黄鱼。  
旧识能为态，新知已暗疏。治生且耕凿，只有不关渠。

西历青羌坂，南留白帝城。於菟侵客恨，粃粒作人情。  
瓦卜传神语，畬田费火声。是非何处定，高枕笑浮生。

卷 231\_23 【得舍弟观书自中都已达江陵，今兹暮春月末，  
行李合到夔州，悲喜相兼，团圆可待，赋诗即事，情见乎词】

杜甫

尔到江陵府，何时到峡州。乱离生有别，聚集病应瘳。  
飒飒开啼眼，朝朝上水楼。老身须付托，白骨更何忧。

· 全唐诗 ·

卷 231\_24 【喜观即到，复题短篇二首】

杜甫

巫峡千山暗，终南万里春。病中吾见弟，书到汝为人。  
意答儿童问，来经战伐新。泊船悲喜后，款款话归秦。

待尔嗔乌鹊，抛书示鹄鷄。枝间喜不去，原上急曾经。  
江阁嫌津柳，风帆数驿亭。应论十年事，愁绝始星星。

卷 231\_25 【舍弟观归蓝田迎新妇，送示两篇】

杜甫

汝去迎妻子，高秋念却回。即今萤已乱，好与雁同来。  
东望西江水，南游北户开。卜居期静处，会有故人杯。

楚塞难为路，蓝田莫滞留。衣裳判白露，鞍马信清秋。  
满峡重江水，开帆八月舟。此时同一醉，应在仲宣楼。

卷 231\_26 【第五弟丰独在江左，近三四载寂无消息，觅使寄此二首】

杜甫

· 全唐诗 ·

乱后嗟吾在，羈栖见汝难。草黄骐驎病，沙晚鵲鷁寒。  
楚设关城险，吴吞水府宽。十年朝夕泪，衣袖不曾干。

闻汝依山寺，杭州定越州。风尘淹别日，江汉失清秋。  
影盖啼猿树，魂飘结蜃楼。明年下春水，东尽白云求。

卷 231\_27【舍弟观赴蓝田取妻子到江陵，喜寄三首】

杜甫

汝迎妻子达荆州，消息真传解我忧。鸿雁影来连峡内，  
鵲鷁飞急到沙头。峽关险路今虚远，禹凿寒江正稳流。  
朱绂即当随彩鹢，青春不假报黄牛。

马度秦关雪正深，北来肌骨苦寒侵。他乡就我生春色，  
故国移居见客心。剩欲提携如意舞，喜多行坐白头吟。  
巡檐索共梅花笑，冷蕊疏枝半不禁。

庾信罗含俱有宅，春来秋去作谁家。短墙若在从残草，  
乔木如存可假花。卜筑应同蒋诩径，为园须似邵平瓜。  
比年病酒开涓滴，弟劝兄酬何怨嗟。

卷 231\_28【江雨有怀郑典设】

杜甫

· 全唐诗 ·

春雨暗暗塞峡中，早晚来自楚王宫。乱波分披已打岸，  
弱云狼藉不禁风。宠光蕙叶与多碧，点注桃花舒小红。  
谷口子真正忆汝，岸高瀼滑限西东。

卷 231\_29【王十五前阁会】

杜甫

楚岸收新雨，春台引细风。情人来石上，鲜脍出江中。  
邻舍烦书札，肩舆强老翁。病身虚俊味，何幸饫儿童。

卷 231\_30【寄韦有夏郎中】

杜甫

省郎忧病士，书信有柴胡。饮子频通汗，怀君想报珠。  
亲知天畔少，药味峡中无。归楫生衣卧，春鸥洗翅呼。  
犹闻上急水，早作取平途。万里皇华使，为僚记腐儒。

卷 231\_31【陪柏中丞观宴将士二首】

杜甫

极乐三军士，谁知百战场。无私齐绮馔，久坐密金章。

· 全唐诗 ·

醉客沾鹦鹉，佳人指凤凰。几时来翠节，特地引红妆。  
绣段装檐额，金花帖鼓腰。一夫先舞剑，百戏后歌樵。  
江树城孤远，云台使寂寥。汉朝频选将，应拜霍嫖姚。

卷 231\_32【七月一日题终明府水楼二首】

杜甫

高栋曾轩已自凉，秋风此日洒衣裳。翛然欲下阴山雪，  
不去非无汉署香。绝辟过云开锦绣，疏松夹水奏笙簧。  
看君宜著王乔履，真赐还疑出尚方。

宓子弹琴邑宰日，终军弃繻英妙时。承家节操尚不泯，  
为政风流今在兹。可怜宾客尽倾盖，何处老翁来赋诗。  
楚江巫峡半云雨，清簟疏帘看弈棋。

卷 231\_33【季秋苏五弟缨江楼夜宴崔十三评事、韦少府侄三首】

杜甫

峡险江惊急，楼高月迥明。一时今夕会，万里故乡情。  
星落黄姑渚，秋辞白帝城。老人因酒病，坚坐看君倾。

明月生长好，浮云薄渐遮。悠悠照边塞，悄悄忆京华。

· 全唐诗 ·

清动杯中物，高随海上查。不眠瞻白兔，百过落乌纱。

对月那无酒，登楼况有江。听歌惊白鬓，笑舞拓秋窗。  
尊蚁添相续，沙鸥并一双。尽怜君醉倒，更觉片心降。

卷 231\_34【九月一日过孟十二仓曹、十四主簿兄弟】

杜甫

藜杖侵寒露，蓬门启曙烟。力稀经树歇，老困拨书眠。  
秋觉追随尽，来因孝友偏。清谈见滋味，尔辈可忘年。

卷 231\_35【过客相寻】

杜甫

穷老真无事，江山已定居。地幽忘盥栉，客至罢琴书。  
挂壁移筐果，呼儿问煮鱼。时闻系舟楫，及此问吾庐。

卷 231\_36【孟仓曹步趾领新酒酱二物满器见遗老夫】

杜甫

楚岸通秋屐，胡床面夕畦。藉糟分汁滓，瓮酱落提携。

· 全唐诗 ·

饭粝添香味，朋来有醉泥。理生那免俗，方法报山妻。

卷 231\_37 【柳司马至】

杜甫

有使归三峡，相过问两京。函关犹出将，渭水更屯兵。  
设备邯郸道，和亲逻些城。幽燕唯鸟去，商洛少人行。  
衰谢身何补，萧条病转婴。霜天到宫阙，恋主寸心明。

卷 231\_38 【简吴郎司法】

杜甫

有客乘舸自忠州，遣骑安置瀼西头。古堂本买藉疏豁，  
借汝迁居停宴游。云石茺茺高叶曙，风江飒飒乱帆秋。  
却为姻娅过逢地，许坐曾轩数散愁。

卷 231\_39 【又呈吴郎】

杜甫

堂前扑枣任西邻，无食无儿一妇人。不为困穷宁有此，  
只缘恐惧转须亲。即防远客虽多事，使插疏篱却甚真。

· 全唐诗 ·

已诉征求贫到骨，正思戎马泪盈巾。

卷 231\_40 【覃山人隐居】

杜甫

南极老人自有星，北山移文谁勒铭。征君已去独松菊，  
哀壑无光留户庭。予见乱离不得已，子知出处必须经。  
高车驷马带倾覆，怅望秋天虚翠屏。

卷 231\_41 【柏学士茅屋】

杜甫

碧山学士焚银鱼，白马却走身岩居。古人已用三冬足，  
年少今开万卷馀。晴云满户团倾盖，秋水浮阶溜决渠。  
富贵必从勤苦得，男儿须读五车书。

卷 231\_42 【题柏大兄弟山居屋壁二首】

杜甫

叔父朱门贵，郎君玉树高。山居精典籍，文雅涉风骚。  
江汉终吾老，云林得尔曹。哀弦绕白雪，未与俗人操。



· 全唐诗 ·

野屋流寒水，山篱带薄云。静应连虎穴，喧已去人群。  
笔架沾窗雨，书签映隙曛。萧萧千里足，个个五花文。

卷 231\_43【戏寄崔评事表侄、苏五表弟、韦大少府诸侄】

杜甫

隐豹深愁雨，潜龙故起云。泥多仍径曲，心醉阻贤群。  
忍待江山丽，还披鲍谢文。高楼忆疏豁，秋兴坐氛氲。

卷 231\_44【秋日寄题郑监湖上亭三首】

杜甫

碧草逢春意，沅湘万里秋。池要山简马，月净庾公楼。  
磨灭馀篇翰，平生一钓舟。高唐寒浪减，仿佛识昭丘。

新作湖边宅，远闻宾客过。自须开竹径，谁道避云萝。  
官序潘生拙，才名贾傅多。舍舟应转地，邻接意如何。

暂阻蓬莱阁，终为江海人。挥金应物理，拖玉岂吾身。  
羹煮秋菰滑，杯迎露菊新。赋诗分气象，佳句莫频频。

· 全唐诗 ·

卷 231\_45 【谒真谛寺禅师】

杜甫

兰若山高处，烟霞嶂几重。冻泉依细石，晴雪落长松。  
问法看诗忘，观身向酒慵。未能割妻子，卜宅近前峰。

卷 231\_46 【别崔溟因寄薛据、孟云卿（内弟溟赴湖南幕职）】

杜甫

志士惜妄动，知深难固辞。如何久磨砺，但取不磷缁。  
夙夜听忧主，飞腾急济时。荆州过薛孟，为报欲论诗。

卷 231\_47 【送李八秘书赴杜相公幕】

杜甫

青帘白舫益州来，巫峡秋涛天地回。石出倒听枫叶下，  
橹摇背指菊花开。贪趋相府今晨发，恐失佳期后命催。  
南极一星朝北斗，五云多处是三台。

卷 231\_48 【巫峡敝庐奉赠侍御四舅别之澧朗】

· 全唐诗 ·

杜甫

江城秋日落，山鬼闭门中。行李淹吾舅，诛茅问老翁。  
赤眉犹世乱，青眼只途穷。传语桃源客，人今出处同。

卷 231\_49【奉送十七舅下邵桂】

杜甫

绝域三冬暮，浮生一病身。感深辞舅氏，别后见何人。  
缥缈苍梧帝，推迁孟母邻。昏昏阻云水，侧望苦伤神。

卷 231\_50【送覃二判官】

杜甫

先帝弓剑远，小臣馀此生。蹉跎病江汉，不复谒承明。  
钱尔白头日，永怀丹凤城。迟迟恋屈宋，渺渺卧荆衡。  
魂断航舸失，天寒沙水清。肺肝若稍愈，亦上赤霄行。

卷 231\_51【季夏送乡弟韶陪黄门从叔朝谒】

杜甫

· 全唐诗 ·

令弟尚为苍水使，名家莫出杜陵人。比来相国兼安蜀，  
归赴朝廷已入秦。舍舟策马论兵地，拖玉腰金报主身。  
莫度清秋吟蟋蟀，早闻黄阁画麒麟。

卷 231\_52【送十五弟侍御使蜀】

杜甫

喜弟文章进，添余别兴牵。数杯巫峡酒，百丈内江船。  
未息豺狼斗，空催犬马年。归朝多便道，搏击望秋天。

卷 231\_53【送田四弟将军将夔州柏中丞命，起居江陵节度  
阳诚郡王卫公幕】

杜甫

离筵罢多酒，起地发寒塘。回首中丞座，驰笈异姓王。  
燕辞枫树日，雁度麦城霜。空醉山翁酒，遥怜似葛强。

卷 231\_54【送王十六判官】

杜甫

客下荆南尽，君今复入舟。买薪犹白帝，鸣橹少沙头。

· 全唐诗 ·

衡霍生春早，潇湘共海浮。荒林庾信宅，为仗主人留。

卷 231\_55【奉送卿二翁统节度镇军还江陵】

杜甫

火旗还锦缆，白马出江城。嘹唳吟笳发，萧条别浦清。  
寒空巫峡曙，落日渭阳明。留滞嗟衰疾，何时见息兵。

卷 231\_56【送鲜于万州迁巴州（鲜于灵乃仲通子，有父风）】

杜甫

京兆先时杰，琳琅照一门。朝廷偏注意，接近与名藩。  
祖帐排舟数，寒江触石喧。看君妙为政，他日有殊恩。

卷 231\_57【寄杜位（顷者与位同在故严尚书幕）】

杜甫

寒日经檐短，穷猿失木悲。峡中为客恨，江上忆君时。  
天地身何在，风尘病敢辞。封书两行泪，沾洒裯新诗。

· 全唐诗 ·

卷 231\_58【奉寄李十五秘书二首】

杜甫

避暑云安县，秋风早下来。暂留鱼复浦，同过楚王台。  
猿鸟千崖窄，江湖万里开。竹枝歌未好，画舸莫迟回。

行李千金赠，衣冠八尺身。飞腾知有策，意度不无神。  
班秩兼通贵，公侯出异人。玄成负文彩，世业岂沉沦。

卷 231\_59【奉送韦中丞之晋赴湖南】

杜甫

宠渥征黄渐，权宜借寇频。湖南安背水，峡内忆行春。  
王室仍多故，苍生倚大臣。还将徐孺子，处处待高人。

卷 231\_60【送李功曹之荆州充郑侍御判官重赠】

杜甫

曾闻宋玉宅，每欲到荆州。此地生涯晚，遥悲水国秋。  
孤城一柱观，落日九江流。使者虽光彩，青枫远自愁。

· 全唐诗 ·

卷 231\_61【送孟十二仓曹赴东京选】

杜甫

君行别老亲，此去苦家贫。藻镜留连客，江山憔悴人。  
秋风楚竹冷，夜雪巩梅春。朝夕高堂念，应宜彩服新。

卷 231\_62【凭孟仓曹将书觅土娄旧庄】

杜甫

平居丧乱后，不到洛阳岑。为历云山问，无辞荆棘深。  
北风黄叶下，南浦白头吟。十载江湖客，茫茫迟暮心。

卷 231\_63【别苏溪（赴湖南幕）】

杜甫

故人有游子，弃掷傍天隅。他日怜才命，居然屈壮图。  
十年犹塌翼，绝倒为惊吁。消渴今如在，提携愧老夫。  
岂知台阁旧，先拂凤凰雏。得实翻苍竹，栖枝把翠梧。  
北辰当宇宙，南岳据江湖。国带风尘色，兵张虎豹符。  
数论封内事，挥发府中趋。赠尔秦人策，莫鞭辕下驹。

· 全唐诗 ·

卷 231\_64 【存歿口号二首】

杜甫

席谦不见近弹棋，毕曜仍传旧小诗。  
玉局他年无限笑，白杨今日几人悲。

郑公粉绘随长夜，曹霸丹青已白头。  
天下何曾有山水，人间不解重骅骝。

卷 231\_65 【奉汉中王手札报韦侍御、萧尊师亡】

杜甫

秋日萧韦逝，淮王报峡中。少年疑柱史，多术怪仙公。  
不但时人惜，只应吾道穷。一哀侵疾病，相识自儿童。  
处处邻家笛，飘飘客子蓬。强吟怀旧赋，已作白头翁。

卷 231\_66 【哭王彭州抡】

杜甫

执友惊沦没，斯人已寂寥。新文生沈谢，异骨降松乔。  
北部初高选，东堂早见招。蛟龙缠倚剑，鸾凤夹吹箫。



· 全唐诗 ·

历职汉庭久，中年胡马骄。兵戈闇两观，宠辱事三朝。  
蜀路江干窄，彭门地里遥。解龟生碧草，谏猎阻清霄。  
顷壮戎麾出，叨陪幕府要。将军临气候，猛士塞风飙。  
井漏泉谁汲，烽疏火不烧。前筹自多暇，隐几接终朝。  
翠石俄双表，寒松竟后凋。赠诗焉敢坠，染翰欲无聊。  
再哭经过罢，离魂去住销。之官方玉折，寄葬与萍漂。  
旷望渥洼道，霏微河汉桥。夫人先即世，令子各清标。  
巫峡长云雨，秦城近斗杓。冯唐毛发白，归兴日萧萧。

卷 231\_67【见萤火】

杜甫

巫山秋夜萤火飞，帘疏巧入坐人衣。忽惊屋里琴书冷，  
复乱檐边星宿稀。却绕井阑添个个，偶经花蕊弄辉辉。  
沧江白发愁看汝，来岁如今归未归。

卷 231\_68【吹笛】

杜甫

吹笛秋山风月清，谁家巧作断肠声。风飘律吕相和切，  
月傍关山几处明。胡骑中宵堪北走，武陵一曲想南征。  
故园杨柳今摇落，何得愁中曲尽生。

· 全唐诗 ·

卷 231\_69【孤雁（一作后飞雁）】

杜甫

孤雁不饮啄，飞鸣声念群。谁怜一片影，相失万重云。  
望尽似犹见，哀多如更闻。野鸦无意绪，鸣噪自纷纷。

卷 231\_70【鸥】

杜甫

江浦寒鸥戏，无他亦自饶。却思翻玉羽，随意点春苗。  
雪暗还须浴，风生一任飘。几群沧海上，清影日萧萧。

卷 231\_71【猿】

杜甫

袅袅啼虚壁，萧萧挂冷枝。艰难人不见，隐见尔如知。  
惯习元从众，全生或用奇。前林腾每及，父子莫相离。

卷 231\_72【黄鱼】

· 全唐诗 ·

杜甫

日见巴东峡，黄鱼出浪新。脂膏兼饲犬，长大不容身。  
筒桶相沿久，风雷肯为神。泥沙卷涎沫，回首怪龙鳞。

卷 231\_73【白小】

杜甫

白小群分命，天然二寸鱼。细微沾水族，风俗当园蔬。  
入肆银花乱，倾箱雪片虚。生成犹拾卵，尽取义何如。

卷 231\_74【麕】

杜甫

永与清溪别，蒙将玉饌俱。无才逐仙隐，不敢恨庖厨。  
乱世轻全物，微声及祸枢。衣冠兼盗贼，饕餮用斯须。

卷 231\_75【鸡】

杜甫

纪德名标五，初鸣度必三。殊方听有异，失次晓无惭。

· 全唐诗 ·

问俗人情似，充庖尔辈堪。气交亭育际，巫峡漏司南。

卷 231\_76【玉腕骝（江陵节度卫公马也）】

杜甫

闻说荆南马，尚书玉腕骝。顿骖飘赤汗，踟蹰顾长楸。  
胡虏三年入，乾坤一战收。举鞭如有问，欲伴习池游。

卷 231\_77【见王监兵马使说，近山有白黑二鹰，罗者久取，  
竟未能得，王以毛骨有异他鹰，恐腊后春生骞飞避暖，劲翮思  
秋之甚，请余赋诗】

杜甫

雪飞玉立尽清秋，不惜奇毛恣远游。在野只教心力破，  
千人何事网罗求。一生自猎知无敌，百中争能耻下鞲。  
鹏碍九天须却避，兔藏三穴莫深忧。

黑鹰不省人间有，度海疑从北极来。正翮抟风超紫塞，  
立冬几夜宿阳台。虞罗自各虚施巧，春雁同归必见猜。  
万里寒空只一日，金眸玉爪不凡材。

· 全唐诗 ·

## 第二百三十二卷

### 卷 232\_1【太岁日】

杜甫

楚岸行将老，巫山坐复春。病多犹是客，谋拙竟何人。  
阊阖开黄道，衣冠拜紫宸。荣光悬日月，赐与出金银。  
愁寂鸳行断，参差虎穴邻。西江元下蜀，北斗故临秦。  
散地逾高枕，生涯脱要津。天边梅柳树，相见几回新。

### 卷 232\_2【元日示宗武】

杜甫

汝啼吾手战，吾笑汝身长。处处逢正月，迢迢滞远方。  
飘零还柏酒，衰病只藜床。训喻青衿子，名惭白首郎。  
赋诗犹落笔，献寿更称觞。不见江东弟，高歌泪数行。

### 卷 232\_3【远怀舍弟颖、观等】

· 全唐诗 ·

杜甫

阳翟空知处，荆南近得书。积年仍远别，多难不安居。  
江汉春风起，冰霜昨夜除。云天犹错莫，花萼尚萧疏。  
对酒都疑梦，吟诗正忆渠。旧时元日会，乡党羨吾庐。

卷 232\_4【续得观书，迎就当阳居止，正月中旬定出三峡】

杜甫

自汝到荆府，书来数唤吾。颂椒添讽咏，禁火卜欢娱。  
舟楫因人动，形骸用杖扶。天旋夔子国，春近岳阳湖。  
发日排南喜，伤神散北吁。飞鸣还接翅，行序密衔芦。  
俗薄江山好，时危草木苏。冯唐虽晚达，终凯在皇都。

卷 232\_5【将别巫峡，赠南卿兄襄西果园四十亩】

杜甫

苔竹素所好，萍蓬无定居。远游长儿子，几地别林庐。  
杂蕊红相对，他时锦不如。具舟将出峡，巡圃念携锄。  
正月喧莺末，兹辰放鹧初。雪篱梅可折，风榭柳微舒。  
托赠卿家有，因歌野兴疏。残生逗江汉，何处狎樵渔。

· 全唐诗 ·

卷 232\_6【送大理封主簿五郎亲事不合却赴通州，主簿前  
阆州贤子，余与主簿平章郑氏女字垂欲纳】

杜甫

禁脔去东床，趋庭赴北堂。风波空远涉，琴瑟几虚张。  
渥水出骐驎，昆山生凤凰。两家诚款款，中道许苍苍。  
颇谓秦晋匹，从来王谢郎。青春动才调，白首缺辉光。  
玉润终孤立，珠明得暗藏。馀寒折花卉，恨别满江乡。

卷 232\_7【人日两篇】

杜甫

元日到人日，未有不阴时。冰雪莺难至，春寒花较迟。  
云随白水落，风振紫山悲。蓬鬓稀疏久，无劳比素丝。

此日此时人共得，一谈一笑俗相看。尊前柏叶休随酒，  
胜里金花巧耐寒。佩剑冲星聊暂拔，匣琴流水自须弹。  
早春重引江湖兴，直道无忧行路难。

卷 232\_8【江梅】

杜甫

· 全唐诗 ·

梅蕊腊前破，梅花年后多。绝知春意好，最奈客愁何。  
雪树元同色，江风亦自波。故园不可见，巫岫郁嵯峨。

卷 232\_9【庭草】

杜甫

楚草经寒碧，逢春入眼浓。旧低收叶举，新掩卷牙重。  
步履宜轻过，开筵得屡供。看花随节序，不敢强为容。

卷 232\_10【大历三年春，城放船出瞿塘峡，久居夔府，将适江陵，漂泊有诗凡四十韵】

杜甫

老向巴人里，今辞楚塞隅。入舟翻不乐，解缆独长吁。  
窄转深啼狖，虚随乱浴凫。石苔凌几杖，空翠扑肌肤。  
叠壁排霜剑，奔泉溅水珠。杳冥藤上下，浓澹树荣枯。  
神女峰娟妙，昭君宅有无。曲留明怨惜，梦尽失欢娱。  
摆阖盘涡沸，欹斜激浪输。风雷缠地脉，冰雪耀天衢。  
鹿角真走险，狼头如跋胡。恶滩宁变色，高卧负微躯。  
书史全倾挠，装囊半压濡。生涯临臬兀，死地脱斯须。  
不有平川决，焉知众壑趋。乾坤霾涨海，雨露洗春芜。  
鸥鸟牵丝飏，骊龙濯锦纡。落霞沉绿绮，残月坏金枢。  
泥笋苞初荻，沙茸出小蒲。雁儿争水马，燕子逐樯乌。



· 全唐诗 ·

绝岛容烟雾，环洲纳晓晡。前闻辨陶牧，转眄拂宜都。  
县郭南畿好，津亭北望孤。劳心依憩息，朗咏划昭苏。  
意遣乐还笑，衰迷贤与愚。飘萧将素发，汨没听洪炉。  
丘壑曾忘返，文章敢自诬。此生遭圣代，谁分哭穷途。  
卧疾淹为客，蒙恩早厕儒。廷争酬造化，朴直乞江湖。  
滟潏险相迫，沧浪深可逾。浮名寻已已，懒计却区区。  
喜近天皇寺，先披古画图。应经帝子渚，同泣舜苍梧。  
朝士兼戎服，君王按湛卢。旄头初偃扰，鹑首丽泥涂。  
甲卒身虽贵，书生道固殊。出尘皆野鹤，历块匪辕驹。  
伊吕终难降，韩彭不易呼。五云高太甲，六月旷桀扶。  
回首黎元病，争权将帅诛。山林托疲沓，未必免崎岖。

卷 232\_11 【巫山县汾州唐使君十八弟宴别，兼诸公携酒乐相送，率题小诗，留于屋壁】

杜甫

卧病巴东久，今年强作归。故人犹远谪，兹日倍多违。  
接宴身兼杖，听歌泪满衣。诸公不相弃，拥别惜光辉。

卷 232\_12 【春夜峡州田侍御长史津亭留宴（得筵字）】

杜甫

北斗三更席，西江万里船。杖藜登水榭，挥翰宿春天。

· 全唐诗 ·

白发烦多酒，明星惜此筵。始知云雨峡，忽尽下牢边。

卷 232\_13【泊松滋江亭】

杜甫

沙帽随鸥鸟，扁舟系此亭。江湖深更白，松竹远微青。  
一柱全应近，高唐莫再经。今宵南极外，甘作老人星。

卷 232\_14【行次古城店泛江作，不揆鄙拙，奉呈江陵幕府诸公】

杜甫

老年常道路，迟日复山川。白屋花开里，孤城麦秀边。  
济江元自阔，下水不劳牵。风蝶勤依桨，春鸥懒避船。  
王门高德业，幕府盛才贤。行色兼多病，苍茫泛爱前。

卷 232\_15【乘雨入行军六弟宅】

杜甫

曙角凌云罢，春城带雨长。水花分堞弱，巢燕得泥忙。  
令弟雄军佐，凡才污省郎。萍漂忍流涕，衰飒近中堂。

· 全唐诗 ·

卷 232\_16 【宴胡侍御书堂（李尚书之芳、郑秘监审同集归字韵）】

杜甫

江湖春欲暮，墙宇日犹微。暗暗春籍满，轻轻花絮飞。  
翰林名有素，墨客兴无违。今夜文星动，吾侪醉不归。

卷 232\_17 【书堂饮既，夜复邀李尚书下马，月下赋绝句】

杜甫

湖水林风相与清，残尊下马复同倾。  
久判野鹤如霜鬓，遮莫邻鸡下五更。

卷 232\_18 【上巳日徐司录林园宴集】

杜甫

鬓毛垂领白，花蕊亚枝红。欹倒衰年废，招寻令节同。  
薄衣临积水，吹面受和风。有喜留攀桂，无劳问转蓬。

卷 232\_19 【奉送苏州李二十五长史丈之任】

· 全唐诗 ·

杜甫

星坼台衡地，曾为人所怜。公侯终必复，经术昔相传。  
食德见从事，克家何妙年。一毛生凤穴，三尺献龙泉。  
赤壁浮春暮，姑苏落海边。客间头最白，惆怅此离筵。

卷 232\_20 【暮春江陵送马大卿公，恩命追赴阙下】

杜甫

自古求忠孝，名家信有之。吾贤富才术，此道未磷缁。  
玉府标孤映，霜蹄去不疑。激扬音韵彻，籍甚众多推。  
潘陆应同调，孙吴亦异时。北辰征事业，南纪赴恩私。  
卿月升金掌，王春度玉墀。熏风行应律，湛露即歌诗。  
天意高难问，人情老易悲。尊前江汉阔，后会且深期。

卷 232\_21 【暮春陪李尚书、李中丞过郑监湖亭泛舟（得中字韵）】

杜甫

海内文章伯，湖边意绪多。玉尊移晚兴，桂楫带酣歌。  
春日繁鱼鸟，江天足芰荷。郑庄宾客地，衰白远来过。

· 全唐诗 ·

卷 232\_22 【奉送蜀州柏二别驾将中丞命赴江陵，起居卫尚书太夫人，因示从弟行军司马佐】

杜甫

中丞问俗画熊频，爱弟传书彩鹢新。迁转五州防御使，  
起居八座太夫人。楚宫腊送荆门水，白帝云偷碧海春。  
报与惠连诗不惜，知吾斑鬓总如银。

卷 232\_23 【夏日杨长宁宅送崔侍御、常正字入京（得深字韵）】

杜甫

醉酒扬雄宅，升堂子贱琴。不堪垂老鬓，还对欲分襟。  
天地西江远，星辰北斗深。乌台俯麟阁，长夏白头吟。

卷 232\_24 【和江陵宋大少府暮春雨后同诸公及舍弟宴书斋】

杜甫

渥洼汗血种，天上麒麟儿。才士得神秀，书斋闻尔为。  
棣华晴雨好，彩服暮春宜。朋酒日欢会，老夫今始知。

· 全唐诗 ·

卷 232\_25 【宇文晁尚书之甥崔彧司业之孙尚书之子重泛郑监前湖】

杜甫

郊扉俗远长幽寂，野水春来更接连。锦席淹留还出浦，  
葛巾欹侧未回船。尊当霞绮轻初散，棹拂荷珠碎却圆。  
不但习池归酩酊，君看郑谷去夤缘。

卷 232\_26 【多病执热奉怀李尚书（之芳）】

杜甫

衰年正苦病侵袭，首夏何须气郁蒸。大水淼茫炎海接，  
奇峰突兀火云升。思沾道暍黄梅雨，敢望宫恩玉井冰。  
不是尚书期不顾，山阴野雪兴难乘。

卷 232\_27 【水宿遣兴奉呈群公】

杜甫

鲁钝乃多病，逢迎远复迷。耳聋须画字，发短不胜篦。  
泽国虽勤雨，炎天竟浅泥。小江还积浪，弱缆且长堤。  
归路非关北，行舟却向西。暮年漂泊恨，今夕乱离啼。

· 全唐诗 ·

童稚频书札，盘餐讵糝藜。我行何到此，物理直难齐。  
高枕翻星月，严城叠鼓鼙。风号闻虎豹，水宿伴鳬鹭。  
异县惊虚往，同人惜解携。蹉跎长泛鹢，展转屡鸣鸡。  
嶷嶷瑚琏器，阴阴桃李蹊。馀波期救涸，费日苦轻赍。  
支策门阑邃，肩舆羽翮低。自伤甘贱役，谁愍强幽栖。  
巨海能无钓，浮云亦有梯。勋庸思树立，语默可端倪。  
赠粟困应指，登桥柱必题。丹心老未折，时访武陵溪。

卷 232\_28【奉贺阳城郡王太夫人恩命加邓国太夫人】

杜甫

卫幕衔恩重，潘舆送喜频。济时瞻上将，锡号戴慈亲。  
富贵当如此，尊荣迈等伦。郡依封土旧，国与大名新。  
紫诰鸾回纸，清朝燕贺人。远传冬笋味，更觉彩衣春。  
奕叶班姑史，芬芳孟母邻。义方兼有训，词翰两如神。  
委曲承颜体，鸞飞报主身。可怜忠与孝，双美画麒麟。

卷 232\_29【江陵望幸】

杜甫

雄都元壮丽，望幸歎威神。地利西通蜀，天文北照秦。  
风烟含越鸟，舟楫控吴人。未枉周王驾，终期汉武帝。  
甲兵分圣旨，居守付宗臣。早发云台仗，恩波起涸鳞。

· 全唐诗 ·

卷 232\_30【江边星月二首】

杜甫

骤雨清秋夜，金波耿玉绳。天河元自白，江浦向来澄。  
映物连珠断，缘空一镜升。馀光隐更漏，况乃露华凝。

江月辞风缆，江星别雾船。鸡鸣还曙色，鹭浴自清川。  
历历竟谁种，悠悠何处圆。客愁殊未已，他夕始相鲜。

卷 232\_31【舟月对驿近寺】

杜甫

更深不假烛，月朗自明船。金刹青枫外，朱楼白水边。  
城乌啼眇眇，野鹭宿娟娟。皓首江湖客，钩帘独未眠。

卷 232\_32【舟中】

杜甫

风餐江柳下，雨卧驿楼边。结缆排鱼网，连樯并米船。  
今朝云细薄，昨夜月清圆。飘泊南庭老，只应学水仙。



· 全唐诗 ·

卷 232\_33 【遣闷】

杜甫

地阔平沙岸，舟虚小洞房。使尘来驿道，城日避乌樯。  
暑雨留蒸湿，江风借夕凉。行云星隐见，叠浪月光芒。  
萤鉴缘帷彻，蛛丝冒鬓长。哀筝犹凭几，鸣笛竟沾裳。  
倚著如秦赘，过逢类楚狂。气冲看剑匣，颖脱抚锥囊。  
妖孽关东臭，兵戈陇右创。时清疑武略，世乱踣文场。  
馀力浮于海，端忧问彼苍。百年从万事，故国耿难忘。

卷 232\_34 【江陵节度阳城郡王新楼成王请严侍御判官赋七  
字句同作】

杜甫

楼上炎天冰雪生，高飞燕雀贺新成。碧窗宿雾濛濛湿，  
朱戟浮云细细轻。杖钺褰帷瞻具美，投壶散帙有馀清。  
自公多暇延参佐，江汉风流万古情。

卷 232\_35 【又作此奉卫王】

杜甫

· 全唐诗 ·

西北楼成雄楚都，远开山岳散江湖。二仪清浊还高下，  
三伏炎蒸定有无。推轂几年唯镇静，曳裾终日盛文儒。  
白头授简焉能赋，愧似相如为大夫。

卷 232\_36【舟出江陵南浦，奉寄郑少尹（审）】

杜甫

更欲投何处，飘然去此都。形骸元土木，舟楫复江湖。  
社稷缠妖气，干戈送老儒。百年同弃物，万国尽穷途。  
雨洗平沙静，天衔阔岸纡。鸣蜩随泛梗，别燕赴秋菰。  
栖托难高卧，饥寒迫向隅。寂寥相煦沫，浩荡报恩珠。  
溟涨鲸波动，衡阳雁影徂。南征问悬榻，东逝想乘桴。  
滥窃商歌听，时忧卞泣诛。经过忆郑驿，斟酌旅情孤。

卷 232\_37【江南逢李龟年】

杜甫

岐王宅里寻常见，崔九堂前几度闻。  
正是江南好风景，落花时节又逢君。

卷 232\_38【官亭夕坐戏简颜十少府】

· 全唐诗 ·

杜甫

南国调寒杵，西江浸日车。客愁连蟋蟀，亭古带蒹葭。  
不返青丝鞚，虚烧夜烛花。老翁须地主，细细酌流霞。

卷 232\_39【秋日荆南述怀三十韵】

杜甫

昔承推奖分，愧匪挺生材。迟暮官臣忝，艰危袞职陪。  
扬镳随日驭，折槛出云台。罪戾宽犹活，干戈塞未开。  
星霜玄鸟变，身世白驹催。伏枕因超忽，扁舟任往来。  
九钻巴巘火，三蛰楚祠雷。望帝传应实，昭王问不回。  
蛟螭深作横，豺虎乱雄猜。素业行已矣，浮名安在哉。  
琴乌曲怨愤，庭鹤舞摧颓。秋雨漫湘水，阴风过岭梅。  
苦摇求食尾，常曝报恩腮。结舌防谗柄，探肠有祸胎。  
苍茫步兵哭，展转仲宣哀。饥籍家家米，愁征处处杯。  
休为贫士叹，任受众人咍。得丧初难识，荣枯划易该。  
差池分组冕，合沓起蒿莱。不必伊周地，皆知屈宋才。  
汉庭和异域，晋史坼中台。霸业寻常体，忠臣忌讳灾。  
群公纷戮力，圣虑窅裴回。数见铭钟鼎，真宜法斗魁。  
愿闻锋镝铸，莫使栋梁摧。盘石圭多翦，凶门毂少推。  
垂旒资穆穆，祝网但恢恢。赤雀翻然至，黄龙讵假媒。  
贤非梦傅野，隐类凿颜坯。自古江湖客，冥心若死灰。

· 全唐诗 ·

卷 232\_40 【秋日荆南送石首薛明府辞满告别奉寄薛尚书颂德舒怀斐然之作三十韵】

杜甫

南征为客久，西候别君初。岁满归鳧舄，秋来把雁书。  
荆门留美化，姜被就离居。闻道和亲入，垂名报国馀。  
连枝不日并，八座几时除。往者胡星孛，恭惟汉网疏。  
风尘相澆洞，天地一丘墟。殿瓦鸳鸯坼，宫帘翡翠虚。  
钩陈摧傲道，枪纍失储胥。文物陪巡守，亲贤病拮据。  
公时呵猘獠，首唱却鲸鱼。势愜宗萧相，材非一范睢。  
尸填太行道，血走浚仪渠。滏口师仍会，函关愤已摅。  
紫微临大角，皇极正乘舆。赏从频峨冕，殊私再直庐。  
岂惟高卫霍，曾是接应徐。降集翻翔凤，追攀绝众狙。  
侍臣双宋玉，战策两穰苴。鉴澈劳悬镜，荒芜已荷锄。  
向来披述作，重此忆吹嘘。白发甘凋丧，青云亦卷舒。  
经纶功不朽，跋涉体何如。应讶耽湖橘，常餐占野蔬。  
十年婴药饵，万里狎樵渔。扬子淹投阁，邹生惜曳裾。  
但惊飞熠耀，不记改蟾蜍。烟雨封巫峡，江淮略孟诸。  
汤池虽险固，辽海尚填淤。努力输肝胆，休烦独起予。

卷 232\_41 【哭李尚书（之芳）】

杜甫

· 全唐诗 ·

漳滨与蒿里，逝水竟同年。欲挂留徐剑，犹回忆戴船。  
相知成白首，此别间黄泉。风雨嗟何及，江湖涕泫然。  
修文将管辂，奉使失张骞。史阁行人在，诗家秀句传。  
客亭鞍马绝，旅棹网虫悬。复魄昭丘远，归魂素浐偏。  
樵苏封葬地，喉舌罢朝天。秋色凋春草，王孙若个边。

卷 232\_42【重题】

杜甫

涕泗不能收，哭君余白头。儿童相识尽，宇宙此生浮。  
江雨铭旌湿，湖风井径秋。还瞻魏太子，宾客减应刘。

卷 232\_43【独坐】

杜甫

悲愁回白首，倚杖背孤城。江敛洲渚出，天虚风物清。  
沧溟服衰谢，朱绂负平生。仰羨黄昏鸟，投林羽翮轻。

卷 232\_44【暮归】

杜甫

· 全唐诗 ·

霜黄碧梧白鹤栖，城上击柝复乌啼。客子入门月皎皎，  
谁家捣练风凄凄。南渡桂水阙舟楫，北归秦川多鼓鼙。  
年过半百不称意，明日看云还杖藜。

卷 232\_45【移居公安敬赠卫大郎钧】

杜甫

卫侯不易得，余病汝知之。雅量涵高远，清襟照等夷。  
平生感意气，少小爱文辞。河海由来合，风云若有期。  
形容劳宇宙，质朴谢轩墀。自古幽人泣，流年壮士悲。  
水烟通径草，秋露接园葵。入邑豺狼斗，伤弓鸟雀饥。  
白头供宴语，乌几伴栖迟。交态遭轻薄，今朝豁所思。

卷 232\_46【公安送韦二少府匡赞】

杜甫

逍遥公后世多贤，送尔维舟惜此筵。念我能书数字至，  
将诗不必万人传。时危兵甲黄尘里，日短江湖白发前。  
古往今来皆涕泪，断肠分手各风烟。

卷 232\_47【赠虞十五司马】

· 全唐诗 ·

杜甫

远师虞秘监，今喜识玄孙。形像丹青逼，家声器宇存。  
凄凉怜笔势，浩荡问词源。爽气金天豁，清谈玉露繁。  
伫鸣南岳凤，欲化北溟鲲。交态知浮俗，儒流不异门。  
过逢联客位，日夜倒芳尊。沙岸风吹叶，云江月上轩。  
百年嗟已半，四座敢辞喧。书籍终相与，青山隔故园。

卷 232\_48【公安县怀古】

杜甫

野旷吕蒙营，江深刘备城。寒天催日短，风浪与云平。  
洒落君臣契，飞腾战伐名。维舟倚前浦，长啸一含情。

卷 232\_49【公安送李二十九弟晋肃入蜀，余下沔鄂】

杜甫

正解柴桑缆，仍看蜀道行。檣乌相背发，塞雁一行鸣。  
南纪连铜柱，西江接锦城。凭将百钱卜，飘泊问君平。

卷 232\_50【宴王使君宅题二首】

杜甫

· 全唐诗 ·

汉主追韩信，苍生起谢安。吾徒自漂泊，世事各艰难。  
逆旅招邀近，他乡思绪宽。不材甘朽质，高卧岂泥蟠。

泛爱容霜发，留欢卜夜闲。自吟诗送老，相劝酒开颜。  
戎马今何地，乡园独旧山。江湖堕清月，酩酊任扶还。

卷 232\_51【留别公安太易沙门】

杜甫

隐居欲就庐山远，丽藻初逢休上人。数问舟航留制作，  
长开篋笥拟心神。沙村白雪仍含冻，江县红梅已放春。  
先蹋炉峰置兰若，徐飞锡杖出风尘。



· 全唐诗 ·

## 第二百三十三卷

卷 233\_1【晓发公安（数月憩息此县）】

杜甫

北城击柝复欲罢，东方明星亦不迟。邻鸡野哭如昨日，  
物色生态能几时，舟楫眇然自此去，江湖远适无前期。  
出门转眄已陈迹，药饵扶吾随所之。

卷 233\_2【泊岳阳城下】

杜甫

江国逾千里，山城仅百层。岸风翻夕浪，舟雪洒寒灯。  
留滞才难尽，艰危气益增。图南未可料，变化有鲲鹏。

卷 233\_3【缆船苦风，戏题四韵，奉简郑十三判官（泛）】

杜甫

· 全唐诗 ·

楚岸朔风疾，天寒鹧鸪呼。涨沙霾草树，舞雪渡江湖。  
吹帽时时落，维舟日日孤。因声置驿外，为觅酒家垆。

卷 233\_4【登岳阳楼】

杜甫

昔闻洞庭水，今上岳阳楼。吴楚东南坼，乾坤日夜浮。  
亲朋无一字，老病有孤舟。戎马关山北，凭轩涕泗流。

卷 233\_5【陪裴使君登岳阳楼】

杜甫

湖阔兼云雾，楼孤属晚晴。礼加徐孺子，诗接谢宣城。  
雪岸丛梅发，春泥百草生。敢违渔父问，从此更南征。

卷 233\_6【过南岳入洞庭湖】

杜甫

洪波忽争道，岸转异江湖。鄂渚分云树，衡山引舳舻。  
翠牙穿裊桨，碧节上寒蒲。病渴身何去，春生力更无。  
壤童犁雨雪，渔屋架泥涂。欹侧风帆满，微冥水驿孤。

· 全唐诗 ·

悠悠回赤壁，浩浩略苍梧。帝子留遗恨，曹公屈壮图。  
圣朝光御极，残孽驻艰虞。才淑随厮养，名贤隐锻炉。  
邵平元入汉，张翰后归吴。莫怪啼痕数，危樯逐夜乌。

卷 233\_7【宿青草湖（重湖，南青草，北洞庭）】

杜甫

洞庭犹在目，青草续为名。宿桨依农事，邮签报水程。  
寒冰争倚薄，云月递微明。湖雁双双起，人来故北征。

卷 233\_8【宿白沙驿（初过湖南五里）】

杜甫

水宿仍馀照，人烟复此亭。驿边沙旧白，湖外草新青。  
万象皆春气，孤槎自客星。随波无限月，的的近南溟。

卷 233\_9【湘夫人祠（即黄陵庙）】

杜甫

肃肃湘妃庙，空墙碧水春。虫书玉佩藓，燕舞翠帷尘。  
晚泊登汀树，微馨借渚蘋。苍梧恨不尽，染泪在丛筠。

· 全唐诗 ·

卷 233\_10【祠南夕望】

杜甫

百丈牵江色，孤舟泛日斜。兴来犹杖屦，目断更云沙。  
山鬼迷春竹，湘娥倚暮花。湖南清绝地，万古一长嗟。

卷 233\_11【登白马潭】

杜甫

水生春缆没，日出野船开。宿鸟行犹去，丛花笑不来。  
人人伤白首，处处接金杯。莫道新知要，南征且未回。

卷 233\_12【归雁】

杜甫

闻道今春雁，南归自广州。见花辞涨海，避雪到罗浮。  
是物关兵气，何时免客愁。年年霜露隔，不过五湖秋。

卷 233\_13【野望】

· 全唐诗 ·

杜甫

纳纳乾坤大，行行郡国遥。云山兼五岭，风壤带三苗。  
野树侵江阔，春蒲长雪消。扁舟空老去，无补圣明朝。

卷 233\_14 【入乔口（长沙北界）】

杜甫

漠漠旧京远，迟迟归路赊。残年傍水国，落日对春华。  
树蜜早蜂乱，江泥轻燕斜。贾生骨已朽，凄恻近长沙。

卷 233\_15 【铜官渚守风（渚在宁乡县）】

杜甫

不夜楚帆落，避风湘渚间。水耕先浸草，春火更烧山。  
早泊云物晦，逆行波浪悭。飞来双白鹤，过去杳难攀。

卷 233\_16 【北风（新康江口信宿方行）】

杜甫

春生南国瘴，气待北风苏。向晚霾残日，初宵鼓大炉。

· 全唐诗 ·

爽携卑湿地，声拔洞庭湖。万里鱼龙伏，三更鸟兽呼。  
涤除贪破浪，愁绝付摧枯。执热沉沉在，凌寒往往须。  
且知宽疾肺，不敢恨危途。再宿烦舟子，衰容问仆夫。  
今晨非盛怒，便道即长驱。隐几看帆席，云州涌坐隅。

卷 233\_17【双枫浦（在浏阳县）】

杜甫

辍棹青枫浦，双枫旧已摧。自惊衰谢力，不道栋梁材。  
浪足浮纱帽，皮须截锦苔。江边地有主，暂借上天回。

卷 233\_18【奉送王信州峯北归】

杜甫

朝廷防盗贼，供给愍诛求。下诏选郎署，传声能典州。  
苍生今日困，天子向时忧。井屋有烟起，疮痍无血流。  
壤歌唯海甸，画角自山楼。白发寐常早，荒榛农复秋。  
解龟逾卧辙，遣骑觅扁舟。徐榻不知倦，颍川何以酬。  
尘生彤管笔，寒飐黑貂裘。高义终焉在，斯文去矣休。  
别离同雨散，行止各云浮。林热鸟开口，江浑鱼掉头。  
尉佗虽北拜，太史尚南留。军旅应都息，寰区要尽收。  
九重思谏诤，八极念怀柔。徙倚瞻王室，从容仰庙谋。  
故人持雅论，绝塞豁穷愁。复见陶唐理，甘为汗漫游。

· 全唐诗 ·

卷 233\_19【江阁卧病走笔寄呈崔、卢两侍御】

杜甫

客子庖厨薄，江楼枕席清。衰年病只瘦，长夏想为情。  
滑忆雕胡饭，香闻锦带羹。溜匙兼暖腹，谁欲致杯罍。

卷 233\_20【潭州送韦员外牧韶州（迢）】

杜甫

炎海韶州牧，风流汉署郎。分符先令望，同舍有辉光。  
白首多年疾，秋天昨夜凉。洞庭无过雁，书疏莫相忘。

卷 233\_21【江阁对雨有怀行营裴二端公（裴虬与讨臧玠故有行营）】

杜甫

南纪风涛壮，阴晴屡不分。野流行地日，江入度山云。  
层阁凭雷殷，长空水面文。雨来铜柱北，应洗伏波军。

卷 233\_22【酬韦韶州见寄】

· 全唐诗 ·

杜甫

养拙江湖外，朝廷记忆疏。深惭长者辙，重得故人书。  
白发丝难理，新诗锦不如。虽无南去雁，看取北来鱼。

卷 233\_23【千秋节有感二首（八月二日为明皇千秋节）】

杜甫

自罢千秋节，频伤八月来。先朝常宴会，壮观已尘埃。  
凤纪编生日，龙池堑劫灰。湘川新涕泪，秦树远楼台。  
宝镜群臣得，金吾万国回。衢尊不重饮，白首独馀哀。

御气云楼敞，含风彩仗高。仙人张内乐，王母献宫桃。  
罗袜红蕖艳，金羁白雪毛。舞阶衔寿酒，走索背秋毫。  
圣主他年贵，边心此日劳。桂江流向北，满眼送波涛。

卷 233\_24【晚秋长沙蔡五侍御饮筵，送殷六参军归澧州黔省】

杜甫

佳士欣相识，慈颜望远游。甘从投辖饮，肯作置书邮。  
高鸟黄云暮，寒蝉碧树秋。湖南冬不雪，吾病得淹留。



· 全唐诗 ·

卷 233\_25【湖中送敬十使君适广陵】

杜甫

相见各头白，其如离别何。几年一会面，今日复悲歌。  
少壮乐难得，岁寒心匪他。气缠霜匣满，冰置玉壶多。  
遭乱实漂泊，济时曾琢磨。形容吾校老，胆力尔谁过。  
秋晚岳增翠，风高湖涌波。鸞腾访知己，淮海莫蹉跎。

卷 233\_26【长沙送李十一（衔）】

杜甫

与子避地西康州，洞庭相逢十二秋。远愧尚方曾赐履，  
竟非吾土倦登楼。久存胶漆应难并，一辱泥涂遂晚收。  
李杜齐名真忝窃，朔云寒菊倍离忧。

卷 233\_27【重送刘十弟判官】

杜甫

分源豕韦派，别浦雁宾秋。年事推兄忝，人才觉弟优。  
经过辨丰剑，意气逐吴钩。垂翅徒衰老，先鞭不滞留。  
本枝凌岁晚，高义豁穷愁。他日临江待，长沙旧驿楼。

· 全唐诗 ·

卷 233\_28【奉赠卢五丈参谋（琨）】

杜甫

恭惟同自出，妙选异高标。入幕知孙楚，披襟得郑侨。  
丈人藉才地，门阀冠云霄。老矣逢迎拙，相于契托饶。  
赐钱倾府待，争米驻船遥。邻好艰难薄，氓心杼轴焦。  
客星空伴使，寒水不成潮。素发干垂领，银章破在腰。  
说诗能累夜，醉酒或连朝。藻翰惟牵率，湖山合动摇。  
时清非造次，兴尽却萧条。天子多恩泽，苍生转寂寥。  
休传鹿是马，莫信鵬如鴞。未解依依袂，还斟泛泛瓢。  
流年疲蟋蟀，体物幸鹪鹩。辜负沧洲愿，谁云晚见招。

卷 233\_29【登舟将适汉阳】

杜甫

春宅弃汝去，秋帆催客归。庭蔬尚在眼，浦浪已吹衣。  
生理飘荡拙，有心迟暮违。中原戎马盛，远道素书稀。  
塞雁与时集，樯乌终岁飞。鹿门自此往，永息汉阴机。

卷 233\_30【暮秋将归秦，留别湖南幕府亲友】

杜甫

· 全唐诗 ·

水阔苍梧野，天高白帝秋。途穷那免哭，身老不禁愁。  
大府才能会，诸公德业优。北归冲雨雪，谁悯敝貂裘。

卷 233\_31 【送卢十四弟侍御护韦尚书灵柩归上都二十韵】

杜甫

素幕渡江远，朱幡登陆微。悲鸣驷马顾，失涕万人挥。  
参佐哭辞毕，门阑谁送归。从公伏事久，之子俊才稀。  
长路更执紼，此心犹倒衣。感恩义不小，怀旧礼无违。  
墓待龙骧诏，台迎獬豸威。深衷见士则，雅论在兵机。  
戎狄乘妖气，尘沙落禁闱。往年朝谒断，他日扫除非。  
但促铜壶箭，休添玉帐旂。动询黄阁老，肯虑白登围。  
万姓疮痍合，群凶嗜欲肥。刺规多谏诤，端拱自光辉。  
俭约前王体，风流后代希。对扬期特达，衰朽再芳菲。  
空里愁书字，山中疾采薇。拨杯要忽罢，抱被宿何依。  
眼冷看征盖，儿扶立钓矶。清霜洞庭叶，故就别时飞。

卷 233\_32 【哭李常侍峰二首】

杜甫

一代风流尽，修文地下深。斯人不重见，将老失知音。  
短日行梅岭，寒山落桂林。长安若个畔，犹想映貂金。

· 全唐诗 ·

青琐陪双入，铜梁阻一辞。风尘逢我地，江汉哭君时。  
次第寻书札，呼儿检赠诗。发挥王子表，不愧史臣词。

卷 233\_33【哭韦大夫之晋】

杜甫

凄怆郇瑕色，差池弱冠年。丈人叨礼数，文律早周旋。  
台阁黄图里，簪裾紫盖边。尊荣真不忝，端雅独翛然。  
贡喜音容间，冯招病疾缠。南过骇仓卒，北思悄联绵。  
鵬鸟长沙讳，犀牛蜀郡怜。素车犹恻哭，宝剑谷高悬。  
汉道中兴盛，韦经亚相传。冲融标世业，磊落映时贤。  
城府深朱夏，江湖眇霁天。绮楼关树顶，飞旆泛堂前。  
帘幕疑风燕，笳箫急暮蝉。兴残虚白室，迹断孝廉船。  
童孺交游尽，喧卑俗事牵。老来多涕泪，情在强诗篇。  
谁寄方隅理，朝难将帅权。春秋褒贬例，名器重双全。

卷 233\_34【舟中夜雪，有怀卢十四侍御弟】

杜甫

朔风吹桂水，朔雪夜纷纷。暗度南楼月，寒深北渚云。  
烛斜初近见，舟重竟无闻。不识山阴道，听鸡更忆君。

· 全唐诗 ·

卷 233\_35 【对雪】

杜甫

北雪犯长沙，胡云冷万家。随风且间叶，带雨不成花。  
金错囊从罄，银壶酒易赊。无人竭浮蚁，有待至昏鸦。

卷 233\_36 【楼上】

杜甫

天地空搔首，频抽白玉簪。皇舆三极北，身事五湖南。  
恋阙劳肝肺，论材愧杞楠。乱离难自救，终是老湘潭。

卷 233\_37 【冬晚送长孙渐舍人归州】

杜甫

参卿休坐幄，荡子不还乡。南客潇湘外，西戎鄠杜旁。  
衰年倾盖晚，费日系舟长。会面思来札，销魂逐去樯。  
云晴鸥更舞，风逆雁无行。匣里雌雄剑，吹毛任选将。

卷 233\_38 【暮冬送苏四郎谪兵曹适桂州】

· 全唐诗 ·

杜甫

飘飘苏季子，六印佩何迟。早作诸侯客，兼工古体诗。  
尔贤埋照久，余病长年悲。卢綰须征日，楼兰要斩时。  
岁阳初盛动，王化久磷缁。为入苍梧庙，看云哭九疑。

卷 233\_39【风疾舟中伏枕书怀三十六韵，奉呈湖南亲友】

杜甫

轩辕休制律，虞舜罢弹琴。尚错雄鸣管，犹伤半死心。  
圣贤名古邈，羁旅病年侵。舟泊常依震，湖平早见参。  
如闻马融笛，若倚仲宣襟。故国悲寒望，群云惨岁阴。  
水乡霾白屋，枫岸叠青岑。郁郁冬炎瘴，濛濛雨滞淫。  
鼓迎非祭鬼，弹落似鸢禽。兴尽才无闷，愁来遽不禁。  
生涯相汨没，时物自萧森。疑惑尊中弩，淹留冠上簪。  
牵裾惊魏帝，投阁为刘歆。狂走终奚适，微才谢所钦。  
吾安藜不糝，汝贵玉为琛。乌几重重缚，鹑衣寸寸针。  
哀伤同庾信，述作异陈琳。十暑岷山葛，三霜楚户砧。  
叨陪锦帐座，久放白头吟。反朴时难遇，忘机陆易沈。  
应过数粒食，得近四知金。春草封归恨，源花费独寻。  
转蓬忧悄悄，行药病涔涔。瘞夭追潘岳，持危觅邓林。  
蹉跎翻学步，感激在知音。却假苏张舌，高夸周宋铉。  
纳流迷浩汗，峻址得嶔峩。城府开清旭，松筠起碧浔。  
披颜争倩倩，逸足竞騏骥。朗鉴存愚直，皇天实照临。  
公孙仍恃险，侯景未生擒。书信中原阔，干戈北斗深。

· 全唐诗 ·

畏人千里井，问俗九州箴。战血流依旧，军声动至今。  
葛洪尸定解，许靖力还任。家事丹砂诀，无成涕作霖。

卷 233\_40 【奉赠萧二十使君】

杜甫

昔在严公幕，俱为蜀使臣。艰危参大府，前后间清尘。  
起草鸣先路，乘槎动要津。王帛聊暂出，萧雉只相驯。  
终始任安义，荒芜孟母邻。联翩匍匐礼，意气死生亲。  
张老存家事，嵇康有故人。食恩惭卤莽，镂骨抱酸辛。  
巢许山林志，夔龙廊庙珍。鹏图仍矫翼，熊轼且移轮。  
磊落衣冠地，苍茫土木身。埭簾鸣自合，金石莹逾新。  
重忆罗江外，同游锦水滨。结欢随过隙，怀旧益沾巾。  
旷绝含香舍，稽留伏枕辰。停骖双阙早，回雁五湖春。  
不达长卿病，从来原宪贫。监河受贷粟，一起辙中鳞。

卷 233\_41 【奉送二十三舅录事之摄郴州】

杜甫

贤良归盛族，吾舅尽知名。徐庶高交友，刘牢出外甥。  
泥涂岂珠玉，环堵但柴荆。衰老悲人世，驱驰厌甲兵。  
气春江上别，泪血渭阳情。舟鹢排风影，林乌反哺声。  
永嘉多北至，句漏且南征。必见公侯复，终闻盗贼平。

· 全唐诗 ·

郴州颇凉冷，橘井尚凄清。从役何蛮貊，居官志在行。

卷 233\_42 【送魏二十四司直充岭南掌选崔郎中判官兼寄韦韶州】

杜甫

选曹分五岭，使者历三湘。才美膺推荐，君行佐纪纲。  
佳声斯共远，雅节在周防。明白山涛鉴，嫌疑陆贾装。  
故人湖外少，春日岭南长。凭报韶州牧，新诗昨寄将。

卷 233\_43 【送赵十七明府之县】

杜甫

连城为宝重，茂宰得才新。山雉迎舟楫，江花报邑人。  
论交翻恨晚，卧病却愁春。惠爱南翁悦，馀波及老身。

卷 233\_44 【燕子来舟中作】

杜甫

湖南为客动经春，燕子衔泥两度新。旧入故园常识主，  
如今社日远看人。可怜处处巢君室，何异飘飘托此身。



· 全唐诗 ·

暂语船樯还起去，穿花落水益沾巾。

卷 233\_45【同豆卢峰知字韵】

杜甫

炼金欧冶子，喷玉大宛儿。符彩高无敌，聪明达所为。  
梦兰他日应，折桂早年知。烂漫通经术，光芒刷羽仪。  
谢庭瞻不远，潘省会于斯。倡和将雏曲，田翁号鹿皮。

卷 233\_46【归雁二首】

杜甫

万里衡阳雁，今年又北归。双双瞻客上，一一背人飞。  
云里相呼疾，沙边自宿稀。系书元浪语，愁寂故山薇。

欲雪违胡地，先花别楚云。却过清渭影，高起洞庭群。  
塞北春阴暮，江南日色曛。伤弓流落羽，行断不堪闻。

卷 233\_47【小寒食舟中作】

杜甫

· 全唐诗 ·

佳辰强饭食犹寒，隐几萧条带鹖冠。春水船如天上坐，  
老年花似雾中看。娟娟戏蝶过闲幔，片片轻鸥下急湍。  
云白山青万余里，愁看直北是长安。

卷 233\_48【清明二首】

杜甫

朝来新火起新烟，湖色春光净客船。绣羽衔花他自得，  
红颜骑竹我无缘。胡童结束还难有，楚女腰肢亦可怜。  
不见定王城旧处，长怀贾傅井依然。虚沾焦举为寒食，  
实藉严君卖卜钱。钟鼎山林各天性，浊醪粗饭任吾年。

此身飘泊苦西东，右臂偏枯半耳聋。寂寂系舟双下泪，  
悠悠伏枕左书空。十年蹴踘将雏远，万里秋千习俗同。  
旅雁上云归紫塞，家人钻火用青枫。秦城楼阁烟花里，  
汉主山河锦绣中。风水春来洞庭阔，白蘋愁杀白头翁。

卷 233\_49【发潭州（时自潭之衡）】

杜甫

夜醉长沙酒，晓行湘水春。岸花飞送客，樯燕语留人。  
贾傅才未有，褚公书绝伦。高名前后事，回首一伤神。

· 全唐诗 ·

卷 233\_50 【回棹】

杜甫

宿昔试安命，自私犹畏天。劳生系一物，为客费多年。  
衡岳江湖大，蒸池疫疠偏。散才婴薄俗，有迹负前贤。  
巾拂那关眼，瓶罍易满船。火云滋垢腻，冻雨裊沉绵。  
强饭莼添滑，端居茗续煎。清思汉水上，凉忆岷山巅。  
顺浪翻堪倚，回帆又省牵。吾家碑不昧，王氏井依然。  
几杖将衰齿，茅茨寄短椽。灌园曾取适，游寺可终焉。  
遂性同渔父，成名异鲁连。篙师烦尔送，朱夏及寒泉。

卷 233\_51 【赠韦七赞善】

杜甫

乡里衣冠不乏贤，杜陵韦曲未央前。尔家最近魁三象，  
时论同归尺五天。北走关山开雨雪，南游花柳塞云烟。  
洞庭春色悲公子，鰕菜忘归范蠡船。

卷 233\_52 【奉酬寇十侍御锡见寄四韵，复寄寇】

杜甫

· 全唐诗 ·

往别郇瑕地，于今四十年。来簪御府笔，故泊洞庭船。  
诗忆伤心处，春深把臂前。南瞻按百越，黄帽待君偏。

卷 233\_53 【酬郭十五受判官】

杜甫

才微岁老尚虚名，卧病江湖春复生。药裹关心诗总废，  
花枝照眼句还成。只同燕石能星陨，自得隋珠觉夜明。  
乔口橘洲风浪促，系帆何惜片时程。

卷 233\_54 【衡州送李大夫七丈勉赴广州】

杜甫

斧钺下青冥，楼船过洞庭。北风随爽气，南斗避文星。  
日月笼中鸟，乾坤水上萍。王孙丈人行，垂老见飘零。

· 全唐诗 ·

## 第二百三十四卷

卷 234\_1【哭长孙侍御（一作杜诵诗。以下为杜甫补遗）】

杜甫

道为谋书重，名因赋颂雄。礼闈曾擢桂，宪府旧乘骢。  
流水生涯尽，浮云世事空。唯馀旧台柏，萧瑟九原中。

卷 234\_2【虢国夫人（一作《张祜集》灵台二首之一）】

杜甫

虢国夫人承主恩，平明上马入宫门。  
却嫌脂粉涴颜色，澹扫蛾眉朝至尊。

卷 234\_3【军中醉饮寄沈八、刘叟（一作畅当诗）】

杜甫

酒渴爱江清，馀甘漱晚汀。软沙欹坐稳，冷石醉眠醒。

· 全唐诗 ·

野膳随行帐，华音发从伶。数杯君不见，醉已遣沉冥。

卷 234\_4 【杜鹃行（一作司空曙诗）】

杜甫

古时杜宇称望帝，魂作杜鹃何微细。跳枝窜叶树木中，  
抢佯瞥睨雌随雄。毛衣惨黑貌憔悴，众鸟安肯相尊崇。  
隳形不敢栖华屋，短翮唯愿巢深丛。穿皮啄朽觜欲秃，  
苦饥始得食一虫。谁言养雏不自哺，此语亦足为愚蒙。  
声音咽咽如有谓，号啼略与婴儿同。口干垂血转迫促，  
似欲上诉于苍穹。蜀人闻之皆起立，至今戮学效遗风，  
乃知变化不可穷。岂知昔日居深宫，嫔嫱左右如花红。

卷 234\_5 【闻惠二过东溪特一送（以下七首，吴若本逸诗）】

杜甫

惠子白驹瘦，归溪唯病身。皇天无老眼，空谷滞斯人。  
崖蜜松花熟，山杯竹叶新。柴门了无事，黄绮未称臣。

卷 234\_6 【舟泛洞庭（一作过洞庭湖）】

杜甫

· 全唐诗 ·

蛟室围青草，龙堆拥白沙。护江盘古木，迎棹舞神鸦。  
破浪南风正，收帆畏日斜。云山千万叠，底处上仙槎。

卷 234\_7【李盐铁二首（一首题作李监宅，已见第九卷中）】

杜甫

落叶春风起，高城烟雾开。杂花分户映，娇燕入檐回。  
一见能倾产，虚怀只爱才。盐官虽绊骥，名是汉庭来。

卷 234\_8【长吟】

杜甫

江渚翻鸥戏，官桥带柳阴。江飞竞渡日，草见蹋春心。  
已拨形骸累，真为烂漫深。赋诗歌句稳，不免自长吟。

卷 234\_9【绝句九首（前六首已见第十三卷中）】

杜甫

闻道巴山里，春船正好行。都将百年兴，一望九江城。  
水槛温江口，茅堂石笋西。移船先主庙，洗药浣沙溪。  
设道春来好，狂风大放颠。吹花随水去，翻却钓鱼船。

· 全唐诗 ·

卷 234\_10【瞿唐怀古（以下草堂逸诗拾遗）】

杜甫

西南万壑注，勍敌两崖开。地与山根裂，江从月窟来。  
削成当白帝，空曲隐阳台。疏凿功虽美，陶钧力大哉。

卷 234\_11【送司马入京】

杜甫

群盗至今日，先朝忝从臣。叹君能恋主，久客羨归秦。  
黄阁长司谏，丹墀有故人。向来论社稷，为话涕沾巾。

卷 234\_12【惜别行送刘仆射判官（仆射乃其主将刘乃仆射之判官也）】

杜甫

闻道南行市骏马，不限匹数军中须。襄阳幕府天下异，  
主将俭省忧艰虞。只收壮健胜铁甲，岂因格斗求龙驹。  
而今西北自反胡，骐驎荡尽一匹无。龙媒真种在帝都，  
子孙永落西南隅。向非戎事备征伐，君肯辛苦越江湖。  
江湖凡马多憔悴，衣冠往往乘蹇驴。梁公富贵于身疏，



· 全唐诗 ·

号令明白人安居。俸钱时散士子尽，府库不为骄豪虚。  
以兹报主寸心赤，气却西戎回北狄。罗网群马籍马多，  
气在驱驰出金帛。刘侯奉使光推择，滔滔才略沧溟窄。  
杜陵老翁秋系船，扶病相识长沙驿。强梳白发提胡卢，  
手把菊花路旁摘。九州兵革浩茫茫，三叹聚散临重阳。  
当杯对客忍流涕，君不觉老夫神内伤。

卷 234\_13【呀鹞行】

杜甫

病鹞孤飞俗眼丑，每夜江边宿衰柳。清秋落日已侧身，  
过雁归鸦错回首。紧脑雄姿迷所向，疏翎稀毛不可状。  
强神迷复皂雕前，俊才早在苍鹰上。风涛飒飒寒山阴，  
熊羆欲蛰龙蛇深。念尔此时有一掷，失声溅血非其心。

卷 234\_14【狂歌行，赠四兄】

杜甫

与兄行年校一岁，贤者是兄愚者弟。兄将富贵等浮云，  
弟切功名好权势。长安秋雨十日泥，我曹鞢马听晨鸡。  
公卿朱门未开锁，我曹已到肩相齐。吾兄睡稳方舒膝，  
不袜不巾蹋晓日。男啼女哭莫我知，身上须繒腹中实。  
今年思我来嘉州。嘉州酒重花绕楼。楼头吃酒楼下卧，

· 全唐诗 ·

长歌短咏还相酬。四时八节还拘礼，女拜弟妻男拜弟。  
幅巾鞶带不挂身，头脂足垢何曾洗。吾兄吾兄巢许伦，  
一生喜怒长任真。日斜枕肘寝已熟，啾啾唧唧为何人。

卷 234\_15【逃难】

杜甫

五十头白翁，南北逃世难。疏布缠枯骨，奔走苦不暖。  
已衰病方入，四海一涂炭。乾坤万里内，莫见容身畔。  
妻孥复随我，回首共悲叹。故国莽丘墟，邻里各分散。  
归路从此迷，涕尽湘江岸。

卷 234\_16【寄高適】

杜甫

楚隔乾坤远，难招病客魂。诗名惟我共，世事与谁论。  
北阙更新主，南星落故园。定知相见日，烂漫倒芳尊。

卷 234\_17【送灵州李判官】

杜甫

· 全唐诗 ·

犬戎腥四海，回首一茫茫。血战乾坤赤，氛迷日月黄。  
将军专策略，幕府盛材良。近贺中兴主，神兵动朔方。

卷 234\_18 【与严二郎奉礼别】

杜甫

别君谁暖眼，将老病缠身。出涕同斜日，临风看去尘。  
商歌还入夜，巴俗自为邻。尚愧微躯在，遥闻盛礼新。  
山东群盗散，阙下受降频。诸将归应尽，题书报旅人。

卷 234\_19 【巴西驿亭观江涨，呈窦使君二首】

杜甫

转惊波作怒，即恐岸随流。赖有杯中物，还同海上鸥。  
关心小剡县，傍眼见扬州。为接情人饮，朝来减半愁。

向晚波微绿，连空岸脚青。日兼春有暮，愁与醉无醒。  
漂泊犹杯酒，踌躇此驿亭。相看万里外，同是一浮萍。

卷 234\_20 【遣忧】

杜甫

· 全唐诗 ·

乱离知又甚，消息苦难真。受谏无今日，临危忆古人。  
纷纷乘白马，攘攘著黄巾。隋氏留宫室，焚烧何太频。

卷 234\_21【早花】

杜甫

西京安稳未，不见一人来。腊日巴江曲，山花已自开。  
盈盈当雪杏，艳艳待春梅。直苦风尘暗，谁忧容鬓催。

卷 234\_22【巴山】

杜甫

巴山遇中使，云自峡城来。盗贼还奔突，乘舆恐未回。  
天寒邵伯树，地阔望仙台。狼狈风尘里，群臣安在哉。

卷 234\_23【收京】

杜甫

复道收京邑，兼闻杀犬戎。衣冠却扈从，车驾已还宫。  
克复成如此，安危在数公。莫令回首地，恸哭起悲风。

· 全唐诗 ·

卷 234\_24 【巴西闻收宫阙，送班司马入京】

杜甫

闻道收宗庙，鸣銮自陕归。倾都看黄屋，正殿引朱衣。  
剑外春天远，巴西敕使稀。念君经世乱，匹马向王畿。

卷 234\_25 【花底】

杜甫

紫萼扶千蕊，黄须照万花。忽疑行暮雨，何事入朝霞。  
恐是潘安县，堪留卫玠车。深知好颜色，莫作委泥沙。

卷 234\_26 【柳边】

杜甫

只道梅花发，那知柳亦新。枝枝总到地，叶叶自开春。  
紫燕时翻翼，黄鹂不露身。汉南应老尽，霸上远愁人。

卷 234\_27 【送竇九归成都】

· 全唐诗 ·

杜甫

文章亦不尽，奚子才纵横。非尔更苦节，何人符大名。  
读书云阁观，问绢锦官城。我有浣花竹，题诗须一行。

卷 234\_28【赠裴南部，闻袁判官自来欲有按问】

杜甫

尘满莱芜甑，堂横单父琴。人皆知饮水，公辈不偷金。  
梁狱书因上，秦台镜欲临。独醒时所嫉，群小谤能深。  
即出黄沙在，何须白发侵。使君传旧德，已见直绳心。

卷 234\_29【奉使崔都水翁下峡】

杜甫

无数涪江筏，鸣桡总发时。别离终不久，宗族忍相遗。  
白狗黄牛峡，朝云暮雨祠。所过频问讯，到日自题诗。

卷 234\_30【题鄆县郭三十二明府茅屋壁】

杜甫

· 全唐诗 ·

江头且系船，为尔独相怜。云散灌坛雨，春青彭泽田。  
频惊适小国，一拟问高天。别后巴东路，逢人问几贤。

卷 234\_31【遣闷戏呈路十九曹长】

杜甫

江浦雷声喧昨夜，春城雨色动微寒。黄鹂并坐交愁湿，  
白鹭群飞大剧干。晚节渐于诗律细，谁家数去酒杯宽。  
惟吾最爱清狂客，百遍相看意未阑。

卷 234\_32【随章留后新亭会送诸君】

杜甫

新亭有高会，行子得良时。日动映江幕，风鸣排槛旗。  
绝荤终不改，劝酒欲无词。已堕岷山泪，因题零雨诗。

卷 234\_33【东津送韦讽摄阆州录事】

杜甫

闻说江山好，怜君吏隐兼。宠行舟远泛，怯别酒频添。  
推荐非承乏，操持必去嫌。他时如按县，不得慢陶潜。

· 全唐诗 ·

卷 234\_34【客旧馆】

杜甫

陈迹随人事，初秋别此亭。重来梨叶赤，依旧竹林青。  
风幔何时卷，寒砧昨夜声。无由出江汉，愁绪月冥冥。

卷 234\_35【阆州奉送二十四舅使自京赴任青城】

杜甫

闻道王乔舄，名因太史传。如何碧鸡使，把诏紫微天。  
秦岭愁回马，涪江醉泛船。青城漫污杂，吾舅意凄然。

卷 234\_36【愁坐】

杜甫

高斋常见野，愁坐更临门。十月山寒重，孤城月水昏。  
葭萌氏种迥，左担犬戎存。终日忧奔走，归期未敢论。

卷 234\_37【陪郑公秋晚北池临眺】



· 全唐诗 ·

杜甫

北池云水阔，华馆辟秋风。独鹤元依渚，衰荷且映空。  
采菱寒刺上，蹋藕野泥中。素楫分曹往，金盘小径通。  
萋萋露草碧，片片晚旗红。杯酒沾津吏，衣裳与钓翁。  
异方初艳菊，故里亦高桐。摇落关山思，淹留战伐功。  
严城殊未掩，清宴已知终。何补参卿事，欢娱到薄躬。

卷 234\_38【去蜀】

杜甫

五载客蜀郡，一年居梓州。如何关塞阻，转作潇湘游。  
世事已黄发，残生随白鸥。安危大臣在，不必泪长流。

卷 234\_39【放船】

杜甫

收帆下急水，卷幔逐回滩。江市戎戎暗，山云淅淅寒。  
村荒无径入，独鸟怪人看。已泊城楼底，何曾夜色阑。

卷 234\_40【哭台州郑司户苏少监】

· 全唐诗 ·

杜甫

故旧谁怜我，平生郑与苏。存亡不重见，丧乱独前途。  
豪俊何人在，文章扫地无。羁游万里阔，凶问一年俱。  
白首中原上，清秋大海隅。夜台当北斗，泉路著东吴。  
得罪台州去，时危弃硕儒。移官蓬阁后，谷贵没潜夫。  
流恸嗟何及，衔冤有是夫。道消诗兴废，心息酒为徒。  
许与才虽薄，追随迹未拘。班扬名甚盛，嵇阮逸相须。  
会取君臣合，宁铨品命殊。贤良不必展，廊庙偶然趋。  
胜决风尘际，功安造化炉。从容拘旧学，惨澹闋阴符。  
摆落嫌疑久，哀伤志力输。俗依绵谷异，客对雪山孤。  
童稚思诸子，交朋列友于。情乖清酒送，望绝抚坟呼。  
疟病餐巴水，疮痍老蜀都。飘零迷哭处，天地日榛芜。

卷 234\_41【送王侍御往东川，放生池祖席】

杜甫

东川诗友合，此赠怯轻为。况复传宗近，空然惜别离。  
梅花交近野，草色向平池。倘忆江边卧，归期愿早知。

卷 234\_42【惠义寺送王少尹赴成都（得峰字）】

杜甫

· 全唐诗 ·

苒苒谷中寺，娟娟林表峰。阑干上处远，结构坐来重。  
骑马行春径，衣冠起晚钟。云门青寂寂，此别惜相从。

卷 234\_43【避地】

杜甫

避地岁时晚，窜身筋骨劳。诗书遂墙壁，奴仆且旌旄。  
行在仅闻信，此生随所遭。神尧旧天下，会见出腥臊。

卷 234\_44【惠义寺园送辛员外】

杜甫

朱樱此日垂朱实，郭外谁家负郭田。  
万里相逢贪握手，高才却望足离筵。

卷 234\_45【又送】

杜甫

双峰寂寂对春台，万竹青青照客杯。细草留连侵坐软，  
残花怅望近人开。同舟昨日何由得，并马今朝未拟回。  
直到绵州始分首，江边树里共谁来。

· 全唐诗 ·

卷 234\_46【九日登梓州城】

杜甫

客心惊暮序，宾雁下襄州。共赏重阳节，言寻戏马游。  
湖风秋戍柳，江雨暗山楼。且酌东篱菊，聊祛南国愁。

卷 234\_47【阙题】

杜甫

三月雪连夜，未应伤物华。只缘春欲尽，留著伴梨花。

卷 234\_48【句】

杜甫

寒食少天气，东风多柳花。（见《合璧事类》）

小桃知客意，春尽始开花。（见《合璧事类》）

· 全唐诗 ·

## 第二百三十五卷

卷 235\_1【自蜀奉册命往朔方途中呈韦左相文部房尚书门下崔侍郎】

贾至

胡羯乱中夏，銮舆忽南巡。衣冠陷戎寇，狼狈随风尘。  
豳公秉大节，临难不顾身。激昂白刃前，溅血下沾巾。  
尚书抱忠义，历险披荆榛。扈从出剑门，登翼岷江滨。  
时望挹侍郎，公才标缙绅。亭亭昆山玉，皎皎无缁磷。  
顾惟乏经济，扞牧陪从臣。永愿雪会稽，仗剑清咸秦。  
太皇时内禅，神器付嗣君。新命集旧邦，至德被远人。  
捧册自南服，奉诏趋北军。觐谒心载驰，违离难重陈。  
策马出蜀山，畏途上缘云。饮啄丛箐间，栖息虎豹群。  
崎岖凌危栈，惴栗惊心神。峭壁上嵒岑，大江下沄沄。  
皇风扇八极，异类怀深仁。元凶诱黠虏，肘腋生妖氛。  
明主信英武，威声赫四邻。誓师自朔方，旗帜何缤纷。  
铁骑照白日，旄头拂秋旻。将来荡沧溟，宁止蹴昆仑。  
古来有屯难，否泰长相因。夏康纘禹绩，代祖复汉勋。  
于役各勤王，驱驰拱紫宸。岂惟太公望，往昔逢周文。  
谁谓三杰才，功业独殊伦。感此慰行迈，无为歌苦辛。

· 全唐诗 ·

卷 235\_2【赠裴九侍御昌江草堂弹琴】

贾至

朔风吹疏林，积雪在崖巘。鸣琴草堂响，小涧清且浅。  
沉吟东山意，欲去芳岁晚。怅望黄绮心，白云若在眼。

卷 235\_3【巴陵早秋，寄荆州崔司马、吏部阎功曹舍人】

贾至

谪居潇湘渚，再见洞庭秋。极目连江汉，西南浸斗牛。  
滔滔荡云梦，澹澹摇巴丘。旷如临渤澥，窅疑造瀛洲。  
君山丽中波，苍翠长夜浮。帝子去永久，楚词尚悲秋。  
我同长沙行，时事加百忧。登高望旧国，胡马满东周。  
宛叶遍蓬蒿，樊邓无良畴。独攀青枫树，泪洒沧江流。  
故人西掖寮，同扈岐阳蒐。差池尽三黜，蹭蹬各南州。  
相去虽地接，不得从之游。耿耿云阳台，迢迢王粲楼。  
跂予暮霞里，谁谓无轻舟。

卷 235\_4【闲居秋怀，寄阳翟陆贄府、封丘高少府】

贾至

· 全唐诗 ·

今日霖雨霁，飒然高馆凉。秋风吹二毛，烈士加慨慷。  
忆昔皇运初，众宾俱龙骧。解巾佐幕府，脱剑升明堂。  
郁郁被庆云，昭昭翼太阳。鲸鱼纵大壑，鸞鷟鸣高冈。  
信矣草创时，泰阶速贤良。一言顿遭逢，片善蒙恩光。  
我生属圣明，感激窃自强。崎岖郡邑权，连蹇翰墨场。  
天朝富英髦，多士如珪璋。盛才溢下位，蹇步徒猖狂。  
闭门对群书，几案在我旁。枕席相远游，聊欲浮沧浪。  
八月白露降，玄蝉号枯桑。舫舟临清川，迢递愁思长。  
我有同怀友，各在天一方。离披不相见，浩荡隔两乡。  
平生霞外期，宿昔共行藏。岂无蓬莱树，岁晏空苍苍。

卷 235\_5【送友人使河源】

贾至

送君鲁郊外，下车上高丘。萧条千里暮，日落黄云秋。  
举酒有馀恨，论边无远谋。河源望不见，旌旆去悠悠。

卷 235\_6【送李侍御】

贾至

我年四十馀，已叹前路短。羁离洞庭上，安得不引满。  
李侯忘情者，与我同疏懒。孤帆泣潇湘，望远心欲断。

· 全唐诗 ·

卷 235\_7【送耿副使归长沙】

贾至

画舸欲南归，江亭且留宴。日暮湖上云，萧萧若流霰。  
昨夜相知者，明发不可见。惆怅西北风，高帆为谁扇。

卷 235\_8【送夏侯子之江夏】

贾至

扣楫洞庭上，清风千里来。留欢一杯酒，欲别复裴回。  
相见楚山下，渔舟忆钓台。羡君还旧里，归念独悠哉。

卷 235\_9【寓言二首】

贾至

春草纷碧色，佳人旷无期。悠哉千里心，欲采商山芝。  
叹息良会晚，如何桃李时。怀君晴川上，伫立夏云滋。

凛凛秋闺夕，绮罗早知寒。玉砧调鸣杵，始捣机中纨。  
忆昨别离日，桐花覆井栏。今来思君时，白露盈阶漙。  
闻有关河信，欲寄双玉盘。玉以委贞心，盘以荐嘉餐。



· 全唐诗 ·

嗟君在万里，使妾衣带宽。

卷 235\_10【燕歌行】

贾至

国之重镇惟幽都，东威九夷北制胡。五军精卒三十万，  
百战百胜擒单于。前临滹沱后易水，崇山沃野亘千里。  
昔时燕山重贤士，黄金筑台从隗始。倏忽兴王定蓟丘，  
汉家又以封王侯。萧条魏晋为横流，鲜卑窃据朝五州。  
我唐区夏馀十纪，军容武备赫万祀。彤弓黄钺授元帅，  
垦耕大漠为内地。季秋胶折边草腓，治兵羽猎因出师。  
千营万队连旌旗，望之如火忽电驰。匈奴慑窜穷发北，  
大荒万里无尘飞。君不见隋家昔为天下宰，  
穷兵黩武征辽海。南风不竞多死声，鼓卧旗折黄云横。  
六军将士皆死尽，战马空鞍归故营。时移道革天下平，  
白环入贡沧海清。自有农夫已高枕，无劳校尉重横行。

卷 235\_11【巴陵寄李二户部、张十四礼部（时贬岳州司马）】

贾至

江南春草初萋萋，愁杀江南独愁客。秦中杨柳也应新，  
转忆秦中相忆人。万里莺花不相见，登高一望泪沾巾。

· 全唐诗 ·

卷 235\_12 【长门怨】

贾至

独坐思千里，春庭晓景长。莺喧翡翠幕，柳覆郁金堂。  
舞蝶萦愁绪，繁花对靓妆。深情托瑶瑟，弦断不成章。

卷 235\_13 【铜雀台】

贾至

日暮铜台静，西陵鸟雀归。抚弦心断绝，听管泪霏微。  
灵几临朝奠，空床卷夜衣。苍苍川上月，应照妾魂飞。

卷 235\_14 【侍宴曲】

贾至

云陛褰珠帘，天墀覆绿杨。隔帘妆隐映，向席舞低昂。  
鸣佩长廊静，开冰广殿凉。欢馀剑履散，同辇入昭阳。

卷 235\_15 【对酒曲二首】

· 全唐诗 ·

贾至

梅发柳依依，黄鹂历乱飞。当歌怜景色，对酒惜芳菲。  
曲水浮花气，流风散舞衣。通宵留暮雨，上客莫言归。

春来酒味浓，举酒对春丛。一酌千忧散，三杯万事空。  
放歌乘美景，醉舞向东风。寄语尊前客，生涯任转蓬。

卷 235\_16【送陆协律赴端州】

贾至

越井人南去，湘川水北流。江边数杯酒，海内一孤舟。  
岭峤同仙客，京华即旧游。春心将别恨，万里共悠悠。

卷 235\_17【送王员外赴长沙】

贾至

携手登临处，巴陵天一隅。春生云梦泽，水溢洞庭湖。  
共叹虞翻枉，同悲阮籍途。长沙旧卑湿，今古不应殊。

卷 235\_18【送夏侯参军赴广州】

· 全唐诗 ·

贾至

闻道衡阳外，由来雁不飞。送君从此去，书信定应稀。  
云海南溟远，烟波北渚微。勉哉孙楚吏，彩服正光辉。

卷 235\_19【长沙别李六侍御】

贾至

月明湘水白，霜落洞庭干。放逐长沙外，相逢路正难。  
云归帝乡远，雁报朔方寒。此别盈襟泪，雍门不假弹。

卷 235\_20【岳阳楼宴王员外贬长沙（一题作南州有赠）】

贾至

极浦三春草，高楼万里心。楚山晴霭碧，湘水暮流深。  
忽与朝中旧，同为泽畔吟。停杯试北望，还欲泪沾襟。

卷 235\_21【咏冯昭仪当熊】

贾至

白羽插雕弓，霓旌动朔风。平明出金屋，扈辇上林中。

· 全唐诗 ·

逐兽长廊静，呼鹰御苑空。王孙莫谏猎，贱妾解当熊。

卷 235\_22【早朝大明宫，两省僚友】

贾至

银烛熏天紫陌长，禁城春色晓苍苍。千条弱柳垂青琐，  
百啭流莺绕建章。剑佩声随玉墀步，衣冠身惹御炉香。  
共沐恩波凤池上，朝朝染翰侍君王。

卷 235\_23【白马】

贾至

白马紫连钱，嘶鸣丹阙前。闻珂自蹀躞，不要下金鞭。

卷 235\_24【赠薛瑶英】

贾至

舞怯铢衣重，笑疑桃脸开。方知汉成帝，虚筑避风台。

卷 235\_25【出塞曲】

· 全唐诗 ·

贾至

万里平沙一聚尘，南飞羽檄北来人。  
传道五原烽火急，单于昨夜寇新秦。

卷 235\_26【春思二首】

贾至

草色青青柳色黄，桃花历乱李花香。  
东风不为吹愁去，春日偏能惹恨长。

红粉当垆弱柳垂，金花腊酒解酴醾。  
笙歌日暮能留客，醉杀长安轻薄儿。

卷 235\_27【勤政楼观乐】

贾至

银河帝女下三清，紫禁笙歌出九城。  
为报延州来听乐，须知天下欲升平。

卷 235\_28【赠陕掾梁宏】

· 全唐诗 ·

贾至

梁子工文四十年，诗颠名过草书颠。  
白头仍作功曹掾，禄薄难供沽酒钱。

卷 235\_29【答严大夫】

贾至

今夕秦天一雁来，梧桐坠叶捣衣催。  
思君独步华亭月，旧馆秋阴生绿苔。

卷 235\_30【送李侍郎赴常州】

贾至

雪晴云散北风寒，楚水吴山道路难。  
今日送君须尽醉，明朝相忆路漫漫。

卷 235\_31【初至巴陵与李十二白、裴九同泛洞庭湖三首】

贾至

江上相逢皆旧游，湘山永望不堪愁。

· 全唐诗 ·

明月秋风洞庭水，孤鸿落叶一扁舟。

枫岸纷纷落叶多，洞庭秋水晚来波。  
乘兴轻舟无近远，白云明月吊湘娥。

江畔枫叶初带霜，渚边菊花亦已黄。  
轻舟落日兴不尽，三湘五湖意何长。

卷 235\_32【西亭春望】

贾至

日长风暖柳青青，北雁归飞入窅冥。  
岳阳城上闻吹笛，能使春心满洞庭。

卷 235\_33【君山】

贾至

湘中老人读黄老，手援紫藟坐碧草。  
春至不知湖水深，日暮忘却巴陵道。

卷 235\_34【洞庭送李十二赴零陵】



· 全唐诗 ·

贾至

今日相逢落叶前，洞庭秋水远连天。  
共说金华旧游处，回看北斗欲潸然。

卷 235\_35【江南送李卿】

贾至

双鹤南飞度楚山，楚南相见忆秦关。  
愿值回风吹羽翼，早随阳雁及春还。

卷 235\_36【送王道士还京】

贾至

一片仙云入帝乡，数声秋雁至衡阳。  
借问清都旧花月，岂知迁客泣潇湘。

卷 235\_37【巴陵夜别王八员外（一作萧静诗，题云三湘有怀）】

贾至

· 全唐诗 ·

柳絮飞时别洛阳，梅花发后到三湘。  
世情已逐浮云散，离恨空随江水长。

卷 235\_38【别裴九弟】

贾至

西江万里向东流，今夜江边驻客舟。  
月色更添春色好，芦风似胜竹风幽。

卷 235\_39【送南给事贬崖州】

贾至

畴昔丹墀与凤池，即今相见两相悲。  
朱崖云梦三千里，欲别俱为恸哭时。

卷 235\_40【重别南给事】

贾至

谪宦三年尚未回，故人今日又重来。  
闻道崖州一千里，今朝须尽数千杯。

· 全唐诗 ·

卷 235\_41 【岳阳楼重宴别王八员外贬长沙】

贾至

江路东连千里潮，青云北望紫微遥。  
莫道巴陵湖水阔，长沙南畔更萧条。

· 全唐诗 ·

## 第二百三十六卷

### 卷 236\_1【紫参歌】

钱起

远公林下满青苔，春药偏宜间石开。往往幽人寻水见，  
时时仙蝶隔云来。阴阳雕刻花如鸟，对凤连鸡一何小。  
春风宛转虎溪傍，紫翼红翘翻霁光。贝叶经前无住色，  
莲花会里暂留香。蓬山才子怜幽性，白云阳春动新咏。  
应知仙卉老云霞，莫赏夭桃满蹊径。

### 卷 236\_2【玛瑙杯歌】

钱起

瑶溪碧岸生奇宝，剖质披心出文藻。良工雕饰明且鲜，  
得成珍器入芳筵。含华炳丽金尊侧，翠斝琼觞忽无色。  
詹弦急管催献酬，倏若飞空生羽翼，湛湛兰英照豹斑，  
满堂词客尽朱颜。花光来去传香袖，霞影高低傍玉山。  
王孙彩笔题新咏，碎锦连珠复辉映。世情贵耳不贵奇，  
谩说海底珊瑚枝。宁及琢磨当妙用，燕歌楚舞长相随。

· 全唐诗 ·

卷 236\_3 【锄药咏】

钱起

药穿林复在巘，浓香秀色深能浅。云气垂来浥露偏，  
松阴占处知春晚。拂曙残莺百啭催，萦泉带石几花开。  
不随飞鸟缘枝去，如笑幽人出谷来。对之不觉忘疏懒，  
废卷荷锄嫌日短。岂无萱草树阶墀，惜尔幽芳世所遗。  
但使芝兰出萧艾，不辞手足皆胼胝。宁学陶潜空嗜酒，  
颓龄舍此事东菑。

卷 236\_4 【病鹤篇】

钱起

独鹤声哀羽摧折，沙头一点留残雪。三山侣伴能远翔，  
五里裴回忍为别。惊群各畏野人机，谁肯相将霞水飞。  
不及川凫长比翼，随波双泛复双归。碧海沧江深且广，  
目尽天倪安得住。云山隔路不隔心，宛颈和鸣长在想。  
何时白雾卷青天，接影追飞太液前。

卷 236\_5 【片玉篇】

钱起

· 全唐诗 ·

至宝未为代所奇，韞灵示璞荆山陲。独使虹光天子识，  
不将清韵世人知。世人所贵惟燕石，美玉对之成瓦砾。  
空山埋照凡几年，古色苍痕宛自然。重溪幂幂暗云树，  
一片荧荧光石泉。美人之鉴明且彻，玉指提携叹奇绝。  
试芳香袖拂莓苔，不觉清心皎冰雪。连城美价幸逢时，  
命代良工岂见遗。试作圭璋礼天地，何如璠璵在阶墀。

卷 236\_6 【画鹤篇（省中作）】

钱起

点素凝姿任画工，霜毛玉羽照帘栊。借问飞鸣华表上，  
何如粉缟彩屏中。文昌宫近芙蓉阙，兰室綈缁香且结。  
炉气朝成缙岭云，银灯夜作华亭月。日暖花明梁燕归，  
应惊片雪在仙闱。主人顾盼千金重，谁肯裴回五里飞。

卷 236\_7 【秋霖曲】

钱起

君不见圣主旰食忧元元，秋风苦雨暗九门。  
凤凰池里沸泉腾，苍龙阙下生云根。阴精离毕太淹度，  
倦鸟将归不知树。愁阴惨淡时殷雷，生灵垫溺若寒灰。  
公卿红粒爨丹桂，黔首白骨封青苔。貂裘玉食张公子，  
炰炙熏天戟门里。且如歌笑日挥金。应笑禹汤能罪己。

· 全唐诗 ·

鹤鸣蛙跃正及时，豹隐兰凋亦可悲。焉得太阿决屏翳，  
还令率土见朝曦。

卷 236\_8【白石枕】

钱起

琢珉胜水碧，所贵素且贞。曾无白圭玷，不作浮磬鸣。  
捧来太阳前，一片新冰清。沈沈风宪地，待尔秋已至。  
璞坚难为功，谁怨晚成器。比德无磷缁，论交亦如此。

卷 236\_9【赋得青城山歌，送杨、杜二郎中赴蜀军】

钱起

蜀山西南千万重，仙经最说青城峰。青城嶽岑倚空碧，  
远压峨眉吞剑壁。锦屏云起易成霞，玉洞花明不知夕。  
星台二妙逐王师，阮瑀军书王粲诗。日落猿声连玉笛，  
晴来山翠傍旌旗。绿萝春月营门近，知君对酒遥相思。

卷 236\_10【送李大夫赴广州】

钱起

· 全唐诗 ·

一贤间气生，麟趾凤凰羽。何意人之望，未为王者辅。  
出镇忽推才，盛哉文且武。南越寄维城，雄雄拥甲兵。  
鼓门通幕府，天井入军营。厥俗多豪侈，古来难致礼。  
唯君饮冰心，可酌贪泉水。忠臣感圣君，徇义不邀勋。  
龙镜逃山魅，霜风破嶂雪。征途凡几转，魏阙如在眼。  
向郡海潮迎，指乡关树远。按节化瓯闽，下车佳政新。  
应令尉陀俗，还作上皇人。支离交俊哲，弱冠至华发。  
昔许霄汉期，今嗟鹏鷃别。图南不可御，惆怅守薄暮。

卷 236\_11【送崔校书从军】

钱起

雁门太守能爱贤，麟阁书生亦投笔。宁唯玉剑报知己，  
更有龙韬佐师律。别马连嘶出御沟，家人几夜望刀头。  
燕南春草伤心色，蓟北黄云满眼愁。闻道轻生能击虏，  
何嗟少壮不封侯。

卷 236\_12【送张将军征西（一作西征）】

钱起

长安少年唯好武，金殿承恩争破虏。沙场烽火隔天山，  
铁骑征西几岁还。战处黑云霾瀚海，愁中明月度阳关。  
玉笛声悲离酌晚，金方路极行人远。计日霜戈尽敌归，



· 全唐诗 ·

回首戎城空落晖。始笑子卿心计失，徒看海上节旄稀。

卷 236\_13【送修武元少府】

钱起

寸禄荣色养，此行宁叹惜。自今黄绶采兰时，  
不厌丹墀芳草色。百战荒城复井田，几家春树带人烟。  
黎氓久厌蓬飘苦，迟尔西南惠月传。

卷 236\_14【送崔十三东游】

钱起

千里有同心，十年一会面。当杯缓箏柱，倏忽催离宴。  
丹凤城头噪晚鸦，行人马首夕阳斜。灞上春风留别袂，  
关东新月宿谁家。官柳依依两乡色，谁能此别不相忆。

卷 236\_15【送邬三落第还乡】

钱起

郢客文章绝世稀，常嗟时命与心违。十年失路谁知己，  
千里思亲独远归。云帆春水将何适，日爱东南暮山碧。

· 全唐诗 ·

关中新月对离尊，江上残花待归客。名宦无媒自古迟，  
穷途此别不堪悲。荷衣垂钓且安命，金马招贤会有时。

卷 236\_16【送马明府赴江陵】

钱起

陶令南行心自永，江天极目澄秋景。万室遥方犬不鸣，  
双凫下处人皆静。清风高兴得湖山，门柳萧条双翟闲。  
黄花满把应相忆，落日登楼北望还。

卷 236\_17【送毕侍御谪居】

钱起

崇兰香死玉簪折，志士吞声甘徇节。忠荇不为明主知，  
悲来莫向时人说，沧浪之水见心清，楚客辞天泪满缨。  
百鸟喧喧噪一鹗，上林高枝亦难托。宁嗟人世弃虞翻，  
且喜江山得康乐。自怜黄绶老婴身，妻子朝来劝隐沦。  
桃花洞里举家去，此别相思复几春。

卷 236\_18【送褚大落第东归】

钱起

· 全唐诗 ·

离琴弹苦调，美人惨向隅。顷来荷策干明主，  
还复扁舟归五湖。汉家侧席明扬久，岂意遗贤在林薮。  
玉堂金马隔青云，墨客儒生皆白首。昨梦芳洲采白蘋，  
归期且喜故园春。稚子只思陶令至，文君不厌马卿贫。  
剡中风月久相忆，池上旧游应再得。酒熟宁孤芳杜春，  
诗成不枉青山色。念此那能不羡归，长杨谏猎事皆违。  
他日东流一乘兴，知君为我扫荆扉。

卷 236\_19【送傅管记赴蜀军】

钱起

终童之死谁继出，燕颔儒生今俊逸。主将早知鸚鵡赋，  
飞书许载蛟龙笔。峨眉玉垒指霞标，鸟没天低幕府遥。  
巴山雨色藏征旆，汉水猿声咽短箫。赐璧腰金应可料，  
才略纵横年且妙。无人不重乐毅贤，何敌能当鲁连啸。  
日暮黄云千里昏，壮心轻别不销魂。劝君用却龙泉剑，  
莫负平生国土恩。

卷 236\_20【送张少府】

钱起

愁云破斜照，别酌劝行子。蓬惊马首风，雁拂天边水。  
寸晷如三岁，离心在万里。

· 全唐诗 ·

卷 236\_21 【行路难】

钱起

君不见明星映空月，太阳朝升光尽歇。  
君不见凋零委路蓬，长风飘举入云中。  
由来人事何尝定，且莫骄奢笑贱穷。

卷 236\_22 【卢龙塞行，韦掌记】

钱起

雨雪纷纷黑山外，行人共指卢龙塞。万里飞沙咽鼓鼙，  
三军杀气凝旌旆。陈琳书记本翩翩，料敌张兵夺酒泉。  
圣主好文兼好武，封侯莫比汉皇年。

卷 236\_23 【效古秋夜长】

钱起

秋汉飞玉霜，北风扫荷香。含情纺织孤灯尽，  
拭泪相思寒漏长。檐前碧云静如水，月吊栖乌啼鸟起。  
谁家少妇事鸳机，锦幕云屏深掩扉。白玉窗中闻落叶，  
应怜寒女独无衣。

· 全唐诗 ·

卷 236\_24 【卧病，李员外题扉而去】

钱起

僻陋病者居，蒿莱行径失。谁知簪绂贵，能问幽忧疾。  
珂声未驻门，兰气先入室。沉疴不冠带，安得候蓬荜。  
清扬去莫寻，离念顷来侵。雀栖高窗静，日出修桐阴。  
枕上忆君子，悄悄唯苦心。

卷 236\_25 【酬王维春夜竹亭赠别】

钱起

山月随客来，主人兴不浅。今宵竹林下，谁觉花源远。  
惆怅曙莺啼，孤云还绝巘。

卷 236\_26 【山中寄时校书】

钱起

蓬莱紫气温如玉，唯予知尔阳春曲，别来几日芳荪绿。  
百花酒满不见君，青山一望心断续。

· 全唐诗 ·

卷 236\_27【送李四擢第归觐省】

钱起

当年贵得意，文字各争名。齐唱阳春曲，唯君金玉声。  
悬黎宝中出，高价世难掩。鸿羽不低飞，龙津徒自险。  
直矜鹦鹉赋，不贵芳桂枝。少俊蔡邕许，长鸣唐举知。  
梁城下熊轼，朱戟何曄耀。才子欲归宁，棠花已含笑。  
高门知庆大，子孝觉亲荣。独揽还珠美，宁唯问绢情。  
离筵不尽醉，掺袂一何早。马蹄西别轻，树色东看好。  
行尘忽不见，惆怅青门道。

卷 236\_28【过曹钧隐居】

钱起

荃蕙有奇性，馨香道为人。不居众芳下，宁老空林春。  
之子秉高节，攻文还守真。素书寸阴尽，流水怨情新。  
济济振缨客，烟霄各致身。谁当举玄晏，不使作良臣。

卷 236\_29【哭曹钧】

钱起

· 全唐诗 ·

苦节推白首，怜君负此生。忠荃名空在，家贫道不行。  
朝来相忆访蓬荜，只谓渊明犹卧疾。忽见江南吊鹤来，  
始知天上文星失。尝恨知音千古稀，那堪夫子九泉归。  
一声邻笛残阳里，酹酒空堂泪满衣。

卷 236\_30 【东阳郡斋中诣南山招韦十（一作东阳郡斋书  
事）】

钱起

霁来海半山，隐映城上起。中峰落照时，残雪翠微里。  
同心久为别，孤兴那对此。良会何迟迟，清扬瞻则迤。

卷 236\_31 【清泥驿迎献王侍御】

钱起

候馆扫清昼，使车出明光。森森入郭树，一道引飞霜。  
仰视骢花白，多惭绶色黄。鹪鹩无羽翼，愿假宪乌翔。

卷 236\_32 【沭阳古渡作】

钱起

· 全唐诗 ·

日落问津处，云霞残碧空。牧牛避田烧，退鹢随潮风。  
回首故乡远，临流此路穷。翩翩青冥去，羨彼高飞鸿。

卷 236\_33【卧疾，答刘道士】

钱起

白露蚕已丝，空林日凄清。寥寥昼扉掩，独卧秋窗明。  
宝字比仙药，羽人寄柴荆。长吟想风驭，恍若升蓬瀛。

卷 236\_34【梦寻西山准上人】

钱起

别处秋泉声，至今犹在耳。何尝梦魂去，不见雪山子。  
新月隔林时，千峰翠微里。言忘心更寂，迹灭云自起。  
觉来纓上尘，如洗功德水。

卷 236\_35【长安旅宿】

钱起

九秋旅夜长，万感何时歇。蕙花渐寒暮，心事犹楚越。  
直躬遭世道，咫尺隔天阙。每闻长乐钟，载泣灵台月。



· 全唐诗 ·

明旦北门外，归途堪白发。

卷 236\_36 【过桐柏山】

钱起

秋风过楚山，山静秋声晚。赏心无定极，仙步亦清远。  
返照云窦空，寒流石苔浅。羽人昔已去，灵迹欣方践。  
投策谢归途，世缘从此遣。

卷 236\_37 【李士曹厅对雨】

钱起

春雨暗重城，讼庭深更寂。终朝人吏少，满院烟云集。  
湿鸟压花枝，新苔宜砌石。掾曹富文史，清兴对词客。  
爱尔蕙兰丛，芳香饱时泽。

卷 236\_38 【登胜果寺南楼，雨中望严协律】

钱起

微雨侵晚阳，连山半藏碧。林端陟香榭，云外迟来客。  
孤村凝片烟，去水生远白。但佳川原趣，不觉城池夕。

· 全唐诗 ·

更喜眼中人，清光渐咫尺。

卷 236\_39【冬夜题旅馆】

钱起

退飞忆林薮，乐业羨黎庶。四海尽穷途，一枝无宿处。  
严冬北风急，中夜哀鸿去。孤烛思何深，寒窗坐难曙。  
劳歌待明发，惆怅盈百虑。

卷 236\_40【自终南山晚归】

钱起

采苓日往还，得性非樵隐。白水到初阔，青山辞尚近。  
绝境胜无倪，归途兴不尽。沮溺时返顾，牛羊自相引。  
逍遥不外求，尘虑从兹泯。

卷 236\_41【早渡伊川见旧邻作】

钱起

鸛鸡鸣早霜，秋水寒旅涉。渔人昔邻舍，相见具舟楫。  
出浦兴未尽，向山心更惬。村落通白云，茅茨隐红叶。

· 全唐诗 ·

东皋满时稼，归客欣复业。

卷 236\_42【夕发箭场岩下作】

钱起

行役不遑安，在幽机转发。山谷无明晦，溪霞自兴没。  
朝栉杉下风，夕饮石上月。懿尔青云士，垂缨朝凤阙。  
宁知采竹人，每食惭薇蕨。

卷 236\_43【同李五夕次香山精舍访宪上人】

钱起

彼岸闻山钟，仙舟过茗水。松门入幽映，石径趋迢迤。  
初月开草堂，远公方觐止。忘言在闲夜，凝念得微理。  
泠泠功德池，相与涤心耳。

卷 236\_44【雨中望海上，怀郁林观中道侣】

钱起

山观海头雨，悬沫动烟树。只疑苍茫里，郁岛欲飞去。  
大块怒天吴，惊潮荡云路。群真俨盈想，一苇不可渡。

· 全唐诗 ·

惆怅赤城期，愿假轻鸿驭。

卷 236\_45【广德初銮驾出关后登高愁望二首】

钱起

长安不可望，远处边愁起。辇毂混戎夷，山河空表里。  
黄云压城阙，斜照移烽垒。汉帜远成霞，胡马来如蚁。  
不知涿鹿战，早晚蚩尤死。渴日候河清，沉忧催暮齿。

愁看秦川色，惨惨云景晦。乾坤暂运行，品物遗覆载。  
黄尘涨戎马，紫气随龙旆。掩泣指关东，日月妖氛外。  
臣心寄远水，朝海去如带。周德更休明，天衢伫开泰。

卷 236\_46【独往覆釜山，寄郎士元】

钱起

赏心无远近，芳月好登望。胜事引幽人，山下复山上。  
将寻洞中药，复爱湖外嶂。古壁苔入云，阴溪树穿浪。  
谁言世缘绝，更惜知音旷。莺啼绿萝春，回首还惆怅。

卷 236\_47【送王季友赴洪州幕下】

· 全唐诗 ·

钱起

列郡皆用武，南征所从谁。诸侯重才略，见子如琼枝。  
抚剑感知己，出门方远辞。烟波带幕府，海日生红旗。  
问我何功德，负恩留玉墀。销魂把别袂，愧尔酬明时。

卷 236\_48【客舍赠郑贲】

钱起

结交意不薄，匪席言莫违。世义随波久，人生知己稀。  
先鸣誓相达，未遇还相依。一望金门诏，三看黄鸟飞。  
暝投同旅食，朝出易儒衣。嵇向林庐接，携手行将归。

卷 236\_49【山中春仲寄汝上王恒、颍川沈冲（一作中）】

钱起

隐者守恬泊，春山日深净。谁知蟠木材，得性无人境。  
座隅泉出洞，竹上云起岭。饥狖入山厨，饮虹过药井。  
前溪堪放逸，仲月好风景。游目来远思，摘芳寄汝颖。

卷 236\_50【南中春意】

· 全唐诗 ·

钱起

入仕无知言，游方随世道。平生愿开济，遇物干怀抱。  
已阻青云期，甘同散樗老。客游南海曲，坐见韶阳早。  
旧国别佳人，他乡思芳草。惜无鸿鹄翅，安得凌苍昊。

卷 236\_51【东陵药堂寄张道士】

钱起

木落苍山空，当轩秋水色。清旦振衣坐，永吟意何极。  
愿言金丹寿，一假鸾凤翼。日夕开真经，言忘心更默。  
玄都有仙子，采药早相识。烟霞难再期，焚香空叹息。

卷 236\_52【苦雨忆皇甫冉】

钱起

凉雨门巷深，穷居成习静。独吟愁霖雨，更使秋思永。  
疲痾苦昏垫，日夕开轩屏。草木森已悲，衾裯清且冷。  
如何游宦客，江海随泛梗。延首长相思，忧襟孰能整。

卷 236\_53【寄任山人】

· 全唐诗 ·

钱起

天阶崇黼黻，世路有趋竞。独抱中孚爻，谁知苦寒咏。  
行潦难朝海，散材空遇圣。岂无鸣凤时，其如问津命。  
所思青山郭，再梦绿萝径。林泉春可游，羡尔得其性。

卷 236\_54 【登秦岭半岩遇雨】

钱起

屏翳忽腾气，浮阳惨无晖。千峰挂飞雨，百尺摇翠微。  
震电闪云径，奔流翻石矶。倚岩假松盖，临水羨荷衣。  
不得采苓去，空思乘月归。且怜东皋上，水色侵荆扉。

卷 236\_55 【杪秋南山西峰题准上人兰若】

钱起

向山看霁色，步步豁幽性。返照乱流明，寒空千嶂净。  
石门有余好，霞残月欲映。上诣远公庐，孤峰悬一径。  
云里隔窗火，松下闻山磬。客到两忘言，猿心与禅定。

卷 236\_56 【田园雨后赠邻人】

· 全唐诗 ·

钱起

安排常任性，偃卧晚开户。樵客荷蓑归，向来春山雨。  
残云虹未落，返景霞初吐。时鸟鸣村墟，新泉绕林圃。  
尧年尚恬泊，邻里成太古。室迩人遂遥，相思怨芳杜。

卷 236\_57【天门谷题孙逸人石壁】

钱起

崖石乱流处，竹深斜照归。主人卧礧石，心耳涤清晖。  
春雷近作解，空谷半芳菲。云栋彩虹宿，药圃蝴蝶飞。  
恶器慕嘉遁，几夜瞻少微。相见竟何说，忘情同息机。

卷 236\_58【蓝溪休沐，寄赵八给事】

钱起

虫鸣归旧里，田野秋农闲。即事敦夙尚，衡门方再关。  
夕阳入东篱，爽气高前山。霜蕙后时老，巢禽知暝还。  
侍臣黄枢宠，鸣玉青云间。肯想观鱼处，寒泉照发斑。

卷 236\_59【游辋川至南山，寄谷口王十六】



· 全唐诗 ·

钱起

山色不厌远，我行随处深。迹幽青萝径，思绝孤霞岑。  
独鹤引过浦，鸣猿呼入林。褰裳百泉里，一步一清心。  
王子在何处，隔云鸡犬音。折麻定延伫，乘月期招寻。

卷 236\_60【蓝田溪与渔者宿】

钱起

独游屡忘归，况此隐沦处。濯发清冷泉，月明不能去。  
更怜垂纶叟，静若沙上鹭。一论白云心，千里沧洲趣。  
芦中夜火尽，浦口秋山曙。叹息分枝禽，何时更相遇。

卷 236\_61【淮上别范大】

钱起

悲风陨凉叶，送归怨南楚。穷年将别离，寸晷申宴语。  
长淮流不尽，征棹忽复举。碧落半愁云，黄鹤时顾侣。  
游宦且未达，前途各修阻。分袂一相嗟，良辰更何许。

卷 236\_62【离居夜雨，奉寄李京兆】

· 全唐诗 ·

钱起

永夜不可度，蛩吟秋雨滴。寂寞想章台，始叹云泥隔。  
雷声匪君车，犹时过我庐。电影非君烛，犹能明我目。  
如何琼树枝，梦里看不足。望望佳期阻，愁生寒草绿。

卷 236\_63【叹毕少府以持法无隐见系】

钱起

用法本禁邪，尽心翻自极。毕公在囹圄，世事何纠纆。  
翠凤呈其瑞，虞罗寄铍翼。囚中千念时，窗外百花色。  
落景闭圆扉，春虫网丛棘。古人不念文，纷泪莫沾臆。

卷 236\_64【小园招隐】

钱起

支离鲜兄弟，形影如手足。但遂饮冰节，甘辞代耕禄。  
斑衣在林巷，始觉无羁束。交柯低户阴，闲鸟将雏宿。  
穷通世情阻，日夜苔径绿。谁言北郭贫，能分晏婴粟。

卷 236\_65【过温逸人旧居】

· 全唐诗 ·

钱起

返真难合道，怀旧仍无吊。浮俗渐浇淳，斯人谁继妙。  
声容在心耳，宁觉阻言笑。玄堂闭几春，拱木齐云峤。  
鹤传居士舞，猿得苏门啸。酹酒片阳微，空山想埋照。

卷 236\_66 【县内水亭晨兴听讼】

钱起

晨光起宿露，池上判黎氓。借问秋泉色，何如拙宦情。  
磨铅辱利用，策蹇愁前程。昨夜明月满，中心如鹊惊。  
负恩时易失，多病绩难成。会惜寒塘晚，霜风吹杜蘅。

卷 236\_67 【海畔秋思】

钱起

匡济难道合，去留随兴牵。偶为谢客事，不顾平子田。  
魏阙贲翘楚，此身长弃捐。箕裘空在念，咄咄谁推贤。  
无用即明代，养痾仍壮年。日夕望佳期，帝乡路几千。  
秋风晨夜起，零落愁芳荃。

卷 236\_68 【太子李舍人城东别业（李祭酒别业俯视川林前

· 全唐诗 ·

带雷岫 )】

钱起

南山转群木，昏晓拥山翠。小泽近龙居，清苍常雨气。  
君家北原上，千金买胜事。丹阙退朝回，白云迎赏至。  
新晴村落外，处处烟景异。片水明断岸，馀霞入古寺。  
东皋指归翼，目尽有馀意。

卷 236\_69【谷口新居寄同省朋故】

钱起

种黍傍烟溪，榛芜兼沮洳。亦知生计薄，所贵隐身处。  
橡栗石上村，莓苔水中路。萧然授衣日，得此还山趣。  
汲井爱秋泉，结茅因古树。闲云与幽鸟，对我不能去。  
寄谢鸳鹭群，狎鸥拙所慕。

卷 236\_70【京兆尹厅前甘棠树降甘露】

钱起

内史用尧意，理京宣惠慈。气和祥则降，孰谓天难知。  
济旱露为兆，有如埧应箴。岂无夭桃树，洒此甘棠枝。

· 全唐诗 ·

玉色与人净，珠光临笔垂。协风与之俱，物性皆熙熙。  
何必凤池上，方看作霖时。

卷 236\_71【秋夜作】

钱起

万计各无成，寸心日悠漫。浮生竟何穷，巧历不能算。  
流落四海间，辛勤百年半。商歌向秋月，哀韵兼浩叹。  
寤寐怨佳期，美人隔霄汉。寒云度穷水，别业绕垂幔。  
窗中问谈鸡，长夜何时旦。

卷 236\_72【观村人牧山田】

钱起

六府且未盈，三农争务作。贫民乏井税，墾土皆垦凿。  
禾黍入寒云，茫茫半山郭。秋来积霖雨，霜降方铄获。  
中田聚黎甿，反景空村落。顾惭不耕者，微禄同卫鹤。  
庶追周任言，敢负谢生诺。

卷 236\_73【裴侍郎湘川回，以青竹筒相遗，因而赠之】

钱起

· 全唐诗 ·

楚竹青玉润，从来湘水阴。缄书取直节，君子知虚心。  
入用随宪简，积文不受金。体将丹凤直，色映秋霜深。  
宁肯假伶伦，谬为龙凤吟。唯将翰院客，昔秘瑶华音。  
长跪捧嘉祝，岁寒惭所钦。

卷 236\_74【东城初陷，与薛员外、王补阙暝投南山佛寺】

钱起

日昃石门里，松声山寺寒。香云空静影，定水无惊湍。  
洗足解尘缨，忽觉天形宽。清钟扬虚谷，微月深重峦。  
噫我朝露世，翻浮与波澜。行运遭忧患，何缘亲盘桓。  
庶将镜中象，尽作无生观。

卷 236\_75【奉和张荆州巡农晚望】

钱起

太清霁云雷，阳春陶物象。明牧行春令，仁风助升长。  
时和俗勤业，播殖农厥壤。阴阴桑陌连，漠漠水田广。  
郡中忽无事，方外还独往。日暮驻归轩，湖山有佳赏。  
宣城传逸韵，千载谁此响。

卷 236\_76【送包何东游】

· 全唐诗 ·

钱起

水国尝独往，送君还念兹。湖山远近色，昏旦烟霞时。  
子好谢公迹，常吟孤屿诗。果乘扁舟去，若与白鸥期。  
野趣及春好，客游欣此辞。入云投馆僻，采碧过帆迟。  
江上日回首，琴中劳别思。春鸿刷归翼，一寄杜蘅枝。

卷 236\_77【酬陶六辞秩归旧居见柬】

钱起

靖节昔高尚，令孙嗣清徽。旧庐云峰下，献岁车骑归。  
去俗因解绶，忆山得采薇。田畴春事起，里巷相寻稀。  
渊明醉乘兴，闲门只掩扉。花禽惊曙月，邻女上鸣机。  
毕娶愿已果，养恬志宁违。吾当挂朝服，同尔缉荷衣。

卷 236\_78【奉使采箭箬竹谷中晨兴赴岭】

钱起

孤客倦夜坐，闻猿乘早发。背溪已斜汉，登栈尚残月。  
重峰转森爽，幽步更超越。云木耸鹤巢，风萝扫虎穴。  
人群徒自远，世役终难歇。入山非买山，采竹异采蕨。  
谁见子牟意，悵劳书魏阙。

· 全唐诗 ·

卷 236\_79【同严逸人东溪泛舟】

钱起

子陵江海心，高迹此闲放。渔舟在溪水，曾是敦夙尚。  
朝霁收云物，垂纶独清旷。寒花古岸傍，唳鹤晴沙上。  
纷吾好贞逸，不远来相访。已接方外游，仍陪郢中唱。  
欢言尽佳酌，高兴延秋望。日暮浩歌还，红霞乱青嶂。

卷 236\_80【过沈氏山居】

钱起

鸡鸣孤烟起，静者能卜筑。乔木出云心，闲门掩山腹。  
贫交喜相见，把臂欢不足。空林留宴言，永日清耳目。  
泉声冷尊俎，荷气香童仆。往往仙犬鸣，樵人度深竹。  
酒酣出谷口，世网何羁束。始愿今不从，区区折腰禄。

卷 236\_81【赠柏岩老人】

钱起

日与麋鹿群，贤哉买山叟。庞眉忽相见，避世一何久。  
林栖古崖曲，野事佳春后。瓠叶覆荆扉，栗苞垂瓮牖。



· 全唐诗 ·

独歌还独酌，不耕亦不耦。硖田隔云溪，多雨长稂莠。  
烟霞得情性，身世同刍狗。寄谢营道人，天真此翁有。

卷 236\_82【送薛判官赴蜀】

钱起

横笛声转悲，羽觞酣欲别。举目叩关远，离心不可说。  
边陲劳帝念，日下降才杰。路极巴水长，天衔剑峰缺。  
单车动夙夜，越境正炎节。星桥过客稀，火井蒸云热。  
阴符能制胜，千里在坐决。始见儒者雄，长缨系馀孽。

卷 236\_83【诏许昌崔明府拜补阙】

钱起

儒者久营道，诏书方问贤。至精一耀世，高步谁同年。  
何树可栖凤，高梧枝拂天。脱身凫舄里，载笔虎闾前。  
日月传轩后，衣冠真列仙。则知骊龙珠，不秘清冷泉。  
才子贵难见，郢歌空复传。惜哉效顰客，心想劳婵娟。

卷 236\_84【仲春晚寻覆釜山】

钱起

· 全唐诗 ·

蝴蝶弄和风，飞花不知晚。王孙寻芳草，步步忘路远。  
况我爱青山，涉趣皆游践。萦回必中路，阴晦阳复显。  
古岸生新泉，霞峰映雪巘。交枝花色异，奇石云根浅。  
碧洞志忘归，紫芝行可搴。应嗤嵇叔夜，林卧方沉湎。

卷 236\_85 【赠东邻郑少府】

钱起

一闻白雪唱，愿见清扬久。谁谓结绶来，得陪趋府后。  
小邑蓝溪上，卑栖愜所偶。忘言复连墙，片月亦携手。  
草色同春径，莺声共高柳。美景百花时，平生一杯酒。  
圣朝法天地，以我为刍狗。秩满归白云，期君访谷口。

卷 236\_86 【谢张法曹万顷小山暇景见忆】

钱起

乐道随去处，养和解朝簪。茅堂近丹阙，佳致亦何深。  
退食不趋府，忘机还在林。清风乱流上，永日小山阴。  
解箨雨中竹，将雏花际禽。物华对幽寂，弦酌兼咏吟。  
自昔仰高步，及兹劳所钦。郢歌叨继组，知己复知音。

卷 236\_87 【罢章陵令山居过中峰道者二首】

· 全唐诗 ·

钱起

宁辞园令秩，不改渊明调。解印无与言，见山始一笑。  
幽人还绝境，谁道苦奔峭。随云剩渡溪，出门更垂钓。  
吾庐青霞里，窗树玄猿啸。微月清风来，方知散发妙。

丘壑趣如此，暮年始栖偃。赖遇无心云，不笑归来晚。  
鸣鸠拂红枝，初服傍清沚。昨日山僧来，犹嫌嘉遁浅。  
托君紫阳家，路灭心更远。梯云创其居，抱犊上绝巘。  
杏田溪一曲，霞境峰几转。路石挂飞泉，谢公应在眼。  
愿言携手去，采药长不返。

卷 236\_88【登覆釜山遇道人二首】

钱起

晨策趣无涯，名山深转秀。三休变覆景，万转迷宇宙。  
攀崖到天窗，入洞穷玉溜。侧径蹲怪石，飞萝掷惊狖。  
花间炼药人，鸡犬和乳窦。散发便迎客，采芝仍满袖。  
郭璞赋游仙，始愿今可就。

真气重嶂里，知君嘉遁幽。山阶压丹穴，药井通湫流。  
道者带经出，洞中携我游。欲骖白霓去，且为紫芝留。  
忽忆武陵事，别家疑数秋。

· 全唐诗 ·

卷 236\_89 【寻华山云台观道士】

钱起

秋日西山明，胜趣引孤策。桃源数曲尽，洞口两岸坼。  
还从罔象来，忽得仙灵宅。霓裳谁之子，霞酌能止客。  
残阳在翠微，携手更登历。林行拂烟雨，溪望乱金碧。  
飞鸟下天窗，袅松际云壁。稍寻玄踪远，宛入寥天寂。  
愿言葛仙翁，终年炼玉液。

卷 236\_90 【海上卧病寄王临】

钱起

离客穷海阴，萧辰归思结。一随浮云滞，几怨黄鹄别。  
妙年即沉痾，生事多所阙。剑中负明义，枕上惜玄发。  
之子良史才，华簪偶时哲。相思千里道，愁望飞鸟绝。  
岁暮冰雪寒，淮湖不可越。百年去心虑，孤影守薄劣。  
独馀慕侣情，金石无休歇。

卷 236\_91 【登玉山诸峰，偶至悟真寺】

钱起

· 全唐诗 ·

郭南云水佳，讼简野情发。紫芝每相引，黄绶不能继。  
稍入石门幽，始知灵境绝。冥搜未寸晷，仙径俄九折。  
蟠木盖石梁，崩岩露云穴。数峰拔昆仑，秀色与空澈。  
玉气交晴虹，桂花留曙月。半岩采珉者，一点如片雪。  
真赏无前程，奇观宁暂辍。更闻东林磬，可听不可说。  
兴中寻觉化，寂尔诸象灭。

卷 236\_92【长安客舍，赠李行父明府】

钱起

藏器待时少，知人自古难。遂令丹穴凤，晚食金琅玕。  
谁谓兵戈际，鸣琴方一弹。理烦善用简，济猛能兼宽。  
夙夜念黎庶，寝兴非宴安。洪波未静壑，何树不惊鸾。  
鳧舄傍京辇，甿心悬灌坛。高槐暗苦雨，长剑生秋寒。  
旅食还为客，饥年亦尽欢。亲劳携斗水，往往救泥蟠。  
但恐酬明义，蹉跎芳岁阑。

卷 236\_93【美杨侍御清文见示】

钱起

伯牙道丧来，弦绝无人续。谁知绝唱后，更有难和曲。  
层峰与清流，逸势竞奔蹙。清文不出户，仿佛皆在目。  
雾雪看满怀，兰茝坐盈掬。孤光碧潭月，一片昆仑玉。

· 全唐诗 ·

初见歌阳春，韶光变枯木。再见吟白雪，便觉云肃肃。  
则知造化源，方寸能展缩。斯文不易遇，清爽心岂足。  
愿言书诸绅，可以为佩服。

卷 236\_94【山居新种花药，与道士同游赋诗】

钱起

自乐鱼鸟性，宁求农牧资。浅深爱岩壑，疏凿尽幽奇。  
雨花相助好，莺鸣春草时。种兰入山翠，引葛上花枝。  
风露拆红紫，缘溪复映池。新泉香杜若，片石引江蓠。  
宛谓武陵洞，潜应造化移。杖策携烟客，满袖掇芳蕤。  
蝴蝶舞留我，仙鸡闲傍篱。但令黄精熟，不虑韶光迟。  
笑指云萝径，樵人那得知。

卷 236\_95【初黄绶赴蓝田县作】

钱起

蟠木无匠伯，终年弃山樊。苦心非良知，安得入君门。  
忽忝英达顾，宁窥造化恩。萤光起腐草，云翼腾沉鲲。  
片石世何用，良工心所存。一叨尉京甸，三省惭黎元。  
贤尹正趋府，仆夫俨归轩。眼中县胥色，耳里苍生言。  
居人散山水，即景真桃源。鹿聚入田径，鸡鸣隔岭村。  
餐和俗久清，到邑政空论。且嘉讼庭寂，前阶满芳荪。

· 全唐诗 ·

卷 236\_96 【归义寺题震上人壁（寺即神尧皇帝读书之所）】

钱起

入谷逢雨花，香绿引幽步。招提饶泉石，万转同一趣。  
向背森碧峰，浅深罗古树。尧皇未登极，此地曾隐雾。  
秘谶得神谋，因高思虎踞。太阳忽临照，物象俄光煦。  
梵王宫始开，长者金先布。白水入禅境，砀山通觉路。  
往往无心云，犹起潜龙处。仍闻七祖后，佛子继调御。  
溪鸟投慧灯，山蝉饱甘露。不作解缨客，宁知舍筏喻。  
身世已悟空，归途复何去。

· 全唐诗 ·

## 第二百三十七卷

卷 237\_1 【奉和圣制登会昌山应制（一作赵起诗）】

钱起

睿想入希夷，真游到具茨。玉銮登嶂远，云辂出花迟。  
泉壑凝神处，阳和布泽时。六龙多顺动，四海正雍熙。

卷 237\_2 【省中对雪寄元判官、拾遗昆季（一作寄谢舍人昆季）】

钱起

万点瑶台雪，飞来锦帐前。琼枝应比净，鹤发敢争先。  
散影成花月，流光透竹烟。今朝谢家兴，几处郢歌传。

卷 237\_3 【山斋独坐，喜玄上人夕至（一作见访）】

钱起



· 全唐诗 ·

舍下虎溪径，烟霞入暝开。柴门兼竹静，山月与僧来。  
心莹红莲水，言忘绿茗杯。前峰曙更好，斜汉欲西回。

卷 237\_4【秋夜寄张、韦二主簿】

钱起

凉夜褰帘好，轻云过月初。碧空河色浅，红叶露声虚。  
道阻天难问，机忘世易疏。不知双翠凤，栖棘复何如。

卷 237\_5【归故山路逢邻居隐者】

钱起

握手云栖路，潜然恨几重。谁知绿林盗，长占彩霞峰。  
心死池塘草，声悲石径松。无因芳杜月，琴酒更相逢。

卷 237\_6【落第，刘拾遗相送东归】

钱起

不醉百花酒，伤心千里归。独收和氏玉，还采旧山薇。  
出处离心尽，荣枯会面稀。预愁芳草色，一径入衡闱。

· 全唐诗 ·

卷 237\_7【和刘七读书】

钱起

夜雨深馆静，苦心黄卷前。云阴留墨沼，萤影傍华编。  
梦鸟富清藻，通经仍妙年。何愁丹穴凤，不饮玉池泉。

卷 237\_8【早下江宁】

钱起

暮天微雨散，凉吹片帆轻。云物高秋节，山川孤客情。  
霜蘋留楚水，寒雁别吴城。宿浦有归梦，愁猿莫夜鸣。

卷 237\_9【登复州南楼】

钱起

孤树延春日，他山卷曙霞。客心湖上雁，归思日边花。  
行李迷方久，归期涉岁赊。故人云路隔，何处寄瑶华。

卷 237\_10【江陵晦日陪诸官泛舟】

· 全唐诗 ·

钱起

节物堪为乐，江湖有主人。舟行深更好，趣久主弥新。  
尊酒平生意，烟花异国春。城南无夜月，长袖莫留宾。

卷 237\_11【县城秋夕】

钱起

山城日易夕，愁生先掩扉。俸薄不沽酒，家贫忘授衣。  
露重蕙花落，月冷莎鸡飞。效拙惭无补，云林叹再归。

卷 237\_12【秋夜梁七兵曹同宿二首】

钱起

一笑不可得，同心相见稀。摘菱频赏酒，待月未扃扉。  
星影低惊鹊，虫声傍旅衣。卑栖岁已晚，共羡雁南飞。

好欲弃吾道，今宵又遇君。老夫相劝酒，稚子待题文。  
月下谁家笛，城头几片云。如何此幽兴，明日重离群。

卷 237\_13【和万年成少府寓直】

· 全唐诗 ·

钱起

赤县新秋夜，文人藻思催。钟声自仙掖，月色近霜台。  
一叶兼萤度，孤云带雁来。明朝紫书下，应问长卿才。

卷 237\_14【春夜过长孙绎别业】

钱起

佳期难再得，清夜此云林。带竹新泉冷，穿花片月深。  
含毫凝逸思，酌水话幽心。不觉星河转，山枝惊曙禽。

卷 237\_15【题温处士山居】

钱起

谁知白云外，别有绿萝春。苔绕溪边径，花深洞里人。  
逸妻看种药，稚子伴垂纶。颖上逃尧者，何如此养真。

卷 237\_16【题陈季壁】

钱起

郢人何苦调，饮水仍布衾。烟火昼不起，蓬蒿春欲深。

· 全唐诗 ·

前庭少乔木，邻舍闻新禽。虽有征贤诏，终伤不遇心。

卷 237\_17【赠邻居齐六司仓】

钱起

沉冥众所遗，咫尺绝佳期。始觉衡门下，翛然太古时。  
鸡声共邻巷，烛影隔茅茨。坐惜牛羊径，芳荪白露滋。

卷 237\_18【送征雁】

钱起

秋空万里净，嘹唳独南征。风急翻霜冷，云开见月惊。  
塞长怯去翼，影灭有馀声。怅望遥天外，乡愁满目生。

卷 237\_19【宴郁林观张道士房】

钱起

灭迹人间世，忘归象外情。竹坛秋月冷，山殿夜钟清。  
仙侣披云集，霞杯达曙倾。同欢不可再，朝暮赤龙迎。

· 全唐诗 ·

卷 237\_20 【秋夕与梁锬文宴】

钱起

客到衡门下，林香蕙草时。好风能自至，明月不须期。  
秋日翻荷影，晴光脆柳枝。留欢美清夜，宁觉晓钟迟。

卷 237\_21 【哭空寂寺玄上人（一作少林寺哭晖上人）】

钱起

凄然双树下，垂泪远公房。灯续生前火，炉添没后香。  
阴阶明片雪，寒竹响空廊。寂灭应为乐，尘心徒自伤。

卷 237\_22 【题精舍寺】

钱起

胜景不易遇，入门神顿清。房房占山色，处处分泉声。  
诗思竹间得，道心松下生。何时来此地，摆落世间情。

卷 237\_23 【开元观遇张侍御】

· 全唐诗 ·

钱起

碧落忘归处，佳期不厌逢。晚凉生玉井，新暑避烟松。  
欲醉流霞酌，还醒度竹钟。更怜琪树下，历历见遥峰。

卷 237\_24【和人秋归终南山别业】

钱起

旧居三顾后，晚节重幽寻。野径到门尽，山窗连竹阴。  
昔年莺出谷，今日凤归林。物外凌云操，谁能继此心。

卷 237\_25【故相国苗公挽歌】

钱起

灞陵谁宠葬，汉主念萧何。盛业留青史，浮荣逐逝波。  
陇云仍作雨，薤露已成歌。凄怆平津阁，秋风吊客过。

卷 237\_26【酬刘员外雨中见寄】

钱起

苦雨滴兰砌，秋风生葛衣。潢污三径绝，砧杵四邻稀。

· 全唐诗 ·

分与玄豹隐，不为湘燕飞。惭君角巾折，犹肯问衡闱。

卷 237\_27【赋得归云送李山人归华山】

钱起

秀色横千里，归云积几重。欲依毛女岫，初卷少姨峰。  
盖影随征马，衣香拂卧龙。只应函谷上，真气日溶溶。

卷 237\_28【过裴长官新亭】

钱起

茅屋多新意，芳林昨试移。野人知石路，戏鸟认花枝。  
慢水萦蓬户，闲云挂竹篱。到家成一醉，归马不能骑。

卷 237\_29【寄郢州郎士元使君】

钱起

龙节知无事，江城不掩扉。诗传过客远，书到故人稀。  
坐啸看潮起，行春送雁归。望舒三五夜，思尽谢玄晖。



· 全唐诗 ·

卷 237\_30【过长孙宅与朗上人茶会】

钱起

偶与息心侣，忘归才子家。玄谈兼藻思，绿茗代榴花。  
岸帻看云卷，含毫任景斜。松乔若逢此，不复醉流霞。

卷 237\_31【下第题长安客舍】

钱起

不遂青云望，愁看黄鸟飞。梨花度寒食，客子未春衣。  
世事随时变，交情与我违。空馀主人柳，相见却依依。

卷 237\_32【陪考功王员外城东池亭宴】

钱起

无双锦帐郎，绝境有林塘。鹤静疏群羽，蓬开失众芳。  
晴山看不厌，流水趣何长。日晚催归骑，钟声下夕阳。

卷 237\_33【过孙员外蓝田山居】

· 全唐诗 ·

钱起

不知香署客，谢病翠微间。去幄兰将老，辞车雉亦闲。  
近窗云出洞，当户竹连山。对酒溪霞晚，家人采蕨还。

卷 237\_34【秋园晚沐】

钱起

黄卷在穷巷，归来生道心。五株衰柳下，三径小园深。  
倒薤翻成字，寒花不假林。庞眉谢群彦，独酌且闲吟。

卷 237\_35【穷秋对雨】

钱起

晦日连苦雨，动息更逄回。生事萍无定，愁心云不开。  
翟门悲暝雀，墨灶上寒苔。始信宣城守，乘流畏曝腮。

卷 237\_36【裴迪南门秋夜对月（一作裴迪书斋玩月之作）】

钱起

· 全唐诗 ·

夜来诗酒兴，月满谢公楼。影闭重门静，寒生独树秋。  
鹊惊随叶散，萤远入烟流。今夕遥天末，清光几处愁。

卷 237\_37【和蜀县段明府秋城望归期】

钱起

制锦蜀江静，飞凫汉阙遥。一兹风靡草，再视露盈条。  
旅望多愁思，秋天更泐寥。河阳传丽藻，清韵入歌谣。

卷 237\_38【晚归蓝田，酬王维给事（一作中书常舍人）赠别】

钱起

卑栖却得性，每与白云归。徇禄仍怀橘，看山免采薇。  
暮禽先去马，新月待开扉。霄汉时回首，知音青琐闱。

卷 237\_39【再得华侍御书，闻巴中卧病（一作疾）】

钱起

芳信来相续，同心远更亲。数重云外树，不隔眼中人。  
梦寐花骢色，相思黄鸟春。更闻公干病，一夜二毛新。

· 全唐诗 ·

卷 237\_40【宿新里馆】

钱起

愁人待晓鸡，秋雨暗凄凄。度烛萤时灭，传书雁渐低。  
客来知计误，梦里泣津迷。无以逃悲思，寒蛩处处啼。

卷 237\_41【谷口书斋寄杨补阙】

钱起

泉壑带茅茨，云霞生薜帷。竹怜新雨后，山爱夕阳时。  
闲鹭栖常早，秋花落更迟。家童扫萝径，昨与故人期。

卷 237\_42【衡门春夜】

钱起

不厌晴林下，微风度葛巾。宁唯北窗月，自谓上皇人。  
丛筱轻新暑，孤花占晚春。寄言庄叟蝶，与尔得天真。

卷 237\_43【题吴通微主人】

· 全唐诗 ·

钱起

食贫无尽日，有愿几时谐。长啸秋光晚，谁知志士怀。  
朝烟不起灶，寒叶欲连阶。饮水仍留我，孤灯点夜斋。

卷 237\_44【晚次宿预馆】

钱起

乡心不可问，秋气又相逢。飘泊方千里，离悲复几重。  
回云随去雁，寒露滴鸣蛩。延颈遥天末，如闻故国钟。

卷 237\_45【蓝上茅茨期王维补阙】

钱起

山中人不见，云去夕阳过。浅濑寒鱼少，丛兰秋蝶多。  
老年疏世事，幽性乐天和。酒熟思才子，溪头望玉珂。

卷 237\_46【春宵寓直】

钱起

养拙惯云卧，为郎如鸟栖。不知仙阁峻，惟觉玉绳低。

· 全唐诗 ·

帐喜香烟暖，诗惭赐笔题。未央春漏促，残梦谢晨鸡。

卷 237\_47【新昌里言怀】

钱起

性拙偶从宦，心闲多掩扉。虽看北堂草，不望旧山薇。  
花月霁来好，云泉堪梦归。如何建章漏，催著早朝衣。

卷 237\_48【秋夜寄袁中丞、王员外】

钱起

一夕盈千念，方知别者劳。衰荣难会面，魂梦暂同袍。  
片月临阶早，晴河度雁高。应怜蒋生径，秋露满蓬蒿。

卷 237\_49【九日闲居寄登高数子】

钱起

初服栖穷巷，重阳忆旧游。门闲谢病日，心醉授衣秋。  
酒尽寒花笑，庭空暝雀愁。今朝落帽客，几处管弦留。

· 全唐诗 ·

卷 237\_50 【晚入宣城界（一作春江晚行）】

钱起

斜日片帆阴，春风孤客心。山来指樵路，岸去惜花林。  
海气蒸云黑，潮声隔雨深。乡愁不可道，浦宿听猿吟。

卷 237\_51 【静夜酬通上人问疾】

钱起

东林生早凉，高枕远公房。大士看心后，中宵清漏长。  
惊蝉出暗柳，微月隐回廊。何事沈痾久，含毫问药王。

卷 237\_52 【奉陪使君十四叔晚憩大云门寺】

钱起

野寺千家外，闲行晚暂过。炎氛临水尽，夕照傍林多。  
境对知心妄，人安觉政和。绳床摇麈尾，佳趣满沧波。

卷 237\_53 【省中春暮酬嵩阳焦道士见招】

· 全唐诗 ·

钱起

朝花飞暝林，对酒伤春心。流年催素发，不觉映华簪。  
垂老遇知己，酬恩看寸阴。如何紫芝客，相忆白云深。

卷 237\_54【酬苗发员外宿龙池寺见寄】

钱起

宁知待漏客，清夜此从容。暂别迎车雉，还随护法龙。  
香烟轻上月，林岭静闻钟。郢曲传甘露，尘心洗几重。

卷 237\_55【贞懿皇后挽词】

钱起

淑丽诗传美，徽章礼饰哀。有恩加象服，无日祀高禴。  
晓月孤秋殿，寒山出夜台。通灵深眷想，青鸟独飞来。

卷 237\_56【岁初归旧山（又作献岁初归旧居酬皇甫侍御见寄）】

钱起



· 全唐诗 ·

欲知愚谷好，久别与春还。莺暖初归树，云晴却恋山。  
石田耕种少，野客性情闲。求仲应难见，残阳且掩关。

卷 237\_57【銮驾避狄岁寄别韩云卿】

钱起

白发壮心死，愁看国步移。关山惨无色，亲爱忽惊离。  
影绝龙分剑，声哀鸟恋枝。茫茫云海外，相忆不相知。

卷 237\_58【咏白油帽送客】

钱起

薄质惭加首，愁阴幸庇身。卷舒无定日，行止必依人。  
已沐脂膏惠，宁辞雨露频。虽同客衣色，不染洛阳尘。

卷 237\_59【蓝上采石芥寄前李明府】

钱起

渊明遗爱处，山芥绿芳初。玩此春阴色，犹滋夜雨馀。  
隔溪烟叶小，覆石雪花舒。采采还相赠，瑶华信不如。

· 全唐诗 ·

卷 237\_60【送赞法师往上都】

钱起

远近化人天，王城指日边。宰君迎说法，童子伴随缘。  
到处花为雨，行时杖出泉。今宵松月下，门闭想安禅。

卷 237\_61【送沈少府还江宁】

钱起

远宦碧云外，此行佳兴牵。湖山入閤井，鸥鸟傍神仙。  
斜日背乡树，春潮迎客船。江楼新咏发，应与政声传。

卷 237\_62【送虞说擢第东游】

钱起

湖山不可厌，东望有馀情。片玉登科后，孤舟任兴行。  
月中严子濑，花际楚王城。岁暮云皋鹤，闻天更一鸣。

卷 237\_63【送少微师西行（一作送僧自吴游蜀）】

· 全唐诗 ·

钱起

随缘忽西去，何日返东林。世路宁嗟别，空门久息心。  
人烟一饭少，山雪独行深。天外猿啼处，谁闻清楚音。

卷 237\_64 【送昆山孙少府】

钱起

徇禄近沧海，乘流看碧霄。谁知仙吏去，宛与世尘遥。  
远帆背归鸟，孤舟抵上潮。悬知讼庭静，窗竹日萧萧。

卷 237\_65 【送屈突司马充安西书记】

钱起

制胜三军劲，澄清万里馀。星飞庞统骥，箭发鲁连书。  
海月低云旆，江霞入锦车。遥知太阿剑，计日斩鲸鱼。

卷 237\_66 【送时暹避难适荆南】

钱起

三叹把离袂，七哀深我情。云天愁远别，豺虎拥前程。

· 全唐诗 ·

驻马恋携手，隔河闻哭声。相思昏若梦，泪眼几时明。

卷 237\_67【送边补阙东归省觐】

钱起

东去有馀意，春风生赐衣。凤凰衔诏下，才子采兰归。  
斗酒百花里，情人一笑稀。别离须计日，相望在彤闱。

卷 237\_68【送弹琴李长史往洪州】

钱起

抱琴为傲吏，孤棹复南行。几度秋江水，皆添白雪声。  
佳期来客梦，幽思缓王程。佐牧无劳问，心和政自平。

卷 237\_69【送宋征君让官还山】

钱起

至人无滞迹，谒帝复思玄。魏阙辞花绶，春山有杏田。  
紫霞开别酒，黄鹤舞离弦。今夜思君梦，遥遥入洞天。

· 全唐诗 ·

卷 237\_70【送陈供奉恩敕放归觐省】

钱起

得意今如此，清光不可攀。臣心尧日下，乡思楚云间。  
杨柳依归棹，芙蓉栖旧山。采兰兼衣锦，何似买臣还。

卷 237\_71【送外甥范勉赴任常州长史兼觐省】

钱起

怜君展骥去，能解倚门愁。就养仍荣禄，还乡即昼游。  
橘花低客舍，莼菜绕归舟。与报垂纶叟，知吾世网留。

卷 237\_72【陇右送韦三还京】

钱起

春风起东道，握手望京关。柳色从乡至，莺声送客还。  
嘶骖顾近驿，归路出他山。举目情难尽，羁离失志间。

卷 237\_73【送元评事归山居】

· 全唐诗 ·

钱起

忆家望云路，东去独依依。水宿随渔火，山行到竹扉。  
寒花催酒熟，山犬喜人归。遥羨书窗下，千峰出翠微。

卷 237\_74【送武进韦明府】

钱起

理邑想无事，鸣琴不下堂。井田通楚越，津市半渔商。  
卢橘垂残雨，红莲拆早霜。送君催白首，临水独思乡。

卷 237\_75【送上官侍御】

钱起

执简朝方下，乘轺去不赒。感恩轻远道，入幕比还家。  
碣石春云色，邯郸古树花。飞书报明主，烽火静天涯。

卷 237\_76【送郭秀才制举下第南游】

钱起

失志思浪迹，知君晦近名。出关尘渐远，过郢兴弥清。

· 全唐诗 ·

山尽溪初广，人闲舟自行。探幽无旅思，莫畏楚猿鸣。

卷 237\_77【送夏侯审校书东归】

钱起

楚乡飞鸟没，独与碧云还。破镜催归客，残阳见旧山。  
诗成流水上，梦尽落花间。傥寄相思字，愁人定解颜。

卷 237\_78【送卫功曹赴荆南】

钱起

汉家仍用武，才子晚成名。惆怅江陵去，谁知魏阙情。  
碧云愁楚水，春酒醉宜城。定想褰帷政，还闻坐啸声。

卷 237\_79【送马使君赴郑州】

钱起

东土忽无事，专城复任贤。喜观班瑞礼，还在偃兵年。  
膏雨带荥水，归人耕圃田。遥知下车日，万井起新烟。

?  
?  
?  
?  
?  
?

· 全唐诗 ·

卷237\_80【送郎四补阙东归】

钱起

无事共干世，多时废隐沦。相看恋簪组，不觉老风尘。  
劝酒怜今别，伤心倍去春。徒言树萱草，何处慰离人。

卷 237\_81【送陆三出尉】

钱起

春草晚来色，东门愁送君。盛才仍下位，明代负奇文。  
且乐神仙道，终随鸳鹭群。梅生寄黄绶，不日在青云。

卷 237\_82【送安都秀才北还】

钱起

年少工文客，言离却解颜。不嗟荆宝退，能喜彩衣还。  
新月来前馆，高阳出故关。相思东北望，燕赵隔青山。

卷 237\_83【送褚十一澡擢第归吴觐省】



· 全唐诗 ·

钱起

林表吴山色，诗人思不忘。向家流水便，怀橘彩衣香。  
满酌留归骑，前程未夕阳。怆兹江海去，谁惜杜蘅芳。

卷 237\_84【送费秀才归衡州】

钱起

南望潇湘渚，词人远忆家。客心随楚水，归棹宿江花。  
不畏心期阻，惟愁面会赊。云天有飞翼，方寸伫瑶华。

卷 237\_85【送陆郎中】

钱起

事边仍恋主，举酒复悲歌。粉署含香别，辕门载笔过。  
莺声出汉苑，柳色过漳河。相忆情难尽，离居春草多。

卷 237\_86【送僧归日本】

钱起

上国随缘住，来途若梦行。浮天沧海远，去世法舟轻。

· 全唐诗 ·

水月通禅观，鱼龙听梵声。惟怜一灯影，万里眼中明。

卷 237\_87【送杨皞擢第游江南】

钱起

行人临水去，新咏复新悲。万里高秋月，孤山远别时。  
挂帆严子濑，酹酒敬亭祠。岁晏无芳杜，如何寄所思。

卷 237\_88【送田仓曹归覲】

钱起

青丝络骢马，去府望梁城。节下趋庭处，秋来怀橘情。  
别筵寒日晚，归路碧云生。千里相思夜，愁看新月明。

卷 237\_89【送张管书记（一作送张管记从军）】

钱起

边事多劳役，儒衣逐鼓鼙。日寒关树外，峰尽塞云西。  
河广篷难度，天遥雁渐低。班超封定远，之子去思齐。

· 全唐诗 ·

卷 237\_90【送萧常侍北使】

钱起

绛节引雕戈，鸣驺动玉珂。戎城去日远，汉使隔年多。  
雁宿常连雪，沙飞半渡河。明光朝即迓，杖杜早成歌。

卷 237\_91【送李栖桐道举擢第还乡省侍】

钱起

几年深道要，一举过贤关。名与玄珠出，乡宜昼锦还。  
莲舟同宿浦，柳岸向家山。欲见宁亲孝，儒衣稚子斑。

卷 237\_92【送柳道士】

钱起

去世能成道，游仙不定家。归期千岁鹤，行迈五云车。  
海上春应尽，壶中日未斜。不知相忆处，琪树几枝花。

卷 237\_93【送陆珣侍御使新罗】

· 全唐诗 ·

钱起

衣冠周柱史，才学我乡人。受命辞云陛，倾城送使臣。  
去程沧海月，归思上林春。始觉儒风远，殊方礼乐新。

卷 237\_94【重送陆侍御使日本】

钱起

万里三韩国，行人满目愁。辞天使星远，临水涧霜秋。  
云佩迎仙岛，虹旌过蜃楼。定知怀魏阙，回首海西头。

卷 237\_95【送陆贽擢第还苏州】

钱起

乡路归何早，云间喜擅名。思亲卢橘熟，带雨客帆轻。  
夜火临津驿，晨钟隔浦城。华亭养仙羽，计日再飞鸣。

卷 237\_96【送虞说擢第南归觐省】

钱起

南风起别袂，心到衡湘间。归客楚山远，孤舟云水闲。

· 全唐诗 ·

爱君采莲处，花岛连家山。得意且宁省，人生难此还。

卷 237\_97【送原公南游】

钱起

有意兼程去，飘然二翼轻。故乡多久别，春草不伤情。  
洗钵泉初暖，焚香晓更清。自言难解缚，何日伴师行。

卷 237\_98【送万兵曹赴广陵】

钱起

秋日思还客，临流语别离。楚城将坐啸，郢曲有馀悲。  
山晚桂花老，江寒蘋叶衰。应须杨得意，更诵长卿辞。

卷 237\_99【送李判官赴桂州幕】

钱起

欲知儒道贵，缝掖见诸侯。且感千金诺，宁辞万里游。  
雁峰侵瘴远，桂水出云流。坐惜离居晚，相思绿蕙秋。

· 全唐诗 ·

卷 237\_100【题苏公林亭】

钱起

平津东阁在，别是竹林期。万叶秋声里，千家落照时。  
门随深巷静，窗过远钟迟。客位苔生处，依然又赋诗。

卷 237\_101【赋得寒云轻重色，送子恂入京】

钱起

无限寒云色，苍茫浅更深。从龙如有瑞，捧日不成阴。  
积翠全低岭，虚明半出林。帝乡遥在目，铁马又駸駸。

卷 237\_102【赋得丛兰曙后色，送梁侍御入京】

钱起

曙色传芳意，分明锦绣丛。兰生霁后日，花发夜来风。  
不向三峰里，全胜一县中。遥知大苑内，应待五花骢。

卷 237\_103【赋得馀冰（一本题下有送人二字）】

· 全唐诗 ·

钱起

晓日馀冰上，春池一镜明。多从履处薄，偏向饮时清。  
比雪光仍在，因风片不成。更随舟楫去，犹可助坚贞。

卷 237\_104【赋得浦口望斜月，送皇甫判官】

钱起

起见西楼月，依依向浦斜。动摇生浅浪，明灭照寒沙。  
水渚犹疑雪，梅林不辨花。送君无可赠，持此代瑶华。

卷 237\_105【赋得绵绵思远道，送岑判官入岭】

钱起

极目烟霞外，孤舟一使星。兴中寻白雪，梦里过沧溟。  
夜月松江戍，秋风竹坞亭。不知行远近，芳草日青青。

卷 237\_106【江宁春夜裴使君席送萧员外】

钱起

花院日扶疏，江云自卷舒。主人熊轼任，归客雉门车。

· 全唐诗 ·

曙月稀星里，春烟紫禁馀。行看石头戍，记得是南徐。

卷 237\_107【送薛八谪居】

钱起

东水将孤客，南行路几千。虹翻潮上雨，鸟落瘴中天。  
谪去宁留恨，思归岂待年。衔杯且一醉，别泪莫潜然。

卷 237\_108【送衡阳归客】

钱起

归客爱鸣榔，南征忆旧乡。江山追宋玉，云雨忆荆王。  
醉里宜城近，歌中郢路长。怜君从此去，日夕望三湘。

卷 237\_109【送员外侍御入朝】

钱起

别思乱无绪，妖氛犹未清。含香五夜客，持赋十年兄。  
霜拂金波树，星回玉斗城。自怜江上鹤，垂翅羡飞鸣。



· 全唐诗 ·

卷 237\_110【送李谏议归荆州】

钱起

归舟同不系，纤草剩忘忧。禁掖曾通籍，江城旧列侯。  
暮帆依夏口，春雨梦荆州。何日朝云陛，随君拜冕旒。

卷 237\_111【送元中丞江淮转运（一作王维诗）】

钱起

薄税归天府，轻徭赖使臣。欢沾赐帛老，恩及卷绡人。  
去问殊官俗，来经几劫春。东南御亭上，莫问有风尘。

卷 237\_112【送唐别驾赴郢州】

钱起

少年从事好，此去别愁轻。满座诗人兴，随君郢路行。  
蒹葭侵驿树，云水抱山城。遥爱下车日，江皋春草生。

卷 237\_113【送郑巨及第后归觐】

· 全唐诗 ·

钱起

多才白华子，初擅桂枝名。嘉庆送归客，新秋带雨行。  
离人背水去，喜鹊近家迎。别赠难为此，衰年畏后生。

卷 237\_114【宿远上人兰若】

钱起

香花闭一林，真士此看心。行道白云近，燃灯翠壁深。  
梵筵清水月，禅坐冷山阴。更说东溪好，明朝乘兴寻。

卷 237\_115【酬元秘书晚出蓝溪见寄】

钱起

野兴引才子，独行幽径迟。云留下山处，鸟静出溪时。  
拙宦不忘隐，归休常在兹。知音倘相访，炊黍扫茅茨。

卷 237\_116【别张起居（时多故）】

钱起

有别时留恨，销魂况在今。风涛初振海，鹳鹭各辞林。

· 全唐诗 ·

旧国关河绝，新秋草露深。陆机婴世网，应负故山心。

卷 237\_117【郭司徒厅夜宴】

钱起

秋堂复夜阑，举目尽悲端。霜堞鸟声苦，更楼月色寒。  
美人深别意，斗酒少留欢。明发将何赠，平生双玉盘。

卷 237\_118【初至京口示诸弟】

钱起

还家百战后，访故几人存。兄弟得相见，荣枯何处论。  
新诗添卷轴，旧业见儿孙。点检平生事，焉能出荜门。

卷 237\_119【月下洗药】

钱起

汲井向新月，分流入众芳。湿花低桂影，翻叶静泉光。  
露下添馀润，蜂惊引暗香。寄言养生客，来此共提筐。

· 全唐诗 ·

卷 237\_120【晚春永宁墅小园独坐，寄上王相公】

钱起

东阁一何静，莺声落日愁。夔龙暂为别，昏旦思兼秋。  
蕙草出篱外，花枝寄竹幽。上方传雅颂，七夕让风流。

卷 237\_121【岁暇题茅茨】

钱起

谷口逃名客，归来遂野心。薄田供岁酒，乔木待新禽。  
溪路春云重，山厨夜火深。桃源应渐好，仙客许相寻。

卷 237\_122【九日登玉山】

钱起

霞景青山上，谁知此胜游。龙沙传往事，菊酒对今秋。  
步石随云起，题诗向水流。忘归更有处，松下片云幽。

卷 237\_123【宴崔驸马玉山别业】

· 全唐诗 ·

钱起

金榜开青琐，骄奢半隐沦。玉箫惟送酒，罗袖爱留宾。  
竹馆烟催暝，梅园雪误春。满朝辞赋客，尽是入林人。

卷 237\_124 【春谷幽居】

钱起

黄鸟鸣园柳，新阳改旧阴。春来此幽兴，宛是谢公心。  
扫径兰芽出，添池山影深。虚名随振鹭，安得久栖林。

卷 237\_125 【赋得池上双丁香树】

钱起

得地移根远，交柯绕指柔。露香浓结桂，池影斗蟠虬。  
黛叶轻筠绿，金花笑菊秋。何如南海外，雨露隔炎洲。

卷 237\_126 【题樊川杜相公别业】

钱起

数亩园林好，人知贤相家。结茅书阁俭，带水槿篱斜。

· 全唐诗 ·

古树生春藓，新荷卷落花。圣恩加玉铉，安得卧青霞。

卷 237\_127【酬卢十一过宿】

钱起

乞还方未遂，日夕望云林。况复逢青草，何妨问此心。  
闭门公务散，枉策故情深。遥夜他乡宿，同君梁甫吟。

卷 237\_128【崔十四宅问候】

钱起

晓日早莺啼，江城旅思迷。微官同寄傲，移疾阻招携。  
远水间关内，青山雉堞西。王孙莫久卧，春草欲萋萋。

卷 237\_129【山路见梅，感而有作】

？

钱起？

莫言山路僻，还被好风催。行客凄凉过，村篱冷落开。  
晚溪寒水照，晴日数蜂来。重忆江南酒，何因把一杯。

· 全唐诗 ·

卷 237\_130【咏门上画松，上元、王、杜三相公（一作崔峒诗）】

钱起

昔闻生涧底，今见起毫端。众草此时没，何人知岁寒。  
岂能裨栋宇，且欲出门阑。只在丹青笔，凌云也不难。

卷 237\_131【早发东阳】

钱起

信风催过客，早发梅花桥。数雁起前渚，千艘争便潮。  
将随浮云去，日惜故山遥。惆怅烟波末，佳期在碧霄。

卷 237\_132【舟中寄李起居】

钱起

南行风景好，昏旦水皋闲。春色郢中树，晴霞湖上山。  
去家旅帆远，回首暮潮还。蕙草知何赠，故人云汉间。

卷 237\_133【夜雨寄寇校书】

· 全唐诗 ·

钱起

秋馆烟雨合，重城钟漏深。佳期阻清夜，孤兴发离心。  
烛影出绡幕，虫声连素琴。此时蓬阁友，应念昔同衾。

卷 237\_134【喜李侍御拜郎官入省】

钱起

粉署花骢入，丹青紫诰垂。直庐惊漏近，赐被觉霜移。  
汉主前瑶席，穰侯许凤池。应怜后行雁，空羡上林枝。

卷 237\_135【苏端林亭对酒喜雨】

钱起

小雨飞林顶，浮凉入晚多。能知留客处，偏与好风过。  
濯锦翻红蕊，跳珠乱碧荷。芳尊深几许，此兴可酣歌。

卷 237\_136【见上林春雁翔青云，寄杨起居、李员外】

钱起

上林春更好，宾雁不知归。顾影怜青籟，传声入紫微。



· 全唐诗 ·

夜陪池鹭宿，朝出苑花飞。宁忆寒乡侣，鸾凰一见稀。

卷 237\_137【偶成】

钱起

含毫意不浅，微月上帘栊。门静吏人息，心闲囿圉空。  
繁星入疏树，惊鹊倦秋风。始觉牵卑剧，宵眠亦在公。

卷 237\_138【渔潭值雨】

钱起

日入林岛异，鹤鸣风草间。孤帆泊枉渚，飞雨来前山。  
客意念留滞，川途忽阻艰。赤亭仍数里，夜待安流还。

卷 237\_139【题萧丞小池】

钱起

莺鸣蕙草绿，朝与情人期。林沼忘言处，鸳鸿养翮时。  
春泉滋药暖，晴日度花迟。此会无辞醉，良辰难再追。

· 全唐诗 ·

## 第二百三十八卷

### 卷 238\_1【送集贤崔八叔承恩括图书】

钱起

雨露满儒服，天心知子虚。还劳五经笥，更访百家书。  
赠别倾文苑，光华比使车。晚云随客散，寒树出关疏。  
相见应朝夕，归期在玉除。

### 卷 238\_2【送张五员外东归楚州】

钱起

纓珮不为美，人群宁免辞。杳然黄鹄去，未负白云期。  
此别清兴尽，高秋临水时。好山枉帆僻，浪迹到家迟。  
他日诏书下，梁鸿安可追。

### 卷 238\_3【闲居寄包何】

钱起

· 全唐诗 ·

去名即栖遁，何必归沧浪。种药幽不浅，杜门喧自忘。  
林眠多晓梦，鸦散惊初阳。片雪幽云至，回风邻果香。  
佳期碧天末，惆怅紫兰芳。

卷 238\_4【津梁寺寻李侍御】

钱起

禅林绝过客，柱史正焚香。驯鸽不猜隼，慈云能护霜。  
骢声隔暗竹，吏事散空廊。霄汉期鸳鹭，狐狸避宪章。  
绕阶春色至，屈草待君芳。

卷 238\_5【山园秋晚寄杜黄裳少府】

钱起

惆怅佳期阻，园林秋景闲。终朝碧云外，唯见暮禽还。  
泉石思携手，烟霞不闭关。杖藜仍把菊，对卷也看山。  
望望离心起，非君谁解颜。

卷 238\_6【东溪杜野人致酒】

钱起

· 全唐诗 ·

万重云树下，数亩子平居。野院罗泉石，荆扉背里闾。  
早冬耕凿暇，弋雁复烹鱼。静扫寒花径，唯邀傲吏车。  
晚来留客好，小雪下山初。

卷 238\_7【忆山中寄旧友】

钱起

数岁白云里，与君同采薇。树深烟不散，溪静鹭忘飞。  
更忆东岩趣，残阳破翠微。脱巾花下醉，洗药月前归。  
风景今还好，如何与世违。

卷 238\_8【东皋早春寄郎四校书】

钱起

禄微赖学稼，岁起归衡茅。穷达恋明主，耕桑亦近郊。  
夜来霁山雪，阳气动林梢。兰蕙暖初吐，春鸠鸣欲巢。  
蓬莱时入梦，知子忆贫交。

卷 238\_9【玉山东溪题李叟屋壁】

钱起

· 全唐诗 ·

霞景已斜照，烟溪方暝投。山家归路僻，辙迹乱泉流。  
野老采薇暇，蜗庐招客幽。麝麝突荒院，鸂鶒步闲畴。  
偶此惬真性，令人轻宦游。

卷 238\_10【温泉宫礼见】

钱起

新丰佳气满，圣主在温泉。云暖龙行处，山明日驭前。  
顺风求至道，侧席问遗贤。灵雪瑶墀降，晨霞彩仗悬。  
沧溟不让水，疵贱也朝天。

卷 238\_11【游襄阳泉石晚归】

钱起

游目随山胜，回桡爱浦长。往来幽不浅，昏旦兴难忘。  
木末看归翼，莲西失夕阳。人声指閭井，野趣惜林塘。  
稍近垂杨路，菱舟拥岸香。

卷 238\_12【夏日陪史郎中宴杜郎中果园】

钱起

· 全唐诗 ·

何事重逢迎，春醪晚更清。林端花自老，池上月初明。  
路入仙郎次，乌连柱史名。竹阴疏柰院，山翠傍芜城。  
引满不辞醉，风来待曙更。

卷 238\_13【南溪春耕】

钱起

荷蓑趣南径，戴胜鸣条枚。溪雨有馀润，土膏宁厌开。  
沟塍落花尽，耒耜度云回。谁道耦耕倦，仍兼胜赏催。  
日长农有暇，悔不带经来。

卷 238\_14【省试湘灵鼓瑟】

钱起

善鼓云和瑟，常闻帝子灵。冯夷空自舞，楚客不堪听。  
苦调凄金石，清音入杳冥。苍梧来怨慕，白芷动芳馨。  
流水传潇浦，悲风过洞庭。曲终人不见，江上数峰青。

卷 238\_15【观法驾自凤翔回】

钱起

· 全唐诗 ·

櫂抢一扫灭，阊阖九重开。海晏鲸鲵尽，天旋日月来。  
圣情苏品物，龙御辟云雷。晓漏移仙仗，朝阳出帝台。  
周惭散马出，禹让濬川回。欲识封人愿，南山举酒杯。

卷 238\_16【题玉山村叟屋壁】

钱起

谷口好泉石，居人能陆沈。牛羊下山小，烟火隔云深。  
一径入溪色，数家连竹阴。藏虹辞晚雨，惊隼落残禽。  
涉趣皆流目，将归羨在林。却思黄绶事，辜负紫芝心。

卷 238\_17【县中池竹言怀】

钱起

官小志已足，时清免负薪。卑栖且得地，荣耀不关身。  
自爱赏心处，丛篁流水滨。荷香度高枕，山色满南邻。  
道在即为乐，机忘宁厌贫。却愁丹凤诏，来访漆园人。

卷 238\_18【山园栖隐】

钱起

· 全唐诗 ·

守静信推分，灌园乐在兹。且忘尧舜力，宁顾尚书期。  
晚景采兰暇，空林散帙时。卷荷藏露滴，黄口触虫丝。  
三径与嚣远，一瓢常自怡。情人半云外，风月讵相思。

卷 238\_19【送王谏议任东都居守】

钱起

车徒凤掖东，去去洛阳宫。暂以青蒲隔，还看紫禁同。  
经过乘雨露，潇洒出鸳鸿。官署名台下，云山旧苑中。  
暮天双阙静，秋月九重空。且喜成周地，诗人播国风。

卷 238\_20【送郑书记】

钱起

决胜无遗策，辞天便请缨。出身唯殉死，报国且能兵。  
受命麒麟殿，参谋骠骑营。短箫催别酒，斜日驻前旌。  
义勇千夫敌，风沙万里行。几年丹阙下，侯印锡书生。

卷 238\_21【送族侄赴任（一作之郡）】

钱起



· 全唐诗 ·

林下不成兴，仲容微禄牵。客程千里远，别念一帆悬。  
欲叹卑栖去，其如胜趣偏。云山深郡郭，花木净潮田。  
坐啸帷应下，离居月复圆。此时知小阮，相忆绿尊前。

卷 238\_22 【长安落第作】

钱起

始愿今如此，前途复若何。无媒献词赋，生事日蹉跎。  
不遇张华识，空悲甯戚歌。故山归梦远，新岁客愁多。  
刷羽思乔木，登龙恨失波。散才非世用，回首谢云萝。

卷 238\_23 【酬长孙绎蓝溪寄杏】

钱起

爱君蓝水上，种杏近成田。拂径清阴合，临流彩实悬。  
清香和宿雨，佳色出晴烟。懿此倾筐赠，想知怀橘年。  
芳馨来满袖，琼玖愿酬篇。把玩情何极，云林若眼前。

卷 238\_24 【药堂秋暮】

钱起

· 全唐诗 ·

隐来未得道，岁去愧云松。茅屋空山暮，荷衣白露浓。  
唯怜石苔色，不染世人踪。潭静宜孤鹤，山深绝远钟。  
有时丹灶上，数点彩霞重。勉事壶公术，仙期待赤龙。

卷 238\_25【哭常征君】

钱起

万化一朝尽，穷泉悲此君。如何丹灶术，能误紫芝焚。  
不遂苍生望，空留封禅文。远年随逝水，真气尽浮云。  
山闭龙蛇蛰，林寒麋鹿群。伤心载酒地，仙菊为谁薰。

卷 238\_26【送鲍中丞赴太原军营】

钱起

年壮才仍美，时来道易行。宠兼三独任，威肃贰师营。  
将略过南仲，天心寄北京。云旂临塞色，龙笛出关声。  
汉月随霜去，边尘计日清。渐知王事好，文武用书生。

卷 238\_27【奉送刘相公江淮催转运】

钱起

· 全唐诗 ·

国用资戎事，臣劳为主忧。将征任土贡，更发济川舟。  
拥传星还去，过池凤不留。唯高饮水节，稍浅别家愁。  
落叶淮边雨，孤山海上秋。遥知谢公兴，微月上江楼。

卷 238\_28【送李秀才落第游荆楚】

钱起

翠羽虽成梦，迁莺尚后群。名逃郢谿策，兴发谢玄文。  
昏旦扁舟去，江山几路分。上潮吞海日，归雁出湖云。  
诗思应须苦，猿声莫厌闻。离居见新月，那得不思君。

卷 238\_29【奉陪郭常侍宴浣川山池】

钱起

掖垣携爱客，胜地赏年光。向竹过宾馆，寻山到妓堂。  
歌声掩金谷，舞态出平阳。地满簪裾影，花添兰麝香。  
莺啼春未老，酒冷日犹长。安石风流事，须归问省郎。

卷 238\_30【寇中送张司马归洛】

钱起

· 全唐诗 ·

戎狄寇周日，衣冠适洛年。客亭新驿骑，归路旧人烟。  
吾道将东矣，秋风更飒然。云愁百战地，树隔两乡天。  
旅思蓬飘陌，惊魂雁怯弦。今朝一尊酒，莫惜醉离筵。

卷 238\_31【奉和宣城张太守南亭秋夕怀友】

钱起

池馆蟪蛄声，梧桐秋露晴。月临朱戟静，河近画楼明。  
卷幔浮凉入，闻钟永夜清。片云悬曙斗，数雁过秋城。  
羽扇扬风暇，瑶琴怅别情。江山飞丽藻，谢朓让前名。

卷 238\_32【过山人所居因寄诸遗补】

钱起

空谷春云满，愚公晦迹深。一随玄豹隐，几换绿萝阴。  
绝径人稀到，芳荪我独寻。厨烟住峭壁，酒气出重林。  
蝴蝶晴还舞，黄鹂晚暂吟。所思青琐客，瑶草寄幽心。

卷 238\_33【过鸣皋隐者】

钱起

· 全唐诗 ·

礧石老红鲜，征君卧几年。飞泉出林下，一径过崖巅。  
鸡犬逐人静，云霞宜地偏。终朝数峰胜，不远一壶前。  
仲月霁春雨，香风生药田。丹溪不可别，琼草色芊芊。

卷 238\_34【送杨鎔归隐】

钱起

悔作扫门事，还吟招隐诗。今年芳草色，不失故山期。  
遥想白云里，采苓春日迟。溪花藏石径，岩翠带茅茨。  
九转莫飞去，三回良在兹。还嗤茂陵客，贫病老明时。

卷 238\_35【酬刘起居卧病见寄】

钱起

承颜看彩服，不觉别丹墀。味道能忘病，过庭更学诗。  
繚垣多画戟，远岫入书帷。竹静携琴处，林香让果时。  
声同叨眷早，交澹在年衰。更枉兼金赠，难为继组词。

卷 238\_36【陪南省诸公宴殿中李监宅】

钱起

· 全唐诗 ·

将门高胜霍，相子宠过韦。宦贵攀龙后，心倾待士时。  
壶觞开雅宴，鸳鹭眷相随。舞退燕姬曲，歌征谢朓诗。  
晚钟过竹静，醉客出花迟。莫惜留馀兴，良辰不可追。

卷 238\_37 【山斋读书寄时校书杜叟】

钱起

日爱衡茅下，闲观山海图。幽人自守朴，穷谷也名愚。  
倒岭和溪雨，新泉到户枢。丛阑齐稚子，蟠木老潜夫。  
忆戴差过剡，游仙惯入壶。濠梁时一访，庄叟亦吾徒。

卷 238\_38 【晚归蓝田旧居】

钱起

云卷东皋下，归来省故蹊。泉移怜石在，林长觉原低。  
旧里情难尽，前山赏未迷。引藤看古木，尝酒咒春鸡。  
兴与时髦背，年将野老齐。才微甘引退，应得遂霞栖。

卷 238\_39 【寄袁州李嘉祐员外】

钱起

· 全唐诗 ·

谁谓江山阻，心亲梦想偏。容辉常在目，离别任经年。  
郡国通流水，云霞共远天。行春莺几啭，迟客月频圆。  
雁有归乡羽，人无访戴船。愿征黄霸入，相见玉阶前。

卷 238\_40【禁闱玩雪寄薛左丞】

钱起

玄云低禁苑，飞雪满神州。虚白生台榭，寒光入冕旒。  
粉凝宫壁静，乳结洞门幽。细绕回风转，轻随落羽浮。  
怒涛堆砌石，新月孕帘钩。为报诗人道，丰年颂圣猷。

卷 238\_41【春暮过石龟谷题温处士林园（一作送温逸人）】

钱起

隐几无名老，何年此陆沈。丘园自得性，婚嫁不婴心。  
岁计因山薄，霞栖在谷深。设置连草色，晒药背松阴。  
触兴云生岫，随耕鸟下林。支颐笑来客，头上有朝簪。

卷 238\_42【宿毕侍御宅】

钱起

· 全唐诗 ·

交情频更好，子有古人风。晤语清霜里，平生苦节同。  
心惟二仲合，室乃一瓢空。落叶寄秋菊，愁云低夜鸿。  
薄寒灯影外，残漏雨声中。明发南昌去，回看御史骢。

卷 238\_43【中书遇雨】

钱起

济旱惟宸虑，为霖即上台。云衔七曜起，雨拂九门来。  
纶阁飞丝度，龙渠激霤回。色翻池上藻，香裊鼎前杯。  
湘燕皆舒翼，沙鳞岂曝腮。尺波应万假，虞海载沿洄。

卷 238\_44【适楚次徐城】

钱起

去家随旅雁，几日到南荆。行迈改乡邑，苦辛淹晦明。  
畏途在淫雨，未暮息趋程。穷木对秋馆，寒鸦愁古城。  
迷津坐为客，对酒默含情。感激念知己，匣中孤剑鸣。

卷 238\_45【经李蒙颖阳旧居】

钱起



· 全唐诗 ·

同心而早世，天道亦何论。独有山阳宅，平生永不谖。  
青溪引白鸟，流涕吊芳荪。蔓草入空室，丛篁深毁垣。  
旧游还在眼，神理更忘言。唯见东山月，人亡不去门。

卷 238\_46【赠汉阳隐者】

钱起

当年不出世，知子餐霞人。乐道复安土，遗荣长隐身。  
衡茅古林曲，粳稻清江滨。桂棹为渔暇，荷衣御暑新。  
款颜行在役，幽兴惜今晨。分首天涯去，再来芳杜春。

卷 238\_47【巨鱼纵大壑】

钱起

巨鱼纵大壑，遂性似乘时。奋跃风生鬣，腾凌浪鼓鳍。  
龙摅回地轴，鲲化想天池。方快吞舟意，尤殊在藻嬉。  
倾危嗟幕燕，隐晦诮泥龟。喻士逢明主，才猷得所施。

卷 238\_48【送李九归河北】

钱起

· 全唐诗 ·

文武资人望，谋猷简圣情。南州初卧鼓，东土复维城。  
寄重分符去，威仍出阊行。斗牛移八座，日月送双旌。  
别恋瞻天起，仁风应物生。伫闻收组练，锵玉会承明。

卷 238\_49【送丁著作佐台郡】

钱起

多年金马客，名遂动归轮。佐郡紫书下，过门朱绶新。  
扬舲望海岳，入境背风尘。水驿偏乘月，梅园别受春。  
带经临府吏，鲙鲤待乡人。始见美高士，逍遥在搢绅。

卷 238\_50【送王使君赴太原行营】

钱起

太白明无象，皇威未戢戈。诸侯持节钺，千里控山河。  
汉驿双旌度，胡沙七骑过。惊蓬连雁起，牧马入云多。  
不卖卢龙塞，能消瀚海波。须传出师颂，莫奏式微歌。

卷 238\_51【送王使君移镇淮南】

钱起

· 全唐诗 ·

共许徐方牧，能临河内人。郡移棠转茂，车至鹿还驯。  
吏事嘉师旅，鸳行惜搢绅。别心倾祖席，愁望尽征轮。  
紫诰徵黄晚，苍生借寇频。愿言青琐拜，早及上林春。

卷 238\_52【李四劝为尉氏尉，李七勉为开封尉（惟伯与仲有令誉）】

钱起

美政惟兄弟，时人数俊贤。皇枝双玉树，吏道二梅仙。  
自理尧唐俗，唯将礼让传。采兰花萼聚，就日雁行联。  
黄绶俄三载，青云未九迁。庙堂为宰制，几日试龙泉。

卷 238\_53【春夜宴任六昆季宅】

钱起

际晚绿烟起，入门芳树深。不才叨下客，喜宴齿诸簪。  
夜月仍携妓，清风更在林。彩毫挥露色，银烛动花阴。  
自接通家好，应知待士心。向隅逢故识，兹夕愿披襟。

卷 238\_54【闲居酬张起居见赠】

钱起

· 全唐诗 ·

在林非避世，守拙自离群。弱羽谢风水，穷愁依典坟。  
良知不遐弃，新咏独相闻。能使幽兴苦，坐忘清景曛。  
前山带乔木，暮鸟联归云。向夕野人思，难忘骑省文。

卷 238\_55【奉和王相公秋日戏赠元校书】

钱起

才妙心仍远，名疏迹可追。清秋闻礼暇，新雨到山时。  
胜事唯愁尽，幽寻不厌迟。弄云怜鹤去，隔水许僧期。  
贤相敦高躅，雕龙忆所思。芙蓉洗清露，愿比谢公诗。

卷 238\_56【过杨驸马亭子】

钱起

衣冠在汉庭，台榭接天成。彩凤翻箫曲，祥鳧入馆名。  
歌钟芳月曙，林嶂碧云生。乱水归潭净，高花映竹明。  
退朝追宴乐，开阁醉簪缨。长袖留嘉客，栖乌下禁城。

卷 238\_57【山下别杜少府】

钱起

· 全唐诗 ·

把手意难尽，前山日渐低。情人那忍别，宿鸟尚同栖。  
寸晷恋言笑，佳期欲阻暌。离云愁出岫，去水咽分溪。  
庄叟几虚说，杨朱空自迷。伤心独归路，秋草更萋萋。

卷 238\_58【晚出青门望终南别业】

钱起

能清谢朓思，暂下承明庐。远山新水下，寒皋微雨馀。  
更怜归鸟去，宛到卧龙居。笑指丛林上，闲云自卷舒。  
宁心鸣凤日，却意钓璜初。处贵有余兴，伊周位不如。

卷 238\_59【送严士良侍奉詹事南游】

钱起

疏傅独知止，曾参善爱亲。江山侍行迈，长幼出嚣尘。  
握手想千古，此心能几人。风光满长陌，草色傍征轮。  
日夕望荆楚，莺鸣芳杜新。渔烟月下浅，花屿水中春。  
点翰遥相忆，含情向白蘋。

卷 238\_60【题秘书王迪城北池亭】

钱起

· 全唐诗 ·

子乔来魏阙，明主赐衣簪。从宦辞人事，同尘即道心。  
还追大隐迹，寄此凤城阴。昨夜新烟雨，池台清且深。  
伏泉通粉壁，迸笋出花林。晚沐常多暇，春醪时独斟。  
西南汉宫月，复对绿窗琴。

卷 238\_61【过王舍人宅】

钱起

入门花柳暗，知是近臣居。大隐心何远，高风物自疏。  
翛然静者事，宛得上皇馀。鸡犬偷仙药，儿童授道书。  
清吟送客后，微月上城初。彩笔有新咏，文星垂太虚。  
承恩金殿宿，应荐马相如。

卷 238\_62【过瑞龙观道士】

钱起

不知谁氏子，炼魄家洞天。鹤待成丹日，人寻种杏田。  
灵山含道气，物性皆自然。白鹿顾瑞草，骊龙蟠玉泉。  
得兹象外趣，便割区中缘。石窦采云母，霞堂陪列仙。  
主人善止客，柯烂忘归年。

卷 238\_63【送沈仲】

· 全唐诗 ·

钱起

天朴非外假，至人常晏如。心期邈霄汉，词律响琼琚。  
举酒常叹息，无人达子虚。夜光失隋掌，骥騄伏盐车。  
考室晋山下，归田秦岁初。寒云随路合，落照下城馀。  
千里还同术，无劳怨索居。

卷 238\_64 【和韦侍御寓直对雨】

钱起

名贵四科首，班宜二妙齐。如何厌白简，未得步金闺。  
寓直晦秋雨，吟馀闻远鸡。漏声过旦冷，云色向窗低。  
谁谓霄汉近，翻嗟心事睽。兰滋人未握，霜晓鹤还栖。  
伫见田郎字，亲劳御笔题。

卷 238\_65 【奉和圣制登朝元阁】

钱起

六合纡玄览，重轩启上清。石林飞栋出，霞顶泰阶平。  
拂曙銮舆上，睇阳瑞雪晴。翠微回日驭，丹巘驻天行。  
御气升银汉，垂衣俯锦城。山通玉苑迥，河抱紫关明。  
感物乾文动，凝神道化成。周王陟乔岳，列辟让英声。

· 全唐诗 ·

卷 238\_66【奉和杜相公移长兴宅，奉呈元相公】

钱起

守贵常思俭，平津此意深。能卑丞相宅，何谢故人心。  
种蕙初抽带，移篁不改阴。院梅朝助鼎，池凤夕归林。  
觉路经中得，沧洲梦里寻。道高仍济代，恩重岂投簪。  
报国谁知己，推贤共作霖。兴来文雅振，清韵掷双金。

卷 238\_67【送任先生任唐山丞】

钱起

再命果良愿，几年勤说诗。上公频握发，才子共垂帷。  
琢玉成良器，出门偏怆离。腰章佐墨绶，耀锦到茅茨。  
树老见家日，潮平归县时。衣催莲女织，颂听海人词。  
鸿鹄志应在，荃兰香未衰。金门定回音，云路有佳期。

卷 238\_68【送外甥怀素上人归乡侍奉】

钱起

释子吾家宝，神清慧有馀。能翻梵王字，妙尽伯英书。  
远鹤无前侣，孤云寄太虚。狂来轻世界，醉里得真如。



· 全唐诗 ·

飞锡离乡久，宁亲喜腊初。故池残雪满，寒柳霁烟疏。  
寿酒还尝药，晨餐不荐鱼。遥知禅诵外，健笔赋闲居。

卷 238\_69【送张中丞赴桂州】

钱起

出守求人瘼，推贤动圣情。紫台初下诏，皂盖始专城。  
宠借飞霜简，威加却月营。云衢降五马，林木引双旌。  
夙仰敦诗礼，尝闻偃甲兵。戍楼云外静，讼阁竹间清。  
化伧还珠美，心将片玉贞。寇恂朝望重，计日谒承明。

卷 238\_70【送王相公赴范阳】

钱起

翊圣衔恩重，频年按节行。安危皆报国，文武不缘名。  
受脤仍调鼎，为霖更洗兵。幕开丞相阁，旗总贰师营。  
料敌知无战，安边示有征。代云横马首，燕雁拂笳声。  
去镇关河静，归看日月明。欲知瞻恋切，迟暮一书生。

卷 238\_71【送蒋尚书居守东都】

钱起

· 全唐诗 ·

凤辇幸秦久，周人徯帝情。若非君敏德，谁镇洛阳城。  
前席命才彦，举朝推令名。纶言动北斗，职事守东京。  
郑履下天去，遽轮满路声。出关秋树直，对阙远山明。  
肃肃保厘处，水流宫苑清。长安日西笑，朝夕衮衣迎。

卷 238\_72【送李兵曹赴河中】

钱起

能荷钟鼎业，不矜纨绮荣。侯门三事后，儒服一书生。  
昔志学文史，立身为士英。骊珠难隐耀，皋鹤会长鸣。  
休命且随牒，候时常振纓。寒蝉思关柳，匹马向蒲城。  
秋日黯将暮，黄河如欲清。黎人思坐啸，知子树佳声。

卷 238\_73【罢官后酬元校书见赠】

钱起

心期怅已阻，交道复何如。自我辞丹阙，惟君到故庐。  
忘机贫负米，忆戴出无车。怜犬吠初服，家人愁斗储。  
秋堂入闲夜，云月思离居。穷巷闻砧冷，荒枝应鹊疏。  
宦名随落叶，生事感枯鱼。临水仍挥手，知音未弃余。

卷 238\_74【同邬戴关中旅寓】

· 全唐诗 ·

钱起

文士皆求遇，今人谁至公。灵台一寄宿，杨柳再春风。  
更惜忘形友，频年失志同。羽毛齐燕雀，心事阻鸳鸿。  
留滞惭归养，飞鸣恨触笼。橘怀乡梦里，书去客愁中。  
残雪迷归雁，韶光弃断蓬。吞悲问唐举，何路出屯蒙。

卷 238\_75【新丰主人】

钱起

明代少知己，夜光频暗投。逆遭终薄命，动息尽穷愁。  
自欲归飞鹧，当为不系舟。双垂素丝泪，几弊皂貂裘。  
暮鸟栖幽树，孤云出旧丘。蛩悲衣褐夕，雨暗转蓬秋。  
客里冯援剑，歌中甯戚牛。主人能纵酒，一醉且忘忧。

卷 238\_76【夕游覆釜山道士观因登玄元庙】

钱起

冥搜过物表，洞府次溪傍。已入瀛洲远，谁言仙路长。  
孤烟出深竹，道侣正焚香。鸣磬爱山静，步虚宜夜凉。  
仍同象帝庙，更上紫霞冈。霁月悬琪树，明星映碧堂。  
倾思丹灶术，愿采玉芝芳。傥把浮丘袂，乘云别旧乡。

· 全唐诗 ·

卷 238\_77【陪郭常侍令公东亭宴集】

钱起

盛业山河列，重名剑履荣。珥貂为相子，开阁引时英。  
美景池台色，佳期宴赏情。词人载笔至，仙妓出花迎。  
暗竹朱轮转，回塘玉佩鸣。舞衫招戏蝶，歌扇隔啼莺。  
饮德心皆醉，披云兴转清。不愁欢乐尽，积庆在和羹。

卷 238\_78【太子李舍人城东别业与二三文友逃暑】

钱起

下马失炎暑，重门深绿簷。宫臣礼嘉客，林表开兰堂。  
兹夕兴难尽，澄壘照墨场。鲜风吹印绶，密坐皆馨香。  
美景惜文会，清吟迟羽觞。东林晚来好，目极趣何长。  
鸟道挂疏雨，人家残夕阳。城隅拥归骑，留醉恋琼芳。

卷 238\_79【柏崖老人号无名先生，男削发，黄黄冠，自以云泉独乐，命予赋诗】

钱起

古也忧婚嫁，君能乐性肠。长男栖月宇，少女炫霓裳。

· 全唐诗 ·

问尔餐霞处，春山芝桂旁。鹤前飞九转，壶里驻三光。  
与我开龙峤，披云静药堂。胡麻兼藻绿，石髓隔花香。  
帝力言何有，椿年喜渐长。窅然高象外，宁不傲羲皇。

卷 238\_80【赠李十六】

钱起

半面喜投分，数年钦盛名。常思梦颜色，谁忆访柴荆。  
忽听款扉响，欣然倒屣迎。蓬蒿驻驹驭，鸡犬傍簪缨。  
酌水即嘉宴，新知甚故情。仆夫视日色，栖鸟催车声。  
自尔宴言后，至今门馆清。何当更乘兴，林下已苔生。

卷 238\_81【裴仆射东亭】

钱起

凤宸任匡济，云溪难退还。致君超列辟，得道在荣班。  
朱戟缭垣下，高斋芳树间。隔花开远水，废卷爱晴山。  
晚沐值清兴，知音同解颜。藉兰开赐酒，留客下重关。  
仙犬逐人静，朝车映竹闲。则知真隐逸，未必谢区寰。  
轩后三朝顾，赤松何足攀。

卷 238\_82【中书王舍人辋川旧居】

· 全唐诗 ·

钱起

几年家绝壑，满径种芳兰。带石买松贵，通溪涨水宽。  
诵经连谷响，吹律减云寒。谁谓桃源里，天书问考槃。  
一从解蕙带，三入偶蝉冠。今夕复何夕，归休寻旧欢。  
片云隔苍翠，春雨半林湍。藤长穿松盖，花繁压药栏。  
景深青眼下，兴绝彩毫端。笑向同来客，登龙此地难。

卷 238\_83【送襄阳卢判官奏开河事】

钱起

千里趋魏阙，一言简圣聪。河流引关外，国用贍秦中。  
有诏许其策，随山兴此功。连云积石阻，计日安波通。  
飞棹转年谷，利人胜岁丰。言归汉阳路，拜手蓬莱宫。  
紫殿赐衣出，青门酣酌同。晚阳过微雨，秋水见新鸿。  
坐惜去车远，愁看离馆空。因思郢川守，南楚满清风。

卷 238\_84【奉送户部李郎中充晋国副节度出塞】

钱起

德佐调梅用，忠输击虏年。子房推庙略，汉主托兵权。  
受命荣中禁，分麾镇左贤。风生黑山道，星下紫微天。  
始愿文经国，俄看武定边。鬼方尧日远，幕府代云连。

· 全唐诗 ·

汗马将行矣，卢龙已肃然。关防驱使节，花月眷离筵。  
自忝知音遇，而今感义偏。泪闻横吹落，心逐去旌悬。  
帝念夔能政，时须说济川。劳还应即尔，朝暮玉墀前。

卷 238\_85【奉和中书常舍人晚秋集贤院即事寄徐薛二侍御】

钱起

文星垂太虚，辞伯综群书。彩笔下鸳掖，褰衣来石渠。  
典坟探奥旨，造化睹权舆。述圣鲁宣父，通经汉仲舒。  
窗明宜缥带，地肃近丹除。清昼删诗暇，高秋作赋初。  
露盘侵汉耸，宫柳度鸦疏。静对连云阁，晴闻过阙车。  
旧僚云出矣，晚岁复何如。海峤瞻归路，江城梦直庐。  
含毫思两凤，望远寄双鱼。定笑巴歌拙，还参丽曲馀。

卷 238\_86【和范郎中宿直中书，晓玩清池，赠南省同僚两垣遗补】

钱起

青琐留才子，春池静禁林。自矜仙岛胜，宛在掖垣深。  
引派彤庭里，含虚玉砌阴。涨来知圣泽，清处见天心。  
兰气飘红岸，文星动碧浔。凤栖长近日，虬卧欲为霖。  
席宠虽高位，流谦乃素襟。焚香春漏尽，假寐晓莺吟。

· 全唐诗 ·

丹地宜清泚，朝阳复照临。司言兼逸趣，鼓兴接知音。  
义惊摛藻，三台响掷金。为怜风水外，落羽此漂沉。



· 全唐诗 ·

## 第二百三十九卷

卷 239\_1 【同程九早入中书（一作钱珣诗）】

钱起

汉家贤相重英奇，蟠木何材也见知。不意云霄能自致，  
空惊鹓鹭忽相随。腊雪初明柏子殿，春光欲上万年枝。  
独惭皇鉴明如日，未厌春光向玉墀。

卷 239\_2 【仲春宴王补阙城东小池】

钱起

王孙兴至幽寻好，芳草春深景气和。药院爱随流水入，  
山斋喜与白云过。犹嫌巢鹤窥人远，不厌丛花对客多。  
醉来倚玉无馀事，目送归鸿笑复歌。

卷 239\_3 【夜宿灵台寺寄郎士元】

钱起

· 全唐诗 ·

西日横山含碧空，东方吐月满禅宫。朝瞻双顶青冥上，  
夜宿诸天色界中。石潭倒献莲花水，塔院空闻松柏风。  
万里故人能尚尔，知君视听我心同。

卷 239\_4【题郎士元半日吴村别业，兼呈李长官】

钱起

半日吴村带晚霞，闲门高柳乱飞鸦。横云岭外千重树，  
流水声中一两家。愁人昨夜相思苦，闰月今年春意赊。  
自叹梅生头似雪，却怜潘令县如花。

卷 239\_5【猷川雪后送僧粲临还京，时避世卧疾】

钱起

连步青溪几万重，有时共立在孤峰。斋到盂空餐雪麦，  
经传金字坐云松。呻吟独卧猷川水，振锡先闻长乐钟。  
回望群山携手处，离心一一涕无从。

卷 239\_6【和李员外扈驾幸温泉宫】

钱起

· 全唐诗 ·

未央月晓度疏钟，凤辇时巡出九重。雪霁山门迎瑞日，  
云开水殿候飞龙。经寒不入宫中树，佳气常薰仗外峰。  
遥羨枚皋扈仙跸，偏承霄汉渥恩浓。

卷 239\_7【长信怨】

钱起

长信萤来一叶秋，蛾眉泪尽九重幽。鵙鹖观前明月度，  
芙蓉阙下绛河流。鸳衾久别难为梦，凤管遥闻更起愁。  
谁分昭阳夜歌舞，君王玉辇正淹留。

卷 239\_8【送河南陆少府】

钱起

云间陆生美且奇，银章朱绶映金羁。自料抱材将致远，  
宁嗟趋府暂牵卑。东城社日催巢燕，上苑秋声散御梨。  
朝夕诏书还柏署，行看飞隼集高枝。

卷 239\_9【送李评事赴潭州使幕】

钱起

· 全唐诗 ·

湖南远去有馀情，蘋叶初齐白芷生。谩说简书催物役，  
遥知心赏缓王程。兴过山寺先云到，啸引江帆带月行。  
幕下由来贵无事，伫闻谈笑静黎氓。

卷 239\_10 【送李九贬南阳】

钱起

玉柱金罍醉不欢，云山驿道向东看，鸿声断续暮天远，  
柳影萧疏秋日寒。霜降幽林沾蕙若，弦惊翰苑失鸳鸾。  
秋来回首君门阻，马上应歌行路难。

卷 239\_11 【送裴頔侍御使蜀】

钱起

柱史才年四十强，须髯玄发美清扬。朝天绣服乘恩贵，  
出使星轺满路光。锦水繁花添丽藻，峨眉明月引飞觞。  
多才自有云霄望，计日应追鸳鹭行。

卷 239\_12 【送韦信爱子归觐】

钱起

· 全唐诗 ·

离舟解缆到斜晖，春水东流燕北飞。才子学诗趋露冕，  
棠花含笑待斑衣。稍闻江树啼猿近，转觉山林过客稀。  
借问还珠盈合浦，何如鲤也入庭闱。

卷 239\_13【送兴平王少府游梁】

钱起

旧识相逢情更亲，攀欢甚少怆离频。黄绶罢来多远客，  
青山何处不愁人。日斜官树闻蝉满，雨过关城见月新。  
梁国遗风重词赋，诸侯应念马卿贫。

卷 239\_14【送张员外出牧岳州】

钱起

凤凰衔诏与何人，喜政多才宠寇恂。台上鸳鸯争送远，  
岳阳云树待行春。自怜黄阁知音在，不厌彤幃出守频。  
应笑冯唐衰且拙，世情相见白头新。

卷 239\_15【送孙十尉温县】

钱起

· 全唐诗 ·

飞花落絮满河桥，千里伤心送客遥。不惜芸香染黄绶，  
惟怜鸿羽下青霄。云衢有志终骧首，吏道无媒且折腰。  
急管繁弦催一醉，颓阳不驻引征镳。

卷 239\_16【送钟评事应宏词下第东归】

钱起

芳岁归人嗟转蓬，含情回首灞陵东。蛾眉不入秦台镜，  
鸂羽还惊宋国风。世事悠扬春梦里，年光寂寞旅愁中。  
劝君稍尽离筵酒，千里佳期难再同。

卷 239\_17【送严维尉河南】

钱起

蕙叶青青花乱开，少年趋府下蓬莱。甘泉未献扬雄赋，  
吏道何劳贾谊才。征陌独愁飞盖远，离筵只惜暝钟催。  
欲知别后相思处，愿植琼枝向柏台。

卷 239\_18【送马员外拜官觐省】

钱起

· 全唐诗 ·

二十为郎事汉文，驾雏骥子自为群。笔精已许台中妙，  
剑术还令世上闻。归觐屡经槐里月，出师常笑棘门军。  
莫言来往朝天远，看取鸣鞘入断云。

卷 239\_19【送冷朝阳擢第后归金陵觐省】

钱起

莱子昼归今始好，潘园景色夏偏浓。夕阳流水吟诗去，  
明月青山出竹逢。兄弟相欢初让果，乡人争贺旧登龙。  
佳期少别俄千里，云树愁看过几重。

卷 239\_20【九日宴浙江西亭】

钱起

诗人九日怜芳菊，筵客高斋宴浙江。渔浦浪花摇素壁，  
西陵树色入秋窗。木奴向熟悬金实，桑落新开泻玉缸。  
四子醉时争讲习，笑论黄霸旧为邦。

卷 239\_21【和王员外雪晴早朝】

钱起

· 全唐诗 ·

紫微晴雪带恩光，绕仗偏随鸳鹭行。长信月留宁避晓，  
宜春花满不飞香。独看积素凝清禁，已觉轻寒让太阳。  
题柱盛名兼绝唱，风流谁继汉田郎。

卷 239\_22【避暑纳凉】

钱起

木槿花开畏日长，时摇轻扇倚绳床。初晴草蔓缘新笋，  
频雨苔衣染旧墙。十旬河朔应虚醉，八柱天台好纳凉。  
无事始然知静胜，深垂纱帐咏沧浪。

卷 239\_23【早夏】

钱起

楚狂身世恨情多，似病如忧正是魔，花萼败春多寂寞，  
叶阴迎夏已清和。鹂黄好鸟摇深树，细白佳人著紫罗。  
军旅阅诗裁不得，可怜风景遣如何。

卷 239\_24【题嵩阳焦道士石壁】

钱起



· 全唐诗 ·

三峰花畔碧堂悬，锦里真人此得仙。玉体才飞西蜀雨，  
霓裳欲向大罗天。彩云不散烧丹灶，白鹿时藏种玉田。  
幸入桃源因去世，方期丹诀一延年。

卷 239\_25【题延州圣僧穴】

钱起

定力无涯不可称，未知何代坐禅僧。默默山门宵闭月，  
荧荧石壁昼然灯。四时树长书经叶，万岁岩悬挂杖藤。  
昔日舍身缘救鸽，今时出见有飞鹰。

卷 239\_26【乐游原晴望上中书李侍郎】

钱起

爽气朝来万里清，凭高一望九秋轻。不知凤沼霖初霁，  
但觉尧天日转明。四野山河通远色，千家砧杵共秋声，  
遥想青云丞相府，何时开阁引书生。

卷 239\_27【幽居春暮书怀（一作石门暮春，一作蓝田春暮）】

钱起

· 全唐诗 ·

自哂鄙夫多野性，贫居数亩半临湍。溪云杂雨来茅屋，  
山雀将雏到药栏。仙箬满床闲不厌，阴符在箧老羞看。  
更怜童子宜春服，花里寻师指杏坛。

卷 239\_28 【谒许由庙】

钱起

故向箕山访许由，林泉物外自清幽。松上挂瓢枝几变，  
石间洗耳水空流。绿苔唯见遮三径，青史空传谢九州。  
缅想古人增叹惜，飒然云树满岩秋。

卷 239\_29 【过张成侍御宅】

钱起

丞相幕中题凤人，文章心事每相亲。从军谁谓仲宣乐，  
入室方知颜子贫。杯里紫茶香代酒，琴中绿水静留宾。  
欲知别后相思意，唯愿琼枝入梦频。

卷 239\_30 【酬考功杨员外见赠佳句(黄卷读来今已老白头  
受屈不曾言)】

钱起

· 全唐诗 ·

上林谏猎知才薄，尺组承恩愧命牵。潢潦难滋沧海润，  
萤光空尽太阳前。虚名滥接登龙士，野性宁忘种黍田。  
相国无私人守朴，何辞老去上皇年。

卷 239\_31【寄永嘉王十二】

钱起

永嘉风景入新年，才子诗成定可怜。梦里还乡不相见，  
天涯忆戴复谁传。花倾晓露垂如泪，莺拂游丝断若弦。  
愿得回风吹海雁，飞书一宿到君边。

卷 239\_32【七盘岭阻寇闻李端公先到南楚】

钱起

日暮穷途泪满襟，云天南望羡飞禽。阮肠暗与孤鸿断，  
江水遥连别恨深。明月既能通忆梦，青山何用隔同心。  
秦楚眼看成绝国，相思一寄白头吟。

卷 239\_33【酬赵给事相寻不遇留赠】

钱起

· 全唐诗 ·

谁忆颜生穷巷里，能劳马迹破春苔。忽看童子扫花处，  
始愧夕郎题凤来。斜景适随诗兴尽，好风才送珮声回。  
岂无鸡黍期他日，惜此残春阻绿杯。

卷 239\_34【山中酬杨补阙见过】

钱起

日暖风恬种药时，红泉翠壁薜萝垂。幽溪鹿过苔还静，  
深树云来鸟不知。青琐同心多逸兴，春山载酒远相随。  
却惭身外牵缨冕，未胜杯前倒接<sub>离</sub>离。

卷 239\_29【同王鎬起居程浩郎中韩翊舍人题安国寺用上人院】

钱起

慧眼沙门真远公，经行宴坐有儒风。香缘不绝簪裾会，  
禅想宁妨藻思通。曙后炉烟生不灭，晴来阶色并归空。  
狂夫入室无馀事，唯与天花一笑同。

卷 239\_30【寻司勋李郎中不遇】

钱起

· 全唐诗 ·

知己知音同舍郎，如何咫尺阻清扬。每恨蒹葭傍芳树，  
多惭新燕入华堂。重花不隔陈蕃榻，修竹能深夫子墙。  
唯有早朝趋凤阁，朝时怜羽接鸳行。

卷 239\_31 【赠张南史】

钱起

紫泥何日到沧洲，笑向东阳沈隐侯。黛色晴峰云外出，  
縠文江水县前流。使臣自欲论公道，才子非关厌薄游。  
溪畔秋兰虽可佩，知君不得少停舟。

卷 239\_32 【暇日览旧诗因以题咏】

钱起

逍遥心地得关关，偶被功名涴我闲。有寿亦将归象外，  
无诗兼不恋人间。何穷默识轻洪范，未丧斯文胜大还。  
筐篚静开难似此，蕊珠春色海中山。

卷 239\_33 【汉武出猎】

钱起

· 全唐诗 ·

汉家无事乐时雍，羽猎年年出九重。玉帛不朝金阙路，  
旌旗长绕彩霞峰。且贪原兽轻黄屋，宁畏渔人犯白龙。  
薄暮方归长乐观，垂杨几处绿烟浓。

卷 239\_34【宴曹王宅】

钱起

贤王驷马退朝初，小苑三春带雨馀。林沼葱茏多贵气，  
楼台隐映接天居。仙鸡引敌穿红药，宫燕衔泥落绮疏。  
自叹平生相识愿，何如今日厕应徐。

卷 239\_35【重赠赵给事】

钱起

久飞鸳掖出时髦，耻负平生稽古劳。玉树满庭家转贵，  
云衢独步位初高。能迂骆驭寻蜗舍，不惜瑶华报木桃。  
应念潜郎守贫病，常悲休沐对蓬蒿。

卷 239\_36【赠阙下裴舍人】

钱起

· 全唐诗 ·

二月黄莺飞上林，春城紫禁晓阴阴。长乐钟声花外尽，  
龙池柳色雨中深。阳和不散穷途恨，霄汉长怀捧日新。  
献赋十年犹未遇，羞将白发对华簪。

卷 239\_37 【登刘宾客高斋（时公初退相，一作春题刘相公山斋）】

钱起

能以功成疏宠位，不将心赏负云霞。林间客散孙弘阁，  
城上山宜绮季家。蝴蝶晴连池岸草，黄鹂晚出柳园花。  
日陪鲤也趋文苑，谁道门生隔绂纱。

卷 239\_38 【哭辛霁】

钱起

流水辞山花别枝，随风一去绝还期。昨夜故人泉下宿，  
今朝白发镜中垂。音徽寂寂空成梦，容范朝朝未见时。  
旦暮馀生几息在，不应存没未尝悲。

卷 239\_39 【和慕容法曹寻渔者寄城中故人】

钱起

· 全唐诗 ·

孤烟一点绿溪湄，渔父幽居即旧基。饥鹭不惊收钓处，  
闲麈应乳负暄时。茅斋对雪开尊好，稚子焚枯饭客迟。  
胜事宛然怀抱里，顷来新得谢公诗。

卷 239\_40【山花】

钱起

山花照坞复烧溪，树树枝枝尽可迷。野客未来枝畔立，  
流莺已向树边啼。从容只是愁风起，眷恋常须向日西。  
别有妖妍胜桃李，攀来折去亦成蹊。

卷 239\_41【送杨著作归东海】

钱起

杨柳出关色，东行千里期。酒酣暂轻别，路远始相思。  
欲识离心尽，斜阳到海时。

卷 239\_42【送李协律还东京】

钱起

芳草忽无色，王孙复入关。长河侵驿道，匹马傍云山。



· 全唐诗 ·

愁见离居久，萤飞秋月闲。

卷 239\_43【秋馆言怀】

钱起

蟋蟀已秋思，蕙兰仍碧滋。蹉跎献赋客，叹息此良时。  
日夕云台下，商歌空自悲。

卷 239\_44【和刘明府宴县前山亭】

钱起

城隅劳心处，雪后岁芳开。山映千花出，泉经万井来。  
翔鸾欲下舞，上客且留杯。

卷 239\_45【新雨喜得王卿书问】

钱起

苦雨暗秋径，寒花垂紫苔。愁中绿尊尽，梦里故人来。  
果有相思字，银钩新月开。

· 全唐诗 ·

卷 239\_46【赋得巢燕送客】

钱起

能栖杏梁际，不与黄雀群。夜影寄红烛，朝飞高碧云。  
含情别故侣，花月惜春分。

卷 239\_47【题张蓝田讼堂】

钱起

角巾高枕向晴山，颂简庭空不用关。秋风窗下琴书静，  
夜景门前人吏闲。稍觉渊明归思远，东皋月出片云还。

卷 239\_48【江行无题一百首（一作钱珣诗）】

钱起

倾酒向涟漪，乘流东去时。寸心同尺璧，投此报冯夷。  
江曲全萦楚，云飞半自秦。岷山回首望，如别故关人。  
浦烟函夜色，冷日转秋旻。自有沈碑石，清光不照人。

· 全唐诗 ·

楚岸云空合，楚城人不来。只今谁善舞，莫恨发阳台。  
行背青山郭，吟当白露秋。风流无屈宋，空咏古荆州。  
晚来渔父喜，罾重欲收迟。恐有长江使，金钱愿赎龟。  
去指龙沙路，徒悬象阙心。夜凉无远梦，不为偶闻砧。  
霁云疏有叶，雨浪细无花。隐放扁舟去，江天自有涯。  
好日当秋半，层波动旅肠。已行千里外，谁与共秋光。  
润色非东里，官曹更建章。宦游难自定，来唤棹船郎。  
夜江清未晓，徒惜月光沉。不是因行乐，堪伤老大心。  
翳日多乔木，维舟取束薪。静听江叟语，俱是厌兵人。  
箭漏日初短，汀烟草未衰。雨馀虽更绿，不是采蘋时。  
山雨夜来涨，喜鱼跳满江。岸沙平欲尽，垂蓼入船窗。  
渚边新雁下，舟上独凄凉。俱是南来客，怜君缀一行。  
牵路沿江狭，沙崩岸不平。尽知行处险，谁肯载时轻。  
云密连江暗，风斜著物鸣。一杯真战将，笑尔作愁兵。

· 全唐诗 ·

柳拂斜开路，篱边数户村。可能还有意，不掩向江门。

不识桓公渴，徒吟子美诗。江清唯独看，心外更谁知。

憔悴异灵均，非谗作逐臣。如逢渔父问，未是独醒人。

水涵秋色静，云带夕阳高。诗癖非吾病，何妨吮短毫。

登舟非古岸，还似阻西陵。箕伯无多少，回头诎不能。

帆翅初张处，云鹏怒翼同。莫愁千里路，自有到来风。

秋云久无雨，江燕社犹飞。却笑舟中客，今年未得归。

佳节虽逢菊，浮生正似萍。故山何处望，荒岸小长亭。

行到楚江岸，苍茫人正迷。只知秦塞远，格磔鹧鸪啼。

月下江流静，村荒人语稀。鹭鸶虽有伴，仍共影双飞。

斗转月未落，舟行夜已深。有村知不远，风便数声砧。

棹惊沙鸟迅，飞溅夕阳波。不顾鱼多处，应防一目罗。

渐觉江天远，难逢故国书。可能无往事，空食鼎中鱼。

岸草连荒色，村声乐稔年。晚晴初获稻，闲却采莲船。

· 全唐诗 ·

滩浅争游鹭，江清易见鱼。怪来吟未足，秋物欠红蕖。  
蛩响依莎草，萤飞透水烟。夜凉谁咏史，空泊运租船。  
睡稳叶舟轻，风微浪不惊。任君芦苇岸，终夜动秋声。  
自念平生意，曾期一郡符。岂知因谪宦，斑鬓入江湖。  
烟渚复烟渚，画屏休画屏。引愁天末去，数点暮山青。  
水天凉夜月，不是惜清光。好物随人秘，秦淮忆建康。  
古来多思客，摇落恨江潭。今日秋风至，萧疏独沔南。  
映竹疑村好，穿芦觉渚幽。渐安无旷土，姜芋当农收。  
秋风动客心，寂寂不成吟。飞上危檣立，啼乌报好音。  
见底高秋水，开怀万里天。旅吟还有伴，沙柳数枝蝉。  
九日自佳节，扁舟无一杯。曹园旧尊酒，戏马忆高台。  
兵火有馀烬，贫村才数家。无人争晓渡，残月下寒沙。  
渚禽菱芡足，不向稻粱争。静宿凉湾月，应无失侣声。  
轻云未护霜，树杪橘初黄。信是知名物，微风过水香。

· 全唐诗 ·

渺渺望天涯，清涟浸赤霞。难逢星汉使，乌鹊日乘槎。

土旷深耕少，江平远钓多。生平皆弃本，金革竟如何。

海月非常物，等闲不可寻。披沙应有地，浅处定无金。

风晚冷飕飕，芦花已白头。旧来红叶寺，堪忆玉京秋。

风好来无阵，云闲去有踪。钓歌无远近，应喜罢艨艟。

吴疆连楚甸，楚俗异吴乡。漫把尊中物，无人啄蟹筐。

岸绿野烟远，江红斜照微。撑开小渔艇，应到月明归。

雨馀江始涨，漾漾见流薪。曾叹河中木，斯言忆古人。

叶舟维夏口，烟野独行时。不见头陀寺，空怀幼妇碑。

晚泊武昌岸，津亭疏柳风。数株曾手植，好事忆陶公。

坠露晓犹浓，秋花不易逢。涉江虽已晚，高树搴芙蓉。

舟航依浦定，星斗满江寒。若比阴霾日，何妨夜未阑。

近戍离金落，孤岑望火门。唯将知命意，潇洒向乾坤。

丛菊生堤上，此花长后时。有人还采掇，何必在春期。

· 全唐诗 ·

夕景残霞落，秋寒细雨晴。短缨何用濯，舟在月中行。  
堤坏漏江水，地坳成野塘。晚荷人不折，留取作秋香。  
左宦终何路，摅怀亦自宽。襏笈嘲白鹭，无意喻臬鸾。  
楼空人不归，云似去时衣。黄鹤无心下，长应笑令威。  
白帝朝惊浪，浔阳暮映云。等闲生险易，世路只如君。  
橹慢开轻浪，帆虚带白云。客船虽狭小，容得庾将军。  
风雨正甘寝，云霓忽晚晴。放歌虽自遣，一岁又峥嵘。  
静看秋江水，风微浪渐平。人间驰竞处，尘土自波成。  
风劲帆方疾，风回棹却迟。较量人世事，不校一毫厘。  
咫尺愁风雨，匡庐不可登。只疑云雾窟，犹有六朝僧。  
幽思正迟迟，沙边濯弄时。自怜非博物，犹未识凫葵。  
曾有烟波客，能歌西塞山。落帆唯待月，一钓紫菱湾。  
千顷水纹细，一拳岚影孤。君山寒树绿，曾过洞庭湖。  
光阔重湖水，低斜远雁行。未曾无兴咏，多谢沈东阳。

· 全唐诗 ·

晚菊绕江垒，忽如开古屏。莫言时节过，白日有馀馨。  
秋寒鹰隼健，逐雀下云空。知是江湖阔，无心击塞鸿。  
日落长亭晚，山门步障青。可怜无酒分，处处有旗亭。  
江草何多思，冬青尚满洲。谁能惊鵬鸟，作赋为沙鸥。  
远岸无行树，经霜有半红。停船搜好句，题叶赠江枫。  
身世比行舟，无风亦暂休。敢言终破浪，唯愿稳乘流。  
数亩苍苔石，烟濛鹤卵洲。定因词客遇，名字始风流。  
兴闲停桂楫，路好过松门。不负佳山水，还开酒一尊。  
幽怀念烟水，长恨隔龙沙。今日滕王阁，分明见落霞。  
短楫休敲桂，孤根自驻萍。自怜非剑气，空向斗牛星。  
江流何渺渺，怀古独依依。渔父非贤者，芦中但有矶。  
高浪如银屋，江风一发时。笔端降太白，才大语终奇。  
细竹渔家路，晴阳看结缯。喜来邀客坐，分与折腰菱。  
幸有烟波兴，宁辞笔砚劳。缘情无怨刺，却似反离骚。



· 全唐诗 ·

平湖五百里，江水想通波。不奈扁舟去，其如决计何。  
数峰云断处，去岸映高山。身到韦江日，犹应未得闲。  
一湾斜照水，三版顺风船。未敢相邀约，劳生只自怜。  
江雨正霏微，江村晚渡稀。何曾妨钓艇，更待得鱼归。  
沙上独行时，高吟到楚词。难将垂岸蓼，盈把当江蓠。  
新野旧楼名，浔阳胜赏情。照人长一色，江月共凄清。  
愿饮西江水，那吟北渚愁。莫教留滞迹，远比蔡昭侯。  
湖口分江水，东流独有情。当时好风物，谁伴谢宣城。  
浔阳江畔菊，应似古来秋。为问幽栖客，吟时得酒不。  
高峰有佳号，千尺倚寒松。若使炉烟在，犹应为上公。  
万木已清霜，江边村事忙。故溪黄稻熟，一夜梦中香。  
楚水苦萦回，征帆落又开。可缘非直路，却有好风来。  
远谪岁时晏，暮江风雨寒。仍愁系舟处，惊梦近长滩。

· 全唐诗 ·

卷 239\_49 【言怀】

钱起

夜月霁未好，云泉堪梦归。如何建章漏，催著早朝衣。

卷 239\_50 【和张仆射塞下曲（一作卢纶诗）】

钱起

月黑雁飞高，单于夜遁逃。欲将轻骑逐，大雪满弓刀。

卷 239\_51 【送李明府去官】

钱起

谤言三至后，直道叹何如。今日蓝溪水，无人不夜鱼。

卷 239\_52 【赴章陵酬李卿赠别】

钱起

一官叨下秩，九棘谢知音。芳草文园路，春愁满别心。

· 全唐诗 ·

卷 239\_53【逢侠者】

钱起

燕赵悲歌士，相逢剧孟家。寸心言不尽，前路日将斜。

卷 239\_54【郎员外见寻不遇】

钱起

轩骑来相访，渔樵悔晚归。更怜垂露迹，花里点墙衣。

卷 239\_55【过李侍御宅（一作过故吕侍御宅）】

钱起

不见承明客，愁闻长乐钟。马卿何早世，汉主欲登封。

卷 239\_56【宿洞口馆】

钱起

野竹通溪冷，秋泉入户鸣。乱来人不到，芳草上阶生。

· 全唐诗 ·

卷 239\_57【九日寄侄筵簪等】

钱起

采菊偏相忆，传香寄便风。今朝竹林下，莫使桂尊空。

卷 239\_58【梨花】

钱起

艳静如笼月，香寒未逐风。桃花徒照地，终被笑妖红。

卷 239\_59【题崔逸人山亭】

钱起

药径深红藓，山窗满翠微。羡君花下酒，蝴蝶梦中飞。

卷 239\_60【蓝田溪杂咏二十二首·登台（一作望山台）】

钱起

望山登春台，目尽趣难极。晚景下平阡，花际霞峰色。

· 全唐诗 ·

卷 239\_61【蓝田溪杂咏二十二首·板桥】

钱起

静宜樵隐度，远与车马隔。有时行药来，喜遇归山客。

卷 239\_62【蓝田溪杂咏二十二首·石井】

钱起

片霞照仙井，泉底桃花红。那知幽石下，不与武陵通。

卷 239\_63【蓝田溪杂咏二十二首·古藤】

钱起

引蔓出云树，垂纶覆巢鹤。幽人对酒时，苔上闲花落。

卷 239\_64【蓝田溪杂咏二十二首·晚归鹭】

钱起

池上静难厌，云间欲去晚。忽背夕阳飞，乘兴清风远。

· 全唐诗 ·

卷 239\_65【蓝田溪杂咏二十二首·洞仙谣（一作伺山径）】

钱起

几转到青山，数重度流水。秦人入云去，知向桃源里。

卷 239\_66【蓝田溪杂咏二十二首·药圃】

钱起

春畦生百药，花叶香初霁。好容似风光，偏来入丛蕙。

卷 239\_67【蓝田溪杂咏二十二首·石上苔】

钱起

净与溪色连，幽宜松雨滴。谁知古石上，不染世人迹。

卷 239\_68【蓝田溪杂咏二十二首·窗里山】

钱起

远岫见如近，千里一窗里。坐来石上云，乍谓壶中起。

· 全唐诗 ·

卷 239\_69【蓝田溪杂咏二十二首·竹间路】

钱起

暗归草堂静，半入花园去。有时载酒来，不与清风遇。

卷 239\_70【蓝田溪杂咏二十二首·竹屿】

钱起

幽鸟清涟上，兴来看不足。新篁压水低，昨夜鸳鸯宿。

卷 239\_71【蓝田溪杂咏二十二首·砌下泉】

钱起

穿云来自远，激砌流偏驶。能资庭户幽，更引海禽至。

卷 239\_72【蓝田溪杂咏二十二首·戏鸥】

钱起

乍依菱蔓聚，尽向芦花灭。更喜好风来，数片翻晴雪。

· 全唐诗 ·

卷 239\_73【蓝田溪杂咏二十二首·远山钟】

钱起

风送出山钟，云霞度水浅。欲知声尽处，鸟灭寥天远。

卷 239\_74【蓝田溪杂咏二十二首·东陂（一作忆皇子陂）】

钱起

永日兴难望，掇芳春陂曲。新晴花枝下，爱此苔水绿。

卷 239\_75【蓝田溪杂咏二十二首·池上亭】

钱起

临池构杏梁，待客归烟塘。水上褰帘好，莲开杜若香。

卷 239\_76【蓝田溪杂咏二十二首·衔鱼翠鸟】

钱起

有意莲叶间，瞥然下高树。擘波得潜鱼，一点翠光去。



· 全唐诗 ·

卷 239\_77【蓝田溪杂咏二十二首·石莲花】

钱起

幽石生芙蓉，百花惭美色。远笑越溪女，闻芳不可识。

卷 239\_78【蓝田溪杂咏二十二首·潺湲声】

钱起

乱石跳素波，寒声闻几处。飏飏暝风引，散出空林去。

卷 239\_79【蓝田溪杂咏二十二首·松下雪】

钱起

虽因朔风至，不向瑶台侧。唯助苦寒松，偏明后凋色。

卷 239\_80【蓝田溪杂咏二十二首·田鹤】

钱起

田鹤望碧霄，舞风亦自举。单飞后片雪，早晚及前侣。

· 全唐诗 ·

卷 239\_81【蓝田溪杂咏二十二首·题南陂】

钱起

家住凤城南，门临古陂曲。时怜上林雁，半入池塘宿。

卷 239\_82【蓝田溪杂咏二十二首·伤秋】

钱起

岁去人头白，秋来树叶黄。搔头向黄叶，与尔共悲伤。

卷 239\_83【送崔山人归山】

钱起

东山残雨挂斜晖，野客巢由指翠微。  
别酒稍酣乘兴去，知君不羡白云归。

卷 239\_84【题礼上人壁画山水】

钱起

· 全唐诗 ·

连山画出映禅扉，粉壁香筵满翠微。  
坐来炉气萦空散，共指晴云向岭归。

卷 239\_85【送欧阳子还江华郡】

钱起

江华胜事接湘滨，千里湖山入兴新。  
才子思归催去棹，汀花且为驻残春。

卷 239\_86【暮春归故山草堂（一作刘长卿诗：晚春归山居题窗前竹）】

钱起

谷口春残黄鸟稀，辛夷花尽杏花飞。  
始怜幽竹山窗下，不改清阴待我归。

卷 239\_87【访李卿不遇】

钱起

画戟朱楼映晚霞，高梧寒柳度飞鸦。  
门前不见归轩至，城上愁看落日斜。

· 全唐诗 ·

卷 239\_88 【与赵莒茶宴】

钱起

竹下忘言对紫茶，全胜羽客醉流霞。  
尘心洗尽兴难尽，一树蝉声片影斜。

卷 239\_89 【故王维右丞堂前芍药花开，凄然感怀】

钱起

芍药花开出旧栏，春衫掩泪再来看。  
主人不在花长在，更胜青松守岁寒。

卷 239\_90 【送张参及第还家】

钱起

大学三年闻琢玉，东堂一举早成名。  
借问还家何处好，玉人含笑下机迎。

卷 239\_91 【夜泊鹦鹉洲】

· 全唐诗 ·

钱起

月照溪边一罩篷，夜闻清唱有微风。  
小楼深巷敲方响，水国人家在处同。

卷 239\_92【归雁】

钱起

潇湘何事等闲回，水碧沙明两岸苔。  
二十五弦弹夜月，不胜清怨却飞来。

卷 239\_93【春郊】

钱起

水绕冰渠渐有声，气融烟坞晚来明。  
东风好作阳和使，逢草逢花报发生。

卷 239\_94【晚归严明府题门】

钱起

降士林沾蕙草寒，弦惊翰苑失鸳鸾。

· 全唐诗 ·

秋中回首君门阻，马上应歌行路难。

卷 239\_95 【秋夜送赵冽归襄阳】

钱起

斗酒忘言良夜深，红萱露滴鹊惊林。  
欲知别后思今夕，汉水东流是寸心。

卷 239\_96 【送符别驾还郡（一作还钱塘）】

钱起

骥足駸駸吴越关，屏星复与紫书还。  
已知从事元无事，城上愁看海上山。

卷 239\_97 【同王员外陇城绝句】

钱起

三军版筑脱金刀，黎庶翻惭将士劳。  
不忆新城连嶂起，唯惊画角入云高。

· 全唐诗 ·

卷 239\_98 【过故洛城】

钱起

故城门外春日斜，故城门里无人家。  
市朝欲认不知处，漠漠野田空草花。

卷 239\_99 【校猎曲】

钱起

长杨杀气连云飞，汉主秋旄正掩围。  
重门日晏红尘出，数骑胡人猎兽归。

卷 239\_100 【晚过横灞寄张蓝田】

钱起

乱水东流落照时，黄花满径客行迟。  
林端忽见南山色，马上还吟陶令诗。

卷 239\_101 【九日田舍】

· 全唐诗 ·

钱起

今日陶家野兴偏，东篱黄菊映秋田。  
浮云暝鸟飞将尽，始达青山新月前。

卷 239\_102【长安落第】

钱起

花繁柳暗九门深，对饮悲歌泪满襟。  
数日莺花皆落羽，一回春至一伤心。



· 全唐诗 ·

## 第二百四十卷

卷 240\_1【二风诗·治风诗五篇·至仁】

元结

猗皇至圣兮，至惠至仁，德施蕴蕴。蕴蕴如何？不全不缺，莫知所贙。

猗皇至圣兮，至俭至明，化流瀛瀛。瀛瀛如何？不虢不桀，莫知其极。

卷 240\_2【二风诗·治风诗五篇·至慈】

元结

至化之深兮，猗猗娒娒。如煦如吹，如负如持，而不知其慈。故莫周莫止，静和而止。

至化之极兮，瀛瀛溶溶。如涵如封，如随如从，而不知其功。故莫由莫己，顺时而理。

卷 240\_3【二风诗·治风诗五篇·至劳】

· 全唐诗 ·

元结

至哉勤绩，不盈不延；谁能颂之，我请颂焉。  
於戏劳王，勤亦何极；济尔九土，山川沟洫。

至哉俭德，不丰不敷；谁能颂之，我请颂夫。  
於戏劳王，俭亦何深；戒尔万代，奢侈荒淫。

至哉茂功，不升不圯；谁能颂之，我请颂矣。  
於戏劳王，功亦何大；去尔兆庶，洪湮灾害。

卷 240\_4【二风诗·治风诗五篇·至正】

元结

为君之道，何以为明？功不滥赏，罪不滥刑；  
谗言则听，谄言不听；王至是然，可为明焉。

卷 240\_5【二风诗·治风诗五篇·至理】

元结

理何为兮，系修文德。加之清一，莫不顺则。意彼刑法，  
设以化人；致使无之，而化益纯。所谓代刑，以道去杀。  
呜呼呜呼！人不斯察。

· 全唐诗 ·

卷 240\_6【二风诗·乱风诗五篇·至荒】

元结

国有世谟，仁信勤欵。王实愾荒，终亡此乎。  
焉有力恣谄惑，而不亡其国？呜呼亡王，忍为此心！  
敢正亡王，永为世箴。

卷 240\_7【二风诗·乱风诗五篇·至乱】

元结

嘻乎王家，曾有凶王，中世失国，岂非骄荒。复复之难，  
令则可忘。

嘻乎乱王，王心何思？暴淫虐惑，无思不为；生人冤怨，  
言何极之。

卷 240\_8【二风诗·乱风诗五篇·至虐】

元结

夫为君上兮，慈顺明恕，可以化人。忍行昏恣，独乐其身；  
一徇所欲，万方悲哀。

· 全唐诗 ·

于斯而喜，当云何哉？

夫为君上兮，兢慎俭约，可以保身，忍行荒惑，虐暴于人；  
前世失国，如王者多。

于斯不寤，当如之何。

卷 240\_9【二风诗·乱风诗五篇·至惑】

元结

贤圣为上兮，必俭约戒身，鉴察化人，所以保福也。如何  
不思，荒恣是为？上下隔塞，  
人神怨讟；敖恶无厌，不畏颠坠。

圣贤为上兮，必用贤正，黜奸佞之臣，所以长久也。如何  
反是，以为乱矣？宠邪信惑，  
近佞好谀；废嫡立庶，忍为祸谖。

卷 240\_10【二风诗·乱风诗五篇·至伤】

元结

夫可伤兮？伤王乎，欲何为乎？将蠹枯矣，无人救乎？  
蠹枯及矣，不可救乎？嗟伤王！自为人君，变为人奴！  
为人君者，忘戒乎。

· 全唐诗 ·

卷 240\_11【补乐歌十首·网罟】

元结

吾人苦兮，水深深。网罟设兮，水不深。

吾人苦兮，山幽幽。网罟设兮，山不幽。

卷 240\_12【补乐歌十首·丰年】

元结

猗太帝兮，其智如神；分草实兮，济我生人。

猗太帝兮，其功如天；均四时兮，成我丰年。

卷 240\_13【补乐歌十首·云门】

元结

玄云溶溶兮，垂雨濛濛；类我圣泽兮，涵濡不穷。

玄云漠漠兮，含映逾光；类我圣德兮，溥被无方。

· 全唐诗 ·

卷 240\_14【补乐歌十首·九渊】

元结

圣德至深兮，瀰瀰如渊；生类娒娒兮，孰知其然。

卷 240\_15【补乐歌十首·五茎】

元结

植植万物兮，滔滔根茎；五德涵柔兮，泐泐而生。  
其生如何兮朏朏，天下皆自我君兮化成。

卷 240\_16【补乐歌十首·六英】

元结

我有金石兮，击考崇崇。与汝歌舞兮，上帝之风。由六合兮，英华泐泐。

我有丝竹兮，韵和泠泠。与汝歌舞兮，上帝之声。由六合兮，根底嬴嬴。

· 全唐诗 ·

卷 240\_17【补乐歌十首·咸池】

元结

元化油油兮，孰知其然。至德汨汨兮，顺之以先。

元化混混兮，孰知其然。至道泱泱兮，由之以全。

卷 240\_18【补乐歌十首·大韶】

元结

森森群象兮，日见生成。欲闻朕初兮，玄封冥冥。

洋洋至化兮，日见深柔。欲闻大濩兮，大渊油油。

卷 240\_19【补乐歌十首·大夏】

元结

茫茫下土兮，乃生九州。山有长岑兮，川有深流。

茫茫下土兮，乃均四方。国有安义兮，野有封疆。

· 全唐诗 ·

茫茫下土兮，乃歌万年。上有茂功兮，下戴仁天。

卷 240\_20【补乐歌十首·大濩】

元结

万姓苦兮，怨且哭，不有圣人兮，谁护育。

圣人生兮，天下和。万姓熙熙兮，舞且歌。

卷 240\_21【系乐府十二首·思太古】

元结

东南三千里，沅湘为太湖。湖上山谷深，有人多似愚。  
婴孩寄树颠，就水捕鰕鲈。所欢同鸟兽，身意复何拘。  
吾行遍九州，此风皆已无。吁嗟圣贤教，不觉久踌蹰。

卷 240\_22【系乐府十二首·陇上叹】

元结

援车登陇坂，穷高遂停驾。延望戎狄乡，巡回复悲咤。  
滋移有情教，草木犹可化。圣贤礼让风，何不遍西夏。



· 全唐诗 ·

父子忍猜害，君臣敢欺诈。所适今若斯，悠悠欲安舍。

卷 240\_23【系乐府十二首·颂东夷】

元结

尝闻古天子，朝会张新乐。金石无全声，宫商乱清浊。  
东惊且悲叹，节变何烦数。始知中国人，耽此亡纯朴。  
尔为外方客，何为独能觉。其音若或在，蹈海吾将学。

卷 240\_24【系乐府十二首·贱士吟】

元结

南风发天和，和气天下流。能使万物荣，不能变羁愁。  
为愁亦何尔，自请说此由。谄竞实多路，苟邪皆共求。  
尝闻古君子，指以为深羞。正方终莫可，江海有沧洲。

?

卷 240\_25【系乐府十二首·欸乃曲】

元结

谁能听欸乃，欸乃感人情。不恨湘波深，不怨湘水清。  
所嗟岂敢道，空羨江月明。昔闻扣断舟，引钓歌此声。

· 全唐诗 ·

始歌悲风起，歌竟愁云生。遗曲今何在，逸为渔父行。

卷 240\_26【系乐府十二首·贫妇词】

元结

谁知苦贫夫，家有愁怨妻。请君听其词，能不为酸凄。  
所怜抱中儿，不如山下麕。空念庭前地，化为人吏蹊。  
出门望山泽，回头心复迷。何时见府主，长跪向之啼。

卷 240\_27【系乐府十二首·去乡悲】

元结

踌蹰古塞关，悲歌为谁长。日行见孤老，羸弱相提将。  
闻其呼怨声，闻声问其方。方言无患苦，岂弃父母乡。  
非不见其心，仁惠诚所望。念之何可说，独立为凄伤。

卷 240\_28【系乐府十二首·寿翁兴】

元结

借问多寿翁，何方自修育。惟云顺所然，忘情学草木。  
始知世上术，劳苦化金玉。不见充所求，空闻肆耽欲。

· 全唐诗 ·

清和存王母，潜濩无乱黷。谁正好长生，此言堪佩服。

卷 240\_29【系乐府十二首·农臣怨】

元结

农臣何所怨，乃欲干人主。不识天地心，徒然怨风雨。  
将论草木患，欲说昆虫苦。巡回宫阙傍，其意无由吐。  
一朝哭都市，泪尽归田亩。谣颂若采之，此言当可取。

卷 240\_30【系乐府十二首·谢大龟】

元结

客来自江汉，云得双大龟。且言龟甚灵，问我君何疑。  
自昔保方正，顾尝无妄私。顺和固鄙分，全守真常规。  
行之恐不及，此外将何为。惠恩如可谢，占问敢终辞。

卷 240\_31【系乐府十二首·古遗叹】

元结

古昔有遗叹，所叹何所为。有国遗贤臣，万事为冤悲。  
所遗非遗望，所遗非可遗。所遗非遗用，所遗在遗之。

· 全唐诗 ·

嗟嗟山海客，全独竟何辞。心非膏濡类，安得无不遗。

卷 240\_32【系乐府十二首·下客谣】

元结

下客无黄金，岂思主人怜。客言胜黄金，主人然不然。  
珠玉成彩翠，绮罗如婵娟。终恐见斯好，有时去君前。  
岂知保忠信，长使令德全。风声与时茂，歌颂万千年。

卷 240\_33【漫歌八曲·故城东】

元结

漫惜故城东，良田野草生。说句县大夫，大夫劝我耕。  
耕者我为先，耕者相次焉。谁爱故城东，今为近郭田。

卷 240\_34【漫歌八曲·西阳城】

元结

江北有大洲，洲上堪力耕。此中宜五谷，不及西阳城。  
城畔多野桑，城中多古荒。衣食可力求，此外何所望。

· 全唐诗 ·

卷 240\_35【漫歌八曲·大回中】

元结

樊水欲东流，大江又北来。樊山当其南，此中为大回。  
回中鱼好游，回中多钓舟。漫欲作渔人，终焉无所求。

卷 240\_36【漫歌八曲·小回中】

元结

丛石横大江，人言是钓台。水石相冲激，此中为小回。  
回中浪不恶，复在武昌郭。来客去客船，皆向此中泊。

卷 240\_37【漫歌八曲·将牛何处去二首】

元结

将牛何处去，耕彼故城东。相伴有田父，相欢惟牧童。

将牛何处去，耕彼西阳城。叔闲修农具，直者伴我耕。

卷 240\_38【漫歌八曲·将船何处去二首】

· 全唐诗 ·

元结

将船何处去，钓彼大回中。叔静能鼓枹，正者随弱翁。

将船何处去，送客小回南。有时逢恶客，还家亦少酣。

卷 240\_39【引极三首·思元极】

元结

天旷莽兮杳泱茫，气浩浩兮色苍苍。上何有兮人不测，  
积清寥兮成元极。彼元极兮灵且异，思一见兮藐难致。  
思不从兮空自伤，心悵悵兮意惶惶。思假翼兮鸾凤，  
乘长风兮上翔。揖元气兮本深实，餐至和兮永终日。

卷 240\_40【引极三首·望仙府】

元结

山凿落兮眇嶽岑，云溶溶兮木杳杳。中何有兮人不睹，  
远欹差兮閼仙府。彼仙府兮深且幽，望一至兮藐无由。  
望不从兮知如何，心混混兮意浑和。思假足兮虎豹，  
超阻绝兮凌蹕。诣仙府兮从羽人，饵五灵兮保清真。

· 全唐诗 ·

卷 240\_41 【引极三首·怀潜君】

元结

海浩淼兮汨洪溶，流蕴蕴兮涛汹汹。下何有兮人不闻，  
深溢漭兮居潜君。彼潜君兮圣且神，思一见兮藐无因。  
思不从兮空踟蹰，心回迷兮意萦纡。思假鳞兮鲲龙，  
激沆浪兮奔从。拜潜君兮索玄宝，佩元符兮轨皇道。

卷 240\_42 【演兴四首·招太灵】

元结

招太灵兮山之巅，山屹山兮水沦涟。祠之禴兮眇何年，  
木修修兮草鲜鲜。嗟魑魅兮淫厉，自古昔兮崇祭。  
禧太灵兮端清，予愿致夫精诚。久惛兮惋惋，  
招摅摅兮呼风。风之声兮起飏飏，吹玄云兮散而浮。  
望太灵兮俨而安，澹油溶兮都清闲。

卷 240\_43 【演兴四首·初祀】

元结

山之乳兮葺太祠，木孙为桷兮木母榑。云纓为 兮愚木

· 全唐诗 ·

枏。洞渊禅兮揭巍巍。涂木兰兮蔚糝薦，被弱草兮褊衲联。  
仡浑洪兮馥闾闾，管化石兮洞剖天。翹修钗兮掉茱萸，  
灵巫累兮舞颺干。荐天鲋兮酒阳泉，献水芸兮饭霜粃，  
与太灵兮千万年。

卷 240\_44【演兴四首·讼木魅】

元结

登高峰兮俯幽谷，心恻恻兮念群木。  
见樗栲兮相阴覆，怜榿榕兮不丰茂；  
见榛梗之森梢，闵枞檣兮合蠹。  
榴桄桄兮未坚，樟粮粮兮可屈。  
榴林樽兮不香，拔丰茸兮已实。  
岂元化之不均兮，非雨露之偏殊。  
谅理性之不等于顺时兮，  
不如瘞吾心以冥想，终念此兮不怡。  
僵予莫识天地之意兮，愿截恶木之根，  
倾泉獍之古巢，取 童以为薪。  
割大木使飞焰，溪枯腐之烧焚。  
实非吾心之不仁惠也，岂耻夫善恶之相纷。  
且欲畚三河之膏壤，裨济水之清涟。  
将封灌乎善木，令櫛櫛以挺挺。  
尚畏乎众善之未茂兮，为众恶之所挑凌。  
思聚义以为曹，令敷扶以相胜。  
取方所以柯如兮，吾将出于南荒。



· 全唐诗 ·

求寿藤与蟠木，吾将出于东方。  
祈有德而来归，辅神怪与坚香。  
且忧颺之翩翩，又愁狖之奔驰。  
及阴阳兮不和，恶此土之失时。  
今神怪兮不茂，使坚香兮不滋。  
重嗟惋兮何补，每齐心以精意。  
切援祝于神明，冀感通于天地。  
犹恐众妖兮木魅，魍魎兮山精，  
上迷惑于灵心，经给于言兮不听。  
敢引佩以指水，誓吾心兮自明。

卷 240\_45【演兴四首·闵岭中】

元结

群山以延想，吾独闵乎岭中。  
彼岭中兮何有，有天含之玉峰。  
殊閼绝之极颠，上闻产乎翠茸。  
欲采之以将寿，眇不知夫所从。  
大渊蕴蕴兮绝窾岌，非梯梁以通险，当无路兮可入。  
彼猛毒兮曹聚，必凭托乎阻修。  
常儼儼兮伺人，又如何兮不愁。  
彼妖精兮变怪，必假见于风雨。  
常闪闪而伺人，又如何兮不苦。  
欲仗仁兮托信，将径往兮不难。  
久懷懷以凌惋，却迟回而永叹。

· 全唐诗 ·

惧大灵兮不知，以予心为永惟。  
若不可乎遂已，吾终保夫直方。  
则必蒙皮篋以为矢，弦毋筱以为弧。  
化毒铜以为戟，刺棘竹以为戣。  
得猛烈之材，获与之而并驱。  
且舂刺乎恶毒，又引射夫妖怪。  
尽群类兮使无，令善仁兮不害。  
然后采椹榕以驾深，收枳橐兮梯险。  
跻予身之飘飘，承予步之跼蹐。  
入岭中而登玉峰，极闕绝而求翠茸。  
将吾寿兮随所从，思未得兮马如龙。  
独翳蔽于山颠，久低回而愠瘵。  
空仰讼于上玄，彼至精兮必应。  
宁古有而今无，将与身而皆亡。  
岂言之而已乎。

· 全唐诗 ·

## 第二百四十一卷

### 卷 241\_1 【闵荒诗】

元结

炀皇嗣君位，隋德滋昏幽。日作及身祸，以为长世谋。  
居常耻前王，不思天子游。意欲出明堂，便登浮海舟。  
令行山川改，功与玄造侔。河淮可支合，峰嶂生回沟。  
封隄下泽中，作山防逸流。船舫状龙鹳，若负宫阙浮。  
荒娱未央极，始到沧海头。忽见海门山，思作望海楼。  
不知新都城，已为征战丘。当时有遗歌，歌曲太冤愁。  
四海非天狱，何为非天囚。天囚正凶忍，为我万姓雠。  
人将引天钗，人将持天钁。所欲充其心，相与绝悲忧。  
自得隋人歌，每为隋君羞。欲歌当阳春，似觉天下秋。  
更歌曲未终，如有怨气浮。奈何昏王心，不觉此怨尤。  
遂令一夫唱，四海欣提矛。吾闻古贤君，其道常静柔。  
慈惠恐不足，端和忘所求。嗟嗟有隋氏，惛惛谁与俦。

### 卷 241\_2 【忝官引】

元结

· 全唐诗 ·

天下昔无事，僻居养愚钝。山野性所安，熙然自全顺。  
忽逢暴兵起，闾巷见军阵。将家瀛海滨，自弃同刍粪。  
往在乾元初，圣人启休运。公车诣魏阙，天子垂清问。  
敢诵王者箴，亦献当时论。朝廷爱方直，明主嘉忠信。  
屡授不次官，曾与专征印。兵家未曾学，荣利非所徇。  
偶得凶丑降，功劳愧方寸。尔来将四岁，惭耻言可尽。  
请取冤者辞，为吾忝官引。冤辞何者苦，万邑馀灰烬。  
冤辞何者悲，生人尽锋刃。冤辞何者甚，力役遇劳困。  
冤辞何者深，孤弱亦哀恨。无谋救冤者，禄位安可近。  
而可爱轩裳，其心又干进。此言非所戒，此言敢贻训。  
实欲辞无能，归耕守吾分。

卷 241\_3【春陵行】

元结

军国多所需，切责在有司。有司临郡县，刑法竞欲施。  
供给岂不忧，征敛又可悲。州小经乱亡，遗人实困疲。  
大乡无十家，大族命单羸。朝餐是草根，暮食仍木皮。  
出言气欲绝，意速行步迟。追呼尚不忍，况乃鞭扑之。  
郭亭传急符，来往迹相追。更无宽大恩，但有迫促期。  
欲令鬻儿女，言发恐乱随。悉使索其家，而又无生资。  
听彼道路言，怨伤谁复知。去冬山贼来，杀夺几无遗。  
所愿见王官，抚养以惠慈。奈何重驱逐，不使存活为。  
安人天子命，符节我所持。州县忽乱亡，得罪复是谁。  
逋缓违诏令，蒙责固其宜。前贤重守分，恶以祸福移。

· 全唐诗 ·

亦云贵守官，不爱能适时。顾惟孱弱者，正直当不亏。  
何人采国风，吾欲献此辞。

卷 241\_4【贼退示官吏】

元结

昔岁逢太平，山林二十年。泉源在庭户，洞壑当门前。  
井税有常期，日晏犹得眠。忽然遭世变，数岁亲戎旃。  
今来典斯郡，山夷又纷然。城小贼不屠，人贫伤可怜。  
是以陷邻境，此州独见全。使臣将王命，岂不如贼焉。  
今彼征敛者，迫之如火煎。谁能绝人命，以作时世贤。  
思欲委符节，引竿自刺船。将家就鱼麦，归老江湖边。

卷 241\_5【寄源休】

元结

天下未偃兵，儒生预戎事。功劳安可问，且有忝官累。  
昔常以荒浪，不敢学为吏。况当在兵家，言之岂容易。  
忽然向三岭，境外为偏帅。时多尚矫诈，进退多欺贰。  
纵有一直方，则上似奸智。谁为明信者，能辨此劳畏。

卷 241\_6【雪中怀孟武昌】

· 全唐诗 ·

元结

冬来三度雪，农者欢岁稔。我麦根已濡，各得在仓廩。  
天寒未能起，孺子惊人寝。云有山客来，篮中见冬簞。  
烧柴为温酒，煮鲊为作沈。客亦爱杯尊，思君共杯饮。  
所嗟山路闲，时节寒又甚。不能苦相邀，兴尽还就枕。

卷 241\_7 【与党评事】

元结

自顾无功劳，一岁官再迁。跼身班次中，常窃愧耻焉。  
加以久荒浪，愒愚性颇全。未知在冠冕，不合无拘牵。  
勤强所不及，于人或未然。岂忘惠君子，怨之识见偏。  
且欲因我心，顺为理化先。彼云万物情，有愿随所便。  
爱君得自遂，令我空渊禅。

卷 241\_8 【与党侍御】

元结

众坐吾独欢，或问欢为谁。高人党茂宗，复来官宪司。  
昔吾顺元和，与世行自遗。茂宗正作吏，日有趋走疲。  
及吾污冠冕，茂宗方矫时。诮吾顺让者，乃是干进资。  
今将问茂宗，茂宗欲何辞。若云吾无心，此来复何为。

· 全唐诗 ·

若云吾有羞，于此还见嗤。谁言万类心，闲之不可窥。  
吾欲喻茂宗，茂宗宜听之。长辕有修辙，驭者令尔驰。  
山谷安可怨，筋力当自悲。嗟嗟党茂宗，可为识者规。

卷 241\_9【与灊溪邻里】

元结

昔年苦逆乱，举族来南奔。日行几十里，爱君此山村。  
峰谷呀回映，谁家无泉源。修竹多夹路，扁舟皆到门。  
灊溪中曲滨，其阳有闲园。邻里昔赠我，许之及子孙。  
我尝有匮乏，邻里能相分。我尝有不安，邻里能相存。  
斯人转贫弱，力役非无冤。终以灊滨讼，无令天下论。

卷 241\_10【招孟武昌】

元结

风霜枯万物，退谷如春时。穷冬涸江海，杯湖澄清漪。  
湖尽到谷口，单船近阶墀。湖中更何好，坐见大江水。  
欹石为水涯，半山在湖里。谷口更何好，绝壑流寒泉。  
松桂荫茅舍，白云生坐边。武昌不干进，武昌人不厌。  
退谷正可游，杯湖任来泛。湖上有水鸟，见人不飞鸣。  
谷口有山兽，往往随人行。莫将车马来，令我鸟兽惊。

· 全唐诗 ·

卷 241\_11 【招陶别驾家阳华作】

元结

海内厌兵革，骚骚十二年。阳华洞中人，似不知乱焉。  
谁能家此地，终老可自全。草堂背岩洞，几峰轩户前。  
清渠匝庭堂，出门仍灌田。半崖盘石径，高亭临极巅。  
引望见何处，迤逦陇北川。杉松几万株，苍苍满前山。  
岩高暖华阳，飞溜何潺潺。洞深迷远近，但觉多洄渊。  
昼游兴未尽，日暮不欲眠。探烛饮洞中，醉昏漱寒泉。  
始知天下心，耽爱各有偏。陶家世高逸，公忍不独然。  
无或毕婚嫁，竟为俗务牵。

卷 241\_12 【游石溪示学者】

元结

小溪在城下，形胜堪赏爱。尤宜春水满，水石更殊怪。  
长山势回合，井邑相萦带。石林绕舜祠，西南正相对。  
阶庭无争讼，郊境罢守卫。时时溪上来，劝引辞学辈。  
今谁不务武，儒雅道将废。岂忘二三子，旦夕相勉励。

卷 241\_13 【游惠泉示泉上学者】



· 全唐诗 ·

元结

顾吾漫浪久，不欲有所拘。每到潯泉上，情性可安舒。  
草堂在山曲，澄澜涵阶除。松竹阴幽径，清源涌坐隅。  
筑塘列圃畦，引流灌时蔬。复在郊郭外，正堪静者居。  
惬心则自适，喜尚人或殊。此中若可安，不服铜虎符。

卷 241\_14【喻灊溪乡旧游】

元结

往年在灊滨，灊人皆忘情。今来游灊乡，灊人见我惊。  
我心与灊人，岂有辱与荣。灊人异其心，应为我冠纓。  
昔贤恶如此，所以辞公卿。贫穷老乡里，自休还力耕。  
况曾经逆乱，日厌闻战争。尤爱一溪水，而能存让名。  
终当来其滨，饮啄全此生。

卷 241\_15【喻旧部曲】

元结

漫游樊水阴，忽见旧部曲。尚言军中好，犹望有所属。  
故令争者心，至死终不足。与之一杯酒，喻使烧戎服。  
兵兴向十年，所见堪叹哭。相逢是遗人，当合识荣辱。  
劝汝学全生，随我畚退谷。

· 全唐诗 ·

卷 241\_16【喻常吾直（时为摄官）】

元结

山泽多饥人，闾里多坏屋。战争且未息，征敛何时足。  
不能救人患，不合食天粟。何况假一官，而苟求其禄。  
近年更长吏，数月未为速。来者罢而官，岂得不为辱。  
劝为辞府主，从我游退谷。谷中有寒泉，为尔洗尘服。

卷 241\_17【漫问相里黄州】

元结

东邻有渔父，西邻有山僧。各问其性情，变之俱不能。  
公为二千石，我为山海客。志业岂不同，今已殊名迹。  
相里不相类，相友且相异。何况天下人，而欲同其意。  
人意苟不同，分寸不相容。漫问轩裳客，何如耕钓翁。

卷 241\_18【酬裴云客】

元结

自厌久荒浪，于时无所任。耕钓以为事，来家樊水阴。  
甚醉或漫歌，甚闲亦漫吟。不知愚僻意，称得云客心。

· 全唐诗 ·

云客方持斧，与人正相临。符印随坐起，守位常森森。  
纵能有相招，岂暇来山林。

卷 241\_19【酬孟武昌苦雪】

元结

积雪闲山路，有人到庭前。云是孟武昌，令献苦雪篇。  
长吟未及终，不觉为凄然。古之贤达者，与世竟何异。  
不能救时患，讽谕以全意。知公惜春物，岂非爱时和。  
知公苦阴雪，伤彼灾患多。奸凶正驱驰，不合问君子。  
林莺与野兽，无乃怨于此。兵兴向九岁，稼穡谁能忧。  
何时不发卒，何日不杀牛。耕者日已少，耕牛日已希。  
皇天复何忍，更又恐毙之。自经危乱来，触物堪伤叹。  
见君问我意，只益胸中乱。山禽饥不飞，山木冻皆折。  
悬泉化为冰，寒水近不热。出门望天地，天地皆昏昏。  
时见双峰下，雪中生白云。

卷 241\_20【漫酬贾沔州】

元结

往年壮心在，尝欲济时难。奉诏举州兵，令得诛暴叛。  
上将屡颠覆，偏师尝救乱。未曾弛戈甲，终日领簿案。  
出入四五年，忧劳忘昏旦。无谋静凶丑，自觉愚且懦。

· 全唐诗 ·

岂欲皂枥中，争食藪与蕢。去年辞职事，所惧贻忧患。  
天子许安亲，官又得闲散。自家樊水上，性情尤荒慢。  
云山与水木，似不憎吾漫。以兹忘时世，日益无畏惮。  
漫醉人不嗔，漫眠人不唤。漫游无远近，漫乐无早晏。  
漫中漫亦忘，名利谁能算。闻君劝我意，为君一长叹。  
人谁年八十，我已过其半。家中孤弱子，长子未及冠。  
且为儿童主，种药老谿涧。

卷 241\_21【送孟校书往南海（一作别孟校书）】

元结

吾闻近南海，乃是魑魅乡。忽见孟夫子，欢然游此方。  
忽喜海风来，海帆又欲张。飘飘随所去，不念归路长。  
君有失母儿，爱之似阿阳。始解随人行，不欲离君傍。  
相劝早旋归，此言慎勿忘。

卷 241\_22【别何员外】

元结

谁能守清躅，谁能嗣世儒。吾见何君饶，为人有是夫。  
黜官二十年，未曾暂崎岖。终不病贫贱，寥寥无所拘。  
忽然逢知己，数月领官符。犹是尚书郎，收赋来江湖。  
人皆悉苍生，随意极所须。比盗无兵甲，似偷不如。

· 全唐诗 ·

公能独宽大，使之力自输。吾欲探时谣，为公伏奏书。  
但恐抵忌讳，未知肯听无。不然且相送，醉欢于坐隅。

卷 241\_23【宴湖上亭作】

元结

广亭盖小湖，湖亭实清旷。轩窗幽水石，怪异尤难状。  
石尊能寒酒，寒水宜初涨。岸曲坐客稀，杯浮上摇漾。  
远水入帘幕，淅沥吹酒舫。欲去未回时，飘飘正堪望。  
酣兴思共醉，促酒更相向。舫去若惊凫，溶瀛满湖浪。  
朝来暮忘返，暮归独惆怅。谁肯爱林泉，从吾老湖上。

卷 241\_24【夜宴石鱼湖作】

元结

风霜虽惨然，出游熙天正。登临日暮归，置酒湖上亭。  
高烛照泉深，光华溢轩楹。如见海底日，曈曚始欲生。  
夜寒闭窗户，石溜何清冷。若在深洞中，半崖闻水声。  
醉人疑舫影，呼指递相惊。何故有双鱼，随吾酒舫行。  
醉昏能诞语，劝醉能忘情。坐无拘忌人，勿限醉与醒。

卷 241\_25【刘侍御月夜宴会】

· 全唐诗 ·

元结

我从苍梧来，将耕旧山田。踟蹰为故人，且复停归船。  
日夕得相从，转觉和乐全。愚爱凉风来，明月正满天。  
河汉望不见，几星犹粲然。中夜兴欲酣，改坐临清川。  
未醉恐天旦，更歌促繁弦。欢娱不可逢，请君莫言旋。

卷 241\_26【樊上漫作】

元结

漫家郎亭下，复在樊水边。去郭五六里，扁舟到门前。  
山竹绕茅舍，庭中有寒泉。西边双石峰，引望堪忘年。  
四邻皆渔父，近渚多闲田。且欲学耕钓，于斯求老焉。

卷 241\_27【登殊亭作】

元结

时节方大暑，试来登殊亭。凭轩未及息，忽若秋气生。  
主人既多闲，有酒共我倾。坐中不相异，岂恨醉与醒。  
漫歌无人听，浪语无人惊。时复一回望，心目出四溟。  
谁能守缨佩，日与灾患并。请君诵此意，令彼惑者听。

· 全唐诗 ·

卷 241\_28【石鱼湖上作】

元结

吾爱石鱼湖，石鱼在湖里。鱼背有酒樽，绕鱼是湖水。  
儿童作小舫，载酒胜一杯。座中令酒舫，空去复满来。  
湖岸多欹石，石下流寒泉。醉中一盥漱，快意无比焉。  
金玉吾不须，轩冕吾不爱。且欲坐湖畔，石鱼长相对。

卷 241\_29【引东泉作】

元结

东泉人未知，在我左山东。引之傍山来，垂流落庭中。  
宿雾含朝光，掩映如残虹。有时散成雨，飘洒随清风。  
众源发渊窦，殊怪皆不同。此流又高悬，旖旎在长空。  
山林何处无，兹地不可逢。吾欲解纓佩，便为泉上翁。

卷 241\_30【登白云亭】

元结

出门见南山，喜逐松径行。穷高欲极远，始到白云亭。  
长山绕井邑，登望宜新晴。州渚曲湘水，萦回随郡城。

· 全唐诗 ·

九疑千万峰，嶕嶢天外青。烟云无远近，皆傍林岭生。  
俯视松竹间，石水何幽清。涵映满轩户，娟娟如镜明。  
何人病惛浓，积醉且未醒。与我一登临，为君安性情。

卷 241\_31【漉阳亭作】

元结

问吾常宴息，泉上何处好。独有漉阳亭，令人可终老。  
前轩临漉泉，凭几漱清流。外物自相扰，渊渊还复休。  
有时出东户，更欲檐下坐。非我意不行，石渠能留我。  
峰石若鳞次，欹垂复旋回。为我引漉泉，泠泠檐下来。  
天寒宜泉温，泉寒宜天暑。谁到漉阳亭，其心肯思去。

卷 241\_32【登九疑第二峰】

元结

九疑第二峰，其上有仙坛。杉松映飞泉，苍苍在云端。  
何人居此处，云是鲁女冠。不知几百岁，燕坐饵金丹。  
相传羽化时，云鹤满峰恋。妇中有高人，相望空长叹。

卷 241\_33【题孟中丞茅阁】



· 全唐诗 ·

元结

小山为郡城，随水能萦纡。亭亭最高处，今是西南隅。  
杉大老犹在，苍苍数十株。垂阴满城上，枝叶何扶疏。  
乃知四海中，遗事谁谓无。及观茅阁成，始觉形胜殊。  
凭轩望熊湘，云榭连苍梧。天下正炎热，此然冰雪俱。  
客有在中坐，颂歌复何如。公欲举遗材，如此佳木欤。  
公方庇苍生，又如斯阁乎。请达谣颂声，愿公且踟蹰。

卷 241\_34 【窾尊诗（在道州）】

元结

嶮嶮小山石，数峰对窾亭。窾石堪为樽，状类不可名。  
巡回数尺间，如见小蓬瀛。尊中酒初涨，始有岛屿生。  
岂无日观峰，直下临沧溟。爱之不觉醉，醉卧还自醒。  
醒醉在尊畔，始为吾性情。若以形胜论，坐隅临郡城。  
平湖近阶砌，近山复青青。异木几十株，林条冒檐楹。  
盘根满石上，皆作龙蛇形。酒堂贮酿器，户牖皆罍瓶。  
此尊可常满，谁是陶渊明。

卷 241\_35 【朝阳岩下歌】

元结

· 全唐诗 ·

朝阳岩下湘水深，朝阳洞口寒泉清。零陵城郭夹湘岸，  
岩洞幽奇带郡城。荒芜自古人不见，零陵徒有先贤传。  
水石为娱安可羨，长歌一曲留相劝。

卷 241\_36【无为洞口作】

元结

无为洞口春水满，无为洞傍春云白。爱此踟蹰不能去，  
令人悔作衣冠客。洞傍山僧皆学禅，无求无欲亦忘年。  
欲问其心不能问，我到山中得无闷。

卷 241\_37【宿无为观】

元结

九疑山深几千里，峰谷崎岖人不到。山中旧有仙姥家，  
十里飞泉绕丹灶。如今道士三四人，茹芝炼玉学轻身。  
霓裳羽盖傍临壑，飘飘似欲来云鹤。

卷 241\_38【宿洄溪翁宅】

元结

· 全唐诗 ·

长松万株绕茅舍，怪石寒泉近岩下。老翁八十犹能行，  
将领儿孙行拾稼。吾羡老翁居处幽，吾爱老翁无所求。  
时俗是非何足道，得似老翁吾即休。

卷 241\_39【说洄溪招退者（在州南江华县）】

元结

长松亭亭满四山，山间乳窦流清泉。洄溪正在此山里，  
乳水松膏常灌田。松膏乳水田肥良，稻苗如蒲米粒长。  
糜色如珈玉液酒，酒熟犹闻松节香。溪边老翁年几许，  
长男头白孙嫁女。问言只食松田米，无药无方向人语。  
浯溪石下多泉源，盛暑大寒冬大温。屠苏宜在水中石，  
洄溪一曲自当门。吾今欲作洄溪翁，谁能住我舍西东。  
勿惮山深与地僻，罗浮尚有葛仙翁。

卷 241\_40【宿丹崖翁宅】

元结

扁舟欲到泷口湍，春水湍泷上水难。投竿来泊丹崖下，  
得与崖翁尽一欢。丹崖之亭当石颠，破竹半山引寒泉。  
泉流掩映在木杪。有若白鸟飞林间。往往随风作雾雨，  
湿人巾履满庭前。丹崖翁，爱丹崖，弃官几年崖下家。  
儿孙棹船抱酒瓮，醉里长歌挥钓车。吾将求退与翁游，

· 全唐诗 ·

学翁歌醉在鱼舟。官吏随人往未得，却望丹崖惭复羞。

卷 241\_41 【石鱼湖上醉歌】

元结

石鱼湖，似洞庭，夏水欲满君山青。山为樽，水为沼，  
酒徒历历坐洲岛。长风连日作大浪，不能废人运酒舫。  
我持长瓢坐巴丘，酌饮四坐以散愁。

卷 241\_42 【橘井】

元结

灵橘无根井有泉，世间如梦又千年。乡园不见重归鹤，  
姓字今为第几仙。风泠露坛人悄悄，地闲荒径草绵绵。  
如何蹑得苏君迹，白日霓旌拥上天。

卷 241\_43 【石宫四咏】

元结

石宫春云白，白云宜苍苔。拂云践石径，俗士谁能来。

· 全唐诗 ·

石宫夏水寒，寒水宜高林。远风吹萝蔓，野客熙清阴。

石宫秋气清，清气宜山谷。落叶逐霜风，幽人爱松竹。

石宫冬日暖，暖日宜温泉。晨光静水雾，逸者犹安眠。

卷 241\_44【欸乃曲五首】

元结

偶存名迹在人间，顺俗与时未安闲。  
来谒大官兼问政，扁舟却入九疑山。

湘江二月春水平，满月和风宜夜行。  
唱桡欲过平阳戍，守吏相呼问姓名。

千里枫林烟雨深，无朝无暮有猿吟。  
停桡静听曲中意，好是云山韶濩音。

零陵郡北湘水东，浯溪形胜满湘中。  
溪口石颠堪自逸，谁能相伴作渔翁。

下泂船似入深渊，上泂船似欲升天。  
泂南始到九疑郡，应绝高人乘兴船。

· 全唐诗 ·

## 第二百四十二卷

卷 242\_1 【郢城西楼吟（一作郎士元诗）】

张继

连山尽塞水萦回，山上戍门临水开。珠帘直下一百丈，  
日暖游鳞自相向。昔人爱险闭层城，今人复爱闲江清。  
沙洲枫岸无来客，草绿花开山鸟鸣。

卷 242\_2 【登丹阳楼（一作郎士元诗）】

张继

寒皋那可望，旅客又初还。迢递高楼上，萧疏凉野间。  
暮晴依远水，秋兴属连山。浮客时相见，霜凋朱翠颜。

卷 242\_3 【春夜皇甫冉宅欢宴（一作对酒）】

张继

· 全唐诗 ·

流落时相见，悲欢共此情。兴因尊酒洽，愁为故人轻。  
暗滴花茎露，斜晖月过城。那知横吹笛，江外作边声。

卷 242\_4【会稽秋晚奉呈于太守】

张继

寂寂讼庭幽，森森戟户秋。山光隐危堞，湖色上高楼。  
禹穴探书罢，天台作赋游。云浮将越客，岁晚共淹留。

卷 242\_5【题严陵钓台】

张继

旧隐人如在，清风亦似秋。客星沈夜壑，钓石俯春流。  
鸟向乔枝聚，鱼依浅濑游。古来芳饵下，谁是不吞钩。

卷 242\_6【清明日自西午桥至瓜岩村有怀】

张继

晚霁龙门雨，春生汝穴风。鸟啼官路静，花发毁垣空。  
鸣玉惭时辈，垂丝学老翁。旧游人不見，惆悵洛城东。

· 全唐诗 ·

卷 242\_7【洛阳作（一作初出徽安门）】

张继

洛阳天子县，金谷石崇乡。草色侵官道，花枝出苑墙。  
书成休逐客，赋罢遂为郎。贫贱非吾事，西游思自强。

卷 242\_8【晚次淮阳】

张继

微凉风叶下，楚俗转清闲。候馆临秋水，郊扉掩暮山。  
月明潮渐近，露湿雁初还。浮客了无定，萍流淮海间。

卷 242\_9【送窦十九判官使江南】

张继

游客淹星纪，裁诗炼土风。今看乘传去，那与问津同。  
南郡迎徐子，临川谒谢公。思归一惆怅，於越古亭中。

卷 242\_10【江上送客游庐山】



· 全唐诗 ·

张继

楚客自相送，沾裳春水边。晚来风信好，并发上江船。  
花映新林岸，云开瀑布泉。惬心应在此，佳句向谁传。

卷 242\_11 【酬张二十员外前国子博士谿叔向】

张继

故交日零落，心赏寄何人。幸与冯唐遇，心同迹复亲。  
语言未终夕，离别又伤春。结念湓城下，闻猿诗兴新。

卷 242\_12 【会稽郡楼雪霁（一作望雪）】

张继

江城昨夜雪如花，郢客登楼齐望华。夏禹坛前仍聚玉，  
西施浦上更飞沙。帘栊向晚寒风度，睥睨初晴落景斜。  
数处微明销不尽，湖山清映越人家。

卷 242\_13 【冯翊西楼（一作郎士元诗）】

张继

· 全唐诗 ·

城上西楼倚暮天，楼中归望正凄然。近郭乱山横古渡，  
野庄乔木带新烟。北风吹雁声能苦，远客辞家月再圆。  
陶令好文常对酒，相招那惜醉为眠。

卷 242\_14 【送邹判官往陈留（一作洪州送郗绍充河南租庸判官）】

张继

齐宋伤心地，频年此用兵。女停襄邑杼，农废汶阳耕。  
国使乘轺去，诸侯拥节迎。深仁荷君子，薄赋恤黎甿。  
火燎原犹热，波摇海未平。应将否泰理，一问鲁诸生。

卷 242\_15 【酬李书记校书越城秋夜见赠】

张继

东越秋城夜，西人白发年。寒城警刁斗，孤愤抱龙泉。  
凤辇栖岐下，鲸波斗洛川。量空海陵粟，赐乏水衡钱。  
投阁嗤扬子，飞书代鲁连。苍苍不可问，余亦赋思玄。

卷 242\_16 【感怀（一作陆沈诗，题作上礼部杨侍郎）】

张继

调与时人背，心将静者论。终年帝城里，不识五侯门。

· 全唐诗 ·

卷 242\_17 【长相思】

张继

辽阳望河县，白首无由见。海上珊瑚枝，年年寄春燕。

卷 242\_18 【奉寄皇甫补阙】

张继

京口情人别久，扬州估客来疏。  
潮至浔阳回去，相思无处通书。

卷 242\_19 【枫桥夜泊（一作夜泊枫江）】

张继

月落乌啼霜满天，江枫渔父对愁眠。  
姑苏城外寒山寺，夜半钟声到客船。

卷 242\_20 【闾门即事】

张继

· 全唐诗 ·

耕夫召募逐楼船，春草青青万顷田。  
试上吴门窥郡郭，清明几处有新烟。

卷 242\_21 【安公房问法】

张继

流年一日复一日，世事何时是了时。  
试向东林问禅伯，遣将心地学琉璃。

卷 242\_22 【上清词】

张继

紫阳宫女捧丹砂，王母令过汉帝家。  
春风不肯停仙驭，却向蓬莱看杏花。

卷 242\_23 【送顾况泗上觐叔父】

张继

吴乡岁贡足嘉宾，后进之中见此人。  
别业更临洙泗上，拟将书卷对残春。

· 全唐诗 ·

卷 242\_24 【留别（一作皇甫冉诗，题作又得云字）】

张继

何事千年遇圣君，坐令双鬓老江云。  
南行更入山深浅，岐路悠悠水自分。

卷 242\_25 【送张中丞归使幕（一作韩翃诗）】

张继

独受主恩归，当朝似者稀。玉壶分御酒，金殿赐春衣。  
拂席流莺醉，鸣鞭骏马肥。满台簪白笔，捧手恋清辉。

卷 242\_26 【华州夜宴庾侍御宅（一作韩翃诗）】

张继

世故他年别，心期此夜同。千峰孤烛外，片雨一更中。  
酒客逢山简，诗人得谢公。自怜驱匹马，拂曙向关东。

卷 242\_27 【赠章八元】

· 全唐诗 ·

张继

相见谈经史，江楼坐夜阑。风声吹户响，灯影照人寒。  
俗薄交游尽，时危出处难。衰年逢二妙，亦得闷怀宽。

卷 242\_28【城西虎跑寺】

张继

石势虎蹲伏，山形龙屈盘。寺开梁殿阁，坟掩晋衣冠。  
出涧泉声细，斜阳塔影寒。近城多      ，栖息此中安。

卷 242\_29【褚主簿宅会毕庶子钱员外郎使君（一作韩翃诗）】

张继

开瓮腊酒熟，主人心赏同。斜阳疏竹上，残雪乱山中。  
更喜宣城印，朝廷与谢公。

卷 242\_30【奉送王相公赴幽州（一作韩翃诗，题下有巡边二字）】

张继

黄阁开帟幄，丹墀拜冕旒。位高汤左相，权总汉诸侯。

· 全唐诗 ·

不改周南化，仍分赵北忧。双旌过易水，千骑入幽州。  
塞草连天暮，边风动地愁。无因随远道，结束佩吴钩。

卷 242\_31【重经巴丘】

张继

昔年高接李膺欢，日泛仙舟醉碧澜。诗句乱随青草落，  
酒肠俱逐洞庭宽。浮生聚散云相似，往事冥微梦一般。  
今日片帆城下去，秋风回首泪阑干。

卷 242\_32【九日巴丘杨公台上宴集】

张继

凄凄霜日上高台，水国秋凉客思哀。万叠银山寒浪起，  
一行斜字早鸿来。谁家捣练孤城暮，何处题衣远信回。  
江汉路长身不定，菊花三笑旅怀开。

卷 242\_33【游灵岩】

张继

灵岩有路入烟霞，台殿高低释子家。风满回廊飘坠叶，

· 全唐诗 ·

水流绝涧泛秋花。青松阅世风霜古，翠竹题诗岁月赊。  
谁谓无生真可学，山中亦自有年华。

卷 242\_34 【河间献王墓】

张继

汉家宗室独称贤，遗事闲中见旧编。偶过河间寻往迹，  
却怜荒冢带寒烟。频求千古书连帙，独对三雍策几篇。  
雅乐未兴人已逝，雄歌依旧大风传。

卷 242\_35 【秋日道中】

张继

齐鲁西风草树秋，川原高下过东州。道边白鹤来华表，  
陌上苍麟卧古丘。九曲半应非禹迹，三山何处是仙洲。  
径行俯仰成今古，却忆当年赋远游。

卷 242\_36 【华清宫】

张继

天宝承平奈乐何，华清宫殿郁嵯峨。朝元阁峻临秦岭，



· 全唐诗 ·

羯鼓楼高俯渭河。玉树长飘云外曲，霓裳闲舞月中歌。  
只今惟有温泉水，呜咽声中感慨多。

卷 242\_37 【春申君祠】

张继

春申祠宇空山里，古柏阴阴石泉水。日暮江南无主人，  
弥令过客思公子。萧条寒景傍山村，寂寞谁知楚相尊。  
当时珠履三千客，赵使怀惭不敢言。

卷 242\_38 【人日代客子是日立春】

张继

人日兼春日，长怀复短怀。遥知双彩胜，并在一金钗。

卷 242\_39 【寄郑员外】

张继

经月愁闻雨，新年苦忆君。何时共登眺，整屐待晴云。

· 全唐诗 ·

卷 242\_40 【饮李十二宅】

张继

重门敞春夕，灯烛霭馀辉。醉我百尊酒，留连夜未归。

卷 242\_41 【山家】

张继

板桥人渡泉声，茅檐日午鸡鸣。  
莫嗔焙茶烟暗，却喜晒谷天晴。

卷 242\_42 【归山】

张继

心事数茎白发，生涯一片青山。  
空林有雪相待，古道无人独还。

卷 242\_43 【金谷园】

张继

· 全唐诗 ·

彩楼歌馆正融融，一骑星飞锦帐空。  
老尽名花春不管，年年啼鸟怨东风。

卷 242\_44 【邮亭】

张继

云淡山横日欲斜，邮亭下马对残花。  
自从身逐征西府，每到开时不在家。

卷 242\_45 【宿白马寺】

张继

白马驮经事已空，断碑残刹见遗踪。  
萧萧茅屋秋风起，一夜雨声羁思浓。

卷 242\_46 【明德宫】

张继

碧瓦朱楹白昼闲，金衣宝扇晓风寒。  
摩云观阁高如许，长对河流出断山。

· 全唐诗 ·

卷 242\_47 【读峰山碑】

张继

六国平来四海家，相君当代擅才华。  
谁知颂德山头石，却与他人戒后车。

卷 242\_48 【句】

张继

汉月经时掩，胡尘与岁深。（《咏镜》，见《诗式》）。

· 全唐诗 ·

## 第二百四十三卷

### 卷 243\_1【令狐员外宅宴寄中丞】

韩翃

寒色凝罗幕，同人清夜期。玉杯留醉处，银烛送归时。  
独坐隔千里，空吟对雪诗。

### 卷 243\_2【褚主簿宅会毕庶子钱员外郎使君（一作张继诗）】

韩翃

开瓮腊酒熟，主人心赏同。斜阳疏竹上，残雪乱天中。  
更喜宣城印，朝廷与谢公。

### 卷 243\_3【送李明府赴滑州】

韩翃

渭城寒食罢，送客归远道。乌帽背斜晖，青骊踏春草。

· 全唐诗 ·

酒醒孤烛夜，衣冷千山早。去事沈尚书，应怜词赋好。

卷 243\_4【送李司直赴江西使幕】

韩翃

敛版辞汉廷，进帆归楚幕。三江城上转，九里人家泊。  
好酒近宜城，能诗谢康乐。雨晴西山树，日出南昌郭。  
竹露点衣巾，湖烟湿局钥。主人苍玉佩，后骑黄金络。  
高视领八州，相期同一鹗。行当报知己，从此飞寥廓。

卷 243\_5【祭岳回重赠孟都督】

韩翃

封作天齐王，清祠太山下。鲁公秋赛毕，晓日回高驾。  
从骑尽幽并，同人皆沈谢。自矜文武足，一醉寒溪夜。

卷 243\_6【送南少府归寿春】

韩翃

人言寿春远，此去先秋到。孤客小翼舟，诸生高翅帽。  
淮风生竹簟，楚雨移茶灶。若在八公山，题诗一相报。

· 全唐诗 ·

卷 243\_7【赠别崔司直赴江东兼简常州独孤使君】

韩翃

爱君青袍色，芳草能相似。官重法家流，名高墨曹吏。  
春衣淮上宿，美酒江边醉。楚酪沃雕胡，湘羹糝香饵。  
前朝山水国，旧日风流地。苏山逐青骢，江家驱白鼻。  
右军尚少年，三领东方骑。亦过小丹阳，应知百城贵。

卷 243\_8【经月岩山】

韩翃

驱车过闽越，路出饶阳西。仙山翠如画，簇簇生虹蜺。  
群峰若侍从，众阜如婴提。岩峦互吞吐，岭岫相追携。  
中有月轮满，皎洁如圆珪。玉皇恣游览，到此神应迷。  
嫦娥曳霞帔，引我同攀跻。腾腾上天半，玉镜悬飞梯。  
瑶池何悄悄，鸾鹤烟中栖。回头望尘事，露下寒凄凄。

卷 243\_9【送客之江宁】

韩翃

春流送客不应愁，南入徐州见柳花。朱雀桥边看淮水，

· 全唐诗 ·

乌衣巷里问王家。千闾万井无多事，辟户开门向山翠。  
楚云朝下石头城，江燕双飞瓦棺寺。吴土风流甚可亲，  
相逢嘉赏日应新。从来此地夸羊酪，自有莼羹定却人。

卷 243\_10【送山阴姚丞携妓之任兼寄山阴苏少府】

韩翃

东风香草路，南客心容与。白皙吴王孙，青蛾柳家女。  
都门数骑出，河口片帆举。夜簟眠橘洲，春衫傍枫屿。  
山阴政简甚从容，到罢唯求物外踪。落日花边剡溪水，  
晴烟竹里会稽峰。才子风流苏伯玉，同官晓暮应相逐。  
加餐共爱鲈鱼肥，醒酒仍怜甘蔗熟。知君炼思本清新，  
季子如今德有邻。他日如寻始宁墅，题诗早晚寄西人。

卷 243\_11【和高平朱（一作米）参军思归作】

韩翃

髯参军，髯参军，身为北州吏，心寄东山云。  
坐见萋萋芳草绿。遥思往日晴江曲。刺船频向剡中回，  
捧被曾过越人宿。花里莺啼白日高，春楼把酒送车螯。  
狂歌好爱陶彭泽，佳句唯称谢法曹。平生乐事多如此，  
忍为浮名隔千里。一雁南飞动客心，思归何待秋风起。



· 全唐诗 ·

卷 243\_12【赠别成明府赴剑南】

韩翃

朝为三室印，晚为三蜀人。遥知下车日，正及巴山春。  
县道橘花里，驿流江水滨。公门辄无事，赏地能相亲。  
解衣初醉绿芳夕，应采蹲鴟荐佳客。霁水远映西川时，  
闲望碧鸡飞古祠。爱君乐事佳兴发，天外铜梁多梦思。

卷 243\_13【送孙泼赴云中】

韩翃

黄骢少年舞双戟，目视旁人皆辟易。百战能夸陇上儿，  
一身复作云中客。寒风动地气苍茫，横吹先悲出塞长。  
敲石军中传夜火，斧冰河畔汲朝浆。前锋直指阴山外，  
虏骑纷纷胆应碎。匈奴破尽人看归，金印酬功如斗大。

卷 243\_14【送客还江东】

韩翃

还家不落春风后，数日应沽越人酒。池畔花深斗鸭栏，  
桥边雨洗藏鸦柳。遥怜内舍著新衣，复向邻家醉落晖。

· 全唐诗 ·

把手闲歌香橘下，空山一望鹧鸪飞。

卷 243\_15【送夏侯侍郎】

韩翃

元戎车右早飞声，御史府中新正名。翰墨已齐钟大理，  
风流好继谢宣城。从军晓别龙骧幕，六骑先驱嘶近郭。  
前路应留白玉台，行人辄美黄金络。使君下马爱瀛洲，  
简贵将求物外游。听讼不闻乌布帐，迎宾暂著紫绀裘。  
公庭日夕罗山翠，功遂心闲无一事。移书或问岛边人，  
立仗时呼铃下吏。事业初传小夏侯，中年剑笏在西州。  
浮云飞鸟两相忘，他日依依城上楼。

卷 243\_16【送李湜下第归卫州便游河北】

韩翃

莫嗟太常屈，便入苏门啸。道在应未迟，勿作我身料。  
轻云日下不成阴，出对流芳搅别心。万雉城东春水阔，  
千人乡北晚花深。旧竹青青常绕宅，到时疏旷应自适。  
佳期纵得上宫游，旅食还为北邙客。路出司州胜景长，  
西山翠色带清漳。仙人矶近茱萸涧，铜雀台临野马冈。  
屡道主人多爱士，何辞策马千馀里。高谭魏国访先生，  
修刺平原过内史。一举青云在早秋，恐君从此便淹留。

· 全唐诗 ·

有钱莫向河间用，载笔须来阙下游。

卷 243\_17【张山人草堂会王方士】

韩翃

屿花晚，山日长，蕙带麻襦食草堂。一片水光飞入户，  
千竿竹影乱登墙。园梅熟，家酝香。新湿头巾不复簪，  
相看醉倒卧藜床。

卷 243\_18【送穆县刘主簿楚】

韩翃

起家得事平原侯，晚出都门辞旧游。草色连绵几千里，  
青骊蹀躞路旁子。花深近县宿河阳，竹映春舟渡淇水。  
邺下淹留佳赏新，群公旧日心相亲。金盘晓鲙朱衣鲋，  
玉簟宵迎翠羽人。王程书使前期促，他日应知举鞭速。  
寒水浮瓜五月时，把君衣袖长河曲。

卷 243\_19【题玉山观禅师兰若】

韩翃

· 全唐诗 ·

玉山宴坐移年月，锡杖承恩诣丹阙。先朝亲与会龙华，  
紫禁鸣钟白日斜。宫女焚香把经卷，天人就席礼袈裟。  
禅床久卧虎溪水，兰若初开凤城里。不出嚣尘见远公，  
道成何必青莲宫。朝持药钵千家近，暮倚绳床一室空。  
掖垣挥翰君称美，远客陪游问真理。薄宦深知误此心，  
回心愿学雷居士。

卷 243\_20 【赠别上元主簿张著】

韩翃

上书一见平津侯，剑笏斜齐秣陵尉。朝垂绶带迎远客，  
暮锁印囊飞上吏。长乐花深万井时，同官无事有归期。  
回船对酒三生渚，系马焚香五愿祠。日日澄江带山翠，  
绿芳都在经过地。行人看射领军堂，游女题诗光宅寺。  
风流才调爱君偏，此别相逢定几年。惆怅浮云迷远道，  
张侯楼上月娟娟。

卷 243\_21 【别汜水县尉】

韩翃

未央宫殿金开钥，诏引贤良卷珠箔。花间赐食近丹墀，  
烟里挥毫对青阁。万年枝影转斜光，三道先成君激昂。  
谷永直言身不顾，郗诜高第转名香。绿槐阴阴出关道，  
上有蝉声下秋草。奴子平头骏马肥，少年白皙登王畿。

· 全唐诗 ·

五侯客舍偏留宿，一县人家争看归。南向千峰北临水，  
佳期赏地应穷此。赋诗或送郑行人，举酒常陪魏公子。  
自怜寂寞会君稀，犹著前时博士衣。我欲低眉问知己，  
若将无用废东归。

卷 243\_22【别李明府】

韩翃

宠光五世腰青组，出入珠宫引箫鼓。醉舞雄王玳瑁床，  
娇嘶骏马珊瑚柱。胡儿夹鼓越婢随，行捧玉盘尝荔枝。  
罗山道士请人送，林邑使臣调象骑。爱君一身游上国，  
阙下名公如旧识。万里初怀印绶归，湘江过尽岭花飞。  
五侯焦石烹江笋，千户沉香染客衣。别后想君难可见，  
苍梧云里空山县。汉苑芳菲入夏阑，待君障日蒲葵扇。

卷 243\_23【送中兄典邵州】

韩翃

官骑连西向楚云，朱轩出饯昼纷纷。百城兼领安南国，  
双笔遥挥王左君。一路诸侯争馆谷，洪池高会荆台曲。  
玉颜送酒铜鞮歌，金管留人石头宿。北雁初回江燕飞，  
南湖春暖著春衣。湘君祠对空山掩，渔父焚香日暮归。  
百事无留到官后，重门寂寂垂高柳。零陵过赠石香溪，

· 全唐诗 ·

洞口人来饮醇酒。登楼暮结邵阳情，万里苍波烟霭生。  
他日新诗应见报，还如宣远在安城。

卷 243\_24 【送万巨】

韩翃

汉相见王陵，扬州事张禹。风帆木兰楫，水国莲花府。  
百丈清江十月天，寒城鼓角晓钟前。金炉促膝诸曹吏，  
玉管繁华美少年。有时过向长干地，远对湖光近山翠。  
好逢南苑看人归，也向西池留客醉。高柳垂烟橘带霜，  
朝游石渚暮横塘。红笺色夺风流座，白苣词倾翰墨场。  
夫子前年入朝后，高名籍籍时贤口。共怜诗兴转清新，  
继远家声在此身。屈指待为青琐客，回头莫羡白亭人。

卷 243\_25 【送巴州杨使君】

韩翃

白云县北千山口，青岁欲开残雪后。前驱锦带鱼皮鞬，  
侧佩金璋虎头绶。南郑侯家醉落晖，东关陌上著鞭归。  
愁看野马随官骑，笑取秦人带客旗。使者下车忧疾苦，  
豪吏销声出公府。万里歌钟相庆时，巴童声节渝儿舞。

· 全唐诗 ·

卷 243\_26 【送王侍御赴江西兼寄李袁州】

韩翃

中朝理章服，南国随旌旆。腊酒湘城隅，春衣楚江外。  
垂帘白角簷，下箸鲈鱼鲙。雄笔佐名公，虚舟应时辈。  
按俗承流几路清，平明山霭春江云。湓城诗赠鱼司马，  
汝水人逢王右军。绿蘋白芷遥相引，孤兴幽寻知不近。  
井上铜人行见无，湖中石燕飞应尽。礼门前直事仙郎，  
腰垂青绶领咸阳。花间五马迎君日，雨霁烟开玉女冈。

卷 243\_27 【寄雍丘窦明府】

韩翃

少年结绶骋金羁，许下如看琼树枝。入里亲过朗陵伯，  
出门高视颖川儿。西游太府东乘传，泗上诸侯谁不羨。  
时辈宁将白笔期，高流伫向丹青见。何事翻飞不及群，  
虎班突骑来纷纷。吴江垂钓楚山醉，身寄沧波心白云。  
中岁胡尘静如扫，一官又罢行将老。薛公荐士得君初，  
领黄金千室馀。机尽独亲沙上鸟，家贫唯向釜中鱼。  
， 出重门烟树里。感物吟诗对暮天，  
怀人倚杖临秋水。别离几日问前期，鸣雁亭边人去时。  
独坐不堪朝与夕，高风萧索乱蝉悲。

· 全唐诗 ·

卷 243\_28 【赠兖州孟都督】

韩翃

少年亲事冠军侯，中岁仍迁北兖州。露冕宁夸汉车服，  
下帷常讨鲁春秋。后斋草色连高阁，事简人稀独行乐。  
闲心近掩陶使君，诗兴遥齐谢康乐。远山重叠水逶迤，  
落日东城闲望时。不见双亲办丰膳，能留五马尽佳期。  
北场争转黄金勒，爱客华亭赏秋色。卷帘满地铺氍毹，  
吹角鸣弦开玉壶。愿学平原十日饮，此时不忍歌骊驹。

卷 243\_29 【别孟都督】

韩翃

平芜霁色寒城下，美酒百壶争劝把。连呼宝剑锐头儿，  
少驻金羁大头马。一饮留欢分有馀，寸心怀思复何如。  
他时相忆若相问，青琐门前开素书。

卷 243\_30 【送别郑明府】

韩翃

长头大鼻鬓如雪，早岁连兵剑锋折。千金尽去无斗储，



· 全唐诗 ·

双袖破来空百结。独恋郊扉已十春，高阳酒徒连此身。  
路傍谁识郑公子，谷口应知汉逸人。儿女相悲探井臼，  
前功岂在他人后。劝君不得学渊明，且策驴车辞五柳。

卷 243\_31【赠别王侍御赴上都】

韩翃

翩翩马上郎，执简佩银章。西向洛阳归鄠杜，  
回头结念莲花府。朝辞芳草万岁街，暮宿春山一泉坞。  
青青树色傍行衣，乳燕流莺相间飞。远过三峰临八水，  
幽寻佳赏偏如此。残花片片细柳风，落日疏钟小槐雨。  
相思掩泣复何如，公子门前人渐疏。幸有心期当小暑，  
葛衣纱帽望回车。

卷 243\_32【赠别太常李博士兼寄两省旧游】

韩翃

两年戴武弁，趋侍明光殿。一朝簪惠文，客事信陵君。  
简异当朝执，香非离直熏。差肩何记室，携手李将军。  
玉铎初回酸枣馆，金钿正舞石榴裙。忽惊万事随流水，  
不见双旌逐塞云。感旧抚心多寂寂，与君相遇头初白。  
暂夸五首军中诗，还忆万年枝下客。昨日留欢今送归，  
空披秋水映斜晖。闲吟佳句对孤鹤，惆怅寒霜落叶稀。

· 全唐诗 ·

卷 243\_33【寄哥舒仆射】

韩翃

万里长城家，一生唯报国。腰垂紫文绶，手控黄金勒。  
高视黑头翁，遥吞白骑贼。先麾牙门将，转斗黄河北。  
帐下亲兵皆少年，锦衣承日绣行缠。辘轳宝剑初出鞘，  
宛转角弓初上弦。步人射箭大如笛，前把两矛后双戟。  
左盘右射红尘中，鹞入鸦群有谁敌。杀将破军白日馀，  
回旆舞旆北风初。郡公楯鼻好磨墨，走马为君飞羽书。

卷 243\_34【赠别华阴道士】

韩翃

紫府先生旧同学，腰垂彤管贮灵药。耻论方士小还丹，  
好饮仙人太玄酪。芙蓉山顶玉池西，一室平临万仞溪。  
昼洒瑶台五云湿，夜行金烛七星齐。回身暂下青冥里，  
方外相寻有知己。卖鲊市中何许人，钓鱼坐上谁家子。  
青青百草云台春，烟驾霓衣白角巾。露叶独归仙掌去，  
回风片雨谢时人。

卷 243\_35【送崔秀才赴上元兼省叔父】

· 全唐诗 ·

韩翃

寒塘敛暮雪，腊鼓迎春早。匹马五城人，重裘千里道。  
淮山轻露湿，江树狂风扫。楚县九酝醺，扬州百花好。  
练湖东望接云阳，女市西游入建康。行乐远夸红布旆，  
风流近赌紫香囊。诗家行辈如君少，极目苦心怀谢朓。  
烟开日上板桥南，吴岫青青出林表。

· 全唐诗 ·

## 第二百四十四卷

### 卷 244\_1【赠别韦兵曹归池州】

韩翃

南陵八月天，暮色远峰前。楚竹青阳路，吴江赤马船。  
簾金诸客贵，佩玉主人贤。终日应相逐，归期定几年。

### 卷 244\_2【寄武陵李少府】

韩翃

小县春山口，公孙吏隐时。楚歌催晚醉，蛮语入新诗。  
桂水遥相忆，花源暗有期。郢门千里外，莫怪尺书迟。

### 卷 244\_3【赠张建】

韩翃

结客平陵下，当年倚侠游。传看辘轳剑，醉脱骅骝裘。

· 全唐诗 ·

翠羽双鬟妾，珠帘百尺楼。春风坐相待，晚日莫淹留。

卷 244\_4【送监军李判官】

韩翃

上客佩双剑，东城喜再游。旧从张博望，新事郑长秋。  
踏水回金勒，看风试锦裘。知君不久住，汉将扫旄头。

卷 244\_5【送客归广平】

韩翃

家在赵邯郸，归心辄自欢。晚杯狐腋暖，春雪马毛寒。  
孟月途中破，轻冰水上残。到时杨柳色，奈向故园看。

卷 244\_6【送张儋水路归北海】

韩翃

千里东归客，孤心忆旧游。片帆依白水，高枕卧青州。  
柏寝寒芜变，梧台宿雨收。知君心兴远，每上海边楼。

· 全唐诗 ·

卷 244\_7【送故人归鲁】

韩翃

鲁客多归兴，居人怅别情。雨馀衫袖冷，风急马蹄轻。  
秋草灵光殿，寒云曲阜城。知君拜亲后，少妇下机迎。

卷 244\_8【送故人归蜀】

韩翃

一骑西南远，翩翩入剑门。客衣筒布润，山舍荔枝繁。  
古庙祠金马，春江带白鼋。自应成旅逸，爱客有王孙。

卷 244\_9【酬程延秋夜即事见赠】

韩翃

长簟迎风早，空城澹月华。星河秋一雁，砧杵夜千家。  
节候看应晚，心期卧亦赊。向来吟秀句，不觉已鸣鸦。

卷 244\_10【送郭赞府归淮南】

· 全唐诗 ·

韩翃

骏马淮南客，归时引望新。江声六合暮，楚色万家春。  
白苎歌西曲，黄苞寄北人。不知心赏后，早晚见行尘。

卷 244\_11【题龙兴寺澹师房】

韩翃

双林彼上人，诗兴转相亲。竹里经声晚，门前山色春。  
卷帘苔点净，下箸药苗新。记取无生理，归来问此身。

卷 244\_12【送客游江南】

韩翃

南使孤帆远，东风任意吹。楚云殊不断，江鸟暂相随。  
月净鸳鸯水，春生豆蔻枝。赏称佳丽地，君去莫应知。

卷 244\_13【送高员外赴淄青使幕】

韩翃

远水流春色，回风送落晖。人趋双节近，马递百花归。

· 全唐诗 ·

山驿尝官酒，关城度客衣。从来赤管笔，提向幕中稀。

卷 244\_14【寻胡处士不遇】

韩翃

到来心自足，不见亦相亲。说法思居士，忘机忆丈人。  
微风吹药案，晴日照茶巾。幽兴殊未尽，东城飞暮尘。

卷 244\_15【赠张道者】

韩翃

采药三山罢，乘风五日归。翦荷成旧屋，剡蘖染新衣。  
玉粒指应久，丹砂验不微。坐看青节引，要与白云飞。

卷 244\_16【题苏许公林亭（一作钱起诗）】

韩翃

平津东阁在，别是竹林期。万叶秋声里，千家落照时。  
门随深巷静，窗过远钟迟。客舍苔生处，依依又赋诗。



· 全唐诗 ·

卷 244\_17【送元诜还江东（一作送太常元博士归润州）】

韩翃

过江秋色在，诗兴与归心。客路随枫岸，人家扫橘林。  
潮声当昼起，山翠近南深。几日华阳洞，寒花引独寻。

卷 244\_18【送客游江南】

韩翃

桂水随去远，赏心知有馀。衣香楚山橘，手鲙湘波鱼。  
芳芷不共把，浮云怅离居。遥想汨罗上，吊屈秋风初。

卷 244\_19【送海州姚别驾】

韩翃

少年为长史，东去事诸侯。坐觉千闾静，闲随五马游。  
行人楚国道，暮雪郁林州。他日知相忆，春风海上楼。

卷 244\_20【送夏侯审】

· 全唐诗 ·

韩翃

谢公邻里在，日夕问佳期。春水人归后，东田花尽时。  
下楼闲待月，行乐笑题诗。他日吴中路，千山入梦思。

卷 244\_21 【送赵评事赴洪州使幕】

韩翃

孤舟行远近，一路过湘东。官属张廷尉，身随杜幼公。  
山河映湘竹，水驿带青枫。万里思君处，秋江夜雨中。

卷 244\_22 【送李侍御赴徐州行营】

韩翃

少年兼柱史，东至旧徐州。远属平津阁，前驱博望侯。  
向营淮水满，吹角楚天秋。客梦依依处，寒山对白楼。

卷 244\_23 【送李秀才归江南（一作送孙革及第归江南）】

韩翃

过淮芳草歇，千里又东归。野水吴山出，家林越鸟飞。

· 全唐诗 ·

荷香随去棹，梅雨点行衣。无数沧江客，如君达者稀。

卷 244\_24 【题僧房（一作题慈恩寺振上人院）】

韩翃

披衣闻客至，开锁此时开。鸣磬夕阳尽，卷帘秋色来。  
名香连竹径，清梵出花台。身在心无住，他方到几回。

卷 244\_25 【送寿州陈录事】

韩翃

寿阳南渡口，敛笏见诸侯。五两楚云暮，千家淮水秋。  
开帘对芳草，送客上春洲。请问山中桂，王孙几度游。

卷 244\_26 【送赵陆司兵归使幕】

韩翃

客路青芜遍，关城白日低。身趋双节近，名共五云齐。  
远水公田上，春山郡舍西。无因得携手，东望转凄凄。

· 全唐诗 ·

卷 244\_27【送蒋员外端公归淮南】

韩翃

淮南芳草色，日夕引归船。御史王元贶，郎官顾彦先。  
光风千日暖，寒食百花燃。惆怅佳期近，澄江与暮天。

卷 244\_28【题慈仁寺竹院】

韩翃

千峰对古寺，何异到西林。幽磬蝉声下，闲窗竹翠阴。  
诗人谢客兴，法侣远公心。寂寂炉烟里，香花欲暮深。

卷 244\_29【赠郢州马使君】

韩翃

东方千万骑，出望使君时。暮雪行看尽，春城到莫迟。  
路人趋墨帟，官柳度青丝。他日铃斋内，知君亦赋诗。

卷 244\_30【送张丞归使幕（一作张继诗）】

· 全唐诗 ·

韩翃

独受主恩归，当朝似者稀。玉壶分御酒，金殿赐春衣。  
拂席流莺醉，鸣鞭骏马肥。满台簪白笔，捧手恋清晖。

卷 244\_31【赠长洲何主簿】

韩翃

挂席逐归流，依依望虎丘。残春过楚县，夜雨宿吴洲。  
野寺吟诗入，溪桥折笋游。到官无一事，清静有诸侯。

卷 244\_32【送崔过归淄青幕府】

韩翃

平陵车马客，海上见旌旗。旧驿千山下，残花一路时。  
春衣过水冷，暮雨出关迟。莫道青州客，迢迢在梦思。

卷 244\_33【田仓曹东亭夏夜饮得春字】

韩翃

薛公门下人，公子又相亲。玉佩迎初夜，金壶醉老春。

· 全唐诗 ·

葛衣香有露，罗幕静无尘。更羡风流外，文章是一秦。

卷 244\_34 【赠王逖】

韩翃

端笏事龙楼，思闲辄告休。新调赭白马，暂试黑貂裘。  
珠履迎佳客，金钱与莫愁。座中豪贵满，谁道不风流。

卷 244\_35 【送深州吴司马归使幕】

韩翃

东门送远客，车马正纷纷。旧识张京兆，新随刘领军。  
行骢看暮雨，归雁踏青云。一去丛台北，佳声几日闻。

卷 244\_36 【华亭夜宴庾侍御宅（一作张继诗）】

韩翃

世故他年别，心期此夜同。千峰孤烛外，片雨一更中。  
酒客逢山简，诗人得谢公。自怜驱匹马，拂曙向关东。

· 全唐诗 ·

卷 244\_37【送客之上谷】

韩翃

北客悲秋色，田园忆去来。披衣朝易水，匹马夕燕台。  
风翦荷花碎，霜迎栗罅开。赏心知不浅，累月故人杯。

卷 244\_38【同中书刘舍人题青龙上房】

韩翃

西掖归来后，东林静者期。远峰春雪里，寒竹暮天时。  
笑说金人偈，闲听宝月诗。更怜茶兴在，好出下方迟。

卷 244\_39【宴吴王宅】

韩翃

玉管箫声合，金杯酒色殷。听歌吴季札，纵饮汉中山。  
称寿争离席，留欢辄上关。莫言辞客醉，犹得曳裾还。

卷 244\_40【题荐福寺衡岳暕师房】

· 全唐诗 ·

韩翃

春城乞食还，高论此中闲。僧腊阶前树，禅心江上山。  
疏帘看雪卷，深户映花关。晚送门人出，钟声杳霭间。

卷 244\_41【送戴迪赴凤翔幕府】

韩翃

青春带文绶，去事魏征西。上路金羁出，中人玉箸齐。  
当歌酒万斛，看猎马千蹄。自有从军乐，何须怨解携。

卷 244\_42【送郢州郎使君】

韩翃

千人插羽迎，知是范宣城。暮雪楚山冷，春江汉水清。  
红鲜供客饭，翠竹引舟行。一别何时见，相思芳草生。

卷 244\_43【送李中丞赴辰州】

韩翃

白羽逐青丝，翩翩南下时。巴人迎道路，蛮帅引旌旗。



· 全唐诗 ·

暮雨山开少，秋江叶落迟。功成益地日，应见竹郎祠。

卷 244\_44 【送刘侍御赴陕州】

韩翃

金羁映骠驪，后骑佩干将。把酒春城晚，鸣鞭晓路长。  
带冰新溜涩，间雪早梅香。明日怀贤处，依依御史床。

卷 244\_45 【李中丞宅夜宴送丘侍御赴江东便往辰州】

韩翃

积雪临阶夜，重裘对酒时。中丞违沈约，才子送丘迟。  
一路三江上，孤舟万里期。辰州佳兴在，他日寄新诗。

卷 244\_46 【送李侍御归宣州使幕】

韩翃

春草东江外，翩翩北路归。官齐魏公子，身逐谢玄晖。  
山色随行骑，莺声傍客衣。主人池上酌，携手暮花飞。

· 全唐诗 ·

卷 244\_47【东城水亭宴李侍御副使】

韩翃

东门留客处，沽酒用钱刀。秋水床下急，斜晖林外高。  
金羁络骥馭，玉匣闭豪曹。去日随戎幕，东风见伯劳。

卷 244\_48【送秘书谢监赴江西使幕】

韩翃

谢监忆山程，辞家万里行。寒衣傍楚色，孤枕宿潮声。  
小寇不足问，新诗应渐清。府公相待日，引旆出江城。

卷 244\_49【送江陵元司录】

韩翃

新领州从事，曾为朝大夫。江城竹使待，山路橘官扶。  
片雨三江道，残秋五叶湖。能令诗思好，楚色与寒芜。

卷 244\_50【送李舍人携家归江东觐省】

· 全唐诗 ·

韩翃

二十青宫吏，成名似者稀。承颜陆郎去，携手谢娘归。  
夜月回孤烛，秋风试夹衣。扁舟楚水上，来往速如飞。

卷 244\_51【送刘侍御赴令公行营】

韩翃

东城跃紫骝，西路大刀头。上客刘公干，元戎郭细侯。  
一军偏许国，百战又防秋。请问萧关道，胡尘早晚收。

卷 244\_52【送苏州姚长史】

韩翃

江城驿路长，烟树过云阳。舟领青丝缆，人歌白玉郎。  
葛衣行柳翠，花簪宿荷香。别有心期处，湖光满讼堂。

卷 244\_53【送金华王明府】

韩翃

县舍江云里，心闲境又偏。家贫陶令酒，月俸沈郎钱。

· 全唐诗 ·

黄蘗香山路，青枫暮雨天。时闻引车骑，竹外到铜泉。

卷 244\_54【送田仓曹汴州覲省】

韩翃

拜庆承天宠，朝来辞汉宫。玉杯分湛露，金勒借追风。  
古驿秋山下，平芜暮雨中。翩翩魏公子，人看渡关东。

卷 244\_55【送张渚赴越州】

韩翃

白面谁家郎，青骊照地光。桃花开绶色，苏合借衣香。  
暮雪连峰近，春江海市长。风流似张绪，别后见垂杨。

卷 244\_56【奉和元相公家园即事寄王相公】

韩翃

共列中台贵，能齐物外心。回车青阁晚，解带碧茸深。  
寒水分畦入，晴花度竹寻。题诗更相忆，一字重千金。

· 全唐诗 ·

卷 244\_57【送道士侄归池阳】

韩翃

银角桃枝杖，东门赠别初。幽州寻马客，灞岸送驴车。  
野饭秋山静，行衣落照馀。燕南群从少，此去意何如。

卷 244\_58【送刘长上归城南别业】

韩翃

数刻是归程，花间落照明。春衣香不散，骏马汗犹轻。  
南渡春流浅，西风片雨晴。朝还会相就，饭尔五侯鯖。

卷 244\_59【赠张五諲归濠州别业】

韩翃

常知罢官意，果与世人疏。复此凉风起，仍闻濠上居。  
故山期采菊，秋水忆观鱼。一去蓬蒿径，羡君闲有馀。

卷 244\_60【送营城李少府】

· 全唐诗 ·

韩翃

怀禄兼就养，更怀趋府心。晴山东里近，春水北门深。  
新绶映芳草，旧家依远林。还乘郑小驷，躑躅县城阴。

卷 244\_61【鲁中送鲁使君归郑州】

韩翃

城中金络骑，出饯沈东阳。九月寒露白，六关秋草黄。  
齐讴听处妙，鲁酒把来香。醉后著鞭去，梅山道路长。

卷 244\_62【送夏侯校书归上都】

韩翃

后辈传佳句，高流爱美名。青春事贺监，黄卷问张生。  
暮雪重裘醉，寒山匹马行。此回将诣阙，几日谏书成。

卷 244\_63【送李明府赴连州】

韩翃

万里向南湘，孤舟入桂阳。诸侯迎上客，小吏拜官郎。

· 全唐诗 ·

春服橦花细，初筵木槿芳。看承雨露速，不待荔枝香。

卷 244\_64【送卢大理赵侍御祭东岳兼寄孟兖州】

韩翃

东岳昔有事，两臣朝望归。驿亭开岁酒，斋舍著新衣。  
上客钟大理，主人陶武威。仍随御史马，山路满光辉。

卷 244\_65【送皇甫大夫赴浙东】

韩翃

舟师分水国，汉将领秦官。麾下同心吏，军中端。  
吴门秋露湿，楚驿暮天寒。豪贵东山去，风流胜谢安。

卷 244\_66【送韦秀才】

韩翃

东人相见罢，秋草独归时。几日孙弘阁，当年谢朓诗。  
寒山叶落早，多雨路行迟。好忆金门步，功名自有期。

· 全唐诗 ·

## 第二百四十五卷

### 卷 245\_1【送客一归襄阳二归浔阳】

韩翃

南驱匹马会心期，东望扁舟惬梦思。熨斗山前春色早，  
香炉峰顶暮烟时。空林欲访庞居士，古寺应怀远法师。  
两地由来堪取兴，三贤他日幸留诗。

### 卷 245\_2【送故人赴江陵寻庾牧】

韩翃

主人持节拜荆州，走马应从一路游。斑竹冈连山雨暗，  
枇杷门向楚天秋。佳期笑把斋中酒，远意闲登城上楼。  
文体此时看又别，吾知小庾甚风流。

### 卷 245\_3【送客水路归陕】

韩翃



· 全唐诗 ·

相风竿影晓来斜，渭水东流去不赊。枕上未醒秦地酒，  
舟前已见陕人家。春桥杨柳应齐叶，古县棠梨也作花。  
好是吾贤佳赏地，行逢三月会连沙。

卷 245\_4【送丹阳刘太真】

韩翃

长干道上落花朝，羡尔当年赏事饶。下箸已怜鹅炙美，  
开笼不奈鸭媒娇。春衣晚入青杨巷，细马初过皂荚桥。  
相访不辞千里远，西风好借木兰桡。

卷 245\_5【送客归江州】

韩翃

东归复得采真游，江水迎君日夜流。客舍不离青雀舫，  
人家旧在白鸥洲。风吹山带遥知雨，露湿荷裳已报秋。  
闻道泉明居止近，篮舆相访为淹留。

卷 245\_6【题张逸人园林】

韩翃

· 全唐诗 ·

花源一曲映茅堂，清论闲阶坐夕阳。麈尾手中毛已脱，  
蟹螯尊上味初香。春深黄口传窥树，雨后青苔散点墙。  
更道小山宜助赏，呼儿舒簟醉岩芳。

卷 245\_7【又题张逸人园林】

韩翃

藏头不复见时人，爱此云山奉养真。露色点衣孤屿晓，  
花枝妨帽小园春。时携幼稚诸峰上，闲濯眉须一水滨。  
兴罢归来还对酌，茅檐挂著紫荷巾。

卷 245\_8【送刘将军】

韩翃

明光细甲照鋌鍔，昨日承恩拜虎牙。胆大欲期姜伯约，  
功多不让李轻车。青巾校尉遥相许，墨槊将军莫大夸。  
阙下来时亲伏奏，胡尘未尽不为家。

卷 245\_9【送郑员外（郑时在熊尚书幕府）】

韩翃

· 全唐诗 ·

风流不减杜陵时，五十为郎未是迟。孺子亦知名下士，  
乐人争唱卷中诗。身齐吏部还多醉，心顾尚书自有期。  
要路眼青知己在，不应穷巷久低眉。

卷 245\_10【寄徐州郑使君】

韩翃

江城五马楚云边，不羨雍容画省年。才子旧称何水部，  
使君还继谢临川。射堂草遍收残雨，官路人稀对夕天。  
虽卧郡斋千里隔，与君同见月初圆。

卷 245\_11【送襄垣王君归南阳别墅】

韩翃

都门霁后不飞尘，草色萋萋满路春。双兔坡东千室吏，  
三鸦水上一归人。愁眠客舍衣香满，走渡河桥马汗新。  
少妇比来多远望，应知蟠子上罗巾。

卷 245\_12【送王诞渤海使赴李太守行营】

韩翃

· 全唐诗 ·

少年结客散黄金，中岁连兵扫绿林。渤海名王曾折首，  
汉家诸将尽倾心。行人去指徐州近，饮马回看泗水深。  
喜见明时钟太尉，功名一似旧淮阴。

卷 245\_13【送王少府归杭州】

韩翃

归舟一路转青蘋，更欲随潮向富春。吴郡陆机称地主，  
钱塘苏小是乡亲。葛花满把能消酒，栀子同心好赠人。  
早晚重过鱼浦宿，遥怜佳句箧中新。

卷 245\_14【赠王随】

韩翃

青云自致晚应遥，朱邸新婚乐事饶。饮罢更怜双袖舞，  
试来偏爱五花骄。帐里炉香春梦晓，堂前烛影早更朝。  
更说球场新雨歇，王孙今日定相邀。

卷 245\_15【同题仙游观】

韩翃

· 全唐诗 ·

仙台下见五城楼，风物凄凄宿雨收。山色遥连秦树晚，  
砧声近报汉宫秋。疏松影落空坛静，细草香闲小洞幽。  
何用别寻方外去，人间亦自有丹丘。

卷 245\_16【访王起居不遇留赠】

韩翃

双龙阙下拜恩初，天子令君注起居。载笔已齐周右史，  
论诗更事谢中书。行闻漏滴随金仗，入对炉烟侍玉除。  
贺客自知来独晚，青骊不见意何如。

卷 245\_17【送刘评事赴广州使幕】

韩翃

征南官属似君稀，才子当今刘孝威。蛮府参军趋传舍，  
交州刺史拜行衣。前临瘴海无人过，却望衡阳少雁飞。  
为报苍梧云影道，明年早送客帆归。

卷 245\_18【送冷朝阳还上元】

韩翃

青丝乍引木兰船，名遂身归拜庆年。落日澄江乌榜外，

· 全唐诗 ·

秋风疏柳白门前。桥通小市家林近，山带平湖野寺连。  
别后依依寒食里，共君携手在东田。

卷 245\_19【送高别驾归汴州】

韩翃

信陵门下识君偏，骏马轻裘正少年。寒雨送归千里外，  
东风沉醉百花前。身随玉帐心应惬，官佐龙符势又全。  
久客未知何计是，参差去借汶阳田。

卷 245\_20【送康洗马归滑州】

韩翃

腰佩雕弓汉射声，东归衔命见双旌。青丝玉勒康侯马，  
孟水金堤滑伯城。腊雪夜看宜纵饮，寒芜昼猎不妨行。  
怀君又隔千山远，别后春风百草生。

卷 245\_21【寄上田仆射】

韩翃

家封薛县异诸田，报主荣亲义两全。仆射临戎谢安石，

· 全唐诗 ·

大夫持宪杜延年。金装昼出罗千骑，玉案晨餐直万钱。  
应念一身留阙下，阖门遥寄鲁西偏。

卷 245\_22 【送王光辅归青州兼寄储侍郎】

韩翃

几回奏事建章宫，圣主偏知汉将功。身著紫衣趋阙下，  
口衔丹诏出关东。蝉声驿路秋山里，草色河桥落照中。  
远忆故人沧海别，当年好跃五花骢。

卷 245\_23 【宴杨驸马山池（一作陈羽诗，又作朱湾诗）】

韩翃

垂杨拂岸草茸茸，绣户帘前花影重。鲙下玉盘红缕细，  
酒开金瓮绿醅浓。中朝驸马何平叔，南国词人陆士龙。  
落日泛舟同醉处，回潭百丈映千峰。

卷 245\_24 【送长史李少府入蜀】

韩翃

行行独出故关迟，南望千山无尽期。见舞巴童应暂笑，

· 全唐诗 ·

闻歌蜀道又堪悲。孤城晚闭清江上，匹马寒嘶白露时。  
别后此心君自见，山中何事不相思。

卷 245\_25【送客还江东】

韩翃

不妨高卧顺流归，五两行看扫翠微。鼯鼠夜喧孤枕近，  
鸬鹚晓避客船飞。一壶先醉桃枝簪，百和初熏苧布衣。  
君到新林江口泊，吟诗应赏谢玄晖。

卷 245\_26【寄令狐尚书】

韩翃

立身荣贵复何如，龙节红旗从板舆。妙略多推霍骠骑，  
能文独见沈尚书。临风高会千门帐，映水连营百乘车。  
他日感恩惭未报，举家犹似涸池鱼。

卷 245\_27【扈从郊庙因呈两省诸公】

韩翃

丹墀列士主恩同，厩马翩翩出汉宫。奉引乘舆金仗里，



· 全唐诗 ·

亲尝赐食玉盘中。昼趋行殿旌门北，夜宿斋房刻漏东。  
明日驾回承雨露，齐将万岁及春风。

卷 245\_28【送端州冯使君】

韩翃

白皙风流似有须，一门豪贵领苍梧。三峰亭暗橘边宿，  
八桂林香节下趋。玉树群儿争翠羽，金盘少妾拣明珠。  
怀君乐事不可见，驂马翩翩新虎符。

卷 245\_29【送王府张参军附学及第东归】

韩翃

邻家不识斗鸡翁，闭户能齐隐者风。顾步曾为小山客，  
成名因事大江公。一身千里寒芜上，单马重裘腊月中。  
寂寂故园行见在，暮天残雪洛城东。

卷 245\_30【送齐明府赴东阳】

韩翃

绿丝帆繹桂为樯，过尽淮山楚水长。万里移家背春谷，

· 全唐诗 ·

一官行府向东阳。风流好爱杯中物，豪荡仍欺陌上郎。  
别后心期如在眼，猿声烟色树苍苍。

卷 245\_31 【鲁中送从事归茌阳】

韩翃

故园衰草带茌波，岁晚知如君思何。轻橐归时鲁缟薄，  
寒衣缝处郑绵多。万人都督鸣骝送，百里邦君枉骑过。  
累路尽逢知己在，曾无对酒不高歌。

卷 245\_32 【兖州送李明府使苏州便赴告期】

韩翃

莫言水国去迢迢，白马吴门见不遥。枫树林中经楚雨，  
木兰舟上蹋江潮。空山古寺千年石，草色寒堤百尺桥，  
早晚卢家兰室在，珊瑚玉佩彻青霄。

卷 245\_33 【送田明府归终南别业】

韩翃

故园此日多心赏，窗下泉流竹外云。近馆应逢沈道士，

· 全唐诗 ·

比邻自识卞田君。离宫树影登山见，上苑钟声过雪闻。  
相劝早移丹凤阙，不须常恋白鸥群。

卷 245\_34 【家兄自山南罢归献诗叙事】

韩翃

时辈已争先，吾兄未著鞭。空嗟镊须日，犹是屈腰年。  
不以殊方远，仍论水地偏。襄橙随客路，汉竹引归船。  
云木巴东峡，林泉岷北川。池馀骑马处，宅似卧龙边。  
夜簟千峰月，朝窗万井烟。朱荷江女院，青稻楚人田。  
县舍多潇洒，城楼入醉眠。黄苞柑正熟，红缕鲙仍鲜。  
坐厌牵丝倦，因从解绶旋。初辞五斗米，唯奉一囊钱。  
室好生虚白，书耽守太玄。枥中嘶款段，阶下引潺湲。  
落照渊明柳，春风叔夜弦。绛纱儒客帐，丹诀羽人篇。  
雅论承安石，新诗与惠连。兴清湖见底，襟豁雾开天。  
魏阙心犹系，周才道岂捐。一丘无自逸，三府会招贤。

卷 245\_35 【奉送王相公缙赴幽州巡边（一作张继诗）】

韩翃

黄阁开帷幄，丹墀侍冕旒。位高汤左相，权总汉诸侯。  
不改周南化，仍分赵北忧。双旌过易水，千骑入幽州。  
塞草连天暮，边风动地秋。无因随远道，结束佩吴钩。

· 全唐诗 ·

卷 245\_36 【寄赠虢州张参军】

韩翃

三十事诸侯，贤豪冠北州。桃花迎骏马，苏合染轻裘。  
观妓将军第，题诗关尹楼。青林朝送客，绿屿晚回舟。  
好栗分通子，名香赠莫愁。洗杯新酒熟，把烛故人留。  
百雉归云过，千峰宿雨收。蒹葭露下晚，菡萏水中秋。  
忆昨陪行乐，常时接献酬。佳期虽雾散，惠问亦川流。  
开卷醒堪解，含毫思苦抽。无因达情意，西望日悠悠。

卷 245\_37 【送李中丞赴商州】

韩翃

五马渭桥东，连嘶逐晓风。当年紫髯将，他日黑头公。  
不异金吾宠，兼齐玉帐雄。闭营春雪下，吹角暮山空。  
香麝松阴里，寒猿黛色中。郡斋多赏事，好与故人同。

卷 245\_38 【汉宫曲二首】

韩翃

骏马绣障泥，红尘扑四蹄。归时何太晚，日照杏花西。

· 全唐诗 ·

绣幕珊瑚钩，春开翡翠楼。深情不肯道，娇倚钿箜篌。

卷 245\_39【陪孟都督祭岳途中有赠】

韩翃

封疆七百里，禄秩二千石。拥节祠太山，寒天霜草白。

卷 245\_40【宿甌山】

韩翃

山中今夜何人，阙下当年近臣。  
青琐应须早去，白云何用相亲。

卷 245\_41【别甌山】

韩翃

一身趋侍丹墀，西路翩翩去时。  
惆怅青山绿水，何年更是来期。

卷 245\_42【送陈明府赴淮南】

· 全唐诗 ·

韩翃

年华近逼清明，落日微风送行。黄鸟绵蛮芳树，  
紫骝躑躅东城。花间一杯促膝，烟外千里含情。  
应渡淮南信宿，诸侯拥旆相迎。

卷 245\_43【送客知鄂州】

韩翃

江口千家带楚云，江花乱点雪纷纷。  
春风落日谁相见，青翰舟中有鄂君。

卷 245\_44【寒食（一作寒食日即事）】

韩翃

春城无处不飞花，寒食东风御柳斜。  
日暮汉宫传蜡烛，轻烟散入五侯家。

卷 245\_45【羽林骑（一作羽林少年行）】

韩翃

· 全唐诗 ·

骏马牵来御柳中，鸣鞭欲向渭桥东。  
红蹄乱蹋春城雪，花颌骄嘶上苑风。

卷 245\_46【看调马】

韩翃

鸳鸯赭白齿新齐，晚日花中散碧蹄。  
玉勒斗回初喷沫，金鞭欲下不成嘶。

卷 245\_47【寄赠衡州杨使君】

韩翃

湘竹斑斑湘水春，衡阳太守虎符新。  
朝来笑向归鸿道，早晚南飞见主人。

卷 245\_48【宿石邑山中】

韩翃

浮云不共此山齐，山霭苍苍望转迷。  
晓月暂飞高树里，秋河隔在数峰西。

· 全唐诗 ·

卷 245\_49【江南曲（一作李益诗）】

韩翃

长乐花枝雨点销，江城日暮好相邀。  
春楼不闭葳蕤锁，绿水回通宛转桥。

卷 245\_50【赠张千牛】

韩翃

蓬莱阙下是天家，上路新回白鼻騊。  
急管昼催平乐酒，春衣夜宿杜陵花。

卷 245\_51【汉宫曲二首（第二首一作李益诗）】

韩翃

五柞宫中过腊看，万年枝上雪花残。  
绮窗夜闭玉堂静，素绠朝穿金井寒。

家在长陵小市中，珠帘绣户对春风。  
君王昨日移仙仗，玉辇迎将入汉宫。



· 全唐诗 ·

卷 245\_52【赠李翼】

韩翃

王孙别舍拥朱轮，不羨空名乐此身。  
门外碧潭春洗马，楼前红烛夜迎人。

卷 245\_53【少年行】

韩翃

千点斓斑玉勒骢，青丝结尾绣缠骝。  
鸣鞭晓出章台路，叶叶春衣杨柳风。

卷 245\_54【题玉真观李秘书院】

韩翃

白云斜日影深松，玉宇瑶坛知几重。  
把酒题诗人散后，华阳洞里有疏钟。

卷 245\_55【送客之潞府】

· 全唐诗 ·

韩翃

官柳青青匹马嘶，回风暮雨入铜鞮。  
佳期别在春山里，应是人参五叶齐。

卷 245\_56【送客贬五溪】

韩翃

南过猿声一逐臣，回看秋草泪沾巾。  
寒天暮雪空山里，几处蛮家是主人。

卷 245\_57【送齐山人归长白山】

韩翃

旧事仙人白兔公，掉头归去又乘风。  
柴门流水依然在，一路寒山万木中。

卷 245\_58【寄裴郢州】

韩翃

乌纱灵寿对秋风，怅望浮云济水东。

· 全唐诗 ·

官树阴阴铃阁暮，州人转忆白头翁。

卷 245\_59【梁城赠一二同幕】

韩翃

五营河畔列旌旗，吹角鸣鼙日暮时。  
曾是信陵门下客，雨回相吊不胜悲。

卷 245\_60【河上寄故人】

韩翃

河流晓天，濮水清烟。日暖昆吾台上，春深颍颍城边。  
莺声乱啁鹄，花片细点龙泉。西望情人早至，  
犹应得醉芳年。

卷 245\_61【留题宁川香盖寺壁】

韩翃

爱远登高尘眼开，为怜萧寺上经台。山川谁识龙蛇蛰，  
天地自迎风雨来。柳放寒条秋已老，雁摇孤翼暮空回。  
何人会得其中事，又被残花落日催。

· 全唐诗 ·

卷 245\_62【寄柳氏】

韩翃

章台柳，章台柳，颜色青青今在否？纵使长条似旧垂，  
也应攀折他人手。

· 全唐诗 ·

## 第二百四十六卷

卷 246\_1 【海上寄萧立】

独孤及

朔风剪塞草，寒露日夜结。行行到瀛壖，归思生暮节。  
驿楼见万里，延首望辽碣。远海入大荒，平芜际穷发。  
旧国在梦想，故人胡且越。契阔阻风期，荏苒成雨别。  
海西望京口，两地各天末。索居动经秋，再笑知曷月。  
日南望中尽，唯见飞鸟灭。音尘未易得，何由慰饥渴。

卷 246\_2 【三月三日，自京到华阴，于水亭独酌，寄裴六、薛八】

独孤及

祗役匪遑息，经时客三秦。还家问节候，知到上巳辰。  
山县何所有，高城闭青春。和风不吾欺，桃杏满四邻。  
旧友适远别，谁当接欢欣。呼儿命长瓢，独酌湘吴醇。  
一酌一朗咏，既酣意亦申。言筌暂两忘，霞月只相新。  
裴子尘表物，薛侯席上珍。寄书二傲吏，何日同车茵。  
讵肯使空名，终然羁此身。他年解桎梏，长作海上人。

· 全唐诗 ·

卷 246\_3 【代书寄上裴六冀、刘二颖】

独孤及

昔余马首东，君在海北汭。尽屏簿领书，相与议岩穴。  
载来诣佳境，每山有车辙。长啸林木动，高歌唾壶缺。  
此辞月未周，虏马嘶絳阙。猛虎踞大道，九州当中裂。  
闻君弃孤城，犹自握汉节。耻栖恶木影，忍与故山别。  
脱舄挂岭云，罔然若鸟逝。唯留潺湲水，分付练溪月。  
尔来大谷梨，白花再成雪。关梁限天险，欢乐竟两绝。  
大盗近削平，三川今底宁。句芒布春令，屏翳收雷霆。  
伊洛日夜涨，鸣皋兰杜青。鸛鸛两黄鹄，何处游青冥。  
畴昔切玉刃，应如新发硎。及时当树勋，高悬景钟铭。  
莫抱白云意，径往丹丘庭。功成傥长揖，然后谋沧溟。

卷 246\_4 【客舍月下对酒，醉后寄毕四耀】

独孤及

乡路风雪深，生事忧患迫。天长波澜广，高举无六翮。  
独立寒夜移，幽境思弥积。霜月照胆净，银河入檐白。  
沽酒聊自劳，开樽坐檐隙。主人奏丝桐，能使高兴剧。  
清机暂无累，献酢更络绎。慷慨葛天歌，愔愔广陵陌。  
既醉万事遗，耳热心亦适。视身兀如泥，瞪目傲今昔。  
故人间城阙，音信两脉脉。别时前盟在，寸景莫自掷。

· 全唐诗 ·

心与白日斗，十无一满百。寓形薪火内，甘作天地客。  
与物无亲疏，斗酒胜竹帛。何必用自苦，将贻古贤责。

卷 246\_5【下弋阳江舟中代书寄裴侍御】

独孤及

故乡隔西日，水去连长天。前路知几许，但指天南边。  
怆恨极浦外，隐映青山连。东风满帆来，五两如弓弦。  
遥羨绣衣客，罔然马首先。得餐武昌鱼，不顾浔阳田。  
屈指数别日，忽乎成两年。百花已满眼，春草渐碧鲜。  
岂是离居时，奈何于役牵。洞庭有深涉，曷日期归旋。  
且作异乡料，讷知携手缘。离忧未易销，莫道樽酒贤。

卷 246\_6【癸卯岁赴南丰道中闻京师失守寄权士繇韩幼深】

独孤及

种田不遇岁，策名不遭时。胡尘晦落日，西望泣路岐。  
猛虎啸北风，麋鹿皆载驰。深泥架疲牛，踉蹌余何之。  
诘屈白道转，缭绕清溪随。荒谷啸山鬼，深林啼子规。  
长叹指故山，三奏归来词。不逢眼中人，调苦车逶迟。  
士繇松筠操，幼深琼树姿。别来平安否，何阶一申眉。  
白云失帝乡，远水恨天涯。昂藏双威凤，曷月还西枝。  
努力爱华发，盛年振羽仪。但令违难康，不负沧洲期。

· 全唐诗 ·

莫作新亭泣，徒使夷吾嗤。

卷 246\_7【贾员外处见中书贾舍人巴陵诗集览之怀旧代书寄赠】

独孤及

海岸望青琐，云长天漫漫。十年不一展，知有关山难。  
适逢阮始平，立马问长安。取公咏怀诗，示我江海澜。  
暂若窥武库，森然矛戟寒。眼明遗头风，心悦忘朝餐。  
大驾今返正，熊罴扈鸣銮。公游凤凰沼，献可在笔端。  
系越有长纆，封关只一丸。罔然翔寥廓，仰望惭羽翰。  
嘉会不我与，相思岁云殫。唯当袖佳句，持比青琅玕。

卷 246\_8【代书寄上李广州】

独孤及

皖水望番禺，迢迢青天末。鸿雁飞不到，音尘何由达。  
独有舆人歌，隔云声喧聒。皆称府君仁，百越赖全活。  
推诚鱼鳖信，持正魑魅怛。疲民保中和，性足无夭阏。  
天子咨四岳，伫公济方割。几时复旋归，入践青琐闼。  
贱子托明德，遑若松上葛。别离鄙吝生，结念思所豁。  
门栏关山阻，岐路天地阔。唯凭万里书，持用慰饥渴。



· 全唐诗 ·

卷 246\_9【夏中酬于逖毕耀问病见赠】

独孤及

救物智所昧，学仙愿未从。行藏两乖角，蹭蹬风波中。  
薄宦耻降志，卧疴非养蒙。闭关涉两旬，羈思浩无穷。  
鸞鷟何处来，双舞下碧空。离别隔云雨，惠然此相逢。  
把手贺疾间，举杯欣酒浓。新诗见久要，清论激深衷。  
高馆舒夜簾，开门延微风。火云赫嵯峨，日暮千万峰。  
遥指故山笑，相看抚号钟。声和由心清，事感知气同。  
出处未易料，且歌缓愁容。愿君崇明德，岁暮如青松。

卷 246\_10【酬梁二十宋中所赠兼留别梁少府】

独孤及

少读黄帝书，肯不笑机事。意犹负深衷，未免名迹累。  
厌贫学干禄，欲徇宾王利。甘为风波人，岂复江海意。  
担簦平台下，是日饮羈思。逢君道寸心，暂喜一交臂。  
绪言未及竟，离念已复至。甯陵望南丘，云雨成两地。  
途殊迹方间，河广流且驶。暮帆望不及，览赠心欲醉。  
爱君如金锡，昆弟皆茂异。奕赫连丝衣，荣养能锡类。  
君子道未长，深藏青云器。巨鳞有纵时，今日不足议。  
唯当加餐饭，好我袖中字。别离动经年，莫道分首易。

· 全唐诗 ·

卷 246\_11【庚子岁避地至玉山，酬韩司马所赠】

独孤及

沧海疾风起，洪波骇恬鳞。已无济川分，甘作乘桴人。  
挥手谢秣陵，举帆指瓯闽。安和风尘表，偶与琼瑶亲。  
共悲行路难，况逢江南春。故园忽如梦，返复知何辰。  
旷野豺虎满，深山兰蕙新。枉君灞陵什，回首徒酸辛。

卷 246\_12【奉和李大夫同吕评事太行苦热行兼寄院中诸公】

独孤及

驷马上太行，修途亘辽碣。王程无留驾，日昃未遑歇。  
请问此何时，恢台朱明月。长蛇稽天讨，上将方北伐。  
明主命使臣，皇华得时杰。已忘羊肠险，岂惮湿风热。  
摇策汗滂沱，登岸思纡结。炎云如烟火，谿谷将恐竭。  
昼景赅可畏，凉飙何由发。山长飞鸟堕，目极行车绝。  
赵魏方俶扰，安危俟明哲。归路岂不怀，饮冰有苦节。  
会同传檄至，疑议立谈决。况有阮元瑜，翩翩秉书札。  
起予歌赤坂，永好逾白雪。谁念剖竹人，无因执羁绁。

卷 246\_13【酬皇甫侍御望天灊山见示之作】

· 全唐诗 ·

独孤及

早岁慕五岳，尝为尘机碍。孰知天柱峰，今与郡斋对。  
隐鳞抱元气，氤氲含青霭。云崖媚远空，石壁寒古塞。  
汉皇南游日，望秩此昭配。法驾到谷口，礼容振荒外。  
焚柴百神趋，执玉万方会。天旋物顺动，德布泽滂霈。  
讲武威已耀，学仙功未艾。黄金竟何成，洪业遽沦昧。  
度世若一瞬，昨朝已千载。如今封禅坛，唯见云雨晦。  
长望哀往古，劳生惭大块。清晖幸相娱，幽独知所赖。  
寒城春方正，初日明可爱。万殊喜阳和，余亦荷时泰。  
山色日夜绿，下有清浅瀨。愧作拳偻人，沈迷簿书内。  
登临叹拘限，出处悲老大。况听郢中曲，复识湘南态。  
思免物累牵，敢令道机退。瞢然诵佳句，持此秋兰佩。

卷 246\_14【送陈兼应辟兼寄高适、贾至】

独孤及

结绿处燕石，卞和不必知。所以王佐才，未能忘茅茨。  
罢官梁山外，获稻楚水湄。适会傅岩人，虚舟济川时。  
天网忽摇顿，公才难弃遗。凤凰翔千仞，今始一鸣岐。  
上马指国门，举鞭谢书帷。预知大人赋，掩却归来词。  
天子方在宥，朝廷张四维。料君能献可，努力副畴咨。  
旧友满皇州，高冠飞翠蕤。相逢绛阙下，应道轩车迟。  
高侯秉戎翰，策马观西夷。方从幕中事，参谋王者师。  
贾生去洛阳，焜耀琳琅姿。芳名动北步，逸韵凌南皮。

· 全唐诗 ·

肃肃举鸿毛，冷然顺风吹。波流有同异，由是限别离。  
汉塞隔陇底，秦川连镐池。白云日夜满，道里安可思。  
梦想浩盈积，物华愁变衰。因君附错刀，送远益凄其。  
四海各横绝，九霄应易期。不知故巢燕，决起栖何枝。

卷 246\_15【送相里郎中赴江西】

独孤及

君把一尺诏，南游济沧浪。受恩忘险艰，不道歧路长。  
戎狄方构患，休牛殊未遑。三秦千仓空，战卒如饿狼。  
委输资外府，诹谋寄贤良。有才当陈力，安得遂翱翔。  
岂不慎井赋，赋均人亦康。遥知轩车到，万室安耕桑。  
火伏金气腾，昊天欲苍茫。寒蝉惨巴邓，秋色愁沅湘。  
昨日携手西，于今芸再黄。欢娱讵几许，复向天一方。  
踟躅话世故，惆怅举离觞。共求数刻欢，戏谑君此堂。  
今日把手笑，少时各他乡。身名同风波，聚散未易量。  
曷月还朝天，及时开智囊。前期傥犹阔，加饭勉自强。

卷 246\_16【观海】

独孤及

北登渤澥岛，回首秦东门。谁尸造物功，凿此天池源。  
湏洞吞百谷，周流无四垠。廓然混茫际，望见天地根。

· 全唐诗 ·

白日自中吐，扶桑如可扪。超遥蓬莱峰，想像金台存。  
秦帝昔经此，登临冀飞翻。扬旌百神会，望日群山奔。  
徐福竟何成，羡门徒空言。唯见石桥足，千年潮水痕。

卷 246\_17【初晴抱琴登马退山对酒望远醉后作】

独孤及

年长心易感，况为忧患缠。壮图迫世故，行止两茫然。  
王旅方伐叛，虎臣皆被坚。鲁人著儒服，甘就南山田。  
挈榼上高磴，超遥望平川。沧江大如縆，隐映入远天。  
荒服何所有，山花雪中然。寒泉得日景，吐露鸣湔湔。  
举酒劝白云，唱歌慰颓年。微风度竹来，韵我号钟弦。  
一弹一引满，耳热知心宣。曲终余亦酣，起舞山水前。  
人生几何时，太半百忧煎。今日羁愁破，始知浊酒贤。

卷 246\_18【同徐侍郎五云溪新庭重阳宴集作】

独孤及

万峰苍翠色，双溪清浅流。已符东山趣，况值江南秋。  
白露天地肃，黄花门馆幽。山公惜美景，肯为芳樽留。  
五马照池塘，繁弦催献酬。临风孟嘉帽，乘兴李膺舟。  
骋望傲千古，当歌遗四愁。岂令永和人，独擅山阴游。

· 全唐诗 ·

卷 246\_19【雨晴后陪王员外泛后湖得溪字】

独孤及

远山媚平楚，宿雨涨清溪。沿溯任舟楫，欢言无町畦。  
酒酣相视笑，心与白鸥齐。

卷 246\_20【题思禅寺上方】

独孤及

溪口闻法鼓，停桡登翠屏。攀云到金界，合掌开禅扃。  
郁律众山抱，空濛花雨零。老僧指香楼，云是不死庭。  
眇眇於越路，茫茫春草青。远山喷百谷，缭绕驰东溟。  
目极道何在，境照心亦冥。騄然诸根空，破结如破瓶。  
下视三界狭，但闻五浊腥。山中有良药，吾欲隳天形。

卷 246\_21【季冬自嵩山赴洛道中作】

独孤及

皇运偶中变，长蛇食中土。天盖西北倾，众星陨如雨。  
胡尘动地起，千里闻战鼓。死人成为阜，流血涂草莽。  
策马何纷纷，捐躯抗豺虎。甘心赴国难，谁谓荼叶苦。

· 全唐诗 ·

天子初受命，省方造区宇。斩鲸安溟波，截鳌作天柱。  
三微复正统，五玉归文祖。不图汉官仪，今日忽再睹。  
升高望京邑，佳气连海浦。宝鼎歆景云，明堂舞干羽。  
虎臣激昂，御侮。腐儒著缝掖，何处议邹鲁。  
西上轘辕山，丘陵横今古。和气蒸万物，腊月春霭吐。  
得为太平人，穷达不足数。他日遇封禅，著书继三五。

卷 246\_22【早发若岷驿望庐山】

独孤及

雨罢山翠鲜，泠泠东风好。断崖云生处，是向峰顶道。  
谁谓峰顶远，跂予可瞻讨。忘缘祛天机，脱屣恨不早。  
只恐岁云暮，遂与空名老。心往迹未并，惭愧山上草。

卷 246\_23【寒夜溪行舟中作】

独孤及

日沉诸山昏，寂历群动宿。孤舟独不系，风水夜相逐。  
云归恒星白，霜下天地肃。月轮大如盘，金波入空谷。  
魏阙万里道，羁念千虑束。倦飞思故巢，敢望桐与竹。  
沉吟登楼赋，中夜起三复。忧来无良方，归候春酒熟。

· 全唐诗 ·

卷 246\_24【壬辰岁过旧居】

独孤及

少年事远游，出入燕与秦。离居岁周天，犹作劳歌人。  
负剑渡颍水，归马自知津。缘源到旧庐，揽涕寻荒榛。  
邻里喜相劳，壶觞展殷勤。酒阑击筑语，及此离会因。  
丈夫随世波，岂料百年身。今日负鄙愿，多惭故山春。

卷 246\_25【丙戌岁正月出洛阳书怀】

独孤及

往岁衣褐见，受服金马门。拟将忠与贞，来酬主人恩。  
天地暂雷雨，洪波生平原。穷鳞遂蹭蹬，夙昔事罕存。  
幸逢帝出震，授钺清东藩。白日忽再中，万方咸骏奔。  
王风从西来，春光满乾坤。蛰虫竞飞动，余亦辞笼樊。  
遭遇思自强，宠辱安足言。唯将四方志，回首谢故园。

卷 246\_26【伤春怀归】

独孤及

谁谓乡可望，望在天地涯。但有时命同，万里共岁华。



· 全唐诗 ·

昨夜南山雨，殷雷坼萌芽。源桃不余欺，先发秦人家。  
寂寂户外掩，迟迟春日斜。源桃默无言，秦人独长嗟。  
不惜中肠苦，但言会合赊。思归吾谁诉，笑向南枝花。

卷 246\_27【杂诗】

独孤及

百花结成子，春物舍我去。流年惜不得，独坐空闺暮。  
心自有所待，甘为物华误。未必千黄金，买得一人顾。

卷 246\_28【山中春思】

独孤及

獭祭川水大，人家春日长。独谣昼不暮，搔首惭年芳。  
靡草知节换，含葩向新阳。不嫌三径深，为我生池塘。  
亭午井灶闲，雀声响空仓。花落没屐齿，风动群木香。  
归路云水外，天涯杳茫茫。独卷万里心，深入山鸟行。  
芳景勿相迫，春愁未遽忘。

· 全唐诗 ·

## 第二百四十七卷

卷 247\_1【雨后公超谷北原眺望寄高拾遗】

独孤及

崖口雨足收，清光洗高天。虹蜺敛残霭，山水含碧鲜。  
远空霞破露月轮，薄云片片成鱼鳞。五陵如荠渭如带，  
目极千里关山春。朝来爽气未易说，画取花峰赠远人。

卷 247\_2【自东都还濠州，奉酬王八谏议见赠】

独孤及

关西仕时俱稚容，彪彪之鬣始相逢。天地变化县城改，  
独有故人交态在。不言会合迹未并，犹以岁寒心相待。  
洛阳居守寄鄴侯，君著貂冠参运筹。高阁连云骑省夜，  
新文会友凉风秋。青袍白面昔携手，冉冉府趋君记否。  
云分雨散十五年，始得一笑樽酒前。未遑少留骤远别，  
况值旅雁鸣秋天。二华旧游如梦想，他时再会何由缘。  
赖君赠我郢中曲，别后相思被管弦。

· 全唐诗 ·

卷 247\_3【官渡柳歌送李员外承恩往扬州覲省】

独孤及

君不见官渡河两岸，三月杨柳枝。千条万条色，  
一一胜绿丝。花作铅粉絮，叶成翠羽帟。此时送远人，  
怅望春水上。远客折杨柳，依依两含情。夹郎木兰舟，  
送郎千里行。郎把紫泥书，东征覲庭闱。脱却貂襜褕，  
新著五彩衣。双凤并两翅，将雏东南飞。五两得便风，  
几日到扬州。莫贪扬州好，客行剩淹留。郎到官渡头，  
春阑已应久。殷勤道远别，为谢大堤柳。攀条倘相忆，  
五里一回首。明年柳枝黄，问郎还家否。

卷 247\_4【东平蓬莱驿夜宴平卢杨判官醉后赠别姚太守置酒留宴】

独孤及

驿楼涨海壖，秋月寒城边。相见自不足，况逢主人贤。  
夜清酒浓人如玉，一斗何啻直十千。木兰为樽金为杯，  
江南急管卢女弦。齐童如花解郢曲，起舞激楚歌采莲。  
固知别多相逢少，乐极哀至心婵娟。少留莫辞醉，  
前路方悠然。明日分飞倘相忆，只应遥望西南天。

卷 247\_5【同岑郎中屯田韦员外花树歌】

· 全唐诗 ·

独孤及

东风动地只花发，渭城桃李千树雪。芳菲可爱不可留，  
武陵归客心欲绝。金华省郎惜佳辰，只持棣萼照青春。  
君家自是成蹊处，况有庭花作主人。

卷 247\_6【和李尚书画射虎图歌】

独孤及

饥虎呀呀立当路，万夫震恐百兽怒。彤弓金镞当者谁，  
鸣鞭飞控流星驰。居然画中见真态，若务除恶不顾私。  
时和年丰五兵已，白额未诛壮士耻。分铢远迩悬毂中，  
不中不发思全功。舍矢如破石可裂，应弦尽敌山为空。  
杀气满堂观者骇，飒若崖谷生长风。精微入神在毫末，  
作绩造物可同功。方叔秉钺受命新，丹青起予气益振，  
底绥静难巧可拟，嗟叹不足声成文。他时代天育万物，  
亦以此道安斯民。

卷 247\_7【和赠远】

独孤及

忆得去年春风至，中庭桃李映琐窗。美人挟瑟对芳树，  
玉颜亭亭与花双。今年新花如旧时，去年美人不在兹。

· 全唐诗 ·

借问离居恨深浅，只应独有庭花知。

卷 247\_8【和题藤架】

独孤及

尊尊叶成幄，璀璀花落架。花前离心苦，愁至无日夜。  
人去藤花千里强，藤花无主为谁芳。相思历乱何由尽，  
春日迢迢如线长。

卷 247\_9【江上代书寄裴使君】

独孤及

何地离念剧，江皋风雪时。艰难伤远道，老大怯前期。  
畴昔行藏计，只将力命推。能令书信数，犹足缓相思。

卷 247\_10【诣开悟禅师问心法次第寄韩郎中】

独孤及

障深闻道晚，根钝出尘难。浊劫相从惯，迷途自谓安。  
得知身垢妄，始喜额珠完。欲识真如理，君尝法味看。

· 全唐诗 ·

卷 247\_11【登后湖（一作登凌湖亭）伤春怀京师故旧】

独孤及

昨日看摇落，惊秋方怨咨。几经开口笑，复及看花时。  
世事空名束，生涯素发知。山山春草满，何处不相思。

卷 247\_12【暮春于山谷寺上方遇恩命加官赐服酬皇甫侍御见贺之作】

独孤及

天书到法堂，朽质被荣光。自笑无功德，殊恩谬激扬。  
还登建礼署，犹忝会稽章。佳句惭相及，称仁岂易当。

卷 247\_13【答李滁州题庭前石竹花见寄】

独孤及

殷疑曙霞染，巧类匣刀裁。不怕南风热，能迎小暑开。  
游蜂怜色好，思妇感年催。览赠添离恨，愁肠日几回。

卷 247\_14【得李滁州书以玉潭庄见托，因书春思，以诗代答】

· 全唐诗 ·

独孤及

春物行将老，怀君意讵堪。朱颜因酒强，白发对花惭。  
日日思琼树，书书话玉潭。知同百口累，曷日办抽簪。

卷 247\_15【答李滁州忆玉潭新居见寄】

独孤及

从来招隐地，未有剖符人。山水能成癖，巢夷拟独亲。  
猪肝无足累，马首敢辞勤。扫洒潭中月，他时望德邻。

卷 247\_16【将赴京答李纾赠别】

独孤及

胶漆常投分，荆蛮各倦游。帝乡今独往，沟水便分流。  
甘作远行客，深惭不系舟。思君带将缓，岂直日三秋。

卷 247\_17【和张大夫秋日有怀呈院中诸公】

独孤及

至公无暇日，高阁闭秋天。肘印拘王事，篱花思长年。

· 全唐诗 ·

绩成心不有，虑澹物犹牵。窃效泉鱼跃，因闻郢曲妍。

卷 247\_18【和大夫秋夜书情即事】

独孤及

上略当分阃，高情善闭关。忘机群动息，无战五兵闲。  
铃阁风传漏，书窗月满山。方知秋兴作，非惜二毛斑。

卷 247\_19【送虢州王录事之任】

独孤及

谓子文章达，当年羽翼高。一经俄白首，三命尚青袍。  
未遇须臾器，安卑莫告劳。盘根尚相值，试用发硎刀。

卷 247\_20【送长孙将军拜歙州之任】

独孤及

临难敢横行，遭时取盛名。五兵常典校，四十又专城。  
浪逐楼船破，风从虎竹生。岛夷今可料，系颈有长缨。



· 全唐诗 ·

卷 247\_21【送何员外使湖南】

独孤及

夙昔皆黄绶，差池复琐闱。上田无晚熟，逸翮果先飞。  
前路舟休系，故山云不归。王程尚未复，莫遣鲤书稀。

卷 247\_22【送江陵全少卿赴府任】

独孤及

冢司方慎选，剧县得英髦。固是攀云渐，何嗟趋府劳。  
楚山迎驿路，汉水涨秋涛。鸞翥方兹始，看君六翮高。

卷 247\_23【送虞秀才擢第归长沙】

独孤及

充赋名今遂，安亲事不违。甲科文比玉，归路锦为衣。  
海运同鸞化，风帆若鸟飞。知君到三径，松菊有光辉。

卷 247\_24【送阳翟张主簿之任】

· 全唐诗 ·

独孤及

旧闻阳翟县，西接凤高山。作吏同山隐，知君处剧闲。  
少年当效用，远道岂辞艰。迟子扬名后，方期彩服还。

卷 247\_25【送游员外赴淮西】

独孤及

多君有奇略，投笔佐元戎。已佩郎官印，兼乘御史骢。  
使星随驿骑，归路有秋风。莫道无书札，他年怀袖空。

卷 247\_26【送马郑州】

独孤及

使君朱两轡，春日整东轅。芳草成皋路，青山凉水源。  
勉修循吏迹，以谢主人恩。当使仁风动，遥听輿颂喧。

卷 247\_27【送义乌韦明府】

独孤及

妙年能致身，陈力复安亲。不惮关山远，宁辞簿领勤。

· 全唐诗 ·

过江云满路，到县海为邻。每叹违心赏，吴门正早春。

卷 247\_28【送陈王府张长史还京】

独孤及

论齿弟兄列，为邦前后差。十年方一见，此别复何嗟。  
极目故关道，伤心南浦花。少时相忆处，招手望行车。

卷 247\_29【水西馆泛舟送王员外】

独孤及

单醪敢献酢，曲沼荷经过。泛览亲鱼鸟，夤缘涉芰荷。  
剧谈增惠爱，美景借清和。明日汀洲草，依依奈别何。

卷 247\_30【李卿东池夜宴得池字】

独孤及

政成机不扰，心惬宴忘疲。去烛延高月，倾壺就小池。  
舞盘回雪动，弦奏跃鱼随。自是山公兴，谁令下士知。

· 全唐诗 ·

卷 247\_31【九月九日李苏州东楼宴】

独孤及

是菊花开日，当君乘兴秋。风前孟嘉帽，月下庾公楼。  
酒解留征客，歌能破别愁。醉归无以赠，只奉万年酬。

卷 247\_32【萧文学山池宴集】

独孤及

檀栾千亩绿，知是辟疆园。远岫当庭户，诸花覆水源。  
主人邀尽醉，林鸟助狂言。莫问愁多少，今皆付酒樽。

卷 247\_33【与韩侍御同寻李七舍人不遇，题壁留赠】

独孤及

三径何寂寂，主人山上山。亭空檐月在，水落钓矶闲。  
药院鸡犬静，酒垆苔藓斑。知君少机事，当待暮云还

卷 247\_34【喜辱韩十四郎中书兼封近诗示代书题赠】

独孤及

· 全唐诗 ·

各牵于役间游遨，独坐相思正郁陶。长跪读书心暂缓，  
短章投我曲何高。宦情缘木知非愿，王事敦人敢告劳。  
所叹在官成远别，徒言岷水才容舠。

卷 247\_35【早发龙沮馆舟中寄东海徐司仓郑司户】

独孤及

沙禽相呼曙色分，渔浦鸣榔十里闻。正当秋风渡楚水，  
况值远道伤离群。津头却望后湖岸，别处已隔东山云。  
停舠目送北归翼，惜无瑶华持寄君。

卷 247\_36【酬常郾县见赠】

独孤及

爱君修政若修身，鰥寡来归乳雉驯。堂上五弦销暇日，  
邑中千室有阳春。谓乘鳧舄朝天子，却愧猪肝累主人。  
辞后读君怀县作，定知三岁字犹新。

卷 247\_37【登山谷寺上方答皇甫侍御卧疾阙陪车骑之后】

独孤及

· 全唐诗 ·

梵宫香阁攀霞上，天柱孤峰指掌看。汉主马踪成蔓草，  
法王身相示空棺。云扶踊塔青霄庑，松荫禅庭白日寒。  
不见戴逵心莫展，赖将新赠比琅玕。

卷 247\_38 【答皇甫十六侍御北归留别作】

独孤及

正当楚客伤春地，岂是骚人道别时。俱徇空名嗟欲老，  
况将行役料前期。劳生多故应同病，羸马单车莫自悲。  
明日相望隔云水，解颜唯有袖中诗。

卷 247\_39 【答李滁州见寄】

独孤及

相逢遽叹别离牵，三见江皋蕙草鲜。白发俱生欢未再，  
沧洲独往意何坚。愁看郡内花将歇，忍过山中月屡圆。  
终日望君休汝骑，愧无堪报起予篇。

卷 247\_40 【得柳员外书封寄近诗书中兼报新主行营兵马  
因代书戏答】

独孤及

· 全唐诗 ·

郎官作掾心非好，儒服临戎政已闻。说剑尝宗漆园吏。  
戒严应笑棘门军。遥知抵掌论皇道，时复吟诗向白云。  
百越待君言即叙，相思不敢怆离群。

卷 247\_41 【同皇甫侍御斋中春望见示之作】

独孤及

望远思归心易伤，况将衰鬓偶年光。时攀芳树愁花尽，  
昼掩高斋厌日长。甘比流波辞旧浦，忍看新草遍横塘。  
因君赠我江枫咏，春思如今未易量。

卷 247\_42 【伤春赠远】

独孤及

去水流年日并驰，年光客思两相随。咨嗟斑鬓今承弁，  
惭愧新荷又发池。杨柳逶迤愁远道，鹧鸪啁哳怨南枝。  
忆君何啻同琼树，但向春风送别离。

卷 247\_43 【奉和中书常舍人晚秋集贤院即事寄赠徐薛二侍御】

独孤及

· 全唐诗 ·

汉家金马署，帝座紫微郎。图籍凌群玉，歌诗冠柏梁。  
阴阴万年树，肃肃五经堂。挥翰忘朝食，研精待夕阳。  
晴空露盘迥，秋月琐窗凉。远兴生斑鬓，高情寄缥囊。  
葳蕤双鸞鷟，夙昔并翱翔。汲冢同刊谬，蓬山共补亡。  
差池摧羽翮，流落限江湘。禁省一分袂，昊天三雨霜。  
石渠遗迹满，水国暮云长。早晚朝宣室，归时道路光。

卷 247\_44【江宁酬郑县刘少府兄赠别作】

独孤及

往年脱缝掖，接武仕关西。结绶腰章并，趋阶手板齐。  
仙山不用买，朋酒日相携。抵掌夸潭壑，忘情向组珪。  
事迁时既往，年长迹逾睽。何为青云器，犹嗟浊水泥。  
役牵方远别，道在或先迷。莫见良田晚，遭时亦杖藜。

卷 247\_45【送李宾客荆南迎亲】

独孤及

宗室刘中垒，文场谢客儿。当为天北斗，曾使海西陲。  
毛节精诚著，铜楼羽翼施。还申供帐别，言赴倚门期。  
恩渥沾行李，晨昏在路岐。君亲两报遂，不敢议伤离。



· 全唐诗 ·

卷 247\_46 【题玉潭】

独孤及

碧玉徒强名，冰壶难比德。唯当寂照心，可并瀛沦色。

卷 247\_47 【海上怀华中旧游，寄郑县刘少府造、渭南王少府崱】

独孤及

凉风台上三峰月，不夜城边万里沙。  
离别莫言关塞远，梦魂长在子真家。

卷 247\_48 【和虞部韦郎中寻杨驸马不遇】

独孤及

金屋琼台萧史家，暮春三月渭州花。  
到君仙洞不相见，谓已吹箫乘早霞。

卷 247\_49 【李张皇甫阎权等数公并有送别之作见寄因答】

· 全唐诗 ·

独孤及

洞庭正波蘋叶衰，岂是秦吴远别时。  
谢君篋中绮端赠，何以报之长相思。

卷 247\_50【将还越留别豫章诸公】

独孤及

客鸟倦飞思旧林，裴徊犹恋众花阴。  
他时相忆双航苇，莫问吴江深不深。

卷 247\_51【送别荆南张判官】

独孤及

轺车骆马往从谁，梦浦兰台日更迟。  
欲识桃花最多处，前程问取武陵儿。

卷 247\_52【陪王员外北楼宴待月】

独孤及

劝酒论心夜不疲，含情有待问谁思。

· 全唐诗 ·

伫看晴月澄澄影，来照江楼酩酊时。

卷 247\_53【垂花坞醉后戏题（赋得俱字韵）】

独孤及

紫蔓青条拂酒壶，落花时与竹风俱。  
归时自负花前醉，笑向鲈鱼问乐无。

· 全唐诗 ·

## 第二百四十八卷

### 卷 248\_1 【题刘相公三湘图】

郎士元

昔别醉衡霍，迩来忆南州。今朝平津邸，兼得潇湘游。  
稍辨郢门树，依然芳杜洲。微明三巴峡，咫尺万里流。  
飞鸟不知倦，远帆生暮愁。涔阳指天末，北渚空悠悠。  
枕上见渔父，坐中常狎鸥。谁言魏阙下，自有东山幽。

### 卷 248\_2 【长安逢故人】

郎士元

数年音信断，不意在长安。马上相逢久，人中欲认难。  
一官今懒道，双鬓竟羞看。莫问生涯事，只应持钓竿。

### 卷 248\_3 【送韦湛判官】

郎士元

· 全唐诗 ·

高阁晴江上，重阳古戍间。聊因送归客，更此望乡山。  
惜别心能醉，经秋鬓自斑。临流兴不尽，惆怅水云间。

卷 248\_4【送长沙韦明府】

郎士元

秋入长沙县，萧条旅宦心。烟波连桂水，官舍映枫林。  
云日楚天暮，沙汀白露深。遥知讼堂里，佳政在鸣琴。

卷 248\_5【送孙愿】

郎士元

悠然富春客，忆与暮潮归。擢第人多羨，如君独步稀。  
乱流江渡浅，远色海山微。若访新安路，严陵有钓矶。

卷 248\_6【送林宗配雷州（一作送王梦流雷州）】

郎士元

昨日三峰尉，今朝万里人。平生任孤直，岂是不防身。  
海雾多为瘴，山雷乍作邻。遥怜北户月，与子独相亲。

· 全唐诗 ·

卷 248\_7【送洪州李别驾之任】

郎士元

南去秋江远，孤舟兴自多。能将流水引，更入洞庭波。  
夏口帆初上，浔阳雁正过。知音在霄汉，佐郡岂蹉跎。

卷 248\_8【送杨中丞和蕃】

郎士元

锦车登陇日，边草正萋萋。旧好寻君长，新愁听鼓鼙。  
河源飞鸟外，雪岭大荒西。汉垒今犹在，遥知路不迷。

卷 248\_9【送李将军赴定州（一作送彭将军）】

郎士元

双旌汉飞将，万里授横戈。春色临边尽，黄云出塞多。  
鼓鼙悲绝漠，烽戍隔长河。莫断阴山路，天骄已请和。

卷 248\_10【关羽祠送高员外还荆州】

· 全唐诗 ·

郎士元

将军禀天姿，义勇冠今昔。走马百战场，一剑万人敌。  
虽为感恩者，竟是思归客。流落荆巫间，裴回故乡隔。  
离筵对祠宇，洒洒暮天碧。去去勿复言，衔悲向陈迹。

卷 248\_11【送张南史（一作寄李纾）】

郎士元

雨馀深巷静，独酌送残春。车马虽嫌僻，莺花不弃贫。  
虫丝粘户网，鼠迹印床尘。借问山阳会，如今有几人。

卷 248\_12【送奚贾归吴】

郎士元

东南富春渚，曾是谢公游。今日奚生去，新安江正秋。  
水清迎过客，霜叶落行舟。遥想赤亭下，闻猿应夜愁。

卷 248\_13【送陆员外赴潮州】

郎士元

· 全唐诗 ·

含香台上客，剖竹海边州。楚地多归信，闽溪足乱流。  
今朝永嘉兴，重见谢公游。

卷 248\_14【送裴补阙入河南幕】

郎士元

皎然青琐客，何事动行轩。苦节酬知己，清吟去掖垣。  
秋城临海树，寒月上营门。邹鲁诗书国，应无鞞鼓喧。

卷 248\_15【送韩司直路出延陵（一作刘长卿诗）】

郎士元

游吴还适越，来往任风波。复送王孙去，其如春草何。  
岸明残雪在，潮满夕阳多。季子留遗庙，停舟试一过。

卷 248\_16【盩厔县郑殓宅送钱大（一作送别钱起，又作送友人别）】

郎士元

暮蝉不可听，落叶岂堪闻。共是悲秋客，那知此路分。  
荒城背流水，远雁入寒云。陶令门前菊，馀花可赠君。



· 全唐诗 ·

卷 248\_17【送元诜还丹阳别业】

郎士元

已知成傲吏，复见解朝衣。应向丹阳郭，秋山独掩扉。  
草堂连古寺，江日动晴晖。一别沧洲远，兰桡几岁归。

卷 248\_18【送崔侍御往容州宣慰】

郎士元

秦原独立望湘川，击隼南飞向楚天。奉诏不言空问俗，  
清时因得访遗贤。荆门晓色兼梅雨，桂水春风过客船。  
畴昔常闻陆贾说，故人今日岂徒然。

卷 248\_19【朱方南郭留别皇甫冉（一作皇甫冉诗：润州南郭留别）】

郎士元

萦回枫叶岸，留滞木兰桡。吴岫新经雨，江天正落潮。  
故人劳见爱，行客自无繆。若问前程事，孤云入剡遥。

· 全唐诗 ·

卷 248\_20 【赠张五諲归濠州别业】

郎士元

常知罢官意，果与世人疏。复此凉风起，仍闻濠上居。  
故山期采菊，秋水忆观鱼。一去蓬蒿径，羡君闲有馀。

卷 248\_21 【送王司马赴润州】

郎士元

暂屈文为吏，聊将禄代耕。金陵且不远，山水复多名。  
楚塞因高出，寒潮入夜生。离心逐春草，直到建康城。

卷 248\_22 【留卢秦卿（一作司空曙诗）】

郎士元

知有前期在，欢如此夜中。无将故人酒，不及古淳风。

卷 248\_23 【赠强山人】

郎士元

· 全唐诗 ·

或掉轻舟或杖藜，寻常适意钓前溪。  
草堂竹径在何处，落日孤烟寒渚西。

卷 248\_24 【赠韦司直】

郎士元

闻君感叹二毛初，旧友相依万里馀。烽火有时惊暂定，  
甲兵无处可安居。客来吴地星霜久，家在平陵音信疏。  
昨日风光还入户，登山临水意何如。

卷 248\_25 【石城馆酬王将军】

郎士元

谁能绣衣客，肯驻木兰舟。连雁沙边至，孤城江上秋。  
归帆背南浦，楚塞入西楼。何处看离思，沧波日夜流。

卷 248\_26 【酬王季友题半日村别业兼呈李明府】

郎士元

村映寒原日已斜，烟生密竹早归鸦。长溪南路当群岫，  
半景东邻照数家。门通小径连芳草，马饮春泉踏浅沙。

· 全唐诗 ·

欲待主人林上月，还思潘岳县中花。

卷 248\_27 【酬二十八秀才见寄】

郎士元

昨夜山月好，故人果相思。清光到枕上，袅袅凉风时。  
永意能在我，惜无携手期。

卷 248\_28 【冬夕寄青龙寺源公】

郎士元

敛屦入寒竹，安禅过漏声。高松残子落，深井冻痕生。  
罢磬风枝动，悬灯雪屋明。何当招我宿，乘月上方行。

卷 248\_29 【塞下曲】

郎士元

宝刀塞下儿，身经百战曾百胜，壮心竟未嫖姚知。  
白草山头日初没，黄沙戍下悲歌发。萧条夜静边风吹，  
独倚营门望秋月。

· 全唐诗 ·

卷 248\_30【柏林寺南望】

郎士元

溪上遥闻精舍钟，泊舟微径度深松。  
青山霁后云犹在，画出东南四五峰。

卷 248\_31【宿杜判官江楼】

郎士元

适楚岂吾愿，思归秋向深。故人江楼月，永夜千里心。  
叶落觉乡梦，鸟啼惊越吟。寥寥更何有，断续空城砧。

卷 248\_32【春宴王补阙城东别业】

郎士元

柳陌乍随州势转，花源忽傍竹阴开。能将瀑水清人境，  
直取流莺送酒杯。山下古松当绮席，檐前片雨滴春苔。  
地主同声复同舍，留欢不畏夕阳催。

卷 248\_33【郢城西楼吟（一作张继诗）】

· 全唐诗 ·

郎士元

连山尽处水萦回，山上戍门临水开。朱栏直下一百丈，  
日暖游鳞自相向。昔人爱险闭层城，今日爱闲江复清。  
沙洲枫岸无来客，草绿花红山鸟鸣。

卷 248\_34【听邻家吹笙】

郎士元

凤吹声如隔彩霞，不知墙外是谁家。  
重门深锁无寻处，疑有碧桃千树花。

卷 248\_35【登丹阳北楼（一作张继诗）】

郎士元

寒皋那可望，旅望又初还。迢递高楼上，萧条旷野闲。  
暮晴依远水，秋兴属连山。浮客时相见，霜凋动翠颜。

卷 248\_36【题精舍寺（一作酬王季友秋夜宿露台寺见寄）】

郎士元

· 全唐诗 ·

石林精舍武溪东，夜扣禅关谒远公。月在上方诸品静，  
僧持半偈万缘空。秋山竟日闻猿啸，落木寒泉听不穷。  
惟有双峰最高顶，此心期与故人同。

卷 248\_37【双林寺谒傅大士】

郎士元

草露经前代，津梁及后人。此方今示灭，何国更分身。  
月色空知夜，松阴不记春。犹怜下生日，应在一微尘。

卷 248\_38【题尹真人祠】

郎士元

窅窅云旗去不还，阴阴祠宇闭空山。  
我来始悟丹青妙，稽首如逢冰雪颜。

卷 248\_39【山中即事】

郎士元

入谷多春兴，乘舟棹碧浔。山云昨夜雨，溪水晓来深。

· 全唐诗 ·

卷 248\_40 【湘夫人二首（乐府诗作一首）】

郎士元

蛾眉对湘水，遥哭苍梧山。万乘既已歿，孤舟谁忍还。  
至今楚竹上，犹有泪痕斑。

南有沔阳路，渺渺多新愁。桂酒神降时，回风江上秋。  
彩云忽无处，碧水空安流。

卷 248\_41 【盖少府新除江南尉问风俗】

郎士元

闻君作尉向江潭，吴越风烟到自谙。客路寻常随竹影，  
人家大底傍山岚。缘溪花木偏宜远，避地衣冠尽向南。  
惟有夜猿啼海树，思乡望国意难堪。

卷 248\_42 【春宴张舍人宅】

郎士元

懒寻芳草径，来接侍臣筵。山色知残雨，墙阴觉暮天。  
莺啼汉宫柳，花隔杜陵烟。地与东城接，春光醉目前。



· 全唐诗 ·

卷 248\_43【寄李袁州桑落酒】

郎士元

色比琼浆犹嫩，香同甘露仍春。  
十千提携一斗，远送潇湘故人。

卷 248\_44【赠万生下第还吴】

郎士元

直道多不偶，美才应息机。灞陵春欲暮，云海独言归。  
为客成白首，入门嗟布衣。莼羹若可忆，惭出掩柴扉。

卷 248\_45【送大德讲时河东徐明府招】

郎士元

远近作人天，王城指日边。宰君迎说法，童子伴随缘。  
到处花为雨，行时杖出泉。今宵松月下，开阁想安禅。

卷 248\_46【赴无锡别灵一上人（一作刘长卿诗，一作皇甫冉诗）】

· 全唐诗 ·

郎士元

高僧本姓竺，开士旧名林。一入春山里，千峰不可寻。  
新年芳草遍，度日白云深。欲问微官去，悬知讶此心。

卷 248\_47【送粲上人兼寄梁镇员外】

郎士元

季月还乡独未能，林行溪宿厌层冰。尺素欲传三署客，  
雪山愁送五天僧。连空朔气横秦苑。满目寒云隔灞陵。  
借问从来香积寺，何时携手更同登。

卷 248\_48【送韦逸人归钟山（一作皇甫冉诗）】

郎士元

逸人归路远，弟子出山迎。服药颜犹驻，耽书癖已成。  
柴扉多岁月，藜杖见公卿。更作儒林传，应须载姓名。

卷 248\_49【登无锡北楼（一作皇甫冉诗）】

郎士元

· 全唐诗 ·

秋兴因危堞，归心过远山。风霜征雁早，江海旅人还。  
驿树寒仍密，渔舟晚更闲。仲宣何所赋，只欲滞柴关。

卷 248\_50 【和王相公题中书丛竹寄上元相公】

郎士元

多时仙掖里，色并翠琅玕。幽意含烟月，清阴庇蕙兰。  
枝繁宜露重，叶老爱天寒。竟日双鸾止，孤吟为一看。

卷 248\_51 【酬萧二十七侍御初秋言怀】

郎士元

楚客秋多兴，江林月渐生。细枝凉叶动，极浦早鸿声。  
胜赏睽前夕，新诗报远情。曲高惭和者，惆怅闭寒城。

卷 248\_52 【奉和杜相公益昌路作】

郎士元

春半梁山正落花，台衡受律向天涯。南去猿声傍双节，  
西来江色绕千家。风吹画角孤城晓，林映蛾眉片月斜。  
已见庙谟能喻蜀，新文更喜报金华。

· 全唐诗 ·

卷 248\_53【赋得长洲苑送李惠】

郎士元

草深那可访，地久阻相传。散漫三秋雨，疏芜万里烟。  
都迷采兰处，强记馆娃年。客有游吴者，临风思眇然。

卷 248\_54【别房士清】

郎士元

世路还相见，偏堪泪满衣。那能郢门别，独向邳城归。  
平楚看蓬转，连山望鸟飞。苍苍岁阴暮，况复惜驰晖。

卷 248\_55【送彭偃房由赴朝因寄钱大郎中李十七舍人】

郎士元

衰病已经年，西峰望楚天。风光欺鬓发，秋色换山川。  
寂寞浮云外，支离汉水边。平生故人远，君去话潸然。

卷 248\_56【送李遂之越】

· 全唐诗 ·

郎士元

未习风波事，初为东越游。露沾湖草晚，月照海山秋。  
梅市门何处，兰亭水向流。西兴待潮信，落日满孤舟。

卷 248\_57【送郑正则徐州行营（一作皇甫冉诗）】

郎士元

从军非陇头，师在古徐州。气劲三河卒，功全万户侯。  
元戎阃外略，才子握中筹。莫听关山曲，还生塞上愁。

卷 248\_58【送钱拾遗归兼寄刘校书】

郎士元

墟落岁阴暮，桑榆烟景昏。蝉声静空馆，雨色隔秋原。  
归客不可望，悠然林外村。终当报芸阁，携手醉柴门。

卷 248\_59【送郴县裴明府之任兼充宣慰】

郎士元

白蘋楚水三湘远，芳草秦城二月初。连雁北飞看欲尽，

· 全唐诗 ·

孤舟南去意何如。渡江野老思求瘼，候馆郴人忆下车。  
别后天涯何所寄，故交惟有袖中书。

卷 248\_60 【送李敖湖南书记】

郎士元

怜君才与阮家同，掌记能资亚相雄。入楚岂忘看汨竹，  
泊舟应自爱江枫。诚知客梦烟波里，肯厌猿鸣夜雨中。  
莫信衡湘书不到，年年秋雁过巴东。

卷 248\_61 【送魏司直】

郎士元

曙雪苍苍兼曙云，朔风烟雁不堪闻。  
贫交此别无他赠，唯有青山远送君。

卷 248\_62 【送别】

郎士元

穆陵关上秋云起，安陆城边远行子。  
薄暮寒蝉三两声，回头故乡千万里。

· 全唐诗 ·

卷 248\_63【咸阳西楼别窦审】

郎士元

西楼迥起寒原上，霁日遥分万井间。小苑城隅连渭水，  
离宫曙色近京关。亭皋寂寞伤孤客，云雪萧条满众山。  
时命如今犹未偶，辞君拟欲拂衣还。

卷 248\_64【闻蝉寄友人（一作李端诗）】

郎士元

昨日始闻莺，今朝蝉又鸣。朱颜向华发，定是几年程。  
故国白云远，闲居青草生。因垂数行泪，书寄十年兄。

卷 248\_65【送李骑曹之灵武宁侍】

郎士元

一岁一归宁，凉天数骑行。河来当塞曲，山远与沙平。  
纵猎旗风卷，听笳帐月生。新鸿引寒色，回日满京城。

卷 248\_66【冯翊西楼（一作张继诗）】

· 全唐诗 ·

郎士元

城上西楼倚暮天，楼中归望正凄然。近郭乱山横古渡，  
野庄乔木带新烟。北风吹雁声能苦，远客辞家月再圆。  
陶令好文常对酒，相招一和白云篇。

卷 248\_67【郢城秋望】

郎士元

白首思归归不得，空山闻雁雁声哀。  
高城落日望西北，又见秋风逐水来。

卷 248\_68【夜泊湘江】

郎士元

湘山木落洞庭波，湘水连云秋雁多。  
寂寞舟中谁借问，月明只自听渔歌。

卷 248\_69【留别常著】

郎士元



· 全唐诗 ·

岁晏苍郊蓬转时，游人相见说归期。  
宓君堂上能留客，明日还家应未迟。

卷 248\_70【送张光归吴】

郎士元

看取庭芜白露新，劝君不用久风尘。  
秋来多见长安客，解爱鲈鱼能几人。

卷 248\_71【闻吹杨叶者二首】

郎士元

妙吹杨叶动悲笳，胡马迎风起恨赊。  
若是雁门寒月夜，此时应卷尽惊沙。

天生一艺更无伦，寥亮幽音妙入神。  
吹向别离攀折处，当应合有断肠人。

· 全唐诗 ·

## 第二百四十九卷

卷 249\_1 【润州南郭留别（一作郎士元诗）】

皇甫冉

萦回枫叶岸，留滞木兰桡。吴岫新经雨，江天正落潮。  
故人劳见爱，行客自无聊。君问前程事，孤云入剡遥。

卷 249\_2 【祭张公洞二首（一本作排律一首）】

皇甫冉

尧心知稼穡，精意绕山川。风雨神祇应，笙镛诏命传。  
沐兰祇扫地，酌桂伫灵仙。拂雾陈金策，焚香拜玉筵。

云开小有洞，日出大罗天。三鸟随王母，双童翊子先。  
何时种桃核，几度看桑田。倏忽烟霞散，空岩骑吏旋。

卷 249\_3 【临平道赠同舟人】

· 全唐诗 ·

皇甫冉

远山谁辨江南北，长路空随树浅深。  
流荡飘飘此何极，唯应行客共知心。

卷 249\_4 【巫山峡】

皇甫冉

巫峡见巴东，迢迢出半空。云藏神女馆，雨到楚王宫。  
朝暮泉声落，寒暄树色同。清猿不可听，偏在九秋中。

卷 249\_5 【长安路（一作韩翃诗）】

皇甫冉

长安九城路，戚里五侯家。结束趋平乐，联翩抵狭斜。  
高楼临远水，复道出繁花。唯见相如宅，蓬门度岁华。

卷 249\_6 【送朱逸人】

皇甫冉

时人多不见，出入五湖间。寄酒全吾道，移家爱远山。

· 全唐诗 ·

更看秋草暮，欲共白云还。虽在风尘里，陶潜身自闲。

卷 249\_7【西陵寄灵一上人】

皇甫冉

西陵遇风处，自古是通津。终日空江上，云山若待人。  
汀洲寒事早，鱼鸟兴情新。回望山阴路，心中有所亲。

卷 249\_8【赴无锡寄别灵一净虚二上人云门所居（刘长卿、  
郎士元）】

皇甫冉

高僧本姓竺，开士旧名林。一入春山里，千峰不可寻。  
新年芳草遍，终日白云深。欲徇微官去，悬知讶此心。

卷 249\_9【舟中送李八（得回字）】

皇甫冉

词客金门未有媒，游吴适越任舟回。  
远水迢迢分手去，天边山色待人来。

· 全唐诗 ·

卷 249\_10 【与张补阙、王炼师自徐方清路同舟南下于台寺，留别赵员外裴补阙，同赋杂题一首】

皇甫冉

朝朝春事晚，泛泛行舟远。淮海思无穷，悠扬烟景中。  
幸将仙子去，复与故人同。高枕随流水，轻帆任远风。  
钟声野寺迥，草色故城空。送别高台上，裴回共惆怅。  
悬知白日斜，定是犹相望。

卷 249\_11 【酬张二仲彝】

皇甫冉

吴洲见芳草，楚客动归心。屈宋乡山古，荆衡烟雨深。  
艰难十载别，羁旅四愁侵。澧月通沅水，湘云入桂林。  
已看生白发，当为乏黄金。江海时相见，唯闻梁甫吟。

卷 249\_12 【三月三日义兴李明府后亭泛舟（一作刘长卿诗）】

皇甫冉

江南烟景复如何，闻道新亭更可过。处处艺兰春浦绿，  
萋萋藉草远山多。壶觞须就陶彭泽，时俗犹传晋永和。

· 全唐诗 ·

更使轻桡徐转去，微风落日水增波。

卷 249\_13【少室山韦炼师升仙歌】

皇甫冉

红霞紫气昼氤氲，绛节青幢迎少君。  
忽从林下升天去，空使时人礼白云。

卷 249\_14【独孤中丞筵陪饯韦君赴升州】

皇甫冉

中司龙节贵，上客虎符新。地控吴襟带，才高汉缙绅。  
泛舟应度腊，入境便行春。处处歌来暮，长江建业人。

卷 249\_15【送王绪剡中（一作送王公还剡中别业）】

皇甫冉

不见关山去，何时到剡中。已闻成竹木，更道长儿童。  
篱落云常聚，村墟水自通。朝朝忆玄度，非是对清风。

· 全唐诗 ·

卷 249\_16 【酬李郎中侍御秋夜登福州城楼见寄】

皇甫冉

辛勤万里道，萧索九秋残。月照闽中夜，天凝海上寒。  
王程无地远，主意在人安。遥寄登楼作，空知行路难。

卷 249\_17 【同李司直诸公暑夜南馀馆】

皇甫冉

何处多明月，津亭暑夜深。烟霞不可望，云树更沉沉。  
好是吴中隐，仍为洛下吟。微官朝复夕，牵强亦何心。

卷 249\_18 【赠普门上人（一作题普门上人房，一作刘长卿诗）】

皇甫冉

支公身欲老，长在沃州多。慧力堪传教，禅功久伏魔。  
山云随坐夏，江草伴头陀。借问回心后，贤愚去几何。

卷 249\_19 【与诸公同登无锡北楼（一作郎士元诗）】

· 全唐诗 ·

皇甫冉

秋兴因危堞，归心过远山。风霜征雁早，江海旅人闲。  
驿树寒仍密，渔舟晚自还。仲宣何所赋，只叹在荆蛮。

卷 249\_20 【同李苏州伤美人】

皇甫冉

玉佩石榴裙，当年嫁使君。专房犹见宠，倾国众皆闻。  
歌舞常无对，幽明忽此分。阳台千万里，何处作朝云。

卷 249\_21 【送李录事（一作裴员外）赴饶州】

皇甫冉

北人南去雪纷纷，雁叫汀沙不可闻。积水长天随远客，  
荒城极浦足寒云。山从建业千峰出，江至浔阳九派分。  
借问督邮才弱冠，府中年少不如君。

卷 249\_22 【同诸公有怀绝句】

皇甫冉



· 全唐诗 ·

旧国迷江树，他乡近海门。移家南渡久，童稚解方言。

卷 249\_23 【题魏仲光淮山所居】

皇甫冉

人群不相见，乃在白云间。问我将何适，羡君今独闲。  
朝朝汲淮水，暮暮上龟山。幸已安贫定，当从鬓发斑。

卷 249\_24 【送郑判官赴徐州（一作郎士元诗）】

皇甫冉

从军非陇头，师在古徐州。气劲三河卒，功多万里侯。  
元戎阃外令，才子幄中筹。莫听关山曲，还生出塞愁。

卷 249\_25 【送顾苓（一作中史，又作长史）往新安（一作刘长卿诗）】

皇甫冉

由来山水客，复道向新安。半是乘潮便，全非行路难。  
晨装林月在，野饭浦沙寒。严子千年后，何人钓旧滩。

· 全唐诗 ·

卷 249\_26 【秋夜有怀高三十五兼呈空和尚（一作刘长卿诗）】

皇甫冉

晚节闻君趋道深，结茅栽树近东林。大师几度曾摩顶，  
高士何年遂发心。北渚三更闻过雁，西城万里动寒砧。  
不见支公与玄度，相思拥膝坐长吟。

卷 249\_27 【途中送权三兄弟（一作送权骅）】

皇甫冉

淮海风涛起，江关忧思长。同悲鹊绕树，独作雁随阳。  
山晚云初雪，汀寒月照霜。由来濯缨处，渔父爱沧浪。

卷 249\_28 【送裴阐（得归字）】

皇甫冉

道向毗陵岂是归，客中谁与换春衣。  
今夜孤舟行近远，子荆零雨正霏霏。

卷 249\_29 【杂言湖山歌送许鸣谦】

· 全唐诗 ·

皇甫冉

湖中之山兮波上青，桂飒飒兮雨冥冥。君归兮春早，  
满山兮碧草。晨春暮汲兮心何求，涧户岩扉兮身自老。  
东岭西峰兮同白云，鸡鸣犬吠兮时相闻。  
幽芳媚景兮当嘉月，践石扪萝兮恣超忽。  
空山寂寂兮颍阳人，旦夕孤云随一身。

卷 249\_30【杂言迎神词二首·迎神】

皇甫冉

启庭户，列芳鲜；目眇眇，心绵绵，因风托雨降琼筵。  
纷下拜，屡加笾，人心望岁祈丰年。

卷 249\_31【杂言迎神词二首·送神】

皇甫冉

露沾衣，月隐壁；气凄凄，人寂寂，风回雨度虚瑶席。  
来无声，去无迹，神心降和福远客。

卷 249\_32【屏风上各赋一物得携琴客】

· 全唐诗 ·

皇甫冉

不是向空林，应当就磐石。白云知隐处，芳草迷行迹。  
如何祇役心，见尔携琴客。

卷 249\_33【江草歌送卢判官】

皇甫冉

江皋兮春早，江上兮芳草。杂蘼芜兮杜蘅，  
作丛秀兮欲罗生。被遥隰兮经长衍，雨中深兮烟中浅。  
目眇眇兮增愁，步迟迟兮堪攀。澧之浦兮湘之滨，  
思夫君兮送美人。吴洲曲兮楚乡路，远孤城兮依独戍。  
新月能分裊露时，夕阳照见连天处。问君行迈将何之，  
淹泊沿洄风日迟。处处汀洲有芳草，王孙讵肯念归期。

卷 249\_34【题画帐二首·山水】

皇甫冉

桂水饶枫杉，荆南足烟雨。犹疑黛色中，复是雒阳岨。

卷 249\_35【题画帐二首·远帆】

· 全唐诗 ·

皇甫冉

朝见巴江客，暮见巴江客。云帆恍暂停，中路阳台夕。

卷 249\_36【落第后东游留别】

皇甫冉

功成方自得，何事学干求。果以浮名误，深贻达士羞。  
九江连涨海，万里任虚舟。岁晚同怀客，相思波上鸥。

卷 249\_37【杂言月洲歌送赵冽还襄阳】

皇甫冉

汉之广矣中有洲，洲如月兮水环流。流聒聒兮湍与濑，  
草青青兮春更秋。苦竹林，香枫树，樵子罾师几家住。  
万山飞雨一川来，巴客归船傍洲去。归人不可迟，  
芳杜满洲时。无限风烟皆自悲，莫辞贫贱阻心期。  
家住洲头定近远，朝泛轻桡暮当返。不能随尔卧芳洲，  
自念天机一何浅。

卷 249\_38【寄刘八山中】

· 全唐诗 ·

皇甫冉

东皋若近远，苦雨隔还期。闰岁风霜晚，山田收获迟。  
茅檐燕去后，樵路菊黄时。平子游都久，知君坐见嗤。

卷 249\_39 【答张諲、刘方平兼呈贺兰广】

皇甫冉

野性难驯狎，荒郊自闭门。心闲同海鸟，日夕恋山村。  
屡枉琼瑶赠，如今道术存。远峰时振策，春雨耐香源。  
复有故人在，宁闻卢鹊喧。青青草色绿，终是待王孙。

卷 249\_40 【泮水送郑丰鄆县读书】

皇甫冉

麦秋中夏凉风起，送君西郊及泮水。孤烟远树动离心，  
隔岸江流若千里。早年江海谢浮名，此路云山惬尔情。  
上古全经皆在口，秦人如见济南生。

卷 249\_41 【九日寄郑丰】

皇甫冉

· 全唐诗 ·

重阳秋已晚，千里信仍稀。何处登高望，知君正忆归。  
还当采时菊，定未授寒衣。欲识离居恨，郊园正掩扉。

卷 249\_42【酬包评事壁画山水见寄】

皇甫冉

一官知所傲，本意在云泉。濡翰生新兴，群峰忽眼前。  
黛中分远近，笔下起风烟。岩翠深樵路，湖光出钓船。  
寒侵赤城顶，日照武陵川。若览名山志，仍闻招隐篇。  
遂令江海客，惆怅忆闲田。

卷 249\_43【渡汝水向太和山】

皇甫冉

落日事蹉跎，西南投一峰。诚知秋水浅，但怯无人踪。

卷 249\_44【秋怨】

皇甫冉

长信多秋气，昭阳借月华。那堪闭永巷，闻道选良家。

· 全唐诗 ·

卷 249\_45 【赠郑山人】

皇甫冉

白首沧洲客，陶然得此生。庞公采药去，莱氏与妻行。  
乍见还州里，全非隐姓名。枉帆临海峤，貰酒秣陵城。  
伐木吴山晓，持竿越水清。家人恣贫贱，物外任衰荣。  
忽尔辞林壑，高歌至上京。避喧心已惯，念远梦频成。  
石路寒花发，江田腊雪明。玄纁倘有命，何以遂躬耕。

卷 249\_46 【刘方平西斋对雪】

皇甫冉

对酒闲斋晚，开轩腊雪时。花飘疑节候，色净润帘帷。  
委树寒枝弱，萦空去雁迟。自然堪访戴，无复四愁诗。

卷 249\_47 【福先寺寻湛然寺主不见】

皇甫冉

寂然空伫立，往往报疏钟。高馆谁留客，东南二室峰。  
川原通霁色，田野变春容。惆怅层城暮，犹言归路逢。



· 全唐诗 ·

卷 249\_48【河南郑少尹城南亭送郑判官还河东】

皇甫冉

使臣怀饯席，亚尹有前溪。客是仙舟里，途从御苑西。  
泉声喧暗竹，草色引长堤。故绛青山在，新田绿树齐。  
天秋闻别鹄，关晓待鸣鸡。应叹沈冥者，年年津路迷。

卷 249\_49【登玄元庙】

皇甫冉

古庙川原迥，重门禁籞连。海童纷翠盖，羽客事琼筵。  
御路分疏柳，离宫出苑田。兴新无向背，望久辨山川。  
物外将遗老，区中誓绝缘。函关若远近，紫气独依然。

卷 249\_50【冬夜集赋得寒漏】

皇甫冉

清冬洛阳客，寒漏建章台。出禁因风彻，萦窗共月来。  
偏将残漏杂，乍与远鸿哀。遥夜重城警，流年滴水催。  
闲斋堪坐听，况有故人杯。

· 全唐诗 ·

卷 249\_51 【玄元观送李源李风还奉先华阴】

皇甫冉

此去那知道路遥，寒原紫府上迢迢。莫辞别酒和琼液，  
乍唱离歌和凤箫。远水东流浮落景，缭垣西转失行镳。  
华山秦塞长相忆，无使音尘顿寂寥。

卷 249\_52 【刘方平壁画山】

皇甫冉

墨妙无前，性生笔先。回溪已失，远嶂犹连。  
侧径樵客，长林野烟。青峰之外，何处云天。

卷 249\_53 【登山歌】

皇甫冉

青山前，青山后，登高望两处，两处今何有。  
烟景满川原，离人堪白首。

卷 249\_54 【和郑少尹祭中岳寺北访萧居士越上方】

· 全唐诗 ·

皇甫冉

肃寺祠灵境，寻真到隐居。夤缘幽谷远，萧散白云馀。  
晚节持僧律，他年著道书。海边曾狎鸟，濠上正观鱼。  
寂静求无相，淳和睹太初。一峰绵岁月，万性任盈虚。  
篱隔溪钟度，窗临涧木疏。谢公怀旧壑，回驾复何如。

卷 249\_55【秋夜寄所思】

皇甫冉

寂寞坐遥夜，清风何处来。天高散骑省，月冷建章台。  
邻笛哀声急，城砧朔气催。芙蓉已委绝，谁复可为媒。

卷 249\_56【赋得郢路悲猿】

皇甫冉

悲猿何处发，郢路第三声。远客知秋暮，空山益夜清。  
啾啾深众木，噉噉入孤城。坐觉盈心耳，翛然适楚情。

卷 249\_57【杂言无锡惠山寺流泉歌】

皇甫冉

· 全唐诗 ·

寺有泉兮泉在山，锵金鸣玉兮长潺潺。作潭镜兮澄寺内，  
泛岩花兮到人间。土膏脉动知春早，隈隩阴深长苔草。  
处处萦回石磴喧，朝朝盥漱山僧老。僧自老，松自新。  
流活活，无冬春。任疏凿兮与汲引，若有意兮山中人。  
偏依佛界通仙境，明灭玲珑媚林岭。宛如太室临九潭，  
讵减天台望三井。我来结绶未经秋，已厌微官忆旧游。  
且复迟回犹未去，此心只为灵泉留。

卷 249\_58【清明日青龙寺上方赋得多字】

皇甫冉

上方偏可适，季月况堪过。远近水声至，东西山色多。  
夕阳留径草，新叶变庭柯。已度清明节，春秋如客何。

卷 249\_59【与张諲宿刘八城东庄】

皇甫冉

人闲当岁暮，田野尚逢迎。莱子多嘉庆，陶公得此生。  
寒芜连古渡，云树近严城。鸡黍无辞薄，贫交但贵情。

卷 249\_60【寄刘方平】

· 全唐诗 ·

皇甫冉

坐忆山中人，穷栖事南亩。烟霞相亲外，墟落今何有。  
潘郎作赋年，陶令辞官后。达生遗自适，良愿固无负。  
田取颍水流，树入阳城口。岁暮忧思盈，离居不堪久。

卷 249\_61【曾东游以诗寄之】

皇甫冉

出郭离言多，回车始知远。寂然层城暮，更念前山转。  
总辔越成皋，浮舟背梁苑。朝朝劳延首，往往若在眼。  
落日孤云还，边愁迷楚关。如何淑花发，复对游子颜。  
古寺杉栝里，连樯洲渚间。烟生海西岸，云见吴南山。  
惊风扫芦荻，翻浪连天白。正是扬帆时，偏逢江上客。  
由来许佳句，况乃惬所适。嵯峨天姥峰，翠色春更碧。  
气凄湖上雨，月净剡中夕。钓艇或相逢，江蓠又堪摘。  
迢迢始宁墅，芜没谢公宅。朱槿列摧墉，苍苔遍幽石。  
顾予任疏懒，期尔振羽翮。沧洲未可行，须售金门策。

卷 249\_62【适荆州途次南阳赠何明府】

皇甫冉

千里独游日，有怀谁与同。言过细阳令，一遇朗陵公。

· 全唐诗 ·

清节迈多士，斯文传古风。闾阎知俗变，原野识年丰。  
吾道方在此，前程殊未穷。江天经岷北，客思满巴东。  
梦渚夕愁远，山丘晴望通。应嗟出处异，流荡楚云中。

卷 249\_63【秋夜戏题刘方平壁】

皇甫冉

鸿悲月白时将谢，正可招寻惜遥夜。  
翠帐兰房曲且深，宁知户外清霜下。

卷 249\_64【问正上人疾】

皇甫冉

医王犹有疾，妙理竞难穷。饵药应随病，观身转悟空。  
地闲花欲雨，窗冷竹生风。几日东林去，门人待远公。

卷 249\_65【山中五咏·门柳】

皇甫冉

接影武昌城，分行汉南道。何事闲门外，空对青山老。

· 全唐诗 ·

卷 249\_66【山中五咏·远山】

皇甫冉

少室尽西峰，鸣皋隐南面。柴门纵复关，终日窗中见。

卷 249\_67【山中五咏·南涧】

皇甫冉

上路各乘轩，高明尽鸣玉。宁知涧下人，自爱轻波渌。

卷 249\_68【山中五咏·春早】

皇甫冉

草遍颖阳山，花开武陵水。春色既已同，人心亦相似。

卷 249\_69【山中五咏·山馆】

皇甫冉

山馆长寂寂，闲云朝夕来。空庭复何有，落日照青苔。

· 全唐诗 ·

卷 249\_70【送窦十九叔向赴京】

皇甫冉

冰结杨柳津，从吴去入秦。徒云还上国，谁为作中人。  
驿树同霜霰，渔舟伴苦辛。相如求一谒，词赋远随身。

卷 249\_71【登石城戍望海寄诸暨严少府】

皇甫冉

平明登古戍，徙倚待寒潮。江海方回合，云林自寂寥。  
讵能知远近，徒见荡烟霄。即此沧洲路，嗟君久折腰。

卷 249\_72【和樊润州秋日登城楼】

皇甫冉

露冕临平楚，寒城带早霜。时同借河内，人是卧淮阳。  
积水澄天堑，连山入帝乡。因高欲见下，非是爱秋光。

卷 249\_73【寄江东李判官】



· 全唐诗 ·

皇甫冉

远怀不可道，历稔倦离忧。洛下闻新雁，江南想暮秋。  
澄清佐八使，纲纪案诸侯。地识吴平久，才当晋用求。  
时贤几殒谢，摛藻继风流。更有西陵作，还成北固游。  
归途限尺牍，王事在扁舟。山色临湖尽，猿声入梦愁。

卷 249\_74【送蒋评事往福州】

皇甫冉

江上春常早，闽中客去稀。登山怨迢递，临水惜芳菲。  
烟树何时尽，风帆几日归。还看复命处，盛府有光辉。

卷 249\_75【送从弟豫贬远州（一作刘长卿诗，题作送从弟  
贬袁州）】

皇甫冉

何事成迁客，思归不见乡。游吴经万里，吊屈过三湘。  
水与荆巫接，山通鄢郢长。名嗟黄绶系，才是白眉良。  
独结南枝恨，应思北雁行。忧来沽楚酒，玄鬓莫凝霜。

卷 249\_76【送钱唐路少府赴制举】

· 全唐诗 ·

皇甫冉

公车待诏赴长安，客里新正阻旧欢。迟日未能销野雪，  
晴花偏自犯江寒。东溟道路通秦塞，北阙威仪识汉官。  
共许郤诜工射策，恩荣请向一枝看。

卷 249\_77【赋得荆溪夜湍送蒋逸人归义兴山】

皇甫冉

惊湍流不极，夜度识云岑。长带溪沙浅，时因山雨深。  
方同七里路，更遂五湖心。揭厉朝将夕，潺湲古至今。  
花源君若许，虽远亦相寻。

卷 249\_78【送孔党赴举】

皇甫冉

入贡列诸生，诗书业早成。家承孔圣后，身有鲁儒名。  
楚水通茱浦，春山拥汉京。爱君方弱冠，为赋少年行。

卷 249\_79【齐郎中筵赋得的的帆向浦留别】

皇甫冉

· 全唐诗 ·

一帆何处去，正在望中微。浦迥摇空色，汀回见落晖。  
每争高鸟度，能送远人归。偏似南浮客，悠扬无所依。

卷 249\_80【送陆鸿渐栖霞寺采茶】

皇甫冉

采茶非采菖，远远上层崖。布叶春风暖，盈筐白日斜。  
旧知山寺路，时宿野人家。借问王孙草，何时泛碗花。

卷 249\_81【泊丹阳与诸人同舟至马林溪遇雨】

皇甫冉

云林不可望，溪水更悠悠。共载人皆客，离家春是秋。  
远山方对枕，细雨莫回舟。来往南徐路，多为芳草留。

卷 249\_82【太常魏博士远出贼庭江外相逢因叙其事】

皇甫冉

烽火惊戎塞，豺狼犯帝畿。川原无稼穡，日月翳光辉。  
里社粉榆毁，宫城骑吏非。群生被惨毒，杂虏耀轻肥。  
多士从芳饵，唯君识祸机。心同合浦叶，命寄首阳薇。

· 全唐诗 ·

耻作纤鳞煦，方随高鸟飞。山经商岭出，水泛汉池归。  
离别霜凝鬓，逢迎泪进衣。京华长路绝，江海故人稀。  
秉节身常苦，求仁志不违。只应穷野外，耕种且相依。

卷 249\_83【送包佶赋得天津桥】

皇甫冉

洛阳岁暮作征客，                    。相望依然一水间，  
相思已如千年隔。晴烟霁景满天津，凤阁龙楼映水滨。  
岂无朝夕轩车度，其奈相逢非所亲。巩树甘陵愁远道，  
他乡一望人堪老。君报还期在早春，桥边日日看芳草。

卷 249\_84【上礼部杨侍郎】

皇甫冉

郢匠抡材日，辕轮必尽呈。敢言当一干，徒欲隶诸生。  
末学惭邹鲁，深仁录弟兄。馀波知可挹，弱植更求荣。  
绩愧他年败，功期此日成。方因旧桃李，犹冀载飞鸣。  
道浅犹怀分，时移但自惊。关门惊暮节，林壑废春耕。  
十里嵩峰近，千秋颍水清。烟花迷戍谷，墟落接阳城。  
渺默思乡梦，迟回知己情。劳歌终此曲，还是苦辛行。

· 全唐诗 ·

卷 249\_85 【宿严维宅送包七（一作刘长卿诗，题下作送包佶）】

皇甫冉

江湖同避地，分手自依依。尽室今为客，经秋空念归。  
岁储无别墅，寒服羡邻机。草色村桥晚，蝉声江树稀。  
夜凉宜共醉，时难惜相违。何事随阳侣，汀洲忽背飞。

卷 249\_86 【同张侍御咏兴宁寺经藏院海石榴花】

皇甫冉

嫩叶生初茂，残花少更鲜。结根龙藏侧，故欲并青莲。

卷 249\_87 【崔十四宅各赋一物得檐柳】

皇甫冉

官渡老风烟，浔阳媚云日。汉将营前见，胡笳曲中出。  
复在此檐端，垂阴仲长室。

卷 249\_88 【送段明府】

· 全唐诗 ·

皇甫冉

遥夜此何其，霜空残杳霭。方嗟异乡别，暂是同公会。  
海林秋更疏，野水寒犹大。离人转吴岫，旅雁从燕塞。  
日夕望前期，劳心白云外。

卷 249\_89 【送王司直（一作刘长卿诗）】

皇甫冉

西塞云山远，东风道路长。人心胜潮水，相送过浔阳。

卷 249\_90 【婕妤春怨】

皇甫冉

花枝出建章，凤管发昭阳。借问承恩者，双蛾几许长。

卷 249\_91 【送魏十六还苏州】

皇甫冉

秋夜深深北送君，阴虫切切不堪闻。  
归舟明日毗陵道，回首姑苏是白云。

· 全唐诗 ·

卷 249\_92【婕妤怨】

皇甫冉

由来咏团扇，今已值秋风。事逐时皆往，恩无日再中。  
早鸿闻上苑，寒露下深宫。颜色年年谢，相如赋岂工。

卷 249\_93【送客】

皇甫冉

旗鼓军威重，关山客路赊。待封甘度陇，回首不思家。  
城下春山路，营中瀚海沙。河源虽万里，音信寄来查。

卷 249\_94【秋日东郊作】

皇甫冉

闲看秋水心无事，卧对寒松手自栽。庐岳高僧留偈别，  
茅山道士寄书来。燕知社日辞巢去，菊为重阳冒雨开。  
浅薄将何称献纳，临岐终日自迟回。

卷 249\_95【秋夜宿严维宅】

· 全唐诗 ·

皇甫冉

昔闻玄度宅，门向会稽峰。君住东湖下，清风继旧踪。  
秋深临水月，夜半隔山钟。世故多离别，良宵讵可逢。

卷 249\_96 【见诸姬学玉台体】

皇甫冉

艳唱召燕姬，清弦待卢女。由来道姓秦，谁不知家楚。  
传杯见目成，结带明心许。宁辞玉辇迎，自堪金屋贮。  
朝朝作行云，襄王迷处所。

卷 249\_97 【酬张二仓曹扬子所居见寄兼呈韩郎中】

皇甫冉

孤云独鹤自悠悠，别后经年尚泊舟。渔父置词相借问，  
郎官能赋许依投。折芳远寄三春草，乘兴闲看万里流。  
莫怪杜门频乞假，不堪扶病拜龙楼。

卷 249\_98 【送安律师】

皇甫冉



· 全唐诗 ·

出家童子岁，爱此雪山人。长路经千里，孤云伴一身。  
水中应见月，草上岂伤春。永日空林下，心将何物亲。

卷 249\_99【题卢十一所居（一作卢十）】

皇甫冉

春风来几日，先入辟疆园。身外无馀事，闲吟昼闭门。

卷 249\_100【送陆澧郭鄱】

皇甫冉

才见吴洲百草春，已闻燕雁一声新。  
秋风何处催年急，偏逐山行水宿人。

卷 249\_101【山中（一作题画帐）】

皇甫冉

湘水风日满，楚山朝夕空。连峰虽已见，犹念长云中。

卷 249\_102【题裴二十一新园（一作题裴固新园，又作裴周）】

· 全唐诗 ·

皇甫冉

东郭访先生，西郊寻隐路。久为江南客，自有云阳树。  
已得闲园心，不知公府步。开门白日晚，倚杖青山暮。  
果熟任霜封，篱疏从水度。穷年无牵缀，往事惜沦误。  
唯见耦耕人，朝朝自来去。

卷 249\_103【寄高云】

皇甫冉

南徐风日好，怅望毗陵道。毗陵有故人，一见恨无因。  
独恋青山久，唯令白发新。每嫌持手板，时见著头巾。  
烟景临寒食，农桑接仲春。家贫仍嗜酒，生事今何有。  
芳草遍江南，劳心忆携手。

· 全唐诗 ·

## 第二百五十卷

### 卷 250\_1 【温泉即事】

皇甫冉

天仗星辰转，霜冬景气和。树含温液润，山入缭垣多。  
丞相金钱赐，平阳玉辇过。鲁儒求一谒，无路独如何。

### 卷 250\_2 【送张南史（效何记室体）】

皇甫冉

马卿工词赋，位下年将暮。谢客爱云山，家贫身不闲。  
风波杳未极，几处逢相识。富贵人皆变，谁能念贫贱。  
岸有经霜草，林有故年枝。俱应待春色，独使客心悲。

### 卷 250\_3 【庐山歌送至弘法师兼呈薛江州】

皇甫冉

· 全唐诗 ·

释子去兮访名山，禅舟容与兮住仍前。猿啾啾兮怨月，  
江渺渺兮多烟。东林西林兮入何处，上方下方兮通石路。  
连湘接楚饶桂花，事久年深无杏树。使君爱人兼爱山，  
时引双旌万木间。政成人野皆不扰，遂令法侣性安闲。

卷 250\_4【送薛秀才】

皇甫冉

虽是寻山客，还同慢世人。读书惟务静，无褐不忧贫。  
野色春冬树，鸡声远近邻。郗公即吾友，合与尔相亲。

卷 250\_5【使往寿州淮路寄刘长卿（一作判官）】

皇甫冉

榛草荒凉村落空，驱驰卒岁亦何功。蒹葭曙色苍苍远，  
蟋蟀秋声处处同。乡路遥知淮浦外，故人多在楚云东。  
日夕烟霜那可道，寿阳西去水无穷。

卷 250\_6【酬李司兵直夜见寄】

皇甫冉

· 全唐诗 ·

江城闻鼓角，旅宿复何如。寒月此宵半，春风旧岁馀。  
徒云资薄禄，未必胜闲居。见欲扁舟去，谁能畏简书。

卷 250\_7【送薛判官之越】

皇甫冉

时难自多务，职小亦求贤。道路无辞远，云山并在前。  
樟亭待潮处，已是越人烟。

卷 250\_8【同温丹徒登万岁楼（一作刘长卿诗）】

皇甫冉

高楼独立思依依，极浦遥山合翠微。江客不堪频北顾，  
塞鸿何事复南飞。丹阳古渡寒烟积，瓜步空洲远树稀。  
闻道王师犹转战，谁能谈笑解重围。

卷 250\_9【赋得檐燕】

皇甫冉

拂水竞何忙，傍檐如有意。翻风去每远，带雨归偏驶。  
令君裁杏梁，更欲年年去。

· 全唐诗 ·

卷 250\_10 【送李万州赴饶州觐省（得西字）】

皇甫冉

前程观拜庆，旧馆惜招携。荀氏风流远，胡家清白齐。  
川回吴岫失，塞阔楚云低。举目亲鱼鸟，惊心怯鼓鼙。  
人稀渔浦外，滩浅定山西。无限青青草，王孙去不迷。

卷 250\_11 【送邹判官赴河南（一作刘长卿诗）】

皇甫冉

看君发原隰，四牡去皇皇。始罢沧江吏，还随粉署郎。  
海沂军未息，河畔岁仍荒。征税人全少，榛芜虏近亡。  
所行知宋远，相隔叹淮长。早晚裁书寄，银钩伫八行。

卷 250\_12 【宿淮阴南楼酬常伯能】

皇甫冉

淮阴日落上南楼，乔木荒城古渡头。浦外野风初入户，  
窗中海月早知秋。沧波一望通千里，画角三声起百忧。  
伫立分宵绝来客，烦君步履忽相求。

· 全唐诗 ·

卷 250\_13【送归中丞使新罗】

皇甫冉

诏使殊方远，朝仪旧典行。浮天无尽处，望日计前程。  
暂喜孤山出，长愁积水平。野风飘叠鼓，海雨湿危旌。  
异俗知文教，通儒有令名。还将大戴礼，方外授诸生。

卷 250\_14【小江怀灵一上人】

皇甫冉

江上年年春早，津头日日人行。  
借问山阴远近，犹闻薄暮钟声。

卷 250\_15【送唐别驾赴郢州】

皇甫冉

莫叹辞家远，方看佐郡荣。长林通楚塞，高岭见秦城。  
雪向峽关下，人从郢路迎。翩翩骏马去，自是少年行。

卷 250\_16【送魏中丞还河北】

· 全唐诗 ·

皇甫冉

宁知贵公子，本是鲁诸生。上国风尘旧，中司印绶荣。  
辛勤戎旅事，雪下护羌营。

卷 250\_17【送李使君赴邵州】

皇甫冉

出送东方骑，行安南楚人。城池春足雨，风俗夜迎神。  
郢路逢归客，湘川问去津。争看使君度，皂盖雪中新。

卷 250\_18【寄振上人无碍寺所居】

皇甫冉

恋亲时见在人群，多在东山就白云。  
独坐焚香诵经处，深山古寺雪纷纷。

卷 250\_19【酬李补阙】

皇甫冉

十年归客但心伤，三径无人已自荒。夕宿灵台伴烟月，



· 全唐诗 ·

晨趋建礼逐衣裳。偶因麋鹿随丰草，谬荷鸳鸾借末行。  
纵有谏书犹未献，春风拂地日空长。

卷 250\_20【故齐王赠承天皇帝挽歌】

皇甫冉

礼盛追崇日，人知友悌恩。旧居从代邸，新陇入文园。  
鸿宝仙书秘，龙旂帝服尊。苍苍松里月，万古此高原。

卷 250\_21【赠恭顺皇后挽歌】

皇甫冉

徂谢年方久，哀荣事独稀。虽殊百两迓，同是九泉归。  
诏使归金策，神人送玉衣。空山竟不从，宁肯学湘妃。

卷 250\_22【病中对石竹花】

皇甫冉

散点空阶下，闲凝细雨中。那能久相伴，嗟尔殢秋风。

· 全唐诗 ·

卷 250\_23【寄郑二侍御归新郑无碍寺所居】

皇甫冉

何事休官早，归来作郑人。云山随伴侣，伏腊见乡亲。  
南亩无三径，东林寄一身。谁当便静者，莫使甑生尘。

卷 250\_24【送庐山人归林虑山】

皇甫冉

无论行远近，归向旧烟林。寥落人家少，青冥鸟道深。  
白云长满目，芳草自知心。山色连东海，相思何处寻。

卷 250\_25【送荣别驾赴华州】

皇甫冉

直到群峰下，应无累日程。高车入郡舍，流水出关城。  
草色田家迥，槐阴府吏迎。还将海沂咏，籍甚汉公卿。

卷 250\_26【送常大夫加散骑常侍赴朔方】

· 全唐诗 ·

皇甫冉

故垒烟尘后，新军河塞间。金貂宠汉将，玉节度萧关。  
澶漫沙中雪，依稀汉口山。人知窦车骑，计日勒铭还。

卷 250\_27【送王翁信还剡中旧居】

皇甫冉

海岸耕残雪，溪沙钓夕阳。客中何所有，春草渐看长。

卷 250\_28【酬张继】

皇甫冉

怅望南徐登北固，迢遥西塞恨东关。  
落日临川问音信，寒潮唯带夕阳还。

卷 250\_29【送柳八员外赴江西】

皇甫冉

岐路穷无极，长江九派分。行人随旅雁，楚树入湘云。  
久在征南役，何殊蓟北勋。离心不可问，岁暮雪纷纷。

· 全唐诗 ·

卷 250\_30【赋长道一绝送陆遂潜夫】

皇甫冉

高山迴欲登，远水深难渡。杳杳复漫漫，行人别家去。

卷 250\_31【又得云字（一作张继诗，题作留别）】

皇甫冉

何事千年遇圣君，坐令双鬓老如云。  
南行更入深山浅，岐路悠悠水自分。

卷 250\_32【送陆潜夫往茅山赋得华阳洞】

皇甫冉

游仙洞兮访真官，奠瑶席兮礼石坛。忽仿佛兮云扰，  
杳阴深兮夏寒。欲回头兮挥手，便辞家兮可否？  
有昏嫁兮婴缠，绵归来兮已久。

卷 250\_33【又送陆潜夫茅山寻友】

· 全唐诗 ·

皇甫冉

登山自补屐，访友不赍粮。坐啸青枫晚，行吟白日长。  
人烟隔水见，草气入林香。谁作招寻侣，清斋宿紫阳。

卷 250\_34【赋得越山三韵（一本题上有又送陆潜夫五字）】

皇甫冉

西陵犹隔水，北岸已春山。独鸟连天去，孤云伴客还。  
只应结茅宇，出入石林间。

卷 250\_35【送卢郎中使君赴京】

皇甫冉

三年期上国，万里自东溟。曲盖遵长道，油幢憩短亭。  
楚云山隐隐，淮雨草青青。康乐多新兴，题诗纪所经。

卷 250\_36【杨氏林亭探得古槎】

皇甫冉

千年古貌多，八月秋涛晚。偶被主人留，那知来近远。

· 全唐诗 ·

卷 250\_37【送郑二之茅山】

皇甫冉

水流绝涧终日，草长深山暮春。  
犬吠鸡鸣几处，条桑种杏何人。

卷 250\_38【和王给事（一本有维字）禁省梨花咏】

皇甫冉

巧解逢人笑，还能乱蝶飞。春时风入户，几片落朝衣。

卷 250\_39【送郑员外入茅山居】

皇甫冉

但见全家去，宁知几日还。白云迎谷口，流水出人间。  
冠冕情遗世，神仙事满山。其中应有物，岂贵一身闲。

卷 250\_40【送志弥师往淮南】

皇甫冉

· 全唐诗 ·

已能持律藏，复去礼禅亭。长老偏摩顶，时流尚诵经。  
独行寒野旷，旅宿远山青。眷属空相望，鸿飞已杳冥。

卷 250\_41 【谢韦大夫柳栽】

皇甫冉

本在胡笳曲，今从汉将营。浓阴方待庇，弱植岂无情。  
比雪花应吐，藏乌叶未成。五株蒙远赐，应使号先生。

卷 250\_42 【问李二司直所居云山】

皇甫冉

门外水流何处？天边树绕谁家？  
山色东西多少？朝朝几度云遮。

卷 250\_43 【刘侍御朝命许停官归侍】

皇甫冉

孟孙唯问孝，莱子复辞官。幸遂温清愿，其甘稼穡难。  
采芝供上药，拾槿奉晨餐。栋里云藏雨，山中暑带寒。  
非时应有笋，闲地尽生兰。赐告承优诏，长筵永日欢。

· 全唐诗 ·

卷 250\_44 【送陆鸿渐赴越】

皇甫冉

行随新树深，梦隔重江远。迢递风日间，苍茫洲渚晚。

卷 250\_45 【送窦叔向】

皇甫冉

楚客怨逢秋，闲吟兴非一。弃官守贫病，作赋推文律。  
樵径未经霜，茅檐初负日。今看泛月去，偶见乘潮出。  
卜地会为邻，还依仲长室。

卷 250\_46 【题蒋道士房】

皇甫冉

轩窗缥缈起烟霞，诵诀存思白日斜。  
闻道昆仑有仙籍，何时青鸟送丹砂。

卷 250\_47 【夜集张諲所居（得飘字）】



· 全唐诗 ·

皇甫冉

江南成久客，门馆日萧条。惟有图书在，多伤鬓发凋。  
诸生陪讲诵，稚子给渔樵。虚室寒灯静，空阶落叶飘。  
沧洲自有趣，谁道隐须招。

卷 250\_48【酬权器】

皇甫冉

南望江南满山雪，此情惆怅将谁说。徒随群吏不曾闲，  
顾与诸生为久别。闻君静坐转耽书，种树葺茅还旧居。  
终日白云应自足，明年芳草又何如。人生有怀若不尽，  
出入公门犹未免。回舟朝夕待春风，先报华阳洞深浅。

卷 250\_49【寄刘方平大谷田家】

皇甫冉

故山闻独往，樵路忆相从。冰结泉声绝，霜清野翠浓。  
篱边颖阳道，竹外少姨峰。日夕田家务，寒烟隔几重。

卷 250\_50【送云阳少府（得归字）】

· 全唐诗 ·

皇甫冉

渭曲春光无远近，池阳谷口倍芳菲。  
官舍村桥来几日，残花寥落待君归。

卷 250\_51 【鲁山送别（一作刘长卿诗）】

皇甫冉

凄凄游子若飘蓬，明月清樽只暂同。  
南望千山如黛色，愁君客路在其中。

卷 250\_52 【题高云客舍】

皇甫冉

孤兴日自深，浮云非所仰。窗中西城峻，树外东川广。  
晏起簪葛巾，闲吟倚藜杖。阮公道在醉，庄子生常养。  
五柳转扶疏，千峰恣来往。清秋香粳获，白露寒菜长。  
吴国滞风烟，平陵延梦想。时人趋缨弁，高鸟违罗网。  
世事徒乱纷，吾心方浩荡。唯将山与水，处处谐真赏。

卷 250\_53 【台头寺愿上人院古松下有小松，栽毫末新生，  
与纤草不辩，重其有凌云于霄之志，与赵八员外、裴十

· 全唐诗 ·

补阙同赋之】

皇甫冉

细草亦全高，秋毫乍堪比。及至干霄日，何人复居此。

卷 250\_54【渔子沟寄赵员外裴补阙】

皇甫冉

欲逐淮潮上，暂停渔子沟。相望知不见，终是屡回头。

卷 250\_55【送崔使君赴寿州（一作刘长卿诗）】

皇甫冉

列郡专城分国忧，彤幃皂盖古诸侯。仲华遇主年犹少，  
公瑾论兵位已酬。草色青青宜建隼，蝉声处处杂鸣驺。  
千里相思如可见，淮南木落早惊秋。

卷 250\_56【送谢十二判官】

皇甫冉

· 全唐诗 ·

四牡驱驰千里馀，越山稠叠海林疏。  
不辞终日离家远，应为刘公一纸书。

卷 250\_57【送处州裴使君赴京】

皇甫冉

使君朝北阙，车骑发东方。别喜天书召，宁忧地脉长。  
山行朝复夕，水宿露为霜。秋草连秦塞，孤帆落汉阳。  
新衔趋建礼，旧位识文昌。唯有东归客，应随南雁翔。

卷 250\_58【送田济之扬州赴选】

皇甫冉

家贫不自给，求禄为荒年。调补无高位，卑栖屈此贤。  
江山欲霜雪，吴楚接风烟。相去诚非远，离心亦渺然。

卷 250\_59【送袁郎中破贼北归】

皇甫冉

优诏亲贤时独稀，中途紫绶换征衣。黄香省闼登朝去，  
杨仆楼船振旅归。万里长闻随战角，十年不得掩郊扉。

· 全唐诗 ·

，但将词赋奉恩辉。

卷 250\_60【同李万晚望南岳寺怀普门上人】

皇甫冉

释子身心无垢纷，独将衣钵去人群。  
相思晚望松林寺，唯有钟声出白云。

卷 250\_61【奉和独孤中丞游法华寺】

皇甫冉

谢君临郡府，越国旧山川。访道三千界，当仁五百年。  
岩空鸾驭响，树密旆旌连。阁影凌空壁，松声助乱泉。  
开门得初地，伏槛接诸天。向背春光满，楼台古制全。  
群峰争彩翠，百谷会风烟。香象随僧久，祥鸟报客先。  
清心乘暇日，稽首慕良缘。法证无生偈，诗成大雅篇。  
苍生望已久，回驾独依然。

卷 250\_62【之京留别刘方平】

皇甫冉

· 全唐诗 ·

客子慕俦侣，含凄整晨装。邀欢日不足，况乃前期长。  
离袂惜嘉月，远还劳折芳。迟回越二陵，回首但苍茫。  
乔木清宿雨，故关愁夕阳。人言长安乐，其奈缅相望。

卷 250\_63【出塞】

皇甫冉

吹角出塞门，前瞻即胡地。三军尽回首，皆洒望乡泪。  
转念关山长，行看风景异。由来征戍客，负得轻生义。

卷 250\_64【赴李少府庄失路】

皇甫冉

君家南郭白云连，正待情人弄石泉。  
月照烟花迷客路，苍苍何处是伊川。

卷 250\_65【雨雪】

皇甫冉

风沙悲久戍，雨雪更劳师。绝漠无人境，将军苦战时。  
山川迷向背，氛雾失旌旗。徒念天涯隔，中人芳草期。

· 全唐诗 ·

卷 250\_66 【馆陶李丞旧居】

皇甫冉

盛名天下挹馀芳，弃置终身不拜郎。词藻世传平子赋，  
园林人比郑公乡。门前坠叶浮秋水，篱外寒皋带夕阳。  
日日青松成古木，只应来者为心伤。

卷 250\_67 【送刘兵曹还陇山居】

皇甫冉

离堂徒宴语，行子但悲辛。虽是还家路，终为陇上人。  
先秋雪已满，近夏草初新。唯有闻羌笛，梅花曲里春。

卷 250\_68 【同李三月夜作】

皇甫冉

霜风惊度雁，月露皓疏林。处处砧声发，星河秋夜深。

卷 250\_69 【同裴少府安居寺对雨】

· 全唐诗 ·

皇甫冉

共结寻真会，还当退食初。炉烟云气合，林叶雨声馀。  
溽暑销珍簟，浮凉入绮疏。归心从念远，怀此复何如。

卷 250\_70【送元晟归潜山所居（一作送王山人归别业）】

皇甫冉

深山秋事早，君去复何如。裊露收新稼，迎寒葺旧庐。  
题诗即招隐，作赋是闲居。别后空相忆，嵇康懒寄书。

卷 250\_71【送康判官往新安赋得江路西南永（一作刘长卿诗）】

皇甫冉

不向新安去，那知江路长。猿声比庐霍，水色胜潇湘。  
驿树收残雨，渔家带夕阳。何须愁旅泊，使者有辉光。

卷 250\_72【宿洞灵观】

皇甫冉

孤烟灵洞远，积雪满山寒。松柏凌高殿，莓苔封古坛。



· 全唐诗 ·

客来清夜久，仙去白云残。明日开金篆，焚香更沐兰。

卷 250\_73【酬卢十一过宿】

皇甫冉

乞还方未遂，日夕望云林。况复逢春草，何劳问此心。  
闭门公务散，枉策故情深。遥夜他乡酒，同君梁甫吟。

卷 250\_74【酬裴十四（得晏字）】

皇甫冉

淮海各联翩，三年方一见。素心终不易，玄发何须变。  
旧国想平陵，春山满阳羨。邻鸡莫遽唱，共惜良夜晏。

卷 250\_75【彭祖井（一本题上有奉和王相公五字）】

皇甫冉

上公旌节在徐方，旧井莓苔近寝堂。访古因知彭祖宅，  
得仙何必葛洪乡。清虚不共春池竟，盥漱偏宜夏日长。  
闻道延年如玉液，欲将调鼎献明光。

· 全唐诗 ·

卷 250\_76【奉和对雪（一本作奉和王相公喜雪）】

皇甫冉

春雪偏当夜，暄风却变寒。庭深不复扫，城晓更宜看。  
命酒闲令酌，披蓑晚未冠。连营鼓角动，忽似战桑干。

卷 250\_77【送萧献士（一本题下有往邺中三字）】

皇甫冉

惆怅烟郊晚，依然此送君。长河隔旅梦，浮客伴孤云。  
淇上春山直，黎阳大道分。西陵倘一吊，应有士衡文。

卷 250\_78【卖药人处得南阳朱山人书】

皇甫冉

卖药何为者，逃名市井居。唯通远山信，因致逸人书。  
已报还丹效，全将世事疏。秋风景溪里，萧散寄樵渔。

卷 250\_79【初出沅江夜入湖】

· 全唐诗 ·

皇甫冉

放溜出江口，回瞻松栝深。不知舟中月，更引湖间心。

卷 250\_80【送裴员外往江南】

皇甫冉

分务江南远，留欢幕下荣。枫林萦楚塞，水驿到湓城。  
岸草知春晚，沙禽好夜惊。风帆几泊处，处处暮潮清。

卷 250\_81【奉和王相公早春登徐州城】

皇甫冉

落日凭危堞，春风似故乡。川流通楚塞，山色绕徐方。  
壁垒依寒草，旌旗动夕阳。元戎资上策，南亩起耕桑。

卷 250\_82【奉和对山僧（一作同杜相公对山僧）】

皇甫冉

吏散重门掩，僧来闭阁闲。远心驰北阙，春兴寄东山。  
草长风光里，莺喧静默间。芳辰不可住，惆怅暮禽还。

· 全唐诗 ·

卷 250\_83【奉和待勤照上人不至】

皇甫冉

东洛居贤相，南方待本师。旌麾俨欲动，杯锡杳仍迟。  
积雪迷何处，惊风泊几时。大臣能护法，况有故山期。

卷 250\_84【奉和汉祖庙下之作】

皇甫冉

古庙风烟积，春城车骑过。方修汉祖祀，更使沛童歌。  
寝帐巢禽出，香烟水雾和。神心降福处，应在故乡多。

卷 250\_85【和朝郎中扬子玩雪寄山阴严维】

皇甫冉

凝阴晦长箔，积雪满通川。征客寒犹去，愁人昼更眠。  
谢家兴咏日，汉将出师年。闻有招寻兴，随君访戴船。

卷 250\_86【闲居作】

· 全唐诗 ·

皇甫冉

多病辞官罢，闲居作赋成。图书唯药箓，饮食止藜羹。  
学谢淹中术，诗无邺下名。不堪趋建礼，讵是厌承明。  
已辍金门步，方从石路行。远山期道士，高柳觅先生。  
性懒尤因疾，家贫自省营。种苗虽尚短，谷价幸全轻。  
篇咏投康乐，壶觞就步兵。何人肯相访，开户一逢迎。

卷 250\_87【归渡洛水】

皇甫冉

暝色赴春愁，归人南渡头。渚烟空翠合，滩月碎光流。  
澧浦饶芳草，沧浪有钓舟。谁知放歌客，此意正悠悠。

卷 250\_88【送郑二员外】

皇甫冉

置酒竟长宵，送君登远道。羁心看旅雁，晚泊依秋草。  
秋草尚芊芊，离忧亦渺然。元戎辟才彦，行子犯风烟。  
风烟积惆怅，淮海殊飘荡。明日是重阳，登高远相望。

卷 250\_89【酬崔侍御期籍道士不至兼寄】

· 全唐诗 ·

皇甫冉

一心求妙道，几岁候真师。丹灶今何在，白云无定期。  
昆仑烟景绝，汗漫往还迟。君但焚香待，人间到有时。

卷 250\_90【送裴陟归常州】

皇甫冉

夜雨须停棹，秋风暗入衣。见君尝北望，何事却南归。

卷 250\_91【赠别（一作赠寄权三客舍）】

皇甫冉

南桥春日暮，杨柳带青渠。不得同携手，空成意有馀。

卷 250\_92【和袁郎中破贼后经剡中山水】

皇甫冉

武库分帷幄，儒衣事鼓鼙。兵连越徼外，寇尽海门西。  
节比全疏勒，功当雪会稽。旌旗回剡岭，士马濯耶溪。  
受律梅初发，班师草未齐。行看佩金印，岂得访丹梯。

· 全唐诗 ·

卷 250\_93【徐州送丘侍御之越】

皇甫冉

时鸟催春色，离人惜岁华。远山随拥传，芳草引还家。  
北固潮当阔，西陵路稍斜。纵令寒食过，犹有镜中花。

卷 250\_94【闲居（一作王维诗）】

皇甫冉

桃红复含宿雨，柳绿更带春烟。  
花落家童未扫，莺啼山客犹眠。

卷 250\_95【送延陵陈法师赴上元】

皇甫冉

延陵初罢讲，建业去随缘。翻译推多学，坛场最少年。  
浣衣逢野水，乞食向人烟。遍礼南朝寺，焚香古像前。

卷 250\_96【赋得海边树】

· 全唐诗 ·

皇甫冉

历历缘荒岸，溟溟入远天。每同沙草发，长共水云连。  
摇落潮风早，离披海雨偏。故伤游子意，多在客舟前。

卷 250\_97【题昭上人房】

皇甫冉

沃州传教后，百衲老空林。虑尽朝昏罄，禅随坐卧心。  
鹤飞湖草迥，门闭野云深。地与天台接，中峰早晚寻。

卷 250\_98【送李使君赴抚州】

皇甫冉

远送临川守，还同康乐侯。岁时徒改易，今古接风流。  
五马嘶长道，双旌向本州。乡心寄西北，应上郡城楼。

卷 250\_99【同樊润州游郡东山】

皇甫冉

北固多陈迹，东山复盛游。铙声发大道，草色引行驺。



· 全唐诗 ·

此地何时，长江自古流。频随公府步，南客寄徐州。

卷 250\_100【酬杨侍御寺中见招】

皇甫冉

贫居依柳市，闲步在莲宫。高阁宜春雨，长廊好啸风。  
诚如双树下，岂比一丘中。

卷 250\_101【重阳日酬李观】

皇甫冉

不见白衣来送酒，但令黄菊自开花。  
愁看日晚良辰过，步步行寻陶令家。

卷 250\_102【寄权器】

皇甫冉

露湿青芜时欲晚，水流黄叶意无穷。  
节近重阳念归否，眼前篱菊带秋风。

· 全唐诗 ·

卷 250\_103【酬李判官度梨岭见寄】

皇甫冉

陇首怨西征，岭南雁北顾。行人与流水，共向闽中去。

卷 250\_104【送魏六侍御葬】

皇甫冉

哭葬寒郊外，行将何所从。盛曹徒列柏，新墓已栽松。  
海月同千古，江云覆几重。旧书曾谏猎，遗草议登封。  
畴昔轻三事，尝期老一峰。门临商岭道，窗引洛城钟。  
应积泉中恨，无因世上逢。招寻偏见厚，疏慢亦相容。  
张范唯通梦，求羊永绝踪。谁知长卿疾，歌赋不还邛。

卷 250\_105【送张道士归茅山谒李尊师】

皇甫冉

向山独有一人行，近洞应逢双鹤迎。尝以素书传弟子，  
还因白石号先生。无穷杏树行时种，几许芝田向月耕。  
师事少君年岁久，欲随旄节往层城。

· 全唐诗 ·

卷 250\_106 【酬裴补阙吴寺见寻（一作酬袁补阙中天寺见寄）】

皇甫冉

东林初结构，已有晚钟声。窗户背流水，房廊半架城。  
远山重叠见，芳草浅深生。每与君携手，多烦长老迎。

卷 250\_107 【送王相公之幽州】

皇甫冉

自昔萧曹任，难兼卫霍功。勤劳无远近，旌节屡西东。  
不选三河卒，还令万里通。雁行缘古塞，马鬣起长风。  
遮虏关山静，防秋鼓角雄。徒思一攀送，羸老荜门中。

卷 250\_108 【题竹扇赠别】

皇甫冉

湘竹殊堪制，齐纨且未工。幸亲芳袖日，犹带旧林风。  
掩笑歌筵里，传书卧阁中。竟将为别赠，宁与合欢同。

卷 250\_109 【归阳羡兼送刘八长卿】

· 全唐诗 ·

皇甫冉

湖上孤帆别，江南谪宦归。前程愁更远，临水泪沾衣。  
云梦春山遍，潇湘过客稀。武陵招我隐，岁晚闭柴扉。

卷 250\_110【东郊迎春】

皇甫冉

晓见苍龙驾，东郊春已迎。彩云天仗合，玄象太阶平。  
佳气山川秀，和风政令行。句陈霜骑肃，御道雨师清。  
律向韶阳变，人随草木荣。遥观上林树，今日遇迁莺。

卷 250\_111【招隐寺送阎判官还江州】

皇甫冉

离别那逢秋气悲，东林更作上方期。共知客路浮云外，  
暂爱僧房坠叶时。长江九派人归少，寒岭千重雁度迟。  
借问浔阳在何处，每看潮落一相思。

卷 250\_112【送李山人还】

皇甫冉

· 全唐诗 ·

从来无检束，只欲老烟霞。鸡犬声相应，深山有几家。

卷 250\_113【韦中丞西厅海榴】

皇甫冉

海花争让候榴花，犯雪先开内史家。  
未客朝朝铃阁下，从公步履玩年华。

卷 250\_114【洪泽馆壁见故礼部尚书题诗】

皇甫冉

底事洪泽壁，空留黄绢词。年年淮水上，行客不胜悲。

卷 250\_115【望南山雪怀山寺普上人】

皇甫冉

夜夜梦莲宫，无由见远公。朝来出门望，知在雪山中。

卷 250\_116【送夔州班使君】

皇甫冉

· 全唐诗 ·

晚日照楼边，三军拜峡前。白云随浪散，青壁与山连。  
万岭岷峨雪，千家橘柚川。还如赴河内，天上去经年。

卷 250\_117【寻戴处士】

皇甫冉

车马长安道，谁知大隐心。蛮僧留古镜，蜀客寄新琴。  
晒药竹斋暖，捣茶松院深。思君一相访，残雪似山阴。

卷 250\_118【早发中严寺别契上人】

皇甫冉

苍苍松桂阴，残月半西岑。素壁寒灯暗，红炉夜火深。  
厨开山鼠散，钟尽岭猿吟。行役方如此，逢师懒话心。

卷 250\_119【华清宫】

皇甫冉

骊岫接新丰，岧峣驾翠空。凿山开秘殿，隐雾闭仙宫。  
绛阙犹栖凤，雕梁尚带虹。温泉曾浴日，华馆旧迎风。  
肃穆瞻云辇，沈深闭绮栊。东郊倚望处，瑞气霭濛濛。

· 全唐诗 ·

卷 250\_120 【送孔巢父赴河南军（一作刘长卿诗）】

皇甫冉

江城相送阻烟波，况复新秋一雁过。闻道全师征北虏，  
更言诸将会南河。边心杳杳乡人绝，塞草青青战马多。  
共许陈琳工奏记，知君名宦未蹉跎。

卷 250\_121 【李二侍御丹阳东去新亭】

皇甫冉

姑苏东望海陵间，几度裁书信未还。长在府中持白简，  
岂知天畔有青山。人归极浦寒流广，雁下平芜秋野闲。  
旧日新亭更携手，他乡风景亦相关。

卷 250\_122 【夜发沅江寄李颖川刘侍郎（时二公贬于此）】

皇甫冉

半夜回舟入楚乡，月明山水共苍苍。  
孤猿更发秋风里，不是愁人亦断肠。

· 全唐诗 ·

卷 250\_123 【浪淘沙二首（一作皇甫松诗）】

皇甫冉

蛮歌豆蔻北人愁，松雨蒲风野艇秋。  
浪起鵀鸂眠不得，寒沙细细入江流。

濞头细草接疏林，恶浪罣船半欲沈。  
宿鹭眠洲非旧浦，去年沙觜是江心。

卷 250\_124 【春思（一作刘长卿诗）】

皇甫冉

莺啼燕语报新年，马邑龙堆路几千。家住秦城邻汉苑，  
心随明月到胡天。机中锦字论长恨，楼上花枝笑独眠。  
为问元戎窦车骑，何时反旆勒燕然。

卷 250\_125 【逢庄纳因赠】

皇甫冉

世故还相见，天涯共向东。春归江海上，人老别离中。  
郡吏名何晚，沙鸥道自同。甘泉须早献，且莫叹飘蓬。



· 全唐诗 ·

卷 250\_126 【送韦山人归钟山所居（一作郎士元诗）】

皇甫冉

逸人归路远，弟子出山迎。服药颜虽驻，耽书癖已成。  
柴扉度岁月，藜杖见公卿。更作儒林传，还应有姓名。

卷 250\_127 【送普门上人（一作皇甫曾诗，题下有还阳羨三字）】

皇甫冉

花宫难久别，道者忆千灯。残雪入林路，深山归寺僧。  
日光依嫩草，泉响滴春冰。何用求方便，看心是一乘。

卷 250\_128 【怨回纥歌二首】

皇甫冉

白首南朝女，愁听异域歌。收兵颍利国，饮马胡芦河。  
毳布腥膻久，穹庐岁月多。雕巢城上宿，吹笛泪滂沱。

祖席驻征棹，开帆信候潮。隔烟桃叶泣，吹管杏花飘。  
船去鸥飞阁，人归尘上桥。别离惆怅泪，江路湿红蕉。

· 全唐诗 ·

卷 250\_129【句】

皇甫冉

微官同侍苍龙阙，直谏偏推白马生。  
(《寄李补阙》，出《诗式》)。

· 全唐诗 ·

## 第二百五十一卷

### 卷 251\_1【代宛转歌二首】

刘方平

星参差，明月二八灯五枝。黄鹤瑶琴将别去，  
芙蓉羽帐惜空垂。歌宛转，宛转恨无穷。愿为潮与浪，  
俱起碧流中。

晓将近，黄姑织女银河尽。九华锦衾无复情，  
千金宝镜谁能引。歌宛转，宛转伤别离。愿作杨与柳，  
同向玉窗垂。

### 卷 251\_2【乌栖曲二首】

刘方平

蛾眉曼脸倾城国，鸣环动佩新相识。  
银汉斜临白玉堂，芙蓉行障掩灯光。

画舸双艚锦为缆，芙蓉花发莲叶暗。

· 全唐诗 ·

门前月色映横塘，感郎中夜度潇湘。

卷 251\_3 【巫山高】

刘方平

楚国巫山秀，清猿日夜啼。万重春树合，十二碧峰齐。  
峡出朝云下，江来暮雨西。阳台归路直，不畏向家迷。

卷 251\_4 【巫山神女】

刘方平

神女藏难识，巫山秀莫群。今宵为大雨，昨日作孤云。  
散漫愁巴峡，徘徊恋楚君。先王为立庙，春树几氛氲。

卷 251\_5 【梅花落】

刘方平

新岁芳梅树，繁花四面同。春风吹渐落，一夜几枝空。  
少妇今如此，长城恨不穷。莫将辽海雪，来比后庭中。

· 全唐诗 ·

卷 251\_6 【铜雀妓】

刘方平

遗令奉君王，嚬蛾强一妆。岁移陵树色，恩在舞衣香。  
玉座生秋气，铜台下夕阳。泪痕沾井干，舞袖为谁长。

卷 251\_7 【秋夜思（一作淮上秋夜）】

刘方平

旅梦何时尽，征途望每赊。晚秋淮上水，新月楚人家。  
猿啸空山近，鸿飞极浦斜。明朝南岸去，言折桂枝花。

卷 251\_8 【秋夜泛舟】

刘方平

林塘夜发舟，虫响荻飕飕。万影皆因月，千声各为秋。  
岁华空复晚，乡思不堪愁。西北浮云外，伊川何处流。

卷 251\_9 【折杨枝】

· 全唐诗 ·

刘方平

官渡初杨柳，风来亦动摇。武昌行路好，应为最长条。  
叶映黄鹂夕，花繁白雪朝。年年攀折意，流恨入纤腰。

卷 251\_10【班婕妤（一作婕妤怨）】

刘方平

夕殿别君王，宫深月似霜。人幽在长信，萤出向昭阳。  
露浥红兰湿，秋凋碧树伤。惟当合欢扇，从此箠中藏。

卷 251\_11【新春】

刘方平

南陌春风早，东邻曙色斜。一花开楚国，双燕入卢家。  
眠罢梳云髻，妆成上锦车。谁知如昔日，更浣越溪纱。

卷 251\_12【寄严八判官】

刘方平

洛阳新月动秋砧，瀚海沙场天半阴。出塞能全仲叔策，

· 全唐诗 ·

安亲更切老莱心。汉家宫里风云晓，羌笛声中雨雪深。  
怀袖未传三岁字，相思空作陇头吟。

卷 251\_13【秋夜寄皇甫冉郑丰】

刘方平

洛阳清夜白云归，城里长河列宿稀。秋后见飞千里雁，  
月中闻捣万家衣。长怜西雍青门道，久别东吴黄鹄矶。  
借问客书何所寄，用心不啻两乡违。

卷 251\_14【寄陇右严判官】

刘方平

副相西征重，苍生属望晨。还同周薄伐，不取汉和亲。  
虏阵摧枯易，王师决胜频。高旗临鼓角，太白静风尘。  
赤狄争归化，青羌已请臣。遥传阊外美，盛选幕中宾。  
玉剑光初发，冰壶色自真。忠贞期报主，章服岂荣身。  
边草含风绿，征鸿过月新。胡笳长出塞，陇水半归秦。  
绝漠多来往，连年厌苦辛。路经西汉雪，家掷后园春。  
谁念烟云里，深居汝颖滨。一丛黄菊地，九日白衣人。  
松叶疏开岭，桃花密映津。缣书若有寄，为访许由邻。

· 全唐诗 ·

卷 251\_15 【拟娼楼节怨】

刘方平

上苑离离莺度，昆明幂幂蒲生。  
时光春华可惜，何须对镜含情。

卷 251\_16 【采莲曲】

刘方平

落日晴江里，荆歌艳楚腰。采莲从小惯，十五即乘潮。

卷 251\_17 【长信宫】

刘方平

梦里君王近，宫中河汉高。秋风能再热，团扇不辞劳。

卷 251\_18 【京兆眉】

刘方平



· 全唐诗 ·

新作蛾眉样，谁将月里同。有来凡几日，相效满城中。

卷 251\_19【春雪】

刘方平

飞雪带春风，裴回乱绕空。君看似花处，偏在洛阳东。

卷 251\_20【望夫石】

刘方平

佳人成古石，藓驳覆花黄。犹有春山杏，枝枝似薄妆。

卷 251\_21【送别】

刘方平

华亭霁色满今朝，云里樵竿去转遥。  
莫怪山前深复浅，清淮一日两回潮。

卷 251\_22【夜月】

· 全唐诗 ·

刘方平

更深月色半人家，北斗阑干南斗斜。  
今夜偏知春气暖，虫声新透绿窗纱。

卷 251\_23【春怨】

刘方平

纱窗日落渐黄昏，金屋无人见泪痕。  
寂寞空庭春欲晚，梨花满地不开门。

卷 251\_24【代春怨】

刘方平

朝日残莺伴妾啼，开帘只见草萋萋。  
庭前时有东风入，杨柳千条尽向西。

· 全唐诗 ·

## 第二百五十二卷

卷 252\_1【宣州东峰亭各赋一物得古壁苔】

刘太真

苒苒温寒泉，绵绵古危壁。光含孤翠动，色与暮云寂。  
深浅松月间，幽人自登历。

卷 252\_2【顾十二况左迁过韦苏州，房杭州，韦睦州，三  
使君皆有郡中燕集诗，辞章高丽，鄙夫之所仰慕顾生既至，  
留连笑语，因亦成篇，以继三君子之风焉】

刘太真

宠至乃不惊，罪及非无由。奔迸历畏途，缅邈赴偏陬。  
牧此凋弊甿，属当赋敛秋。夙兴谅无补，旬暇焉敢休。  
前日怀友生，独登城上楼。迢迢西北望，远思不可收。  
今日车骑来，旷然销人忧。晨迎东斋饭，晚度南溪游。  
以我碧流水，泊君青翰舟。莫将迁客程，不为胜境留。  
飞札谢三守，斯篇希见酬。

· 全唐诗 ·

卷 252\_3【贡院寄前主司萧尚书听（一作吕渭诗）】

刘太真

独坐贡闱里，愁心芳草生。山公昨夜事，应见此时情。

卷 252\_4【东峰亭同刘太真各赋一物得垂涧藤】

袁傒

寒涧流不息，古藤终日垂。迎风仍未定，拂水更相宜。  
新花与旧叶，惟有幽人知。

卷 252\_5【喜陆侍御破石埭草寇东峰亭赋诗】

袁傒

古寺东峰上，登临兴有馀。同观白简使，新报赤囊书。  
几处闲烽堠，千方庆里闾。欣欣夏木长，寂寂晚烟徐。  
战罢言归马，还师赋出车。因知越范蠡，湖海意何如。

卷 252\_6【东峰亭各赋一物得岭上云】

· 全唐诗 ·

崔何

伫立增远意，中峰见孤云。溶溶傍危石，片片宜夕曛。  
渐向群木尽，残飞更氤氲。

卷 252\_7【喜陆侍御破石埭草寇东峰亭赋诗】

崔何

绝景西溪寺，连延近郭山。高深清局外，行止翠微间。  
江澈烟尘静，川源草树闲。中丞健步到，柱史捷书还。  
一战清戎越，三吴变险艰。功名麟阁上，得咏入秦关。

卷 252\_8【东峰亭各赋一物得幽径石】

王纬

片石东溪上，阴崖剩阻修。雨馀青石霭，岁晚绿苔幽。  
从来不可转，今日为人留。

卷 252\_9【喜陆侍御破石埭草寇东峰亭赋诗】

王纬

· 全唐诗 ·

蜂蛰聚吴州，推贤奉圣忧。忠诚资上策，仁勇佐前筹。  
草木成鹅鹳，戈鋌复斗牛。戎车一战后，残垒五兵收。  
野静山戎险，江平水面流。更怜羁旅客，从此罢葵丘。

卷 252\_10【东峰亭各赋一物得临轩桂】

郭澹

青青芳桂树，幽阴在庭轩。向日阴还合，从风叶乍翻。  
共看霜雪后，终不变凉暄。

卷 252\_11【喜陆侍御破石埭草寇东峰亭赋诗】

郭澹

介胄鹰扬出，山林蚁聚空。忽闻飞简报，曾是坐筹功。  
迴夜昏氛灭，危亭眺望雄。茂勋推世上，馀兴寄杯中。  
喜色烟霞改，欢忻里巷同。幸兹尊俎末，饮至又从公。

卷 252\_12【东峰亭各赋一物得林中翠】

高倬

杳靄无定状，霏微常满林。清风光不散，过雨色偏深。

· 全唐诗 ·

幽意赏难尽，终朝再招寻。

卷 252\_13【东峰亭各赋一物得栖烟鸟】

李岑

从来养毛羽，昔日曾飞迁。变转对朝阳，差池栖夕烟。  
遇此枝叶覆，夙举翼冲天。

卷 252\_14【东峰亭各赋一物得寒溪草】

苏寓

幂历溪边草，游人不厌看。馀芳幽处老，深色望中寒。  
幸得陪情兴，青青赏未阑。

卷 252\_15【东峰亭各赋一物得阴崖竹】

袁邕

终岁寒苔色，寂寥幽思深。朝歌犹夕岚，日永流清阴。  
龙钟负烟雪，自有凌云心。

· 全唐诗 ·

卷 252\_16【唐德明兴圣庙乐章·迎神】

李纾

元尊九德，佐尧光宅。烈祖太宗，方周作伯。  
响怀霜露，乐变金石。白云清风，仿佛来格。

卷 252\_17【唐德明兴圣庙乐章·登歌奠币】

李纾

四时有典，百事来祭。尊祖奉宗，严禋大帝。  
礼先苍璧，奠备黝制。于万期年，熙成帝系。

卷 252\_18【唐德明兴圣庙乐章·迎俎】

李纾

盛牲实俎，涓选休成。鼎燂阳燧，玉盥阴精。  
有飴嘉豆，既和大羹。侑以清乐，细齐人情。

卷 252\_19【唐德明兴圣庙乐章·德明酌献】



· 全唐诗 ·

李纾

清庙奕奕，和乐雍雍。器尊牺象，礼属宗公。  
白水方裸，黄流在中。谟明之德，万古清风。

卷 252\_20【唐德明兴圣庙乐章·兴圣酌献】

李纾

闕宫静谧，合乐周张。泰尊始献，百末重觴。  
震澹存诚，庶几迪尝。遥源之祚，天汉灵长。

卷 252\_21【唐德明兴圣庙乐章·亚献终献】

李纾

惟清惟肃，靡闻靡见。举备九成，俯终三献。  
庆彰曼寿，胙撤嘉荐。瘞玉埋牲，礼神斯遍。

卷 252\_22【唐德明兴圣庙乐章·送神】

李纾

元精回复，灵贶繁滋。风洒兰路，云摇桂旗。

· 全唐诗 ·

高丘缅邈，凉部逶迟。瞻望靡及，缠绵永思。

卷 252-23【让皇帝庙乐章·迎神】

李纾

皇矣天宗，德先王季。因心则友，克让以位。  
爰命有司，式尊前志。神其降灵，昭飨祀事。

卷 252\_24【让皇帝庙乐章·奠币】

李纾

惟帝时若，去而上仙。祀用商武，乐备宫悬。  
白璧加荐，玄纁告虔。子孙拜后，承兹吉蠲。

卷 252\_25【让皇帝庙乐章·迎俎】

李纾

祀盛体荐，礼协粢盛。方周假庙，用鲁纯牲。  
捧撤祗敬，击拊和鸣。受釐归胙，既戒而平。

· 全唐诗 ·

卷 252\_26 【让皇帝庙乐章 · 酌献】

李纾

八音具举，三寿既盥。洁兹宗彝，瑟彼圭瓚。  
兰肴重错，椒醑飘散。降祚维城，永为藩翰。

卷 252\_27 【让皇帝庙乐章 · 亚献终献】

李纾

秩礼有序，和音既同。九仪不忒，三揖将终。  
孝感藩后，相维辟公。四时之典，永永无穷。

卷 252\_28 【让皇帝庙乐章 · 送神】

李纾

奠献已事，昏昕载分。风摇雨散，灵卫絪縕。  
龙驾帝服，已腾五云。泮宫复閟，寂寞无闻。

卷 252\_29 【释奠武成王乐章 · 迎神】

· 全唐诗 ·

于邵

卜畋不从，兆发非熊。乃倾荒政，爰佐一戎。盛烈载垂，  
命祀维崇。日练上戊，宿严闕宫。迎奏嘉至，感而遂通。

卷 252\_30【释奠武成王乐章·奠币登歌】

于邵

管磬升，坛芻集。上公进，嘉币执。信以通，僎如及。  
恢帝功，锡后邑。四维张，百度立。绵亿载，邈难挹。

卷 252\_31【释奠武成王乐章·迎俎酌献】

于邵

五齐絜，九牢硕。橐橐循，壘巽涤。进具物，扬鸿勳。  
和奏发，高灵寂。虔告终，繁祉锡。昭秩祀，永无易。

卷 252\_32【释奠武成王乐章·亚献终献】

于邵

贰觞以献，三变其终。顾此非馨，尚达斯衷。茅缩可致，

· 全唐诗 ·

神歆载融。始神翊周，拯溺除凶。时维降祐，永绝兴戎。

卷 252\_33【释奠武成王乐章·送神】

于邵

明祀方终，备乐斯阕。黝纁就瘞，豆笾告撤。  
肸蚨尚馀，光景云灭。返归虚极，神心则悦。

· 全唐诗 ·

## 第二百五十三卷

卷 253\_1 【登鹳雀楼（一作朱斌诗）】

王之涣

白日依山尽，黄河入海流。欲穷千里目，更上一层楼。

卷 253\_2 【送别】

王之涣

杨柳东风树，青青夹御河。近来攀折苦，应为别离多。

卷 253\_3 【凉州词二首】

王之涣

黄河远上白云间，一片孤城万仞山。  
羌笛何须怨杨柳，春光不度玉门关。

· 全唐诗 ·

单于北望拂云堆，杀马登坛祭几回。  
汉家天子今神武，不肯和亲归去来。

卷 253\_4【宴词】

王之涣

长堤春水绿悠悠，畎入漳河一道流。  
莫听声声催去棹，桃溪浅处不胜舟。

卷 253\_5【九日送别】

王之涣

蓟庭萧瑟故人稀，何处登高且送归。  
今日暂同芳菊酒，明朝应作断蓬飞。

卷 253\_6【晚秋石门礼拜（一作礼佛）】

阎防

轻策临绝壁，招提谒金仙。舟车无由径，岩嶠乃属天。  
踟躅淹昃景，夷犹望新弦。石门变暝色，谷口生人烟。  
阳雁叫平楚，秋风急寒川。驰晖苦代谢，浮脆惭贞坚。

· 全唐诗 ·

永欲卧丘壑，息心依梵筵。誓将历劫愿，无以外物牵。

卷 253\_7【百丈谿新理茅茨读书】

阎防

浪迹弃人世，还山自幽独。始傍巢由踪，吾其获心曲。  
荒庭何所有，老树半空腹。秋蛩鸣北林，暮鸟穿我屋。  
栖迟乐遵渚，恬旷寡所欲。开卦推盈虚，散帙攻节目。  
养闲度人事，达命知止足。不学东周儒，俟时劳伐辐。

卷 253\_8【宿岸道人精舍】

阎防

早岁参道风，放情入寥廓。重因息心侣，遂果岩下诺。  
敛迹辞人间，杜门守寂寞。秋风翦兰蕙，霜气冷淙壑。  
山牖见然灯，竹房闻捣药。愿言舍尘事，所趣非龙蠖。

卷 253\_9【夕次鹿门山作】

阎防

庞公嘉遁所，浪迹难追攀。浮舟暝始至，抱杖聊自闲。



· 全唐诗 ·

双岩开鹿门，百谷集珠湾。喷薄湍上水，舂容漂里山。  
焦原不足险，梁壑未成艰。我行自春仲，夏鸟忽绵蛮。  
蕙草色已晚，客心殊倦还。远游非避地，访道爱童颜。  
安能徇机巧，争夺锥刀间。

卷 253\_10【与永乐诸公夜泛黄河作】

阎防

烟深载酒入，但觉暮川虚。映水见山火，鸣榔闻夜渔。  
爱兹山水趣，忽与人事疏。无暇然官烛，中流有望舒。

卷 253\_11【句】

阎防

熊踞庭中树，龙蒸栋里云。

卷 253\_12【怀哉行】

薛据

明时无废人，广厦无弃材。良工不我顾，有用宁自媒。  
怀策望君门，岁晏空迟回。秦城多车马，日夕飞尘埃。

· 全唐诗 ·

伐鼓千门启，鸣珂双阙来。我闻雷雨施，天泽罔不该。  
何意斯人徒，弃之如死灰。主好臣必效，时禁权不开。  
俗流实骄矜，得志轻草莱。文王赖多士，汉帝资群才。  
一言并拜相，片善咸居台。夫君何不遇，为泣黄金台。

卷 253\_13【古兴】

薛据

日中望双阙，轩盖扬飞尘。鸣珮初罢朝，自言皆近臣。  
光华满道路，意气安可亲。归来宴高堂，广筵罗八珍。  
仆妾尽绮纨，歌舞夜达晨。四时固相代，谁能久要津。  
已看覆前车，未见易后轮。丈夫须兼济，岂能乐一身。  
君今皆得志，肯顾憔悴人。

卷 253\_14【冬夜寓居寄储太祝（一作綦毋潜诗）】

薛据

自为洛阳客，夫子吾知音。爱义能下士，时人无此心。  
奈何离居夜，巢鸟飞空林。愁坐至月上，复闻南邻砧。

卷 253\_15【登秦望山】

· 全唐诗 ·

薛据

南登秦望山，目极大海空。朝阳半荡漾，晃朗天水红。  
谿壑争喷薄，江湖递交通。而多渔商客，不悟岁月穷。  
振缙迎早潮，弭棹候长风。予本萍泛者，乘流任西东。  
茫茫天际帆，栖泊何时同。将寻会稽迹，从此访任公。

卷 253\_16【西陵口观海】

薛据

长江漫汤汤，近海势弥广。在昔胚浑凝，融为百川泱。  
地形失端倪，天色灏滢漾。东南际万里，极目远无象。  
山影乍浮沉，潮波忽来往。孤帆或不见，棹歌犹想像。  
日暮长风起，客心空振荡。浦口霞未收，潭心月初上。  
林屿几遄回，亭皋时偃仰。岁晏访蓬瀛，真游非外奖。

卷 253\_17【题鹤林寺】

薛据

道门隐形胜，向背临法桥。松覆山殿冷，花藏溪路遥。  
珊珊宝幡挂，焰焰明灯烧。迟日半空谷，春风连上潮。  
少凭水木兴，暂忝身心调。愿谢携手客，兹山禅侣饶。

· 全唐诗 ·

卷 253\_18【初去郡斋书怀（一作初去郡书情）】

薛据

肃徒辞汝颖，怀古独凄然。尚想文王化，犹思巢父贤。  
时移多谗巧，大道竟谁传。况是疾风起，悠悠旌旆悬。  
征鸟无返翼，归流不停川。已经霜雪下，乃验松柏坚。  
回首望城邑，迢迢间云烟。志士不伤物，小人皆自妍。  
感时惟责己，在道非怨天。从此适乐土，东归知几年。

卷 253\_19【出青门往南山下别业】

薛据

旧居在南山，夙驾自城阙。榛莽相蔽亏，去尔渐超忽。  
散漫馀雪晴，苍茫季冬月。寒风吹长林，白日原上没。  
怀抱旷莫伸，相知阻胡越。弱年好栖隐，炼药在岩窟。  
及此离垢氛，兴来亦因物。末路期赤松，斯言庶不伐。

卷 253\_20【泊震泽口】

薛据

日落草木阴，舟徒泊江汜。苍茫万象开，合沓闻风水。

· 全唐诗 ·

洄沿值渔翁，窈窕逢樵子。云开天宇静，月明照万里。  
早雁湖上飞，晨钟海边起。独坐嗟远游，登岸望孤洲。  
零落星欲尽，臃肿气渐收。行藏空自秉，智识仍未周。  
伍胥既仗剑，范蠡亦乘流。歌竟鼓楫去，三江多客愁。

卷 253\_21 【题丹阳陶司马厅壁】

薛据

高鉴清洞彻，儒风入进难。诏书增宠命，才子益能官。  
门带山光晚，城临江水寒。唯馀好文客，时得咏幽兰。

卷 253\_22 【古兴】

薛据

投珠恐见疑，抱玉但垂泣。道在君不举，功成叹何及。

卷 253\_23 【早发上东门（一作綦毋潜诗，题作落第后口号）】

薛据

十五能文西入秦，三十无家作路人。  
时命不将明主合，布衣空惹洛阳尘。

· 全唐诗 ·

卷 253\_24 【句】

薛据

省署开文苑，沧浪学钓翁。

卷 253\_25 【秋夕会友】

姚系

倦客易相失，欢游无良辰。忽然一夕间，稍慰阖家贫。  
白露下庭梧，孤琴始悲辛。回风入幽草，虫响满四邻。  
会遇更何时，持杯重殷勤。

卷 253\_26 【荆山独往】

姚系

宿昔山水上，抱琴聊踟躅。山远去难穷，琴悲多断续。  
岩重丹阳树，泉咽闻阴谷。时下白云中，淹留秋水曲。  
秋水石栏深，潺湲如喷玉。杂芳被阴岸，坠露方消绿。  
恣此平生怀，独游还自足。

卷 253\_27 【五老峰大明观赠隐者】

· 全唐诗 ·

姚系

云观此山北，与君携手稀。林端涉横水，洞口入斜晖。  
颇觉鸾鹤迤，忽为烟雾飞。故人清和客，默会琴心微。  
丹术幸可授，青龙当未归。悠悠平生意，此日复相违。

卷 253\_28【送周愿判官归岭南】

姚系

早蝉望秋鸣，夜琴怨离声。眇然多异感，值子江山行。  
由来重义人，感激事纵横。往复念遐阻，淹留慕平生。  
晨奔九衢饯，暮始万里程。山驿风月榭，海门烟霞城。  
易绡泉源近，拾翠沙渚明。兰蕙一为赠，贫交空复情。

卷 253\_29【送陆浑主簿赵宗儒之任】

姚系

山中眇然意，此意乃平生。常日望鸣皋，遥对洛阳城。  
故人吏为隐，怀此若蓬瀛。夕气冒岩上，晨流泻岸明。  
存亡区中事，影响羽人情。溪寂值猿下，云归闻鹤声。  
及兹春始暮，花葛正明荣。会有携手日，悠悠去无程。

· 全唐诗 ·

卷 253\_30 【杨参军庄送宇文邈】

姚系

秋云冒原隰，野鸟满林声。爱此田舍事，稽君车马程。  
离堂惨不喧，脉脉复盈盈。兰叶一经霜，香销为赠轻。  
灯光耿方寂，虫思隐馀清。相望忽无际，如含江海情。

卷 253\_31 【京西遇旧识兼送往陇西】

姚系

蝉鸣一何急，日暮秋风树。即此不胜愁，陇阴人更去。  
相逢与相失，共是亡羊路。

卷 253\_32 【古别离】

姚系

凉风已裊裊，露重木兰枝。独上高楼望，行人远不知。  
轻寒入洞户，明月满秋池。燕去鸿方至，年年是别离。

卷 253\_33 【野居池上看月】



· 全唐诗 ·

姚系

悠然云间月，复此照池塘。泫露苍茫湿，沉波澹滟光。  
应门当未曙，歌吹满昭阳。远近徒伤目，清辉霭自长。

卷 253\_34【庭柳】

姚系

袅袅柳杨枝，当轩杂珮垂。交阴总共密，分条各自宜。  
因依似永久，揽结更伤离。爱此阳春色，秋风莫遽吹。

卷 253\_35【硤州旅舍奉怀苏州韦郎中（公频有尺书，颇积离乡之思）】

令狐峒

儒服学从政，遂为尘事婴。衔命东复西，孰堪异乡情。  
怀禄且怀恩，策名敢逃名。羡彼农田人，白首亲友并。  
江山入秋气，草木凋晚荣。方塘寒露凝，旅管凉飙生。  
懿交守东吴，梦想闻颂声。云水方浩浩，离忧何平时。

卷 253\_36【释奠日国学观礼闻雅颂】

· 全唐诗 ·

令狐峒

肃肃先师庙，依依胄子群。满庭陈旧礼，开户拜清芬。  
万舞当华烛，箫韶入翠云。颂歌清晓听，雅吹度风闻。  
澹泊调元气，中和美圣君。唯馀东鲁客，蹈舞向南熏。

卷 253\_37【释奠日国学观礼闻雅颂】

滕珣

太学时观礼，东方晓色分。威仪何棣棣，环珮又纷纷。  
古乐从空尽，清歌几处闻。六和成远吹，九奏动行云。  
圣上尊儒学，春秋奠茂勋。幸因陪齿列，聊以颂斯文。

· 全唐诗 ·

## 第二百五十四卷

### 卷 254\_1 【奉和圣制麟德殿燕百僚应制】

常袞

云辟御筵张，山呼圣寿长。玉阑丰瑞草，金陛立神羊。  
台鼎资庖膳，天星奉酒浆。蛮夷陪作位，犀象舞成行。  
网已祛三面，歌因守四方。千秋不可极，花发满宫香。

### 卷 254\_2 【晚秋集贤院即事寄徐薛二侍郎】

常袞

穆穆上清居，沈沈中秘书。金铺深内殿，石甃净寒渠。  
花树台斜倚，空烟阁半虚。缥囊披锦绣，翠轴卷琼琚。  
墨润冰文茧，香销蠹字鱼。翻黄桐叶老，吐白桂花初。  
旧德双游处，联芳十载馀。北朝荣庾薛，西汉盛严徐。  
侍讲亲花宸，征吟步绮疏。缀帘金翡翠，赐砚玉蟾蜍。  
序秩东南远，离忧岁月除。承明期重入，江海意何如。

· 全唐诗 ·

卷 254\_3【早秋望华清宫树因以成咏（一作卢纶诗）】

常袞

可怜云木丛，满禁碧濛濛。色润灵泉近，阴清辇路通。  
玉坛标八桂，金井识双桐。交映凝寒露，相和起夜风。  
数枝盘石上，几叶落云中。燕拂宜秋霁，蝉鸣觉昼空。  
翠屏更隐见，珠缀共玲珑。雷雨生成早，樵苏禁令雄。  
野藤高助绿，仙果迥呈红。惆怅撩垣暮，兹山闻暗虫。

卷 254\_4【和考功员外杪秋忆终南旧宅之作（以下六首，一作卢纶诗）】

常袞

静忆溪边宅，知君许谢公。晓霜凝未耜，初日照梧桐。  
涧鼠喧藤蔓，山禽窜石丛。白云当岭雨，黄叶绕阶风。  
野果垂桥上，高泉落水中。欢荣来自间，羸贱赏曾通。  
月满珠藏海，天晴鹤在笼。馀阴如可寄，愿得隐墙东。

卷 254\_5【题金吾郭将军石洑茅堂】

常袞

· 全唐诗 ·

云戟曙沈沈，轩墀清且深。家传成栋美，尧宠结茅心。  
玉佩多依石，油幢亦在林。炉香诸洞暖，殿影众山阴。  
草奏风生笔，筵开雪满琴。客从龙阙至，僧自虎溪寻。  
潇洒延清赏，周流会素襟。终朝惜尘步，一醉见华簪。

卷 254\_6【登栖霞寺（一作奉和李益游栖霞寺）】

常袞

林香雨气新，山寺绿无尘。遂结云外侣，共游天上春。  
鹤鸣金阁丽，僧语竹房邻。待月水流急，惜花风起频。  
何方非环境，此地有归人。回首空门外，皤然一幻身。

卷 254\_7【逢南中使寄岭外故人】

常袞

见说南来处，苍梧指桂林。过秋天更暖，边海日长阴。  
巴路缘云出，蛮乡入洞深。信回人自老，梦到月应沈。  
碧水通春色，青山寄远心。炎方难久客，为尔一沾襟。

卷 254\_8【代员将军罢战后归故里】

· 全唐诗 ·

常袞

结发事疆场，全生到海乡。连云防铁岭，同日破渔阳。  
牧马胡天晚，移军碣路长。枕戈眠古戍，吹角立繁霜。  
归老勋仍在，酬恩虏未忘。独行过邑里，多病对农桑。  
雄剑依尘橐，兵符寄药囊。空馀麾下将，犹逐羽林郎。

卷 254\_9【咏冬瑰花（奉和中书李舍人昆季咏寄徐郎中之作）】

常袞

独鹤寄烟霜，双鸾思晚芳。旧阴依谢宅，新艳出萧墙。  
蝶散摇轻露，莺衔入夕阳。雨朝胜濯锦，风夜剧焚香。  
丽日千层艳，孤霞一片光。密来惊叶少，动处觉枝长。  
布影期高赏，留春为远方。尝闻赠琼玖，叨和愧升堂。

卷 254\_10【句】

常袞

风候已应同岭北，云山仍喜似终南。  
（《题漳浦驿》。《方輿胜览》）

卷 254\_11【登圣善寺阁（一题作登少室山）】

· 全唐诗 ·

褚朝阳

飞阁青霞里，先秋独早凉。天花映窗近，月桂拂檐香。  
华岳三峰小，黄河一带长。空间指归路，烟际有垂杨。

卷 254\_12【五丝】

褚朝阳

越人传楚俗，截竹竞萦丝。水底深休也，日中还贺之。  
章施文胜质，列匹美于姬。锦绣侔新段，羔羊寝旧诗。  
但夸端午节，谁荐屈原祠。把酒时伸奠，汨罗空远而。

卷 254\_13【奉上徐中书】

褚朝阳

中禁仙池越凤凰，池边词客紫薇郎。  
既能作颂雄风起，何不时吹兰蕙香。

· 全唐诗 ·

## 第二百五十五卷

### 卷 255\_1【小洞庭洄源亭宴四郡太守诗】

苏源明

小洞庭兮牵方舟，风袅袅兮离平流。牵方舟兮小洞庭，  
云微微兮连绝陉。层澜壮兮缅以没，重岩转兮超以忽。  
冯夷逝兮护轻桡，蛟龙行兮落增潮。泊中湖兮澹而闲，  
并曲溆兮怅而还。适予手兮非予期，将解袂兮丛予思。  
尚君子兮寿厥身，承明主兮忧斯人。

### 卷 255\_2【秋夜小洞庭离宴诗】

苏源明

浮涨湖兮莽迢遥，川后礼兮扈予桡。横增沃兮蓬仙延，  
川后福兮易予舳。月澄凝兮明空波，星磊落兮耿秋河。  
夜既良兮酒且多，乐方作兮奈别何。

### 卷 255\_3【闺情】



· 全唐诗 ·

郑虔

银钥开香阁，金台照夜灯。长征君自惯，独卧妾何曾。

卷 255\_4【古意】

毕耀

璇闺绣户斜光入，千金女儿倚门立。横波美目虽往来，  
罗袂遥遥不相及。闻道今年初避人，珊珊挂镜长随身。  
愿得侍儿为道意，后堂罗帐一相亲。

卷 255\_5【情人玉清歌（一作张南容诗）】

毕耀

洛阳有人名玉清，可怜玉清如其名。善踏斜柯能独立，  
婵娟花艳无人及。珠为裙，玉为纓。临春风，吹玉笙。  
悠悠满天星。黄金阁上晚妆成，云和曲中为曼声。  
玉梯不得蹈，摇袂两盈盈。城头之日复何情。

卷 255\_6【赠独孤常州（见《纪事》）】

毕耀

· 全唐诗 ·

洪炉无久停，日月速若飞。忽然冲人身，饮酒不须疑。

卷 255\_7【奉和圣制次琼岳应制】

韦济

陆海披晴雪，千旗猎早阳。岳临秦路险，河绕汉垣长。  
行漏通鸂鶒，离宫接建章。都门信宿近，歌舞从周王。

卷 255\_8【成都为客作】

田澄

蜀郡将之远，城南万里桥。衣缘乡泪湿，貌以客愁销。  
地富鱼为米，山芳桂是樵。旅游唯得酒，今日过明朝。

卷 255\_9【奉和苑舍人宿直晓玩新池寄南省友】

沈东美

传闻闾阖里，寓直有神仙。史为三坟博，郎因五字迁。  
晨临翔凤沼，春注跃龙泉。去似登天上，来如看镜前。  
影摇宸翰发，波净列星悬。既济仍怀友，流谦欲进贤。  
弹冠声实贵，覆被渥恩偏。温室言虽阻，文场契独全。

· 全唐诗 ·

玉珂光赫奕，朱绂气蝉联。兴逸潘仁赋，名高谢朓篇。  
青云仰不逮，白雪和难牵。苒苒胡为此，甘心老岁年。

卷 255\_10 【变律（本十九首，今存三首）】

苏涣

日月东西行，寒暑冬夏易。阴阳无停机，造化渺莫测。  
开目为晨光，闭目为夜色。一开复一闭，明晦无休息。  
居然六合外，旷哉天地德。天地且不言，世人浪喧喧。

毒蜂成一窠，高挂恶木枝。行人百步外，目断魂亦飞。  
长安大道边，挟弹谁家儿。右手持金丸，引满无所疑。  
一中纷下来，势若风雨随。身如万箭攒，宛转迷所之。  
徒有疾恶心，奈何不知几。

养蚕为素丝，叶尽蚕不老。倾筐对空林，此意向谁道。  
一女不得织，万夫受其寒。一夫不得意，四海行路难。  
祸亦不在大，福亦不在先。世路险孟门，吾徒当勉旃。

卷 255\_11 【赠零陵僧（一作《怀素上人草书歌》）】

苏涣

张颠没在二十年，谓言草圣无人传。零陵沙门继其后，

· 全唐诗 ·

新书大字大如斗。兴来走笔如旋风，醉后耳热心更凶。  
忽如裴旻舞双剑，七星错落缠蛟龙。又如吴生画鬼神，  
魑魅魍魉惊本身。钩锁相连势不绝，倔强毒蛇争屈铁。  
西河舞剑气凌云，孤蓬自振唯有君。今日华堂看洒落，  
四座喧呼叹佳作。回首邀余赋一章，欲令羡价齐钟张。  
琅诵 句三百字，何似醉僧颠复狂。忽然告我游南溟，  
言祈亚相求大名。亚相书翰凌献之，见君绝意必深知。  
南中纸价当日贵，只恐贪泉成墨池。

· 全唐诗 ·

## 第二百五十六卷

### 卷 256\_1【江南曲】

刘昫虚

美人何荡漾，湖上风日长。玉手欲有赠，裴回双明珰。  
歌声随绿水，怨色起青阳。日暮还家望，云波横洞房。

### 卷 256\_2【九日送人】

刘昫虚

海上正摇落，客中还别离。同舟去未已，远送新相知。  
流水意何极，满尊徒尔为。从来菊花节，早已醉东篱。

### 卷 256\_3【暮秋扬子江寄孟浩然】

刘昫虚

木叶纷纷下，东南日烟霜。林山相晚暮，天海空青苍。

· 全唐诗 ·

暝色况复久，秋声亦何长。孤舟兼微月，独夜仍越乡。  
寒笛对京口，故人在襄阳。咏思劳今夕，江汉遥相望。

卷 256\_4【浔阳陶氏别业】

刘昫

陶家习先隐，种柳长江边。朝夕浔阳郭，白衣来几年。  
霁云明孤岭，秋水澄寒天。物象自清旷，野情何绵联。  
萧萧丘中赏，明宰非徒然。愿守黍稷税，归耕东山田。

卷 256\_5【登庐山峰顶寺】

刘昫

孤峰临万象，秋气何高清。天际南郡出，林端西江明。  
山门二缁叟，振锡闻幽声。心照有无界，业悬前后生。  
虽知真机静，尚与爱网并。方首金门路，未遑参道情。

卷 256\_6【寻东溪还湖中作】

刘昫

出山更回首，日暮清溪深。东岭新别处，数猿叫空林。

· 全唐诗 ·

昔游有初迹，此路还独寻。幽兴方在往，归怀复为今。  
云峰劳前意，湖水成远心。望望已超越，坐鸣舟中琴。

卷 256\_7【送韩平兼寄郭微】

刘昫

上客夜相过，小童能酤酒。即为临水处，正值归雁后。  
前路望乡山，近家见门柳。到时春未暮，风景自应有。  
余忆东州人，经年别来久。殷勤为传语，日夕念携手。  
兼问前寄书，书中复达否。

卷 256\_8【寄阎防（防时在终南丰德寺读书）】

刘昫

青冥南山口，君与缙锡邻。深路入古寺，乱花随暮春。  
纷纷对寂寞，往往落衣巾。松色空照水，经声时有人。  
晚心复南望，山远情独亲。应以修往业，亦惟立此身。  
深林度空夜，烟月资清真。莫叹文明日，弥年徒隐沦。

卷 256\_9【海上诗送薛文学归海东】

刘昫

· 全唐诗 ·

何处归且远，送君东悠悠。沧溟千万里，日夜一孤舟。  
旷望绝国所，微茫天际愁。有时近仙境，不定若梦游。  
或见青色古，孤山百里秋。前心方杳眇，后路劳夷犹。  
离别惜吾道，风波敬皇休。春浮花气远，思逐海水流。  
日暮骊歌后，永怀空沧洲。

卷 256\_10【越中问海客】

刘昫

风雨沧洲暮，一帆今始归。自云发南海，万里速如飞。  
初谓落何处，永将无所依。冥茫渐西见，山色越中微。  
谁念去时远，人经此路稀。泊舟悲且泣，使我亦沾衣。  
浮海焉用说，忆乡难久违。纵为鲁连子，山路有柴扉。

卷 256\_11【阙题】

刘昫

道由白云尽，春与青溪长。时有落花至，远随流水香。  
闲门向山路，深柳读书堂。幽映每白日，清辉照衣裳。

卷 256\_12【寄江滔求孟六遗文】



· 全唐诗 ·

刘沅虚

南望襄阳路，思君情转亲。偏知汉水广，应与孟家邻。  
在日贫为善，昨来闻更贫。相如有遗草，一为问家人。

卷 256\_13【积雪为小山】

刘沅虚

飞雪伴春还，春庭晓自闲。虚心应任道，遇赏遂成山。  
峰小形全秀，岩虚势莫攀。以幽能皎洁，谓近可循环。  
孤影临冰镜，寒光对玉颜。不随迟日尽，留顾岁华间。

卷 256\_14【赠乔琳（一作张谓诗）】

刘沅虚

去年上策不见收，今年寄食仍淹留。羡君有酒能共醉，  
羡君无钱能不忧。如今五侯不待客，羡君不问五侯宅。  
如今七贵方自尊，羡君不过七贵门。丈夫会应有知己，  
世上悠悠何足论。

卷 256\_15【茱萸花歌（一作岑参诗）】

· 全唐诗 ·

刘昫

昨日一花开，今日一花开；今日花正好，昨日花已老。  
人生不得长少年，莫惜床头酤酒钱；请君有钱向酒家，  
君不见茱萸花。

卷 256\_16【句】

刘昫

归梦如春水，悠悠绕故乡。

驻马渡江处，望乡待归舟。

· 全唐诗 ·

## 第二百五十七卷

卷 257\_1【冬夜宴萧十丈因饯殷郭二子西上】

息夫牧

有琴斯鸣，于宰之庭。君子莅止，其心孔平。政既告成，  
德以永贞。鸣琴有衍，于颍之畔。彼之才髦，其年未冠。  
闻诗闻礼，斐兮璨璨。鸣琴其怡，于颍之湄。二子翰飞，  
言戾京师。有郁者桂，爰攀其枝。琴既鸣矣，宵既清矣。  
烘煨有炜，酒醴惟旨。喟我寤叹，吁其别矣。

卷 257\_2【蝉鸣一篇五章】

宋华

蝉其鸣矣，于彼疏桐。庇影容迹，何所不容。嚙嚙其长，  
永托于风。未见君子，我心忡忡。既见君子，乐且有融。

彼蝉鸣矣，于林之表。含风饮露，以乐吾道。有怀载迁，  
伊谁云保。未见君子，我心悄悄。既见君子，披豁予抱。  
蝉鸣蝉鸣，幽畅乎而。肃肃尔庭，远近凉飈。言赴高柳，

· 全唐诗 ·

丛篁间之。思而不见，如渴如饥。亦既覯止，我心则夷。  
蝉鸣伊何，时运未与。匪叹秋徂，怨斯路阻。愿言莫从，  
郁悒谁语。君子至止，慰我延伫。何斯违斯，倏尔遐举。

岁之秋深，蝉其夕吟。披衣轩除，萧萧风林。我友来斯，  
言告离衿。何以叙怀，临水鸣琴。何以赠言，委顺浮沉。

卷 257\_3【寄萧颖士补正字】

邹象先

六月度开云，三峰玩山翠。尔时黄绶屈，别后青云致。

卷 257\_4【河中晚霁】

韦建

湖广舟自轻，江天欲澄霁。是时清楚望，气色犹霾噎。  
踟蹰金霞白，波上日初丽。烟红落镜中，树木生天际。  
杳杳涯欲斑，濛濛云复闭。言垂星汉明，又睹寰瀛势。  
微兴从此惬，悠然不知岁。试歌沧浪清，遂觉乾坤细。  
肯念客衣薄，将期永投袂。迟回渔父间，一雁声嘹唳。

卷 257\_5【泊舟盱眙】

· 全唐诗 ·

韦建

泊舟淮水次，霜降夕流清。夜久潮侵岸，天寒月近城。  
平沙依雁宿，候馆听鸡鸣。乡国云霄外，谁堪羁旅情。

卷 257\_6 【铨试后征山别业寄源侍御】

殷寅

别业在征山，登高望畿甸。严令天地肃，城阙如何见。  
蔼蔼王侯门，华轩日游衍。幸逢休明代，山虏尚交战。  
投策去园林，率名皆拜选。圣君性则哲，济济多英彦。  
裴楷能清通，山涛急推荐。謏才甘自屏，薄伎忝馀眷。  
虽承国土恩，尚乏中人援。畴昔相知者，今兹秉天宪。  
朱绂何赫赫，绣衣复葱蒨。

卷 257\_7 【玄元皇帝应见贺圣祚无疆】

殷寅

应历生周日，修祠表汉年。复兹秦岭上，更似霍山前。  
昔赞神功启，今符圣祚延。已题金简字，仍访玉堂仙。  
睿祖光元始，曾孙体又玄。言因六梦接，庆叶九龄传。  
北阙心超矣，南山寿固然。无由同拜庆，窃抃贺陶甄。

· 全唐诗 ·

卷 257\_8【秋怨】

柳中庸

玉树起凉烟，凝情一叶前。别离伤晓镜，摇落思秋弦。  
汉垒关山月，胡笳塞北天。不知肠断梦，空绕几山川。

卷 257\_9【春思赠人】

柳中庸

红粉当三五，青娥艳一双。绮罗回锦陌，弦管入花江。  
落雁惊金弹，抛杯泻玉缸。谁知褐衣客，憔悴在书窗。

卷 257\_10【幽院早春】

柳中庸

草短花初拆，苔青柳半黄。隔帘春雨细，高枕晓莺长。  
无事含闲梦，多情识异香。欲寻苏小小，何处觅钱塘。

卷 257\_11【寒食戏赠】

· 全唐诗 ·

柳中庸

春暮越江边，春阴寒食天。杏花香麦粥，柳絮伴秋千。  
酒是芳菲节，人当桃李年。不知何处恨，已解入箏弦。

卷 257\_12【听箏】

柳中庸

抽弦促柱听秦箏，无限秦人悲怨声。似逐春风知柳态，  
如随啼鸟识花情。谁家独夜愁灯影，何处空楼思月明。  
更入几重离别恨，江南岐路洛阳城。

卷 257\_13【河阳桥送别】

柳中庸

黄河流出有浮桥，晋国归人此路遥。  
若傍阑干千里望，北风驱马雨萧萧。

卷 257\_14【征怨】

柳中庸

· 全唐诗 ·

岁岁金河复玉关，朝朝马策与刀环。  
三春白雪归青冢，万里黄河绕黑山。

卷 257\_15【凉州曲二首】

柳中庸

关山万里远征人，一望关山泪满巾。  
青海戍头空有月，黄沙碛里本无春。

高槛连天望武威，穷阴拂地戍金微。  
九城弦管声遥发，一夜关山雪满飞。

卷 257\_16【江行】

柳中庸

繁阴乍隐洲，落叶初飞浦。萧萧楚客帆，暮入寒江雨。

卷 257\_17【丁评事宅秋夜宴集】

柳中庸

翠幕卷回廊，银灯开后堂。风惊拥砌叶，月冷满庭霜。



· 全唐诗 ·

绮席人将醉，繁弦夜未央。共怜今促席，谁道客愁长。

卷 257\_18【夜渡江（一作姚崇诗）】

柳中庸

夜渚带浮烟，苍茫晦远天。舟轻不觉动，缆急始知牵。  
听笛遥寻岸，闻香暗识莲。唯看去帆影，常恐客心悬。

卷 257\_19【扬子途中】

柳中庸

楚塞望苍然，寒林古戍边。秋风人渡水，落日雁飞天。

· 全唐诗 ·

## 第二百五十八卷

卷 258\_1【宴城东庄（一作崔惠童，一作崔思童）】

崔惠童

一月主人笑几回，相逢相识且衔杯。  
眼看春色如流水，今日残花昨日开。

卷 258\_2【宴城东庄】

崔敏童

一年始有一年春，百岁曾无百岁人。  
能向花前几回醉，十千沽酒莫辞贫。

卷 258\_3【奉和圣制早登太行山中言志】

苗晋卿

金吾戒道清，羽骑动天声。砥路方南绝，重岩始北征。

· 全唐诗 ·

关楼前望远，河邑下观平。喜气回舆合，祥风入旆轻。  
祝尧三老至，会禹百神迎。月令农先急，春蒐礼复行。  
仍亲后土祭，更理晋阳兵。不似劳车辙，空留八骏名。

卷 258\_4【赋虞书歌】

贾耽

众书之中虞书巧，体法自然归大道。不同怀素只攻颠，  
岂类张芝惟创草。形势素，筋骨老，父子君臣相揖抱。  
孤青似竹更飕飕，阔白如波长浩渺。能方正，不隳倒，  
功夫未至难寻奥。须知孔子庙堂碑，便是青箱中至宝。

卷 258\_5【云门山投龙诗】

赵居贞

晓登云门山，直上一千尺。绝顶弥孤耸，盘途几倾窄。  
前对竖裂峰，下临削成壁。阳岵灵芝秀，阴崖半天赤。  
大壑静不波，渺溟无际极。是时雪初霁，沍寒水更积。  
披展送龙仪，宁安服狐白。沛恩惟圣主，祈福在方伯。  
三元章醮升，五域 觐。帘幕翠微亘，机茵丹洞辟。  
祝起鸣天鼓，拜传端素册。霞间朱绂紫，岚际黄裳襞。  
玉策奉诚信，仙佩俟奔驿。香气入岫门，瑞云出岩石。  
至诚必招感，大福旋来格。空中忽神言，帝寿万千百。

· 全唐诗 ·

卷 258\_6 【扈从回銮应制】

萧华

粤在秦京日，议乎封禅难。岂知陶唐主，道济苍生安。  
惟彼烈祖事，增修实荣观。声名朝万国，玉帛礼三坛。  
纂圣德重光，建元功载刊。仍开旧驰道，不记昔回銮。  
羽卫摇晴日，弓戈生早寒。犹思检玉处，却望白云端。

卷 258\_7 【西河郡太原守张夫人挽歌】

李岑

鹄印庆仍传，鱼轩宠莫先。从夫元凯贵，训子孟轲贤。  
龙是双归日，鸾非独舞年。哀荣今共尽，凄怆杜陵田。

卷 258\_8 【玄元皇帝应见贺圣祚无疆】

李岑

皇纲归有道，帝系祖玄元。运表南山祚，神通北极尊。  
大同齐日月，兴废应乾坤。圣后趋庭礼，宗臣稽首言。  
千官欣肆觐，万国贺深恩。锡宴云天接，飞声雷地喧。  
祥光浮紫阁，喜气绕皇轩。未预承天命，空勤望帝门。

· 全唐诗 ·

卷 258\_9【复游浯溪】

元友让

昔到才三岁，今来鬓已苍。剥苔看篆字，薙草觅书堂。  
引客登台上，呼童扫树旁。石渠疏拥水，门径劚丛篁。  
田地潜更主，林园尽废荒。悲凉问耆耄，疆界指垂杨。

卷 258\_10【南溪别业】

蒋冽

结宇依青嶂，开轩对绿畴。树交花两色，溪合水同流。  
竹径春来扫，兰尊夜不收。逍遥自得意，鼓腹醉中游。

卷 258\_11【古意】

蒋冽

冉冉红罗帐，开君玉楼上。画作同心鸟，衔花两相向。  
春风正可怜，吹映绿窗前。妾意空相感，君心何处边。

卷 258\_12【台中书怀】

· 全唐诗 ·

蒋冽

持宪当休明，饬躬免颠沛。直绳备豪右，正色清冠盖。  
寄切才恨薄，职雄班匪大。坐居三独中，立在百僚外。  
简牍时休暇，依然秋兴多。披书唯骨鲠，循迹少闲和。  
庭树凌霜柏，池倾萎露荷。岁寒应可见，感此遂成歌。

卷 258\_13【经埋轮地】

蒋冽

汉家张御史，晋国绿珠楼。时代邈已远，共谢洛阳秋。  
洛阳大道边，旧地尚依然。下马独太息，扰扰城市喧。  
时人欣绿珠，诗满金谷园。千载埋轮地，无人兴一言。  
正直死犹忌，况乃未死前。汨罗有翻浪，恐是嫌屈原。  
我闻太古水，上与天相连。如何一落地，又作九曲泉。  
万古惟高步，可以旌我贤。

卷 258\_14【山行见鹊巢】

蒋冽

鹊巢性本高，更在西山木。朝下清泉戏，夜近明月宿。  
非直避网罗，兼能免倾覆。岂忧五陵子，挟弹来相逐。

· 全唐诗 ·

卷 258\_15【巫山之阳，香溪之阴，明妃神女旧迹存焉】

蒋冽

神女归巫峡，明妃入汉宫。搗衣馀石在，荐枕旧台空。  
行雨有时度，溪流何日穷。至今词赋里，凄怆写遗风。

卷 258\_16【夜飞鹊】

蒋冽

北林夜方久，南月影频移。何啻飞三匝，犹言未得枝。

卷 258\_17【途次维扬望京口寄白下诸公】

蒋涣

北望情何限，南行路转深。晚帆低荻叶，寒日下枫林。  
云白兰陵渚，烟青建业岑。江天秋向尽，无处不伤心。

卷 258\_18【登栖霞寺塔】

蒋涣

· 全唐诗 ·

三休寻磴道，九折步云霓。漉涧临江北，郊原极海西。  
沙平瓜步出，树远绿杨低。南指晴天外，青峰是会稽。

卷 258\_19【和徐侍郎书丛筱韵】

蒋涣

中禁夕沈沈，幽篁别作林。色连鸡树近，影落凤池深。  
为重凌霜节，能虚应物心。年年承雨露，长对紫庭阴。

卷 258\_20【故太常卿赠礼部尚书李公及夫人挽歌二首】

蒋涣

白简尝持宪，黄图复尹京。能标百郡则，威肃一朝清。  
典秩崇三礼，临戎振五兵。更闻传世业，才子有高名。

封树遵同穴，生平此共归。镜埋鸾已去，泉掩凤何飞。  
薤挽疑笳曲，松风思翟衣。扬名将宠赠，泉路满光辉。

卷 258\_21【挽涌泉寺僧怀玉】

段怀然



· 全唐诗 ·

我师一念登初地，佛国笙歌两度来。  
唯有门前古槐树，枝低只为挂银台。

卷 258\_22 【辞房相公】

张偁

秋风飒飒雨霏霏，愁杀栖遑一布衣。  
辞君且作随阳鸟，海内无家何处归。

卷 258\_23 【移耶溪旧居呈陈元初校书】

陈孙

鸡犬渔舟里，长谣任兴行。即令邀客醉，已被远山迎。  
书笈将非重，荷衣著甚轻。谢安无个事，忽起为苍生。

卷 258\_24 【西河郡太原守张夫人挽歌（一作李岑诗）】

李峰

鹄印庆仍传，鱼轩宠莫先。从夫元凯贵，训子孟轲贤。  
龙是双归日，鸾非独舞年。哀荣今共尽，凄怆杜陵田。

· 全唐诗 ·

## 第二百五十九卷

卷 259\_1 【感怀弟妹（一作汝坟示弟妹）】

沈千运

今日春气暖，东风杏花拆。筋力久不如，却羡涧中石。  
神仙杳难准，中寿稀满百。近世多夭伤，喜见鬓发白。  
杖藜竹树间，宛宛旧行迹。岂知林园主，却是林园客。  
兄弟可存半，空为亡者惜。冥冥无再期，哀哀望松柏。  
骨肉能几人，年大自疏隔。性情谁免此，与我不相易。  
唯念得尔辈，时看慰朝夕。平生兹已矣，此外尽非适。

卷 259\_2 【赠史修文】

沈千运

故人阻千里，会面非别期。握手于此地，当欢反成悲。  
念离宛犹昨，俄已经数期。畴昔皆少年，别来鬓如丝。  
不道旧姓名，相逢知是谁。曩游尽騫翥，与君仍布衣。  
岂曰无其才，命理应有时。别路渐欲少，不觉生涕洟。

· 全唐诗 ·

卷 259\_3【濮中言怀】

沈千运

圣朝优贤良，草泽无遗匿。人生各有命，在余胡不淑。  
一生但区区，五十无寸禄。衰退当弃捐，贫贱招毁讟。  
栖栖去人世，屯蹶日穷迫。不如守田园，岁晏望丰熟。  
壮年失宜尽，老大无筋力。始觉前计非，将贻后生福。  
童儿新学稼，少女未能织。顾此烦知己，终日求衣食。

卷 259\_4【山中作】

沈千运

栖隐非别事，所愿离风尘。不辞城邑游，礼乐拘束人。  
迺来归山林，庶事皆吾身。何者为形骸，谁是智与仁。  
寂寞了闲事，而后知天真。咳唾矜崇华，迂俯相屈伸。  
如何巢与由，天子不知臣。

卷 259\_5【古歌】

沈千运

北邙不种田，但种松与柏。松柏未生处，留待市朝客。

· 全唐诗 ·

卷 259\_6【别李季友】

王季友

栖鸟不恋枝，喈喈在同声。行子驰出户，依依主人情。  
昔时霜台镜，丑妇羞尔形。闭匣二十年，皎洁常独明。  
今日照离别，前途白发生。

卷 259\_7【寄韦子春（一作山中赠十四秘书兄）】

王季友

出山秋云曙，山木已再春。食我山中药，不忆山中人。  
山中谁余密，白发日相亲。雀鼠昼夜无，知我厨廩贫。  
依依北舍松，不厌吾南邻。有情尽弃捐，土石为同身。  
夫子质千寻，天泽枝叶新。余以不材寿，非智免斧斤。

卷 259\_8【杂诗】

王季友

采山仍采隐，在山不在深。持斧事远游，固非匠者心。  
翳翳青桐枝，樵爨日所侵。斧声出岩壑，四听无知音。  
岂为鼎下薪，当复堂上琴。凤鸟久不栖，且与枳棘林。

· 全唐诗 ·

卷 259\_9【滑中赠崔高士瑾】

王季友

夫子保药命，外身得无咎。日月不能老，化肠为筋否。  
十年前见君，甲子过我寿。于何今相逢，华发在我后。  
近而知其远，少见今白首。遥信蓬莱宫，不死世世有。  
玄石采盈担，神方秘其肘。问家惟指云，爱气常言酒。  
摄生固如此，履道当不朽。未能太玄同，愿亦天地久。  
实腹以芝朮，贱形乃刍狗。自勉将勉余，良药在苦口。

卷 259\_10【还山留别长安知己】

王季友

出山不见家，还山见家在。山门是门前，此去长樵采。  
青溪谁招隐，白发自相待。惟馀涧底松，依依色不改。

卷 259\_11【代贺若令誉赠沈千运】

王季友

相逢问姓名亦存，别时无子今有孙。山上双松长不改，  
百家唯有三家村。村南村西车马道，一宿通舟水浩浩。

· 全唐诗 ·

涧中磊磊十里石，河上淤泥种桑麦。平坡冢墓皆我亲，  
满田主人是旧客。举声酸鼻问同年，十人六七归下泉。  
分手如何更此地，回头不语泪潸然。

卷 259\_12【酬李十六岐】

王季友

炼丹文武火未成，卖药贩履俱逃名。出谷迷行洛阳道，  
乘流醉卧滑台城。城下故人久离怨，一欢适我两家愿。  
朝饮杖悬沽酒钱，暮餐囊有松花饭。于何车马日憧憧，  
李膺门馆争登龙。千宾揖对若流水，五经发难如叩钟。  
下笔新诗行满壁，立谈古人坐在席。问我草堂有卧云，  
知我山储无儋石。自耕自刈食为天，如鹿如麋饮野泉。  
亦知世上公卿贵，且养丘中草木年。

卷 259\_13【宿东溪李十五山亭】

王季友

上山下山入山谷，溪中落日留我宿。松石依依当主人，  
主人不在意亦足。名花出地两重阶，绝顶平天一小斋。  
本意由来是山水，何用相逢语旧怀。

· 全唐诗 ·

卷 259\_14 【观于舍人壁画山水】

王季友

野人宿在人家少，朝见此山谓山晓。半壁仍栖岭上云，  
开帘欲放湖中鸟。独坐长松是阿谁，再三招手起来迟。  
于公大笑向予说，小弟丹青能尔为。

卷 259\_15 【玉壶冰】

王季友

玉壶知素结，止水复中澄。坚白能虚受，清寒得自凝。  
分形同晓镜，照物掩宵灯。壁映圆光入，人惊爽气凌。  
金罍何足贵，瑶席几回升。正值求珪瓚，提携共饮冰。

卷 259\_16 【古塞曲】

王季友

进军飞狐北，穷寇势将变。日落沙尘昏，背河更一战。  
騂马黄金勒，雕弓白羽箭。射杀左贤王，归奏未央殿。  
欲言塞下事，天子不召见。东出咸阳门，哀哀泪如霰。

· 全唐诗 ·

卷 259\_17【野外行】

于逖

老病无乐事，岁秋悲更长。穷郊日萧索，生意已苍黄。  
小弟发亦白，两男俱不强。有才且未达，况我非贤良。  
幸以朽钝姿，野外老风霜。寒鸦噪晚景，乔木思故乡。  
魏人宅蓬池，结网伫鳣鲂。水清鱼不来，岁暮空彷徨。

卷 259\_18【忆舍弟】

于逖

衰门少兄弟，兄弟唯两人。饥寒各流浪，感念伤我神。  
夏期秋未来，安知无他因。不怨别天长，但愿见尔身。  
茫茫天地间，万类各有亲。安知汝与我，乖隔同胡秦。  
何时对形影，愤懑当共陈。

卷 259\_19【杂诗】

张彪

富贵多胜事，贫贱无良图。上德兼济心，中才不如愚。  
商者多巧智，农者争膏腴。儒生未遇时，衣食不自如。



· 全唐诗 ·

久与故交别，他荣我穷居。到门懒入门，何况千里馀。  
君子有褊性，矧乃寻常徒。行行任天地，无为强亲疏。

卷 259\_20 【神仙】

张彪

神仙可学无，百岁名大约。天地何苍茫，人间半哀乐。  
浮生亮多惑，善事翻为恶。争先等驰驱，中路苦瘦弱。  
长老思养寿，后生笑寂寞。五谷非长年，四气乃灵药。  
列子何必待，吾心满寥廓。

卷 259\_21 【北游还酬孟云卿】

张彪

忽忽忘前事，志愿能相乖。衣马久羸弊，谁信文与才。  
善道居贫贱，洁服蒙尘埃。行行无定心，壤坎难归来。  
慈母忧疾疹，至家念栖哀。与君宿姻亲，深见中外怀。  
俟余惜时节，怅望临高台。

卷 259\_22 【古别离】

张彪？

· 全唐诗 ·

别离无远近，事欢情亦悲。不闻车轮声，后会将何时。  
去日忘寄书，来日乖前期。纵知明当返，一息千万思。

卷 259\_23【回军跛者】

赵徵明

既老又不全，始得离边城。一枝假枯木，步步向南行。  
去时日一百，来时月一程。常恐道路旁，掩弃狐兔茔。  
所愿死乡里，到日不愿生。闻此哀怨词，念念不忍听。  
惜无异人术，倏忽具尔形。

卷 259\_24【挽歌词】

赵徵明

寒日蒿上明，凄凄郭东路。素车谁家子，丹旌引将去。  
原下荆棘丛，丛边有新墓。人间痛伤别，此是长别处。  
旷野多萧条，青松白杨树。

卷 259\_25【思归（一作古离别）】

赵徵明

· 全唐诗 ·

为别未几日，去日如三秋。犹疑望可见，日日上高楼。  
惟见分手处，白蘋满芳洲。寸心宁死别，不忍生离忧。

卷 259\_26【泉上雨后作】

元季川

风雨荡繁暑，雷息佳霁初。众峰带云雨，清气入我庐。  
飒飒凉飙来，临窥愜所图。绿萝长新蔓，裊裊垂坐隅。  
流水复檐下，丹砂发清渠。养葛为我衣，种芋为我蔬。  
谁是畹与畦，瀾漫连野芜。

卷 259\_27【登云中】

元季川

灌田东山下，取乐在尔休。清兴相引行，日日三四周。  
白鸥与我心，不厌此中游。穷览颇有适，不极趣无幽。  
惝然歌采薇，曲尽心悠悠。

卷 259\_28【山中晓兴】

元季川

· 全唐诗 ·

河汉降玄霜，昨来节物殊。愧无神仙姿，岂有阴阳俱。  
灵鸟望不见，慨然悲高梧。华叶随风扬，珍条杂榛芜。  
为君寒谷吟，叹息知何如。

卷 259\_29【古远行】

元季川

悠悠远行者，羈独当时思。道与日月长，人无茅舍期。  
出门万里心，谁不伤别离。纵远当白发，岁月悲今时。  
何况异形容，安须与尔悲。

· 全唐诗 ·

## 第二百六十卷

卷 260\_1【晚秋拾遗朱放访山居】

秦系

不逐时人后，终年独闭关。家中贫自乐，石上卧常闲。  
坠栗添新味，寒花带老颜。侍臣当献纳，那得到空山。

卷 260\_2【题女道士居（不饵芝朮四十余年，一作马戴诗）】

秦系

不饵住云溪，休丹罢药畦。杏花虚结子，石髓任成泥。  
扫地青牛卧，栽松白鹤栖。共知仙女丽，莫是阮郎妻。

卷 260\_3【山中枉张宙员外书期访衡门】

秦系

常恨相知晚，朝来枉数行。卧云惊圣代，拂石候仙郎。

· 全唐诗 ·

时果连枝熟，春醪满瓮香。贫家仍有趣，山色满湖光。

卷 260\_4【山中赠张正则评事（系时授右卫佐，以疾不就）】

秦系

终年常避喧，师事五千言。流水闲过院，春风与闭门。  
山茶邀上客，桂实落前轩。莫强教余起，微官不足论。

卷 260\_5【题镜湖野老所居（一作马戴诗）】

秦系

湖里寻君去，樵风往返吹。树喧巢鸟出，路细药田移。  
沤苕成鱼网，枯根是酒卮。老年唯自适，生事任群儿。

卷 260\_6【早秋宿崔业居处】

秦系

从来席不暖，为尔便淹留。鸡黍今相会，云山昔共游。  
上帘宜晚景，卧簟觉新秋。身事何须问，余心正四愁。

· 全唐诗 ·

卷 260\_7【赠乌程杨苹明府】

秦系

策杖政成时，清溪弄钓丝。当年潘子貌，避病沈侯诗。  
漉酒迎宾急，看花署字迟。杨梅今熟未，与我两三枝。

卷 260\_8【徐侍郎素未相识时携酒命馔兼命诸诗客同访会稽山居】

秦系

忽道仙翁至，幽人学拜迎。华簪窥瓮牖，珍味代藜羹。  
洗砚鱼仍戏，移樽鸟不惊。兰亭攀叙却，会此越中营。

卷 260\_9【春日闲居三首】

秦系

一似桃源隐，将令过客迷。碍冠门柳长，惊梦院莺啼。  
浇药泉流细，围棋日影低。举家无外事，共爱草萋萋。

长谣朝复暝，幽独几人知。老鹤兼雏弄，丛篁带笋移。  
白云将袖拂，青镜出檐窥。邀取渔家叟，花间把酒卮。

· 全唐诗 ·

寂寂池亭里，轩窗间绿苔。游鱼牵荇没，戏鸟踏花摧。  
小径僧寻去，高峰鹿下来。中年曾屡辟，多病复迟回。

卷 260\_10 【题石室山王宁所居（罢官学道）】

秦系

白云知所好，柏叶幸加餐。石镜妻将照，仙书我借看。  
鸟来翻药碗，猿饮怕鱼竿。借问檐前树，何枝曾挂冠。

卷 260\_11 【送王道士】

秦系

真人俄整舄，双鹤屡飞翔。恐入壶中住，须传肘后方。  
霓裳云气润，石径术苗香。一去何时见，仙家日月长。

卷 260\_12 【将移耶溪旧居留赠严维秘书（一作留呈严长史陈秘书）】

秦系

鸡犬渔舟里，长谣任兴行。那邀落日醉，已被远山迎。  
书箧将非重，荷衣著甚轻。谢安无个事，忽起为苍生。



· 全唐诗 ·

卷 260\_13【秋日过僧惟则故院】

秦系

衰草经行处，微灯旧道场。门人失谭柄，野鸟上禅床。  
科斗书空古，梅檀钵自香。今朝数行泪，却洒约公房。

卷 260\_14【山中奉寄钱起员外兼简苗发员外】

秦系

空山岁计是胡麻，穷海无梁泛一槎。稚子唯能觅梨栗，  
逸妻相共老烟霞。高吟丽句惊巢鹤，闲闭春风看落花。  
借问省中何水部，今人几个属诗家。

卷 260\_15【献薛仆射】

秦系

由来那敢议轻肥，散发行歌自采薇。逋客未能忘野兴，  
辟书翻遣脱荷衣。家中匹妇空相笑，池上群鸥尽欲飞。  
更乞大贤容小隐，益看愚谷有光辉。

· 全唐诗 ·

卷 260\_16 【鲍防员外见寻因书情呈赠（曾与系同举场）】

秦系

少小为儒不自强，如今懒复见侯王。览镜已知身渐老，  
买山将作计偏长。荒凉鸟兽同三径，撩乱琴书共一床。  
犹有郎官来问疾，时人莫道我佯狂。

卷 260\_17 【寄浙东皇甫中丞】

秦系

闲闲麋鹿或相随，一两年来鬓欲衰。琴砚共依春酒瓮，  
云霞覆著破柴篱。注书不向时流说，种药空令道者知。  
久带纱巾仍藉草，山中那得见朝仪。

卷 260\_18 【题章野人山居（一作马戴诗）】

秦系

带郭茅亭诗兴饶，回看一曲倚危桥。门前山色能深浅，  
壁上湖光自动摇。闲花散落填书帙，戏鸟低飞碍柳条。  
向此隐来经几载，如今已是汉家朝。

· 全唐诗 ·

卷 260\_19【山中枉皇甫温大夫见招书】

秦系

十年木屐步苔痕，石上松间水自喧。三辟草堂仍被褐，  
数行书札忽临门。卧多共息嵇康病，才劣虚同郭隗尊。  
亚相已能怜潦倒，山花笑处莫啼猿。

卷 260\_20【题茅山李尊师山居（一作严维诗）】

秦系

天师百岁少如童，不到山中竟不逢。洗药每临新瀑水，  
步虚时上最高峰。篱间五月留残雪，座右千年荫老松。  
此去人寰今远近，回看去壑一重重。

卷 260\_21【耶溪书怀寄刘长卿员外（时在睦州）】

秦系

时人多笑乐幽栖，晚起闲行独杖藜。云色卷舒前后岭，  
药苗新旧两三畦。偶逢野果将呼子，屡折荆钗亦为妻。  
拟共钓竿长往复，严陵滩上胜耶溪。

· 全唐诗 ·

卷 260\_22 【山中崔大夫有书相问（一作崔大夫有书问余山中）】

秦系

客在烟霞里，闲闲逐狎鸥。终年常裸足，连日半蓬头。  
带月乘渔艇，迎寒绽鹿裘。已于人事少，多被挂冠留。  
素业堆千卷，清风至一丘。苍黄倒藜杖，伛偻睹银钩。  
迹愧巢由隐，才非管乐俦。从来自多病，不是傲王侯。

卷 260\_23 【张建封大夫奏系为校书郎因寄此作】

秦系

久是烟霞客，潭深钓得鱼。不知芸阁上，遗校几多书。

卷 260\_24 【会稽山居寄薛播侍郎袁高给事高参舍人】

秦系

稷契今为相，明君复为尧。宁知买臣困，犹负会稽樵。

卷 260\_25 【闲居览史】

· 全唐诗 ·

秦系

长策胸中不复论，荷衣蓝缕闭柴门。  
当时汉祖无三杰，争得咸阳与子孙。

卷 260\_26 【山中赠耿拾遗漳兼两省故人】

秦系

数片荷衣不蔽身，青山白鸟岂知贫。  
如今非是秦时世，更隐桃花亦笑人。

卷 260\_27 【秋日送僧志幽归山寺（一作马戴诗）】

秦系

禅室绳床在翠微，松间荷笠一僧归。  
磬声寂历宜秋夜，手冷灯前自衲衣。

卷 260\_28 【题僧明惠房】

秦系

檐前朝暮雨添花，八十真僧饭一麻。

· 全唐诗 ·

入定几时将出定，不知巢燕污袈裟。

卷 260\_29 【答泉州薛播使君重阳日赠酒】

秦系

欲强登高无力也，篱边黄菊为谁开。  
共知不是浔阳郡，那得王弘送酒来。

卷 260\_30 【题洪道士山院】

秦系

霞外主人门不扃，数株桃树药囊青。  
闲行池畔随孤鹤，若问多应道姓丁。

卷 260\_31 【期王炼师不至】

秦系

黄精蒸罢洗琼杯，林下从留石上苔。  
昨日围棋未终局，多乘白鹤下山来。

· 全唐诗 ·

卷 260\_32 【题赠张道士山居】

秦系

盘石垂萝即是家，回头犹看五枝花。  
松间寂寂无烟火，应服朝来一片霞。

卷 260\_33 【山中书怀寄张建封大夫】

秦系

昨日年催白发新，身如麋鹿不知贫。  
时时亦被群儿笑，赖有南山四老人。

卷 260\_34 【山中赠诸暨丹丘明府】

秦系

荷衣半破带莓苔，笑向陶潜酒瓮开。  
纵醉还须上山去，白云那肯下山来。

卷 260\_35 【奉寄昼公】

· 全唐诗 ·

秦系

蓑笠双童傍酒船，湖山相引到房前。  
团蕉何事教人见，暂借空床守坐禅。

卷 260\_36【宿云门上方】

秦系

禅室遥看峰顶头，白云东去水长流。  
松间倘许幽人住，不更将钱买沃州。

卷 260\_37【即事奉呈郎中韦使君（明系试秘书省校书郎）】

秦系

久卧云间已息机，青袍忽著狎鸥飞。  
诗兴到来无一事，郡中今有谢玄晖。

卷 260\_38【晓鸡】

秦系

黯黯严城罢鼓鼙，数声相续出寒栖。  
不嫌惊破纱窗梦，却恐为妖半夜啼。